

10394



Galat LII 140₍₂₈₎



596563

COLLEZIONE
COMPLETA
DELLE COMMEDIE

DI
CARLO GOLDONI

TOMO XXVIII.



PRATO
PER I F. GIACHETTI
MDCCCXXI.



CHI
LA FA L' ASPETTA

P E R S O N A G G I

Sior GASPARO , *senser* .

Siora TONINA , *moglie de Sior GASPARO* .

RIOSÀ , *serva* .

Sior RAIMONDO , *bolognese , mercante de canevi* .

Siora CATTINA , *figlia de Sior RAIMONDO* .

Sior BORTOLO , *negoziante* .

Siora CECILIA , *sorela de Sior BORTOLO* .

LUCIETTA , *serva* .

Sior LISSANDRO , *mercante de zoggie false* .

Sior ZANETTO , *zovene venezian* .

Missier MENEGO , *oste* .

Un CAFFETTIER .

GARZONI *d' osteria* .

SERVITORI .

La scena si rappresenta in casa de sior Gasparo .

CHI LA FA L'ASPETTA

A T T O P R I M O

SCENA PRIMA.

Camera in casa di Bortolo. Un tavolino
piccolo da lavorare in mezzo alla scena.

Varie sedie sparse qua e là.

CECILIA, e LISSANDRO.

*Cec. (Guardando degli orecchini, ed altre cose da
donna di pietre false.)*

*Lis. (tira fuori di quando in quando degli astucchi
e delle scatole con dentro simili mercanzie.)* Le
varda quele buccole se le pol esser meggio ligae.

Cec. La me par troppo grande.

Lis. Se usa. La varda queste.

Cec. De dia! Ghe vol un facchin a portarle. No le
porteria guanca se i me le donasse.

Lis. E pur adesso i le vol cusì; ghe n'averò dà via
trenta para in manco d'una settimana.

Cec. Cargadure, rafari, mode che no dura do mesi.
Se'vu altri che inventa ste mode strampalade per

CHI LA FA L'ASPETTA

far spender i bezzi a chi gh'ha el mattezzo de tegnirve drio.

Lis. Siela benedetta. Tutto quel che la vol.

Cec. Lassè veder se gh'avè qualcosa de meggio.

Lis. Ghe ne vorla un par che anderà ben all'aria del so viso?

Cec. No le togo miga per mi.

Lis. Qualche commission?

Cec. Sì, mio fradelo m'ha pregà de sto servizio.

Lis. Se sior Bortolo vol far un regalo, el se vorrà far onor, el vorrà qual cosa de bon.

Cec. No so, vedè, nol m'ha dito gnente. No so che ziri ch'el gh'abbia.

Lis. La lassa far a mi. So quel che ghe vol. La varda, e la stupissa. *(le fa vedere delle altre buccole.)*

Cec. Sì ben. Cossa varle?

Lis. Mo la le esamina avanti.

Cec. Ho visto. So cossa le xe: quanto varle?

Lis. Ghe spuzza el fià.

Cec. Oh za per carigolo, se' carigolo certo! Ma pur, via disè quanto.

Lis. Vorla che fazza una parola sola?

Cec. Una parola sola.

Lis. O sie zecchini, o la xe parona de bando.

Cec. Oh che caro sior Lissandro! Sie zecchini!

Lis. Via, se ghe par poco, la me ne darà sette. *(intendendo via le altre.)*

Cec. L'avè sbarada, compare.

Lis. Sala che roba che xe quella?

Cec. La vedo, e la cognosso, e so cossa che la xe. Animo animo, quanto voleu?

Lis. Mi ho dito.

Cec. Vn avè dito. Bisogna mo che diga anca mi.

Lis. La varda ben...

ATTO PRIMO.

Cec. Tasè là. Sì ben, tre zecchini, e guanca un bezzo de più.

Lis. Siora sì, farave un bel vadagno. Le me costa a mi quattro zecchini da quel bon servitor che ghe son.

Cec. Via chiaccole pacchiarate. Se volè tre zecchini, ben; se no tegniuele, e mi no compro altro.

Lis. Via no la vaga in colera. La me daga de più tuto quel che la vol.

Cec. Guanca un bagattin. (*apre la cassetta e tira fuori tre zecchini.*) Tolè questi xe tre zecchini. Se volè ben, se no volè bon viazzo. (*li mette sul tavolino.*)

Lis. No so cossa dir. Ghe perdo, ma con ela bisogna perderghe volentiera. (*prende i tre zecchini.*)

Cec. Mi ho paura, che cole vostre chiaccole m'abbie fatto zo.

Lis. Se no la xe contenta, ghe dago i so bezzi in drio. (*e in questo mentre li mette in tasca.*)

Cec. Basta, l'è fata.

Lis. Siora, sto marcà, se mai ghe avauzasse una chiave de palco, la se recorda de mi.

Cec. Oh caro vecchio! in sti ultimi zorni!

Lis. Basta, digo, se a caso...

Cec. Sì, sì, volentiera. Se mai poderò.

Lis. Sin adesso ho comprà dele chiave, ma adesso le xe cussì care...

Cec. Sì sì, caro, ve piase a divertirve per quel che vedo.

Lis. Oh mi sì la veda! Laoro, e me diverto. Vadagno e spendo. No gh'ho muggier, no gh'ho fioli. Tanti pia, tanti mazza. No fazzo debiti, ma co ghe n'ho me li godo.

Cec. Bravo, pulito! E no ve volè maridar?

Lis. Mi maridarne! bisognarave ben che ghe n'avesse voggia. Oh no digo guente, perchè no vorria che la disesse che son una mala lingua!

Cec. Oh no, no, no v'indubità che anca mi son dela vostra opinion! M'ho maridà una volta, son restada vedoà, e no me torneria a maridar gnunca, se me vegnisse un re de corona.

Lis. Oh benedetta la libertà!

Cec. Oh anca mi, vedè, anca mi digo cussì, che la libertà xe una bela cossa!

SCENA II.

LUCIETTA, e detti.

Luc. Siora patrona.

Cec. Cossa gh'è?

Luc. Una mascara.

Cec. Una mascara! Omo, o dona?

Luc. Omo mé par. Sala chi credo ch'el sia?

Cec. Chi?

Luc. Sior Zanetto.

Cec. Oh magari! Vardè, e se el xe elo, fe ch'el vegna avanti.

Luc. E se nol xe elo?

Cec. Sappieme dir chi xe.

Luc. Siora sì (parte.)

Cec. El cognosseu sior Zanetto Bigolini? (a Lissandro.)

Lis. Mi no.

Cec. Fermeve qua, se no gh'avè da far, che se el xe elo, conosserè un capo d'opera.

Lis. In che genere?

Cec. In genere de cargadura, di scempiagine, de tutto quel che volè.

Lis. Cospetto! me la goderò volentiera. A ste cosse mi ghe vago de vita.

ATTO PRIMO.

9\

Cec. Oh siestu malignazo! el xe elo, el xe elo.
(*guardando verso la scena.*)

SCENA III.

ZANETTO, e detti.

Zan. (*Mascherato in bauta con caricatura, entra seriamente, credendo non esser conosciuto.*)

Cec. Sior Zanetto patron.

Zan. (*fa cenno con la testa che non è lui.*)

Lis. (Oh co belo!)

Cec. Eh via, maschera, che ve cognosso!

Zan. (*fa dei lazzi volendo sostenere che non è lui.*)

Cec. Nol xe elo, via nol xe elo. (*toccando col gomito Lissandro.*) Mo chi mai xe sta maschera? Vardè co pulito! Vardè con che bona grazia! Qualche forestier certo, qualche Milord, che me fa sto onor.

Zan. (*si consola e procura di far da signore.*)

Lis. Co l'è cussì, vago via. Zelenza. (*saluta Zanetto.*)

Cec. No, no, restè, lasseghhe veder, che pol esser ch'el compra qualcosa. (*a Lissandro.*)

Lis. Zelenza, se la gh'avesse bisogno de fornimenti da scarpe, da zenturini, bottoni da camisa, fiube da capelo, fiube da colo, anelli, stucchi, relogi.

Zan. (*fa cenno di no.*)

Cec. De ste cose el ghe n'averà, caro vecchio, lasseghhe veder qualcosa da dona. (*Za son segura che nol ghe n'ha un.*) (*piano a Lissandro.*)

Zan. (*si trova imbrogliato, e non sa come dir di no.*)

Lis. La varda ste buccole, sti aneli, sto fior da testa. L'avantaggio che la gh'averà da mi, no la lo gh'averà da nissun.

Cec. Via, animo, sior Milord, la com pra.

Zan. (*Si mette a ridere forte.*)

Cec. Cossa gh' hala, che la ride?

Zan. (*Seguita a ridere.*)

Cec. (Cossa diseu? con che bona grazia ch' el ride.)

(*a Lissandro.*)

Lis. Se la vol, sceglierà sta signora qualeossa per ela.

(*a Zanetto.*)

Zan. Noi non vogliamo comprar diamanti di Murano.

(*a Lissandro caricando la voce.*)

Lis. La me perdoni, questa no xe roba da strapazzar.

Cec. Vorla che ghe diga, che la me par un bel matto?

Zan. Ah ah no la m' ha cognossù, no la m' ha cognossù. (*levandosi il volto.*)

Cec. Oh no l'aveva miga cognossù, vedè! (*ironica.*)

Zan. Patrona, siora Cecilia; mettè via quèla roba.

(*a Lissandro.*)

Lis. (La ghe fa mal ai occhi.) (*mette via.*)

Cec. Cossa falo, sior Zanetto? stalo ben?

Zan. Siora no, stago mal. (*si mette a sedere con sgarbo.*)

Cec. Cossa gh' ala?

Zan. Sono innamorà. (*stendendosi sulla sedia.*)

Cec. Poverazzo! quanto xe?

Zan. Da giersera in qua. (*balza in picdi.*)

Cec. E ve se innamorà cussì presto?

Zan. Son cotto, sbasio, desperà, fora de mi, fora de liogo, fora de sesto, no posso più. (*così dicendo passeggia a gran passi, e poi si getta sulla sedia.*)

Lis. (No daria sta zornada per tutte le opere, e per tutte le commedie del mondo.)

Cec. Se pol saver chi xe quella che ve fa spasemar?

Zan. Una cagna, una sassina che me vol far morir.

Cec. Cossa v' alo fato?

Zan. La m' ha ferio el cuor.

Cec. Cussì presto?

Zan. In t' un batter d' occhio .

Cec. Se la v' ha ferio , la ve pol guarir .

Zan. Siora no . Questo xe 'el mio mal , no la gh' ha carità , no la gh' ha compassion . *(salta in piedi .)*

Lis. La perdona , come mai in t' una sera ...

Zan. Vu no gh' intrè , sior , andè via de qua a vender la vostra roba .

Lis. Ghe domando perdon . M' interesse , perchè se la podesse ajutar ...

Zan. Oh amico , se vedessi che tocco ! *(a Lissandro prendendolo per la mano .)*

Lis. *(Oh belo !)*

Cec. Ma se pol saver chi la sia ?

Zan. Ghe lo dirò , ma no i diga guente a nissun .

Cec. No parlo .

Lis. No gh' è pericolo .

Zan. Conosseli sior Raimondo Berlingozzi ?

Lis. Un marcante bolognese ! Se el cognosso ? La diga , anca sì ché la xe la siora Cattina so fia ?

Zan. « Ecco la fonte del mio mal crudele ,
« Ecco la piaga ... che ha piagato il core .

Cec. Oh bravo ! *(ridendo .)*

Zan. La ride ? *(a Cecilia con muso duro .)*

Lis. No , siora Cecilia , no la rida , perchè le xe cose che no xe da rider . *(con serietà .)*

Zan. Ah cossa discu , vu che se' omo , ah ! *(a Lissandr .)*

Lis. Digo cussì che la me fa compassion , e mi che pratico in quella casa , son capace de servirla da amico , e da galantomo .

Zan. Oh magari ! Oh siestu benedeto ! *(lo bacia .)*

Cec. Ma come xela stada ? Se pol saver ?

Zan. L' ho vista giersera a un festin . *Vederla , e amarla fu in un punto solo .* L' ho vardada , la m' la

vardà. L'ho saludada, la m'ha saludà, l'ho invidada a balar... la m'ha refudà. (*si getta dolente sulla sedia.*)

Cec. (Oh mato maledeto.) (*da se.*)

Lis. La l'ha refudà? (*a Zanetto seriamente.*)

Cec. Possibile sta cossa? (*a Zanetto ironicamente.*)

Zan. Da putto, l'ha m'ha refudà, e se nol credè, domandeghelo a sior Bortolo, ch'el ghe giera presente anca lu. (*a Cecilia.*)

Cec. Ghe giera anca mio fradelo? (*a Zanetto.*)

Zan. Siora sì, el ghe giera anca elo, e come ch'el xe mio amigo, el l'ha dito a tutti... No só se de mio de ela, i s'ha messo a rider; e a sganassar.

Cec. O senz'altro, i averà ridesto de ela.

Zan. L'è quel che digo anca mi.

Lis. (La lassa far a mi.) (*piano a Cecilia.*) Sior Zanello, questa xe la prima volta che gh'ho l'onor de conosserla; ma vedo che el xe un galautomo, vedo ch'el gh'ha dela passion, el me fa peccà.

Zan. Ainigo; no vardè che sia fio de famegia, perchè in t'un bisogno vederè chi son.

Lis. No gl'è 'bisogno de gnente. Vorla che mi ghe procura l'occasion de trovarse in compagnia de siora Cattina?

Zan. Oh magari! (*balza dalla sedia.*)

Cec. Via da bravo, sior Lissandro.

Lis. Vorla che la fazzo disnar con ela?

Zan. Oh magari!

Lis. M'impegno che ancuo la fazzo disnar co siora Cattina.

Zan. Oh caro, che siestu benedeto! (*lo abbraccia.*)

Tolè, ma de cuor. (*lo bacia.*)

Cec. E vu ve podè tor sto impegno? (*a Lissandro.*)

Lis. Siora sì, e ela ne farà grazia d'esser dela compagnia.

Zan. Sì cara ela.

Cec. Siora Cattina la cognosso solamente de nome, nè l'ho mai vista. In casa soa non son mai stada, e nò me togo sta confidenza.

Lis. No voi miga che andemo a disnar da sior Raimondo.

Cec. E dove donca?

Zan. Dove, dove? Diseme dove?

Lis. Da un mio amigo, da un certo sior Gasparo senser.

Cec. Oh sior Gasparo lo cognosso, el mario de siora Tonina! So chi el xe.

Lis. Ben donca, giusto elo...

Zan. Giusto elo. (*a Cecilia.*)

Lis. El xe amigo amigon de sior Raimondo. M'impeguo mi de far andar ancuo sior Raimondo, e so fia a disnar da sior Gasparo, e che ghe andemo anca nu, e che sior Zanetto staga arcute de siora Cattina. (*allegro.*)

Cec. Ma come fareu a combinar tutte ste cosse insieme? (*a Lissandro.*)

Lis. La lassa far a mi. (*a Cecilia.*)

Zan. Lassemolo far elo. (*a Cecilia.*)

Lis. E la vegnirà anca ela. (*a Cecilia.*)

Cec. Ma mi sta zente no la cognosso.

Lis. N'importa, la meno in casa d'un galantomo; la se devertirà.

Cec. Devertimose pur.

Lis. Ma per no dar sospeto a sior Raimondo, gh'averavela difficoltà de far una cossa? (*a Cecilia.*)

Cec. Diseme cossa.

Lis. De passar ela, e sior Zanetto per mario e muggier.

Cec. Mi passar per so muggier?

Zan. Sì, sì, cara ela, la prego.

Cec. E se sior Tonina, e sior Gasparo che me cognosse, i ne scoverzirà . . . (*a Lissandro.*)

Zan. Saveu che la gh'ha rason. (*a Lissandro.*)

Cec. Piuttosto poderia passar per so sorela. (*a Lissandro.*)

Zan. Oh sì, sì mia sorela!

Lis. Ma se sior Raimondo vede che ghe xe dei putti da maridar el se pol metter in testa de voler andar via.

Zan. Cospetto de Diana!

Cec. Femo cusì, vestimo Lucietta, e femola passar per so muggier.

Lis. Chi ela Lucietta?

Cec. La mia serva.

Zan. Oh sì sì la serva?

Lis. La xe dita. Vago da sior Raimondo, e po subito da sior Gasparo, e magneremo, e rideremo e se goderemo.

Zan. E se goderemo. Ma mi no ghe so miga andar.

Cec. Anderemo insieme.

Zan. Ma in maschera no ghe voi vegnir.

Cec. No? per cossa?

Zan. La vede ben; co se xe in maschera, se xe spennacchiai no se pol miga parer bon.

Cec. Oh sì gh'avè rason. Andeve a far i rizzi, po vegnì qua.

Zan. Vago subito. Oh caro Lissandro!

Lis. Oh! songio un omo mi?

Zan. Vardè po, no me manchè.

Lis. Me maraveggio. Co dago una parola no manco mai.

Zan. Siora Cecilia, la reverisso. Siora sorela, bondì siora sorela. Cara sorela! (*si maschera.*) Adesso nissun me cognosse più. Sior milord, sior milord.

Got morghen main libreher. Ah, ah, ah. (*ridendo.*)
Patrona riverita. (*parte.*)

SCENA IV.

CECILIA, e LISSANDRO.

Cec. Ah! cossa diseu?

Lis. El xe una delizia, un zuccaro, un marzapan.

Cec. E volè dasseno che femo ancuo sta commedia?

Lis. Sì, anca da galantuomo che voi che la femo...

Cec. Cossa voleu che diga sior Gasparo, e siora Tonina?

Lis. La lassa l'intrigo a mi, no son capace de tornar
impegno, co no son seguro de tirarla fora pulito.

Semo de carnaval, i xe spassi che se se pol tor.

Cec. Sì ben: co sior Gasparo lo sa, co siora Tonina
xe contenta.

Lis. Ghe sala andar da sior Gasparo?

Cec. Oh sì ghe so andar!

Lis. Dopo Nona la se trova là col sior Milord, e se
no la ride ancuo, no la ride mai più. A bon rive-
rirla.

Cec. A rivederse.

Lis. Oh che chiassi avemo da far? (*parte.*)

SCENA V.

CECILIA, poi BORTOLO.

Cec. Semo de carnaval xe vero; gh'ho dà parola,
ma per dir la verità, no so miga se anderò. Ghe
penserò suso avanti de andar.

Bor. Ho visto sior Lissandro. Aveu comprà le buccole?

Cec. Le ho comprà. Vele qua, vardè xele bele?

Bor. Bele. No me n'intendo, ma le par bele. Quanto l' veu pagae?

Cec. Stimele.

Bor. Vinti ducati?

Cec. Quanti zecchini fali?

Bor. Sie zecchini manco otto lire.

Cec. Povero martuffo!

Bor. Mo se v' ho dito che no me n'intendo.

Cec. A forza de parole el me l' ha lassae per tre zecchini.

Bor. Via, via, son contento. *(le incarta e le mette via.)*

Cec. Se pol saver a chi volè far sto presente?

Bor. Ve dirò pò.

Cec. Me pareria che a vostra sorela...

Bor. Mo se vel dirò. *(vuol partire.)*

Cec. Vegnì qua, ve voi domandar un conseggio.

Bor. Che xe?

Cec. Xe sta qua quel scempio de sior Zanetto...

Bor. Oh caro! Se savessi giersera che scene che s' ha fato sora de elo!

Cec. El me l' ha dito. E cussì che giera qua anca mattarana de sior Lissandro. Zanetto n' ha contà che l' è innamorà, e ale curte Lissandro s' ha impegnà de farlo disnar ancuo in t' un terzo liogo in compagnia de sta so morosa, e i vorave che ghe andasse anca mi. Cossa dixeù?

Bor. Mi ve consegio de no ghe andar.

Cec. N' è vero? Son anca mi dela stessa opinion.

Bor. Chi xela sta morosa de Zanetto? La cognosseu?

Cec. Saveu chi la xe! Siora Cattina, la fia de sior Raimondo...

Bor. Cossa, cosa? siora Cattina?

Cec. Siora Cattina.

Bor. La fia de sior Raimondo?

Cec. La fia de sior Raimondo.

Bor. La xe quella dele buccole.

Cec. Eh via!

Bor. Come diselo che la xe la so morosa?

Cec. El s'ha innamorà gier sera.

Bor. Oh che alocco! El xe sta el ridicolo dela conversazion.

Cec. Gh'avè bon donca vu con quella puta?

Bor. Ve conterò. El sior Lissandro lo vol far disnar co sta puta?

Cec. Sì ben, co so pare, in casa de sior Gasparo senser, e i voleva che ghe andasse anca mi, ma mi no ghe anderò.

Bor. Andemoghe. Ghe vegnirò anca mi.

Cec. Mo no, caro vu, no me convien a mi.

Bor. Co ghe son mi, siora sì.

Cec. Ve cognosselo sior Raimondo?

Bor. El me cognosse, ma nol sa gnente de quel che passa tra mi e la puta.

Cec. Che intenzion gh'aven?

Bor. Ve dirò. La xe fia sola, e so pare xe un omo ricco...

Cec. Perchè no ghe la feu domandar?

Bor. Perchè voggio prima saver se la me vol ben.

Cec. No savè se la ve vol ben, e ghe volè dar le buccole?

Bor. Gier sera la ghe n'ha rotto una al festin. Voi provar de darghele, e se la le tol, sarà segnò che la me vol ben.

Cec. Come voleu che la toga le buccole? Cossa dirave so pare?

Bor. Oh certo che no la saverà dir che qualche santola ghe le ha regalae!

Cec. Voleu che ve la diga? In sti potacchi mi no ghe vogio intrar.

Bor. Cara sórela, andemo.

Cec. Sior no, sior no.

Bor. Vardè, se el caso, se l'accidente me pol esser più favorevole. Cercava un' occasion de poderghie parlar, e la me capita, e volè che me la lassa scampar?

Cec. Andeghe vu.

Bor. Cara sorela, vegnì auca vu.

Cec. Sior Lissandro ha dito, che se sior Raimondo vede che ghe xe dei putti da maridar, el se metterà in sospetto, e l'anderà via.

Bor. Zanetto, no xelo da maridar?

Cec. Avevimo dito de vestir Lucietta, e finzerla so muggier. (*ridendo.*)

Bor. Sì ben, e vu sarè mia muggier de mi.

Cec. Eh via, mato!

Bor. Cara vu, cara fia, cara ti. (*facendole delle carezze fraterne.*)

Cec. Sentì, per farve servizio, vegnirò; ma abbiè giudizio, no me fe scene, e no me fe smattar.

Bor. Cossa songio, un puttelo?

Cec. E le buccole, no ghe le ste a dar.

Bor. Tolè, deghele vu.

Cec. Dè qua.

Bor. No, no, ghe le darò mi.

Cec. Abbiè prudenza.

Bor. Sangue de diana! Ancuo chi me pol? Me par che tutto el mondo sia mio. (*parte.*)

Cec. Eh putti senza giudizio! E po? E po, dopo tre dì no la xe più quella. (*parte.*)

SCENA VI.

Camera con due porte laterali, ed una nel fondo, un tavolino da una parte con testa da scuffia, ed una cestella, con due sedie di paglia pulite.

TONINA, poi RIOSA.

Ton. **R**iosa. (*chiama, e si mette a lavorare intorno ad una scuffia.*)

Rios. Siora. (*vien lavorando, facendo le calze.*)

Ton. L'aveu visto mio mario sta mattina?

Rios. Mi no, siora, che no l'ho visto. Xelo fora de casa sior Gasparo?

Ton. Sior Gasparo? Che bisogno ghe xe che disè sior Gasparo? Se dise el patron.

Rios. La gh'ha rason, siora sì. Xelo fora de casa el patron?

Ton. Siguro ch'el xe fora de casa. E el s'ha levà su sta mattina, el xe andà via, che no l'ho gnanca sentio.

Rios. Caspita! siora patrona, bisogna ben che la dormisse pulito. (*siede, e lavora.*)

Ton. Bisogna; e si savè, giersera appena ho messo la testa sul cavezzal, me sou subito indormenzada.

Rios. Ma co se gh'ha el cuor contento, se dorine ben.

Ton. Son contenta, xe vero; ma anca mi gh'ho dele cattive zornae.

Rios. Cara ela, cossa ghe manca?

Ton. No me manca gnente; ma stago sempre col batticuor.

Rios. De cossa ?

Ton. No vedè ch'el xe sempre a torzion ?

Rios. El va pe i sò interessi .

Ton. Sia malignazzo quando el s'ha messo a far el senser !

Rios. Cara siora patrona , no xela stada ela che gh'ha fato aver sta carica de senser ?

Ton. No saveva miga mi , che per far sto mestier el s'avesse da levar all'alba , e che l'avesse da vegnir a casa a magnar un boccon strangolon , e po piantarme qua fin a negra note .

Rios. Ma almanco la sera el vien a casa a bon'ora , el sta qua con ela . . .

Ton. La sarave bela che nol vegnisse gnanca la sera .

Rios. Oh , cara siora , ghe n'è . . .

Ton. Quanti ghe n'è , quanti ghe n'è . . . (*con forza interrompendola .*)

Rios. La me lassa dir , elo no gh'ha casin .

Ton. No , ghe mancherave altro .

Rios. Nol zoga . . .

Ton. Sì , xe vero , nol cognosse gnanca le carte .

Rios. Nol gh'ha pratiche . . . se la m'intende .

Ton. Oh in questo po , no so gnente !

Rios. Gh'ala qualche suspetto ?

Ton. Xe qualehe tempo che gh'ho sto balin .

Rios. Ma con che fondamento ? El xe tutto al zorno fora de casa .

Ton. Cosa soggio mi ? L'omeni coi s'ha messo el tabaro e el cappelo , vatela a pesca dove che i va .

Rios. Oh co no la gh'ha altro fondamento che questo . . .

Ton. Che altro fondamento voleu che gh'abbia ?

Rios. Che soggio mi ! Credeva che la sapesse qualcosa .

Ton. Che sapesse qualcosa ? De dia ! se fosse segura de gnente , povereto elo . Ch'el varda ben . . . che

l'ara dreto. Perchè son fia de-mia siora mare.

Rios. Vedela, cara siora patrona. La me compatissa, la se scalda per gnente.

Ton. Oh in ste cosse son delicata!

Rios. La gh'ha rason, per questo la gha rason, ma la me compatissa, xe el ben che me fa parlar.

Ton. E mi xe el ben che qualche volta me fa andar in collera con mio mario.

Rios. Qualche volta, la dise?

Ton. Via, siora dottora, cossa vorressi dir? Chi ve sente vu, pareria che fusse una stramba.

Rios. No parlo altro.

Ton. Tra mario e muggier se cria, se se magna i occhj, e po se fa pase, e la xe fenìa.

Rios. Se la fusse fenìa!

Ton. Tase là, che son stufà.

Rios. (El xe el più bon omo del mondo, e la lo fa desperar.) (*da se.*)

Ton. Siora, cossa dixeu? (*con sdegno.*)

Rios. Oh digo de ste calse!

Ton. No vorria che ve tolessi troppe boneman.

Rios. Oh la tasa, che credo ch'el sia elo!

Ton. Da che banda? (*guardando alle due porte laterali.*)

Rios. Da sta banda qua. Lo conosso in tel far la scala.

Ton. Via, via, me ne contento. El xe vegnù a un'ora discreta, averzighe.

Rios. No gh'halo la chiave?

Ton. N'importa. Averzighe; gh'aveu paura d'incomodarve?

Rios. Siora sì, no la vaga in collera. (*s'alza, e va ad aprire.*) (La xe proprio impastada de velen.) (*da se.*)

Ton. La gh'ha rason, culia, ma no posso far de manco. (*da se.*) E cussì xelo elo?

SCENA VII.

GASPARO, e detti.

Gas. Siora sì, son mi. (*con cera ridente.*)

Ton. Bravo sior, dove seu stà fin adesso? (*ridendo.*)

Gas. Fin adesso! non xe gnancora disisett' ore.

Ton. Digo adesso, perchè se' andà via che dormiva, e no v'ho più visto. (*ridendo.*)

Gas. Cara fia, so sta per i mi interessi.

Ton. E perchè non m'aveu dismissià? (*placidamente.*)

Gas. Perchè v'ho volesto lassar dormir. (*con maniera.*)

Ton. Andè là, che se' un gran baron. (*scherzando.*)

Gas. Poverazza! un'altra volta no lo farò più. (*scherzando.*)

Ton. Andè via, andè a lavorar in cusina. (*a Riosa.*)

Rios. Oh siora sì. La diga, sior patron.

Gas. Cossa gh'è?

Rios. No l'ha gnancora mandà la spesa sta mattina.

Gas. Andè, andè, no stè a cercar altro. (*a Riosa che parte.*)

Ton. Appunto, no volè che magnemo ancuo?

Gas. Ve dirò, ho trovà mio compare Bernardin. Ghe xe da c'lo dei bolognesi, el gh'ha una partia de canevo da esitar, e i m'ha scjelto mi per seuser, e ancuo bisogna che yaga a disnar da elo.

Ton. Per cossa mo a disnar?

Gas. Perchè i gh'ha dele altre cosse da far, e i ha destinà quell'ora per sto negozio.

Ton. E vu gh'avè dito de sì, che anderè?

Gas. Cossa voleu che fazzo? Voleu che ghe diga de no?

Ton. E mi sola in casa co fa una bestia...

Gas. No, ve dirò...

Ton. Andè, andè, se avè d'andar, destriglieve. (*si mette a lavorare.*)

Gas. Cossa diavolo gh'aveu sta mattina?

Ton. Gnente. (*lavorando.*)

Gas. Seu in colera perchè no v'ho desmissià? (*scherzando.*)

Ton. Mi! no me n'importa nè bezzo, nè bagattin.

Gas. Cossa gh'aveu douca?

Ton. Andeve a divertir, e lasseme qua.

Gas. Ve dirò, se me lasserè dir. Xe deboto un mese, che vostra mare me prega che ve lassa andar un zorno da ela; gh'ho promesso, gh'ho dà parola, ancuo la ve aspeta.

Ton. Ancuo la me aspeta?

Gas. Siora sì, ancuo.

Ton. Quando l'aveu vista mia mare?

Gas. Sta mattina.

Ton. Se' stà da ela donca?

Gas. Son stà da ela seguro.

Ton. Ho capio.

Gas. Cossa mo?

Ton. Ho capio.

Gas. Ma cossa?

Ton. Accordi fati, perchè vada mi da mia mare, e vu dove volè.

Gas. In verità, Tonina, qualche volta se' bela.

Ton. O bela, o brutta, se gh'avevi intenzion de trattarme cussì, me dovevi lassar dove che giera, che stava ben.

Gas. Con che sugo, con che proposito vegniù fora co ste freddure?

Ton. Ancuo mo giusto per questo da mia mare no ghe voggio andar.

Gas. E sì bisognerà che gh'andè.

Ton. Bisognerà che ghe vaga?

Gas. Mi crederave de sì.

Ton. Per che rason?

Gas. Ve dirò, fia mia, perchè la ve aspeta, perchè la v'ha da far veder dela tela che vorave comprar, perchè gh'ho promesso che anderè, e perchè son un pochetto, un pochetto patron de dirve che voggio che andè.

Ton. Oh potenza de Diana de dia...*(alzandosi con furia.)*

Gas. Zitto. *(a Tonina.)* Riosa. *(chiamandola.)*

Rios. Sior.

Gas. Porteghe la vesta e 'l zendà ala vostra patrona.
(a Riosa.)

Rios. Qualo vorla? *(a Tonina.)*

Ton. Ve digo cussì... *(con sdegno.)*

Gas. Zitto. *(a Tonina.)* Quell'ordenario. *(a Riosa.)*

Rios. *(Se el scomenzasse a far un pochetto da oino, sior sì, che le cosse anderavè ben.)* *(parte.)*

Ton. E cussì, sior, la s'ha, cazza in testa, che ancuo vaga a disnar da mia mare?

Gas. Cara la mia cara Tonina, savè se ve voggio ben, se ve amo, se ve respeto, ma qualche volta arrecordeve che son vostro mario.

Ton. Qualche volta ah! me l'arecordo anca troppo, e se no ve volesse ben... *(le vien da piangere.)*

Gas. *(Ghe scommetto che la pianze da rabia, ma n'importa, a poco a poco la modererò.)*

Ton. *(Mai più nol m'ha parlà come ancuo.)* *(si asciuga gli occhi.)*

Gas. Via, Tonina, via, vien qua, fia mia, ti sa che te voggio ben.

Ton. Quanti ghe n'avetno del mese?

Gas. Cinque, fia mia.

Ton. De che mese semio?

Gas. De Febraro.

Ton. Ben, ben; sto zorno me lo ricorderò.

Gas. Perchè no v'ho desmissià sta mattina?

Ton. Sior no, la veda, patron, perchè aucuo per la prima volta la m'ha dito, voggio.

Gas. Oh adesso ho capio! E vu che se' una bona mug-
gier, per contentar el mario, anderè da vostra sio-
ra mare senza nissuna difficoltà.

Ton. Ghe anderò, perchè sono una bona minchiona.

Gas. No, fia mia, disè che gh'anderè perchè me vo-
lè ben.

Ton. Ve voggio ben, ma... sior Gasparo...

Gas. Gh'andereu, o no gh'andereu?

Ton. No v'hogio dito che gh'anderò?

Gas. Sia riugrazià il cielo. (*tira fuori un lunario,
e una penna di lapis, e fa un segno.*)

Ton. Cossa xelo quel libro?

Gas. El lunario.

Ton. Cossa segneu?

Gas. El primo zorno che avè fato a mio modo.

Rios. (*colla veste, ed il zendale della padrona.*)

La toga la vesta, e el zendà. (*a Tonina.*)

Ton. Dè qua. (*prende con dispetto.*) Via, siora, agiu-
teme. (*a Riosa.*)

Rios. De diana! Cossa gh'ala con mi? (*l'ajuta.*)

Gas. Tonina. (*amorosamente.*)

Ton. Cossa gh'è? (*brusca.*)

Gas. Via, siè bona, fia mia. (*amorosamente.*)

Ton. Se poderave saver per cossa, che sta mattina me
volè ficcar da mia mare?

Gas. No ve l'hogio dita la rason?

Ton. No se poteva mo aspettar a doman? (*vestendosi
si agita, perchè il zendale non va bene.*)

Gas. Vedeu, fia mia, za che ancuo vado a disnar da mio compare, vu andè da vostra siora mare, e cussì se sparagna un disnar. Ah Riosa, cossa distu?

Rios. Mi digo ch'el gh'ha rason.

Ton. Animo, animo, siora, andeve a vestir, che vequirè con mi. (*a Riosa.*)

Rios. Oh mi, siora, fazzo presto! (No gh'ho miga bisogno del compasso mi per veder se il becco del zondà xe ala mezaria.) (*burlandosi di Ton. e par.*)

Ton. Se' diventà ben economo, sior Gasparo. Una volta no gieri miga cussì.

Gas. Una volta, co giera da maridar, giera un'altra cossa. Adesso penso a casa mia, penso a mia muggier, e penso a quello che pol vègnir. Me podeu condannar per questo?

Ton. Per questo no ve condanno, ma no vorria che teguissi per la spina, e che spandessi per il cocon. (1)

Gas. Come sarave a dir?

Ton. Vardè che scuro! Non vorria che sparagnassi in casa, e che andassi a spenderli fora de casa.

Gas. Mi a spenderli fora de casa? Oh, fia mia, me cognossè mal! Dopo che son maridà, non ho pagà un caffè a chi si sia. Son galantomo, no gh'ho da dar niente a nissun, ma del mio nissun ghe ne magna, e nissun ghe ne magnerà. Voggio godermè quel pocheto che gh'ho cola mia pase, e cola mia cara muggier.

Ton. Sì sì la vostra cara muggier!

Gas. No xe fursi vero?

Ton. No ve arecordè cossa che m'avè dito?

Gas. Cossa v'hoggio dito?

(1) *Proverbio, che significa aver economia per le piccole, e gettar via per le cose grandi. Cocon è il grosso turacciolo della botte.*

Rios. Son qua co la comanda. (*a Tonina.*)

Ton. Via, andemo co volè. (*a Gasparo.*)

Gas. Andè pur; mi bisogna che resta a casa.

Ton. Gnanca a compagnarne no volè vegnir?

Gas. Aspetto mio compare Bernardin, che m'ha da vegnir a levar.

Ton. Aspetteu sior compare Bernardin, o siora comare Bernardina?

Gas. Cosa diavolo diseu?

Ton. Sior Gasparo, se me n'accolzo!

Gas. Via, via, buttè a monte sti putelezi. Son omo, son maridà, e no tendo a ste frascherie.

Ton. Ne vegnireu a levar gnanca?

Gas. Oh siora sì, per veguirve a levar, siora sì! Subito che m'ho destrigà, vegno a torve.

Ton. Riosa, dov'è la chiave del saggiaor?

Rios. La xe là su quel taolin.

Gas. Cossa gh'aveu bisogno dela chiave del saggiaor? No vegnirogiù a levarve?

Ton. Se' capace de farne star là fina a negra notte; e mi gh'ho da far a casa mia, e voi vegnir co me par e piase.

Gas. Siora no, aspetteme.

Ton. E se no vegnissi? (*prende la chiave dal tavolino.*)

Gas. Aspetteme, e lassè là quella chiave. (*con forza.*)

Ton. No gh'aveu la vostra?

Gas. Siora sì, ma voggio aver sto gusto de venirve a levar.

Ton. Ben, v'aspetterò.

Gas. Siora no, so chi se', se' capace de vegnir via, voi esser seguro de trovarve da vostra mare, e lassè là quella chiave.

Ton. De dial se'devetà una bestia, un satiro, no ve cognosso debotto più. (*getta la chiave in terra.*)

Gas. Me fe da rider in verità.

Ton. Andemo, andemo, che debotto... (*s'incammina verso la porta.*)

Rios. (Uh se el gh'avesse cuor!)

Gas. Anden via con questa?

Ton. Se no me podè soffrir, disemelo.

Gas. Via, matta. (*dolcemente.*)

Ton. No m'avè mo guanca trovà in t'un gattolo.

Gas. E tutte ste cosse, perchè sono andà via senza dismissionarla.

Ton. Perchè... perchè... no me volè ben.

Gas. Dè qua la zampa.

Ton. Cossa songio una gatta? (*gli dà la mano.*)

Gas. Cinque, e cinque diese.

Ton. E l'amor?

Gas. No gh'è vanti.

Ton. E l'amor ve va zoso per i calcagni.

Gas. Ah inuso d'oro vèh!

Ton. Ah tocco de baron! Stassera faremo i conti. (*parte.*)

Rios. (Oh che stomeghezzi! no li posso proprio soffrir.) (*parte.*)

SCENA VIII.

GASPARO solo.

Ghe voggio un ben che l'adoro a culia, ma la cognosso. So da che piè che la zoppega. La vorave el mondo a so modo, e mi lo voggio un pochetto al mio. Vedo che co le bone no se fa gnente, bisogna provar un pocheto co le cattive. No la xe usa, la gh'ha parso un pocheto garbà. La se userà, la se userà. La farà a modo mio. L'ho volesta vènz

anca dela chiave. (*la riprende da terra.*) Le xe cosse da gnente, ma xe meggio usarle in ste cosse piccole, per no vegnir al caso de cosse de conseguenza. (*si sente battere.*) Me par che i batta. La sarave bela che la fusse ela che tornasse in drio. (*mette la chiave sul tavolino, e va ad aprire.*)

SCENA IX.

LISSANDRO, e detti.

Gas. Oh! se vu, sior Lissandro?

Lis. Son mi, compare Gasparo. Cossa feu? Steu ben?

Gas. Che bon vento ve mena da ste nostre bande?

Lis. Amicizia vecchia, amicizia vera, de cuor.

Gas. Ve son obligà del vostro bon amor.

Lis. Xe un pezzo che non se vedemo. Cossa feu dela vostra vita? Una volta vegnivi qualche mezz' oretta al caffè, qualche sera al casin, adesso no se ve vede più.

Gas. Ho tirà in terra, compare, ho fenì.

Lis. Per cossa? Perchè se' maridà? Se pol tender a casa sua, se pol esser marii, e de là de marii, e veder qualche volta i so boni amici. Vu fe un mestier, compare, che gh'ha bisogno de amicizia, de conoscenze, de protezion.

Gas. Oh de questa, per grazia del cielo, no me ne manca! e de le facende ghe n' ho, per un principiante, che no me posso descontentar.

Lis. Quanto xe che no vedè sior Raimondo?

Gas. L' ho visto gieri a Rialto.

Lis. E nol v' ha dito gnente?

Gas. Gnente.

Lis. Quello, vedeu, quello xe un omo da fargliene capital.

Gas. Oh in quanto a questo, gh'avè rason. Quel poco che gh'ho, lo riconosso da elo, e no finirò mai de pagar le mie obbligazion.

Lis. Sì, se vede che el gh'ha dell'amor. Capisso da quel che el m'ha dito, ch'el gh'ha dell'amor.

Gas. De cosa? Cosa v'halo dito?

Lis. Me despiase ch'el m'ha ordenà espressamente de no parlar.

Gas. Se no podè parlar, caro vecchio, no so cosa dir.

Lis. Ma coi amici no posso taser.

Gas. Ben, donca se me se'amigo, parlè.

Lis. Ma no disè che sia sta mi che ve l'abbia dito.

Gas. Ve prometto che no parlerò.


Lis. Ancuo sior Raimondo vol vegnirve a far un'improvisata.

Gas. Un'improvisata? de cosa?

Lis. El vol vegnir a disnar con vu.

Gas. S'el m'ha visto gieri, e nol m'ha dito gnente.

Lis. S'el ve l'avesse dito, no la saria più improvisata.

El vol vegnir ancuo a disuar da vu, elo, e siora Cattina  fia.

Gas. E el ve l'ha dito a vu ch'el vol vegnir?

Lis. El me l'ha confidà, ma el m'ha dito che no ve diga gnente, perchè nol vol metterve in suggezion.

Mi mo, che ve son amigo, v'ho volesto vegnir a avisar. Ah! hoggio fato ben?

Gas. M'imagino che sarè anca vu dela compagnia?

Lis. No voleu? A mezzo zorno el me aspetta da elo, montaremo in gondola, e veguiremo insieme.

Gas. Me despiase una cosa.

Lis. Che xe mo?

Gas. Che ancuo son impegnà a andar a disnar fora de casa.

Lis. Oh vedeu? Queste xe de quele cosse da perder i amici, da perder i protettori, e de farse trattar de

da spilorza, e da omo che no gh'ha cuor. Compatime, xe l'amicizia che me fa parlar. Cossa voleu diga sior Raimondo...

Gas. Co 'l saverà*...

Lis. Cossa voleu che diga la so puta, che gh'ha tanta voglia de star un zorno co siora Tonina?

Gas. L'anderà da ela quando che la vorrà.

Lis. Mo no, no, qua in confidenza, da vu, in casa vostra.

Gas. Caro amico, son impegnà, e ve dirò anca co chi, da mio compare Bernardin.

Lis. Fe una cossa, se ve preme, se no ve podè cavar, audè, e lassè ordene a vostra muggier che la li riceva.

Gas. Mia muggier xe andata a disnar da so mare.

Lis. Eh via, cabale, invenzion, vergogneve, un omo dela vostra sorte!

Gas. Ve digo che la xe andata da galantuomo, in parola d'onor. Vardè per segno dela verità, ho d'audarla a levar, e la m'ha lassà la chiave del saggiaor.

Lis. Me despiase per vu, ma assae, assae, vedè, me despiase.

Gas. Me despiase anca a mi, ma per ancuo no ghe xe remedio.

Lis. E gh'avè cuor de far sta malagrazia a sior Raimondo, al qual gh'avè tante obbligazion?

Gas. Anderò a trovarlo, ghe farò le mie scuse.

Lis. No, no, no v'incomodè, el m'ha dito che no ve diga gnente; no ste andar adesso a far dele chiaccole, a far cli'el me toga in urta.

Gas. Volcu ch'el vegna, e che nol me trova?

Lis. L'avviserò mi, ghe dirò che ho savesto che audè a disnar fora de casa.

Gas. Oh bravo! ve lasso l'impegno a vu.

Lis. Ma, scuseme, sior Gasparo, fe molto mal.

Gas. Oh! i batte.

Lis. Mi no gh'ho sentio. (*osservando la porta per dove è venuto.*)

Gas. Oh i ha battù dall' altra banda!

Lis. Gh' hala do porte la vostra casa?

Gas. Sior sì, se va fora anca per de là; senz' altro sarà mio compare Bernardin che me vien a levar.

Lis. Vardè se ve podessi despegnar.

Gas. Farò el pussibile, ma gh'ho paura de no poder.
(*apre, e parte per l' altra porta.*)

SCENA X.

LISSANDRO solo.

Ghe scommetto che nol xe impegnà guente affatto, o che se el xe impegnà, el se poderia desimpegno, ma che el lo fa per spilorzeria. El me giera sta dito, ch'el xe diventà una tegna, ma no lo credeva. Tolé suso, aveva immagiù la più bela cossa del mondo; son in te l'impegno, e sta caia me fa perder el piacer, e la bona occasion. Cossa dirà sior Raimondo che gh'ho dà da intender che Gasparo l'invidava a disnar? E cossa dirà siora Cecilia che gh'ho dà parola? Maledetta la spilorzeria de costù! Gh'ho una rabbia, che se sapesse come poder far a vendicarme... Ma zitto che me vien un pensier, el m'ha dito che questa xe la chiave del saggiaor. (*prende la chiave dal tavolino.*) Se la ghe fasso sparir?...Ma se el torna, e che non la trova... vedemo la mia. (*tira fuori la sua.*) Per diana! gh'è poca differenza. (*confronta le due chiavi.*) Presto, presto, scambiemola. (*mette la sua sul tavolino.*) Ma per andare a casa da mi che no

gh'è nissun? Eh co gh'ho questa, vegnìò a tor quell'altra! (*mette via la chiave di Gasparo.*) Oh se la me va ben, l'ba da esser el più bel spasso del mondo! Velo qua l'amigo.

SCENA XI.

GASPARO, e detti.

Gas. No gh'è remedio, ve l'ho dito, no gh'è remedio. Sior Bernardin, ch'el mauda a chiamar.

Lis. Perchè no gh'aveu fato dir che per ancuo el ve dispensa?

Gas. Eh no, caro vu, che gh'ho promesso d'andar, e po xe tardi, adesso come voleu che fazza a ordinar un disnar?

Lis. Per tardi, no xe tardi, ghe xe un osteria qua taccada.

Gas. Se xe disnov' ore sonae.

Lis. Disnov' ore! M'impegno che no le xe gnancora disdotto.

Gas. Me lo voleu dir a mi, che le ho sentie a sonar?

Lis. Me lo voleu dir a mi che gh'ho la bocca dela verità? (*cerca l'orologio.*)

Gas. Coss'è? Aveu perso el relologio?

Lis. La sarave ben bela! El me costa vinti zecchini. (*cerca.*)

Gas. Lo gh'avevi sta mattiua?

Lis. Me par... Aspettè, aspettè, adesso che me ricordo... sì ben, l'ho lassà tacchà alla testiera del letto.

Gas. Andelo a tor, andè là.

Lis. No posso, se ho da andar da sior Raimondo.

(*Sia maledetto! se podesse aver la mia chiave!*)

Gas. Via donca andè da sior Raimondo.

Tom. XXVIII.

Lis. Mo adesso par che me cazzè via. (*si accosta al tavolino.*)

Gas. Xe che mio compare me spetta.

Lis. Andeu per de là, o per de qua? (*tenta di levar la chiave.*)

Gas. Vu per de là, e mi per de qua.

Lis. (*Pazienza. Vegnirò a torla col sarà andà via.*)

Sior Gasparo, a rivederse. (*andando per partire.*)

Gas. Me despiase che ancuo no posso goder sta bela compagnia.

Lis. Un'altra volta.

Gas. Sior sì; un'altra volta.

Lis. (*Se me riesse... a Rialto voi che ghe demo la batarella.*) (1) (*parte.*)

SCENA XII.

GASPARO solo.

MMe despiase per sior Raimondo. In verità, el me voleva far sto onor, ghe son obligà. Ma col saverà che giera impegnà per un interesse, che me pol portar del profitto, son seguro che anzi el gh'averà a caro, e el me loderà. Ch'el diga quel che el vol Lissandro, le mie scuse le voggio far. Oh andemo! Mio compare me manda a chiamar; bisogna che i voggia scomenzar a bon'ora a parlar. Gh'ho gusto, cussì anderò più presto a levar Tonina. Gh'hoggio la mia chiave in scarsela? Sì ben. Ma n'importa; xe meggio che toga anca questa, za che la gh'è;

(1) *Fuol dire, se mi riesce di corbellarlo, lo vo' far sapere agli amici che frequentano Rialto, e lo voglio fare scorbacchiare.*

dele volte se ghe ne pol perder una. (*prende la chiave, e la mette via senza guardarla.*) Me despiase de sior Raimondo. Ma lo pregherò de vegnirne un di a favorir. Xe meggio che vaga per de qua, che la scurto. Vorria squasi serrar cole chiave, eh no, za veguirò avanti sera. (*parte e serra.*)

SCENA XIII.

LISANDRO solo, poi il suo GARZONE.

Lis. (*Aprè la porta pian piano colla chiave ed entra.*) Ghe n'ha volesto avanti ch'el vaga via. Me son giazà su quella porta quel che sta ben. Vorave che vegnisse sto mio garzon. Me preme de mandar a casa a tor elologio. Cossa diavolo falo? L'osteria xe tanto taccada. Ma dove xe la mia chiave? (*cercando sul tavolino e per terra.*) Dove diavolo halo ficcà la mia chiave? Ah el l'abbia portada via! No crederave mai.

Gar. Sior patrou. (*sulla porta con timore.*)

Lis. Vien avanti, che no gh'è nissun.

Gar. L'oste xe avisà, e el vien elo in persona.

Lis. Gh'hastu dito da sior Gasparo?

Gar. Sior sì, da sior Gasparo.

Lis. Gh'astu parlà de mi?

Gar. Mi no, gnente.

Lis. Vorria che ti andassi . . . aspetta, caro ti, che no trovo sta maledetta chiave. Bisogna seguro che senza abbadar el l'abbia portada via. Paziienza. Bisognerà stasera che fazza averzer da un favro, e che domattina fazza muar la serradura.

Gar. Comandela altro?

Lis. Aspetta.

Gar. Vedo l'oste che vien su de la scala .

Lis. Va là, va in cusina, fa del fogo, e impizza el fogo in tinello.

Gar. No so miga de sta casa.

Lis. Va drento de quella porta, (*accenna la porta dī fondo.*) e ti troverà tuto.

Gar. E se no ghe xe fogo?

Lis. Battilo.

Gar. E se no trovo l'azzalin?

Lis. Eh el diavolo che te porta cole to difficoltà!
(*garzone parte.*)

SCENA XIV.

L' OSTE, e detto.

Lis. **V**egni avanti, sior patron.

Ost. La me comandi.

Lis. Nu gh'avemo bisogno de vu, presto, pulito, e no vardè bezzi.

Ost. Per quanti.

Lis. Aspettè. Do, e do quattro; e do sie... per sette; per sie o sette.

Ost. Vienne da mi, vorle che le serva qua?

Lis. Qua qua da sior Gasparo. Lo cognosseu sior Gasparo senser?

Ost. Lo cognosso de vista. So ch'el xe una persona civil, ma nol m'ha mai fato l'onor de spender un soldo ala mia ostaria.

Lis. Ben caro vecchio, tute le cosse gh'ha d'aver el so principio; el principierà ancuo.

Ost. Nol ghe xe in casa sior Gasparo?

Lis. Nol ghe xe, el m'ha dà l'incombenza a mi.

Ost. La perdoni, e ela? La so reverita persona.

Lis. Mi son so fradelo .

Ost. Me ne consolo infinitamente . (*cavandosi la berretta e il cappello.*) E . . . la perdoni, la pagherà ela?

Lis. Pagherà mi fradelo . Gh'aveu qualche difficoltà?

Ost. Gnente affatto . Me maraveggio .

Lis. Gh'ho ben campo de vegnir spesso ala vostra bottega .

Ost. La vederà che gh'averò ambizion de servirla .
Quanti piatti comandela ?

Lis. Sentì, amigo . Mio fradelo xe un omo che in te le occasion no se fa vardar drio, trattelo ben, e no ve dubitè gnente .

Ost. Per esempio, cento risi colla quagietta ?

Lis. Sì ben .

Ost. Un bon pezzo de triolfa de lai suttilo ?

Lis. Anzi .

Ost. Un cappone impastà col balsamo del Perù ?

Lis. Anca con quel dela Mecca, se volè .

Ost. Un fracassè all'ultima moda ?

Lis. Bravo ! eviva la moda !

Ost. Ma ghe raccomando el piatto .

Lis. Come el piatto ?

Ost. Perchè m'impegno che le magnerave anca el piatto .

Lis. Ho capio ; son cortesan , o no ghe arrivava .

Ost. Lattesini certo .

Lis. S'intende .

Ost. Figà de vedelo ?

Lis. No ghe xe risposta .

Ost. Vorla che fizza un contrabando ?

Lis. Che xe mo ?

Ost. Che ghe daga una lengua de manzo salamestrada co le mie man ?

Lis. Magari !

Ost. La sentirà che roba! altro che cale dei fuseri!
la sentirà. Cossa vorla de rosto?

Lis. Cossa gh'aveu de bon?

Ost. Tutto quel che la vol, lonza, straculo, cingal,
lievro, agnello, cavretto, polastri, dindj, capponi,
anere, quaggie, gallinazze, beccanotti, pernisse, fran-
colini, fasani, beccafichi, tutto quel che la vol.

Lis. Tutta sta roba gh'avè?

Ost. La comandi, e no la dubita gnente. Semo a Ve-
nezia, sala? No ghe nasse gnente, e ghe xe de tut-
to, e a tutte le ore, e in t'un batter d'occhio se
trova tutto quel che se vol. La comandi.

Lis. M'avè minzonà tanta roba, che m'avè confuso
la fantasia.

Ost. Faremo cussì: una lunza, sie gallinazze, e de
polastrelli.

Lis. Sì ben.

Ost. Vorlo una torta?

Lis. Perchè no.

Ost. Una crema de cioccolata?

Lis. Sior sì.

Ost. Ostreghe ghe ne vorla?

Lis. Oh sì appunto, le ostreghe!

Ost. Ghe voria anca la so tartuffoletta maligna. (1)

Lis. No disè mal! E che sior Gasparo se faccia onor.

Ost. No la se indubita, li ghe xe in bone man.

Lis. Me par anca a mi.

Ost. Cossa comandela per el deser?

Lis. Vu se' omo capace; fe tutto quel che volè.

(1) *Quest'epiteto di maligna è in questo senso un'espressione cortigianesca adottata dall'uso, e difficile da spiegarsi; perchè non indica cosa cattiva, ma all'incontro cosa buona, ricercata e piacevole.*

Ost. La se lassa servir, e no la gh'abbia travagio de guente.

Lis. Ma diseme, caro sior . . .

Ost. Paron Menego, per servirla.

Lis. Caro sior paron Menego; questo che m'avè esibio nol xe miga un disnar da ostaria.

Ost. Bravo! La gh'ha rason. Ma no la sa che gh'ho do cusine, do capi cuoghi, do caneve, e do botteghe? Mi ghe darò da disnar, se la vol, scomenzando da diese soldi a testa, fina a diese zecchini, se la comanda.

Lis. Sior sì, ho capio tutto. Ma aspettè, caro vecchio . . . (Vorave farghela portar a sta càia de sior Gasparo, ma no voria mo gnanca rovinarlo.) Diseme, sior paron Menego, appresso a poco quanto ne fareu spender in sto nostro disnar?

Ost. El vin se lo porteli lori?

Lis. Vu avè da metter tutto. Pan, vin, frutti, biancheria, posade, piatti, tutto quel che bisogna.

Ost. Anca i piatti da tovaggiol?

Lis. No so, per quelli no credo, ve saverò dir. (Andarò a veder se ghe xe el bisogno in cucina.)

Ost. La senta, co la vol un disnar da par soo, con tutto quel che s'ha dito, manco de do zecchini a testa, mi no la posso servir.

Lis. No amico, mio fradelo sta spesa nol la vol far; un zecchin a testa, e guanca un bezzo de più. (Per sie o sette zecchini la se ghe pol far portar.)

Ost. Mi le servirò a quel prezzo che le comanda; za le tartufole con sti sirocchi le xe patie.

Lis. N'importa, faremo de manco.

Ost. Le ostreghe chi le ghe piase, e chi no le ghe piase.

Lis. Xe vero.

Ost. Mezza galinazza per omo, le gh'ha da magnar quanto che le vol.

Lis. No andè avanti altro, compare; ferineve là.

Ost. Sarà difficile che a st' ora trovemo dei lattesini.

Lis. Oh compare, compare, no me de in te la gola!

No me tocchè i lattesin.

Ost. Vorla spender un zecchin a testa?

Lis. Sior sì, ma ben lo volemo spender.

Ost. La lassa far a mi, che ghe lo farò spender ben.

(*comincia a partire.*)

Lis. E presto. (*s'incammina verso l'appartamento*)

Ost. In tun batter d'occhio. (*camminando.*)

Lis. E pulito. (*camminando.*)

Ost. La vederà. (*camminando.*)

Lis. Pan? (*camminando.*)

Ost. De Marocco. (*camminando.*)

Lis. Vin?

Ost. Va Vicenza.

Lis. Da bravo, sior paron Menego.

Ost. La sarà contenta de mi. (*parte per la porta della scala.*)

Lis. E sior Gasparo pagherà. (*parte.*)

FINE DELL' ATTO PRIMO.

A T T O S E C O N D O

SCENA PRIMA.

La stessa camera col tavolino medesimo. ⁷

LISSANDRO solo, poi *Giovani d'osteria*.

Lis. (*Aprire colla chiave la porta solita della scala ed entra, e chiude.*) Oh bela! Oh bela da galantomo! Chi mai se poteva immaginar una cossa simile! Me vien in mente de far una chiassada per rider de sior Zanetto, e trovo che sior Bortolo xe innamorà dasseno de siora Cattina, che le buccole che ha comprà siora Cecilia le xe destinate per ela, e che sior Bortolo vol vegnir anca elo a disnar. La cossa se fa seria, e squasi me despiase d'averme impegnà. Ma ghe son, e no ghe più remedio. El disnar xe ordenà, xe invidà sior Raimondo... No ghe più remedio. Lassemo correr. La sarà co la sarà. Semo de carneval. Se devertiremo ale spale de quel caia de sior Gasparo. Son contento almanco, che m'ho assicurà che el xe a disnar da sior Bernardin, e che so muggier xe da so mare. Gh'aveva i mii reverenti dubbj; ma adesso posso star col cuor quieto. Spero che i ne lasserà disnar con tutte le nostre comodità. El se la merita sto tegna, el se la merita. Se vede ch'el l'ha fato per avarizia. Gierelo impegnà? bon viazo; el doveva, e el giera in obbligo de mandar a chiamar so muggier. (*si*

sente battere.) I batte, chi è? Vedemo. (*apre.*)
(*tre o quattro garzoni carichi di roba.*)

Lis. Oh bravi! Andè là, andè in cucina, mettè la roba in caldo. Ghe xe del fogo, ghe xe dei fornelli, ghe xe carbon. Parecchiè la tola in Tinelo. Oe! Menego. (*verso l'appartamento.*) Varda sti putti, dighe quel che i ha da far. E co vorremò che metè su i risi, ve aviseremo.

Gar. (*dicono di sì di tutto, ed entrano nell'appartamento.*)

Lis. Anderò anca mi a dar un'occhiada in cucina, perchè me preme che sior Gasparo se faccia onor. Ma gh'ho sta roba in scarzela... la me intriga, e no vorave perder qualcosa. (*tira fuori i suoi scrignetti.*) Se sapesse dove metterli... qua qua li logherò in sta cassella. (*li mette nella cassetta del tavolino.*) No vorave desmentegarmeli... Oh diavolo, possibile che sia cussì storno! me li ricorderò. I batte. (*va ad aprire.*)

SCENA II.

RAIMONDO (1), CATTINA, e detto.

Lis. **P**atroni, ben venuti, che le resta servide.

Rai. Oh il mi car signor Lissandre, bon dì a vossignori.

Lis. Bravo, sior Raimondo, brava siora Cattina, cussì me piase. No ghe posso dir quanta soddisfazion, che gh'averà sior Gasparo, e siora Tonina...

Cat. Dove xela?

Lis. Ghe dirò...

(1) *Raimondo parla bolognese.*

Rai. Dov'el el sior Gasparo? Dov'el el mi car amigon?

Lis. Ghe dirò. Sior Gasparo, e siora Tonina i xe andai tutti do fora de casa per un interesse de gran premura, ma a momenti i sarà qua, e i m'ha lassà mi a posta per riceverle, e domandarghe scusa, e farle compagnia fin che i vien. Le se comoda, le resta servide. (*porta due sedie.*)

Cat. Starali un pezzo a vegnir? (*siedono.*)

Lis. No i doverave tardar.

Cat. Sarà deboto vint' ore.

Lis. No crederia gnancora.

Rai. (*guarda il suo orologio.*) Disnov'e mezza.

Lis. Eh via via no ghe mal!

Cat. Xe che nu altri semo avvezzi a disnar tanto a bon'ora.

Lis. Ch'halà àpetito, siora Cattina?

Cat. Ve dirò, me son levada un pochetto tardi; tra vestirme, conzarme, e tra la pressa de vegnir via, no gh'ho gnancora mareudà stamattina.

Lis. Oe! se i starà un pezzo a vegnir, co sarà all'ordine anderemo a tola senza de lori.

Rai. Mo sgnor no, da bon, ch'n's'ha d'andar a tavola s'in vien.

Lis. (*Oh s'ì ghe anderemo senza de lori.*) (*da se.*)

Perchè no xela vegnua in mascara, siora Cattina?

Cat. Oh perchè iu mascara! Semo vegnui in barca. Son vegnua cussì come che stago per casa. Za co siora Tonina no gh'ho suggizion.

Lis. Cossa disela? Per Diana! la xe pulita, che no se pol far de più. No ghe manca gnente.

Rai. La me fa da rider mi fiola. (*ridendo.*)

Lis. Per cossa?

Cat. Cossa ghe faccio da rider?

Rai. L'ha chiappà anch'li sta bell'usanza. L'ha sem-

pre el matezz de dir, che l'è vestida, come che la va per ca.

Cat. Ah vardè che gran cosse! Cossa xelo sto strazzo de abito?

Rai. Ah, cossa diseu? la ghe dis un strazz. (*a Lissandro.*)

Lis. No, no, siora Cattina. L'assiculo che la xe vestia pulitissima. El xe un abitin de bon gusto.

Cat. Ve piaseło? (*guardandosi ed accomodandosi.*)

Lis. El me piase infinitamente.

Cat. Me l'ho scelto mi sto raso. (*come sopra.*)

Lis. Brava! pulito!

Rai. Quant credi mo ch'el gh' durerà? (*a Lissandro.*)

Cat. Oh che sougio una strapazzona!

Rai. Ancù, per esempi, a n'jera sta necessità da mettersse st' abitin per vegnir a disnar con d' i amigh de confideuza.

Cat. Mo za, el vorave sempre che andasse co fa una massera.

Lis. Eh ancuo no l'ha fato mal a vestirse! perchè a disnar ghe sarà qualchedun. (*a Raimondo.*)

Rai. Comod? Ai sarà della zente a disuar? Mo ne me avì miga dit sta cossa.

Cat. (El gh' ha paura che la zente i me magna.)

Lis. No gh' ha miga da esser un gran iuvido. La vederà, la vederà, no la se toga suggizion.

Rai. Mo s' a saveva csi, an i vegniva miga, vedi. An vui ch' i diga la mi fiola...

Lis. La me perdona, sior Raimondo, la l' ha pur menada gier sera al festin.

Rai. L'è veira, ma li è sta mi cugnà, che m'ha fatt sta bassetta. La n' ha iuvità a magnar una turt a la Bulgues: mi a credeva ch' an'è fuss nissun, e

a poc a la volta , a du , a tri , a quatter s' ha impenij la ca , e i ha fatt una festa da bal.

Cat. Oh la varda che gran cosse ! No gh' ho mai un fià de divertimento .

Rai. E chi è ni sta zente , che ha da vegnir a disnar ?
(*a Lissandro .*)

Lis. No la se indubita gnente . Tutta zente propria , civil , tutti nario , e muggier . La vederà do zoveni tutti do maridai , e i veguirà tutti do cole so muggier .

Rai. Oh quand' l'è cusì , a n' i è mal !

Cat. Mo una gran cossa de elo , che el vol sempre pensar al mal . (*a Raimondo .*)

Rai. Eh fraschetta veh ! At cognoss .

Cat. (El me fa una rabbia . . .) (*da se .*)

Rai. E chi eni mo ? Se pol saver ? (*a Lissandro .*)

Lis. Do mercanti de rango , de considerazion . La vede ben , sior Gasparo fa el senser .

Rai. Eh sior Gaspar , el so mi , l'è un om de giudizi , el fa ben i fatt so . Cossa ghe disni a sti do mercanti ?

Lis. Uno xe un certo sior Zanetto Bigolini . . .

Rai. Quel matt .

Lis. El xe matto , ma el gli' ha dei bezzi , e del credito , e dei magazzeni .

Cat. Quel scempio xe maridà ? (*a Lissandro .*)

Lis. La vederà so muggier . (*a Cattina .*)

Cat. Oh che te pustu ! (1) Chi mai xela quella matta che l' ha tolto ?

Lis. Per i bezzi , fia mia , per i bezzi .

(1) *Maniera bassa , che significa ammirazione , come se si dicesse . Oh che ti possa romper il collo , e cose simili .*

Cat. Vardè che sporco ! e giersera el me vegniva a far el grazioso ! Manco mal ch'el me fava stomego, e che no gh'ho badà. (*da se.*)

Rai. E quel altr chi el ?

Lis. Un certo sior Bortolo Parigini. .

Cat. (Sior Bortoletto ?) (*da se con allegrezza.*)

Rai. Sior Bortel Parisin ! Al cognoss, ma no miga mai savu ch' al sippia maridà.

Lis. Sior sì, el vegnirà anca elo co so muggier.

Cat. (Oh poveretta mi ! Anca elo xe maridà ? Gran busieri che xe sti omeni.) (*da se afflitta.*)

Rai. A i' ho piacer, ch' i sippia el sior Bortel, el cognoss cussì de vista ; so ch' el fa d' i bon negozj, ho piacer de far amicizia con lu.

Cat. Sior padre.

Rai. Coss i è ?

Cat. Vedo che sior Gasparo, e siora Tonina no vien mai. Ancuo i gh'averà da far, sarave meglio che tornessimo a casa. Vegniremo più tosto un altro zorno.

Lis. Oh cossa disela, siora Cattina ?

Rai. Via via, avì pazienza.

Cat. E po con tuta sta zente la sa che mi non sou usa . . .

Rai. Quand' a i è de l' altr' donne . . . Quand n' i è che marì e muggier . . .

Cat. In verità me sento una certa cossa. Par che me vegna mal. Audemo via, caro elo.

Lis. Vorla una scuola de brodo ?

Cat. Sior no, sior no. Grazie.

Rai. Se vull, che andemen, auden.

Lis. Caro sior Raimondo, cossa vorla mai che digi sior Gasparo, e siora Tonina ? La ghe vorria far sto affronto ?

ATTO SECONDO.

47

Rai. L'è veira vi, la mia fiola, avi pazienza.

Lis. La compatisso, poveretta, xe tardi. Cossa diavolo fali, che no i se destrega? Farò cussì, so dove che i xe, i xe poco lontani. Tanto che vien sti altri, anderò a chiamarli, i vegnirà subito. No la s'indubita gnente. Se vien sti signori, la prego de riverirli ela. (*a Raimondo.*) Vago; e vegno in t'un salto. A bon riverirle. (Anderò a veder cossa che i fa in cucina.) (*da se e va per andar al- l'appartamento.*)

Rai. Dov' andeu per de là? (*a Lissandro.*)

Lis. Eh se va fora anca per de qua. La se scurta. (*parte.*)

SCENA III.

RAIMONDO, e CATTINA.

Rai. Ah sì, el me la ditt'sior Gaspar, che i xe do port int la so ca.

Cat. (No credeva mai che sior Bortolo fusse maridà!) (*da se.*)

Rai. Anim, anim, alligher.

Cat. Ghe digo che me sento poco ben.

Rai. Ti averà troppo striccà el bust. Vot che te delazza?

Cat. El varda se son mola.

Rai. Vot inagnar qualcosa?

Cat. Oh me xe passà la fame!

Rai. L'è el patiment. L'è el stomegh, che te va vi. Ma perchè n'at fat colazzion stamattina?

Cat. No ho avudo tempo.

Rai. L'è quel specch quel maledett specch. Ti gh sta tre or d'orogg a quel specch, e fa, e desfa, e tira i catj d'la; d'i grām de manteca sul topè; d'i

baril de pulver in tel cignon e sta bucla ne va ben,
e sta baudetta ne corrisponde a quest'alter, a glia
vol tutta una mattina per sto bel conzir.

Cat. Perché no me trovelo un parrucchier?

Rai. Aveva trovà una donna, nol' avì volsuda.

Cat. Sior no, le done no sa far ben, fazzo meggio mi.

Rai. Oh ragazza! ragazza...

Cat. Andemo via, caro elo.

Rai. I batt. An gh'è la serva, an gh'è nissun. Aver-
zirò mi. (*va ad aprire.*)

Cat. (Vardè se gh'avesse teso a quel baron! Andar-
me a dir ch'el giera da maridar! manco mal che
no l'ho mai dito de volerghe ben.)

Rai. (Cmod se fa a avrir sta porta? Ah l'ho trovà.)
(*apre.*)

SCENA IV.

ZANETTO dando mano a *LUCIETTA* in abito
da signora, *BORTOLO* dando mano a *CECILIA*,
e detti.

Rai. **E**h i vignin pur innanz; ch'i se comoda.

Zan. Servitor umilissimo al mio caro patron. (*a Rai-
mondo.*)

Rai. Ela la se signoura questa? (*a Zanetto, accen-
nando Lucietta.*)

Zan. (*Senza rispondere lascia Lucietta, corre da
Cattina.*) Ghe fazzo umilissima reverenza. Hala
dormio ben sta notte? S' hala destraccà? Stala ben?
(*a Cattina.*)

Cat. Benissimo per servirla. (*seria.*)

Zan. S' hala insunià de mi sta notte? (*a Cattina.*)

Cat. (Vardè che sempiezz!) (*da se con rabbia.*)

Luc. (El m'ha impiantà qua.) (*piano a Cecilia.*)

Cec. Cossa volevistù? ch' el te tegnisse sempre per man?
(*piano a Lucietta.*)

Zan. (*si va aggiustando l' abito , e i manighetti.*)

Rai. A i ho ben piaser, sior Bortel, d'aver l'onor
de la so compagnì.

Bor. La xe una fortuna per mi questa, d'aver l'onor
de disnar con ela, e cola degnissima so siora fia.
(*addrizzandosi a Cattina.*)

Cat. (Poco de bon! malignazo quando che l'ho co-
gnossù!) (*da se.*)

Rai. Vi la mi fiola. Agradì, rispondì con un pos
di bona grazia. (*a Cattina.*)

Cat. L' ho saludà, ho fato el mio debito; la sà che
mi no so far cerimonie.

Bor. (Sia maledetto! ghe scommetto che la crede
che sia maridà.) (*da se.*)

Rai. Ella li la consort de sior Bortel? (*a Cecilia.*)

Cec. Per servirla.

Rai. E st' altra signoura? (*verso Lucietta.*)

Cec. St' altra signora... (*sforzandosi per non ride-
re.*) la xe la consorte de sior Zanetto.

Zan. (*ci patisce.*)

Rai. Me consol infinitament d'aver l'onor de con-
nosserla. (*a Lucietta.*)

Luc. Grazie tanto, sior. (*si vede che l'è impic-
ciata.*)

Cec. { (*ridono piano fra di loro.*)

Bor. }

Rai. Me ne ralligr con li, signor Zanett, de la bona
scelta.

Zan. Eh sior sì... Ma... grazie. (*a Raimondo.*)
No la creda guente. (*piano a Cattina.*)

Cat. (Cossa d'èvol, diselo? mi nol capisso.) (*da se.*)

- Rai.* Am davis che la muggier e el marì se s'emezzia.
(da se ridendo.) L'am fizza grazia. El mo un pezz
 ch'è maridà. *(a Lucietta.)*
- Luc.* Mi sior? *(imbarazzata.)*
- Cec.* Via, siora Gasparina... *(a Lucietta.)*
- Luc.* *(Oh Gasparina!)* *(di se ridendo.)*
- Cec.* La ghe diga quanto che xe che la xe maridada.
(a Lucietta.)
- Luc.* No so, sior, tre ani, quattr' ani. No so guente.
- Rai.* Hala d' i fant'sin?
- Luc.* Oh giusto! *(ridendo.)*
- Cec.* *(Oh no la tien duro custia!)* *(da se.)*
- Rai.* *(Mo che bela copia!)* *(da se.)*
- Bor.* *(No son miga maridà sala?)* *(a Cattina.)*
- Zan.* Guanca mi. *(piano a Cattina.)*
- Bor.* *(Quela xe mia sorela.)* *(come sopra.)*
- Zan.* *(E quella xe la massera.)*
- Cat.* *(Oh matti maledetti tutti do!)* *(di se, e riprende la cera allegra.)*
- Cec.* Cossa xe de sior Gasparo, e de siora Tonina che no i se vede?
- Cat.* No i ghe xe, ma adesso i vegnirà tutti do. *(con spirito, e si accosta a Cecilia.)* Aspettemoli. Xe tardi, ma n' importa. Semo in compagnia, no xela ela? *(accennando Bortolo.)*
- Cec.* Sior sì, la muggier de sior Bortolo.
- Cat.* *(No xe miga vero, n'è vero?)* *(piano a Cecilia.)*
- Cec.* *(Siora no, so sorela.)* *(piano a Cattina.)*
- Cat.* Me consolo tanto de vederla, e de cognosserla.
(si baciano.) E questa xe la consorte de sior Zauetto?
(a Lucietta ridendo.)
- Luc.* Sior sì. *(si accosta per baciarla.)*
- Cat.* Grazie. *(si ritira.)* Mi no voi baciar la massera.
(da se.)

Luc. Me cognossela? (*a Cecilia piano.*)

Cec. Oh giusto! (*piano a Lucietta.*) (Bisogna che quci matti gh'abbia scoperto tutto.) (*da se.*)

Rai. Per cossa mo i av'ì fatt ste sgarb? (*piano a Cattina.*)

Cat. Perchè la gh'ha mal a la bocca. (*piano a Raimondo.*)

Rai. Cara la signora delicatina. (*piano a Cattina.*)

SCENA V.

LISSANDRO, e detti.

Lis. Patroni reveriti.

Cat. E cussì? Vieni, o no vieni?

Lis. I vegnirà.

Cat. Dove diavolo xeli ficai stamattina?

Lis. Ghe dirò, sior Gasparo xe da sior Bernardin Zoccoletti per un negozio de canevi, che se el ghe va ben, el va a rischio de vadagnar almanco un mier de ducati, in tre o quattro zorni.

Cat. E cossa gh'intra siora Tonina?

Lis. Siora Tonina? La xe una donetta che val un million. Sti marcanti che gh'ha sto canevo da dar via, i gh'ha bisogno de bezzi, ghe vol do mille ducati a la man, e siora Tonina s'ha cavà le voggie, e tanto che so mario contratta, la xe andata a trovar i bezzi.

Rai. Per cossa no cla vegnù da mi, che a gh'l'ì averia dadi senza un interess al mond?

Bor. Ma in sostanza, vegnirali, o no vegnirali?

Lis. I vegnirà.

Zan. Sentemose a tola, che i vegnirà.

Rai. Oh signor Zanett, cossa disla? Senza i patron de cà? L'am perdona, saravela una bella creanza.

Zan. La creanza xe bela, e bona, ma mi gh'ho una fame che no ghe vedo.

Lis. E el negozio va longo, e Dio sa quando che i vegnirà.

Luc. (Oh mi debotto chiappo su, e vago via!) (*da se.*)

Rai. Ma coss'ha ditt'el sior Gaspar?

Lis. Sior Gasparo gh'ha el mazor travaggio del mondo, ma el sa che l'ha da far con de le persone che ghe vol ben, che no ghe vorrà far perder sta bona occasione, e el li prega, e el li supplica, el li sconzura de sentarse a tola, e de principiar. (*tutti fuor che Raimondo e Lissandro.*) Sì, sì, sior sì.

Rai. Mo signor no, da bon, ch' i avem da aspettar.

Lis. Sior, son andà in cusina; se la vedesse; xe una cossa che fa compassion. Tutto va de mal. E si sala, l'ha parecchià un boccon de disnar! no ghe digo gnente. L'ha tolto un cuogo. (*a Raimondo.*)

Cec. Andemo, andemo, sior Raimondo, che i vegnirà.

Rai. Se i vol andar loro, che i vadan pur, ma mi, e mi fiola piuttost anderem a cà; el veira, Cattina?

Cat. Mi sior? In verità che gh'ho una fame, e che no gh'ho gambe da far le scale.

Rai. Ti m'ha pur ditt, che t'era passà la fam?

Cat. Oh la me xe tornada!

Cec. Anemo, sior Raimondo, andemo che i vegnirà.
(*lo prende sotto il braccio.*)

Bor. A tola, a tola. (*prende per la mano Cattina.*)

Zan. Sans façons, sans façons. (*la prende per l'altra mano.*)

Cat. Sior pare, se ghe xe, bisogna starghe. (*parte con i due suddetti.*)

Rai. L'am vol far far una cossa... (*a Cecilia.*)

Cec. Andemo, andemo drio de sti putti. (*vuol condurlo via.*)

Rai. Putti! (*fermandosi.*)

Cec. Eh mi, co i xe zoveni, ghe digo putti! Andemo.
(*parte con Raimondo.*)

SCENA VI.

LISSANDRO, e LUCIETTA.

Lis. **V**ia siora novizza, la me favorissa la man. (*a Lucietta ridendo.*)

Luc. Eh novizza, i totani.

Lis. Quanto pagheressi che fusse la verità?

Luc. Oh con quel scempio no, vedè.

Lis. Piuttosto con mi, u'è vero?

Luc. Oh guanca. Gh'avè troppe cabale.

Lis. No cognossè el bon, sorela. Via la me daga la man. La permetta, che gh'abbia l'ouor de servirla.

Luc. Dove me voleu menar?

Lis. A tola.

Luc. A tola? mi no, varè.

Lis. No? per cossa?

Luc. Figureve, se mi voi disnar sentada a tola coi mi paroni.

Lis. Co lori ve lo permette.

Luc. Oh mi no, vedè, me vergogno!

Lis. Dove vorressi andar? In cusina?

Luc. Feme parecchiar piuttosto qua su d'un taolin.

Lis. Eh andemo! Vegni con mi. (*la prende a forza per la mano.*)

Luc. Sior no, ve digo. (*fa forza per restare.*)

Lis. Sangue de Diaua! che vegnì. (*la prende in braccio, e la porta.*)

Luc. Oe! oe! siestu malignazzo. (*partono.*)

SCENA VII.

Tinello con tavola apparecchiata, e le pietanze in tavola, colle sedie che occorrono. In fondo una credenza grande da tinello, con portelle che si aprono.

CECILIA, CATTINA, RAIMONDO, BORTOLO, ZANETTO, poi LISSANDRO, e LUCIETTA, Servitori d'osteria, e il Garzone di Lissandro che servono.

Cec. **S**on qua, son qua, farò mi i onori dela casa.
Qua sior Raimondo in cao de tola.

Rai. An so cossa dir. Ai son. (*siede in principio dalla parte della prima donna.*)

Cec. E mi arente de elo, e arente de mi mio mario.
(*ridendo.*)

Bor. (*prende il posto.*)

Cec. Là siora Cattina.

Cat. (*siede vicino a Bortolo*)

Zan. E mi qua. (*siede vicino a Cattina.*)

Cec. Sì ben, e vu là. (*a Zanetto.*)

Zan. E mi qua. (*fa un poco il pazzo:*)

Cec. Dove xeli sti altri?

Bor. Veli qua che i vien. (*comincia a distribuir la minestra.*)

Rai. Me faravla una grazia? (*a Cecilia piano.*)

Cec. (*La comandi pur.*) (*piano.*)

Rai. L'è tant matt quel sior Zanet. Se content de

lassar che mi fiola vigna qui, e li andar dall' altra banda de so mèr? (*piano.*)

Cec. Sior sì, volentiera. (*si alza, e va da Cattina, e parla all' orecchio.*)

Cat. (In verità gh'ho da caro.) (*a Cecilia, e si alza, e va tra Raimondo, e Bortolo.*)

Zan. Dove vala? (*si alza.*)

Cec. E vu qua, e vu qua, fermeve qua. (*a Zanetto tenendolo, e caricandolo*) Animo, ve destrigheu? (*alla scena.*)

Lis. Semo qua, semo qua anca nu. (Cossa che gh'ha volesto a farla vegnir!)

Cec. Animo, siora Dorotea, arente a vostro mario. (*a Lucietta.*)

Luc. (Oh adesso mo Dorotea!)

Cec. E là sior Lissandro.

Lis. Siora sì. (*siede in fondo dalla par te della seconda donna*) Via, siora Dorotea, la se senta.

Luc. Oh m' avè debotto stuffà! (*a Lissandro.*)

Cec. Via, cossa fala? (*a Lucietta.*)

Luc. M' hoggio da sentar? (*a Cecilia.*)

Cec. Cossa vorla? magnar in piè?

Luc. Sia malignazzo! (*vuol sedere ed è imbrogliata.*)

Zan. (*non vorrebbe vicino Lucietta, guarda Cattina, ci patisce, e vorrebbe alzarsi.*)

Cec. Fermeve qua, ve digo.

Zan. (Oh povereto mi!)

Luc. (*siede, e sta lontana dalla tavola in maniera che tiene il piatto metà in mano, e metà sulla tavola.*)

Cec. Cossa diavolo feu, Lucietta? Fève avanti, che spanderè il piatto, e ve macchiarè la roba.

Luc. (*si tira innanzi.*)

Rai. Guora Cecilia.

Cec. Sior.

Rai. Quanti nomi hala quella gnora?

Cec. No so guanca mi. Semo amighe; ghe digo quel che me vien in bocca.

Zan. (Sior Lissandro.) (*piano avanzandosi davanti Lucietta, e Lucietta lo spinge.*)

Lis. (Sior.)

Zan. (M'avè tradio.) (*come sopra, e Lucietta lo spinge.*)

Lis. (Per cossa?)

Zan. (Songio areute de siora Cattina?) (*come sopra.*)

Iuc. La vorla scuir una volta? (*spingendolo.*)

Zan. Eh lasseme star! (*contro Lucietta.*)

Rai. Coss'è sto tananai?

Cec. Via, sior, portè rispetto a vostra muggier. (*a Zanetto.*)

Zan. (Pazenzia. El finirà sto disnar.)

Rai. (L'è matt. A l'ho semper ditt. Ho fatt ben mi a allontanar el de mi fiola.) (*da se, mangiando.*)

Bor. (*dà la carta con le buccole a Cattina. Ella vorrebbe vedere cos'è, ma ha soggezione di suo padre.*)
(Oe!) (*piano a Cecilia.*)

Cec. (Cossa gh'è?)

Bor. (Gh'ho dà le buccole.)

Cec. (L'hala tolte?)

Bor. (No voleu?)

Cec. (Me ne consolo.)

Rai. Alinanc el sior Bortel l'è un zoven savi, e prudent, as ved ch'al ghe vol ben a so muier, siel benedett.

Cec. Coss'è, sior Lissandro, no disè gnente? Paremo morti.

Lis. Fin adesso gh'ho abuo da far. Adessadesso me metterò in vena. Deme da beber. (*gli portano da*

bere) Siori, se i me permette, el primo brindese...
ala salute de sior Gasparo.

Tut. Evviva! (*tutti prendono da bere.*)

Rai. Evviva el sior Gasper! Ma la va longa sta cth.

(1) Nol vin mai.

Lis. Adess' adesso el vegnirà.

Cec. E mi ala salute de siora Tonina.

Tut. Evviva!

Luc. (*col gotto in mano vorrebbe bere, e non sa come fare, va menando il gotto, poi si alza, e dice.*) Oh ala se bona conversazion! (*beve.*)

Tut. Evviva! (*ridendo.*)

Luc. (*quando ha bevuto scola il gotto in terra.*)

Cec. Oe! l'abito in malora. (*forte a Lucietta.*)

Cat. (*curiosa guarda le buccole sotto la tavola.*)

Rai. Coss'è quel negozi? (*a Cattina.*)

Cat. Eh gnente!

Rai. A jo vist a luser.

Cat. Le mie buccole che ho rotto giersera. (*mette in saccoccia.*)

Rai. Demle a mi, che av le farò accomodar.

Cat. Oh giusto!

Rai. Demle a mi ve digh.

Cat. Ghe le darò.

Cec. (*Vedeu?*) (*urtando Bortolo.*)

Bor. (*si vede agitato.*)

Lis. Cossa gh'ala? De le buccole da far comodar?
(*a Cattina.*)

Cat. Sior sì, gh'ho rotto el ganzo gier sera.

Lis. (*si alza, e va da Cattina.*) La me le daga a mi, che el xe el mio mestier.

(1) Cta. Termine stretto bolognese, e significa questa istoria, questa faccenda.

t'ot. Sior sì, tolè. Eh, eh. (*tosse.*)

Lis. (*Ho capio.*) Eh gnente, ho visto. Domattina, ghe le porterò comodae. (*guarda, e mette via e torna al posto.*)

Rai. A lu sì, e a mi no? (*a Cattina con un poco di sdegno.*)

Cat. Sior sì, perchè sior Lissandro xe bravo, el comoda le cosse pulito, e lu el le averave tutte precipitae. (*a Raimondo.*)

Cec. Brava, brava, pulito! (*a Cattina.*) E vu cossa feu qua incantao co fa un pandolo? (*a Zanetto.*)

Zan. Voggio andar via.

Cec. Per cossa?

Zan. No gh'ho più fame. Voggio andar via.

Cec. Se no gh'avè più fame vu, gh'ha fame vostra muggier.

Zan. Cossa m'importa mi de ela? (*disprezzandolo la.*)

Luc. E gnanca mi de vu, sior. (*colla bocca piena.*)

Cec. Oe! la ve vol tanto ben, che la se soffega.

Rai. (*Oh, oh, che matrimonj, oh oh!*) (*ridendo.*)

Lis. Qua nissun magna altro. Oe! portè via; anemo, ala segonda portada. (*i servitori levano e rimettono i piatti.*)

Rai. Gnor Lissander.

Lis. Signor.

Rai. Mi no me posso più tegnir.

Lis. De cossa?

Rai. Sto sior Gasper, sta siora Tonina?

Lis. Mi no so cossa dir. La me par una stravaganza anca a mi.

Rai. Che gh'cià intravegnù qual cossa?

Lis. Mi no crederia.

Rai. Mandem a veder da qualchedun.

Lis. Adesso manderò el mio garzon. Dov'estu? Menego.

ATTO SECONDO.

59

(*Menego sarà dentro per portar via i piatti, e Lissandro va dentro a parlargli.*)

Bor. (*distribuisce i piatti della seconda portata.*)

Cat. (Che bele buccole!) (*piano a Bortolo.*)

Bor. (Ghe piasele?) (*a Cattina piano.*)

Cat. (Sior sì.) (*piano.*)

Rai. Cossa?

Cat. De che?

Rai. Cossa disel, s'av pias?

Bor. Ghe domando se ghe piase le gallinazze.

Cat. Sior sì, che le me piase assae. (*con caricatura.*)

Bor. Xele bele?

Cat. Belissime.

Rai. Mo cossa?

Cat. Le gallinazze.

Bor. La compatissa. (*dandole una gallinazza sul piatto.*)

Cat. Lo ringrazio tanto.

Cec. Caspita, la la sa longa!

Zan. (*taglia un piatto ch'è dalla sua parte, n e mette sopra un tondo, e l' offerisce a Cattina.*) (*A ella.*) (*a Cattina.*)

Cat. Grazie. (*rifiuta.*)

Zan. La favorissa.

Cat. No dasseno.

Zan. La se degna. (*con più forza.*)

Cat. Mo no la vede, che son drio a sta gallinazza.

Zan. Co uol la vol, la lassa star. (*butta il tondo in mezzo la tavola.*)

Cec. Oe! oel sior, dove credeu d'esser? al magazzin?

Zan. La perdoua. Ho fato mal, xe vero. Ho manca de rispetto. (*si alza.*) Signori, ghe domando a tutti perdon. (*gli viene da piangere e si getta a sedere.*)

Tut. (ridono.)

Zan. (si alza, passeggia e batte i piedi.)

Cec. L'è matto sior Zanetto,

L'è matto poveretto,

L'è matto in verità. (*cantando, ma senza grand' impegno di musica.*)

Lis. Signori, compatitelo;

Che anca a mi el mi fa peccà. (*col medesimo canto.*)

Tut. (ridono, e applaudiscono, dicono bravi, e battono le mani.)

Zan. Deine da beber. (*torna a sedere, e gli danno da bere.*) Sangue de diana! se vaga a far squartar la malinconia. Ala salute... No de ela che me scofona. (*a Cecilia con rabbia.*) No de ela che no me vol per gnente. (*a Cattina patetico.*) Ala salute... de mia muggier.

Tut. Bravo, bravo, evviva!

Lis. Comandele altro? No. Tirè via, e portè el deser. (*si alza, i servitori eseguono, Lissandro parla piano col garzone.*)

Lis. Sentele! El garzon xe turnà, i conta bezzi, i xe in tel calor del negozio, i ghe domanda mille perdoni, ma per ancuo i dise cussì, che no i pol vegnir, xe la verità, Menego?

Gar. Sior sì, tal e qual.

Rai. O la 'm despiase po ben. S'a saveva csi a n' i vegniva miga vdì.

Lis. Cossa vorla far? I xe casi che nasse.

Luc. Siora, vorla che impizza il fogo?

Lis. Coss'è? S' nsoniela? (*a Lucietta.*)

Luc. Sior sì, m' insuniava.

SCENA VIII.

*Il GIOVINE del caffè con bricco, e chicchere,
e detti.*

Lis. Oh! xe qua el caffè. Lo vorle bever a tola?
(*si alza.*)

Cec. Per mi son stracca de star sentada. Lo voggio
bever in piè. (*si alza, e tutti si alzano.*)

Rai. (*tira avanti la sua sedia e lo beve a sedere.*)

Lis. Putti desparecchiè. Mettè tutto in quella credenza,
piatti, possade, biancaria, mettè tutto là, che
po' li vegnirè a tor. E ti fa quel che t' ho dito, sta
attento se mai da una bauda, o da l' altra ti vedes-
se a vegnir sior Gasparo, e se ti lo vedi da lontan,
avviseme. (*piano al garzone.*)

Gar. Sior sì, no la se indubita gnente. (*parte.*)

Lis. I ha da far tre o quattro viazi, no vorria, che
i incontrasse sior Gasparo sulle scale. i servitori spa-
recchiano, mettono tutto nella loro credenza, lev a-
no le tavole, poi partono.)

Cec. (E cussì, come vala?) (*a Bortolo bevendo il
caffè.*)

Bor. (D'incanto. La me vol ben. La xe mia. Un de
sti dì ghe la faccio domandar. Cossa diseu?)

Cec. (Sì ben, me par che la lo merita. La me piase
anca a mi, son contenta.)

Zan. (Me permettela.) (*a Cattina, volendo prender la
tazza dopo che ella ha bevuto il caffè.*)

Cat. No la se incomoda. (*la dà al caffettiere.*)

Zan. (Sangue de mi! sangue de mi! povereto mi!
povereto mi!) (*di se smaniando.*)

Cec. Cossa feu vu? no bevè el caffè? (*a Lucietta.*)

Luc. A mi el caffè?

Cec. Perchè no ghe deu el caffè a sta siora? (*al caffettiere.*)

Caf. No la ghe n'ha voiesto. (*a Cecilia ridendo.*)

Cec. Via, deghelo che la lo Beverà. (*al caffettiere.*)

Caf. Vorla, siora Lucietta? (*le dà il caffè, ed ella lo beve.*)

Cec. Ti la cognossi? (*piano al caffettiere.*)

Caf. (No vorla?)

Cec. (Tasi sa, no dir gnente.)

Caf. (Mi no parlo.) (*ridendo.*)

Cec. (No rider che te traggo sta tazza in tel muso.) (*ridendo.*)

Luc. Tolè la tazza. (*al caffettiere.*)

Caf. Pulito siora Lucietta.

Luc. Oh se savessi, son propriamente in gioia!

Caf. Il caffè lo paghela ela? (*a Lissandro.*)

Lis. No, pagherà sior Gasparo.

Caf. Non occorr'altro. (*prende la sua roba, e parte.*)

Rai. O i mi sgnori, con so boua grazia mi a fazz cont che mi, e la mia fiola as se n'andarem.

Zan. Se la me permette, averò l'onor de servirla. (*si esibisce di dar la mano a Cattina.*)

Cat. No in verità, grazie, la daga man a so muggier, che la farà meggio.

Rai. (Brava la mia fiola!)

Zan. Muggier? mia muggier...

Cec. Animo, animo, sior, semo vegnui insieme, andemo via insieme, e no ghe xe altri discorsi. (*a Zanetto.*)

Zan. Basta, averò l'onor de reverirla. (*a Cattina.*)

Rai. No che la s'incomoda, miga vidla (*a Zanetto.*)

Zan. Come? No la me vol? Un omo dela mia sorte? Cossa gh'ogio fato?

Rai. L'am perdona, servitor de lor gnori, andem.

(*prende sotto il braccio Cattina.*)

Bor. Addio. (*a Cattina così alla sfuggita.*)

Cat. Grazie dele gallinazze. (*lo saluta con vezzo.*)

Zan. Sangue de Diana! A mi sto affronto?

Cec. Seu mato? (*a Zanetto.*)

Rai. Saludè 'l sior Gasper, e ringraziel. (*a Lissandro.*)

Lis. La sarà servida. (*va a sollecitar i servitori.*)

Zan. No la me vol douca? (*a Raimondo con forza.*)

Rai. Mo . . . mo . . . Che l'am scusa. In ca mi . . .

patron . . . Mo ag dig po de no, mi.

Zan. No certo? (*con forza.*)

Rai. No, segur.

Zan. Pazienza. (*patetico.*)

Rai. (Oh el bel matt.) Servidor de lor gnori. *parte con Cattina.*

Cec. Mo andè là, che gh'avè tanto giudizio, co fa un gatto. (*a Zanetto.*)

Zan. Xe vero. Mi no gh'ho giudizio. Sala chi gh'ha giudizio? Quel sior. (*accennando Bortolo.*)

Bor. Mi? Per cossa?

Zan. Credeu che no abbia visto che avè fato le carte con quella puta?

Bor. Mi? V'ingannè, compare . . .

Zan. E per farne smattar, i me va a far passar per mario de quella martuffa. (*accennando Lucietta.*)

Luc. Come parlo, sior? Varè che sesti, ancora che me lasso vestir da Franceschina per vegnir qua a batterghe l'azzalin . . .

Zan. A mi batterme l'azzalin?

Bor. Sior sì. Ela da una banda, e mi dall'altra. E se ho parlà a quella puta, gh'ho parlà per vu.

Zan. Per mi? (*tutto allegro.*)

Cec. Sior sì, per vu, el so anca mi.

Zan. Per mi? Conteme, conteme. (*a Bortolo.*)

Bor. Andemo, che ve coaterò.

Gar. (Sior patrou. Ho visto sior Gasparo, e siora Tonina.)

Lis. (I vien?)

Gar. (I vien.)

Lis. (Da che banda?)

Gar. (Dala fundamenta.)

Lis. (Anderemo via per la corte. Xeli lontan?) (*al garzone.*)

Gar. (I ho visti a spuntar sull'altra fundamenta de là dal rio.)

Lis. (Presto, presto, va via.) (*al garzone che parte.*) Patroni, se le vol andar, anca mi bisogna che vanga, e che serra la casa.

Cec. Andemo. (*vuol andar dalla parte dritta.*)

Lis. No, andemo per de qua. Ghe xe un'altra scala; e la so barca l'ho fata vegnir ala riva dela corte, che ghe xe più comoda. La resta servida con mi.

Cec. Andemo. (*prende per mano Bortolo.*) Via, deghe man a la vostra cara muggier. (*a Zanetto, ridendo, e parte.*)

Zan. Son qua, dolcissimo mio tesoro. (*a Lucietta.*)

Luc. Che el senta. Mi no valo gnente, ma per Diana de dia! no me scambiarave. (*partono.*)

SCENA IX.

GASPARO in tabarro, *TONINA* in zendale,
RIOSA col zendale sul braccio. Vengono
senza dir gnente un poco ingrugnati.

Rio. **V**orla despoggiarse? (*a Tonina.*)

Ton. Aspettè, me despoggerò, co vorrò. Me par de

sentir un certo odor, come de roba da magnar...
Sentiu vu?

Rio. Siora sì, me par anca a mi.

Gas. (ascolta e ride.)

Ton. Ridè? Saveu qualcosa vu? (a Gasparo.)

Gas. No saveu che gh'avemo l'osteria taccada muro con muro? Le se sente spesso ste galanternie.

Ton. Sior Gasparo, mi no ho volesto dir guente per strada per non far scene; avè volesto che vegna a casa, son vegnuu, ho obbedio, perchè ai sei di iebraro xe la zornada del *voggio*. Ma adesso mo in casa se poderave saver, perchè za che son vestia, no vole che andemo a far una visita a sior Raimondo, e a siora Cattina?

Gas. Perchè ho da scriver, perchè gh'ho da far, e ancuo no ghe posso andar.

Ton. Ben, se gh'avè da far, vu gh'anderè un'altra volta, e ancuo anderò mi cola dona.

Gas. Caveve zo, e gh'anderè domattina.

Ton. Mo perchè domattina? Mo perchè no ghe posso andar adesso za che son vestia?

Gas. Cara fia, gh'ho le mie rason, perchè no gh'abbie d'andar ancuo, e perchè gh'abbie d'andar domattina.

Ton. E a so muggier, no se poderave dirghele ste rason?

Gas. (Oh povereto mi!) Ve soddisferò, ve dirò la rason. Riosa, tolè sto tabaro; portelo de là.

Rio. Sior sì, la daga qua. (Porlo esser più bon de quel che el xe? La tira i tonfi tre mia lontan.) (*prende il tabarro e parte.*)

Ton. E cussì? Cossa xe ste rason?

Gas. Aspettè, deme tempo. Sappiè che stamattina, dopo che vu se'partia, xe vegnù un amigo a dirme

che sior Raimondo, e siora Cattina i voleva vegnir stamattina a farne una burla.

Ton. Una burla! (*con meraviglia e piacere.*)

Gas. Sì, che all'improvviso i voleva vegnir a disnar da nu.

Ton. E perchè no xeli vegnui? (*con premura.*)

Gas. Vedè ben, mi giera impegnà fora de casa.

Ton. No ghe giero mi? (*con forza.*)

Gas. Vu gieri andata da vostra mare.

Ton. No me podevi mandar a chiamar? (*come sopra.*)

Gas. A quell'ora cossà ghe volevi parecchiar da disnar?

Ton. E li avè rifudai?

Gas. Gh'ho dito all'amigo la verità, e l'amigo li xe andai a avvertir.

Ton. Andè là che avè fato una bela cossa.

Gas. Cossà volevi che fasse?

Ton. Persone che gh'avevo tutta l'obligazion.

Gas. Ma giusto per questo...

Ton. Che se gh'avevo bisogno de mille, o do mille ducati da negoziar, i xe capaci d'imprestarneli senza uu interesse a sto moudo.

Gas. Carneval no xe gnaucora fenio.

Ton. Mi no gh'ho più muso de farne veder. Riosa. (*chiama.*)

Rio. Siora. (Oh cossa che ho visto!) (*da se meravigliandosi assai.*)

Gas. E per questo voi che domattina andè a domandarghe scusa da parte mia.

Ton. Mi? No ghe vago gnanca se i me strascina co le caene. (*si cava il zendale e lo dà a Riosa.*)

Rio. (Oh che cusina che ghe xè de là! Oh che diavolezzi!)

Gas. Mo per cossà, co vu no ghe gieri? Co mi giera impegnà via...

Ton. Eh lasseme star, caro vu, coi vostri impegni, lasseme star. (*cavandosi la vesta.*)

Gas. Tonina, in verità, dasseno, parè matta.

Ton. Porte de là. (*getta la veste a Riosa con dispetto.*)

Rio. Oh se la va in cusua, poveretti uu! Cossa mai halo fato el paron sta mattina? (*parte.*)

Ton. Refudar un omo de quella sorte, per andar... per andar...

Gas. Da mio compare Bernardin.

Ton. Da vostro compare Bernardin?

Gas. Siora sì, avemo serà el contratto d'una partia de quattro balle de canevi.

Ton. Caro vu, no me se parlar.

Gas. Cossa vorressi dir?

Ton. Voggio dir, che ho mandà da sior Bernardin, e che no ghe gieri.

Gas. A che ora aveu mandà?

Ton. A ora, che tutti i galantomeni xe a disnar; a vent' ore.

Gas. Se avessi mandà a vintiuna, i u'averave trovà. Semo andai a visitar i canevi in magazen.

Ton. Podè dir quel che volè, mi no ve credo nè bezzo, nè bagatin.

Gas. Credè donca che sia un baron?

Ton. Mi no so quel che siè, vedè.

Gas. Siora Toniua, no vorria che ai sie de febraro v'avesse da succeder qualch'altra cossa.

Ton. Coss'è, sior? Me manizzeressi ancora?

Gas. Son galantomo, ve stimo, ve voggio ben, ma no me tirè per i cavei.

Ton. Cossa vorressi che ghe disse a sior Raimondo, e a siora Cattina?

Gas. Feghe le nostre scuse, e invideli a disnar quando che volè.

Ton. Bisognerà veder se i ghe vorrà vegnir.

Gas. Eh no l'è cussì puntiglioso no, sior Raimondo!
Lo cognosso, e el xe un omo ragionevole, el ne
vol ben, e son seguro ch'el vegnirà.

Rio. Sior patron, ghe xe uno che lo domanda.

Ton. Chi xelo?

Rio. No so, siora, no lo cognosso.

Gas. Andè de là; sarà qualchedun per qualche inte-
resse. (*a Tonina.*)

Ton. E cussì? Me volè ficcar via? No ghe posso esser?
No posso sentir anca mi?

Gas. (Oh che pazenzia!) Diseghe ch'el vegna avanti.
(*a Riosa.*)

Rio. (Ho gusto che la resta. Cussì finirò un pochetto
de destigar. Prego el cielo che no la se n'accorza.)
(*va alla scena.*) La resta servida, patron. (*alla
scena, e parte.*)

SCENA X.

Paron MENEGO oste, e detti.

Ost. Patroni, con permission.

Gas. La reverisso, sior.

Ton. Chi elo? (*a Gaspero.*)

Gas. Mi no so. (*a Tonina.*)

Ost. Xela ela, sior Gasparo?

Gas. Son mi per servirla.

Ost. Servitor umilissimo, Me pareva, e no me pareva.
Patrona reverita. (*a Tonina.*)

Ton. Patron.

Gas. Cossa m'hala da comandar?

Ost. Prima de tutto desidero de saver se la xe conten-
ta de mi?

Ton. De cossa ? (*a Gasparo.*)

Gas. Sior, mi no gh'ho l'onor de cognosserla.

Ost. Paron Menego per servirla. L'oste qua dela Tataruga.

Gas. Ah questo che ne xe taccà ?

Ost. Per obbedirlo.

Ton. Avè fato un gran disnar ancuo, se sente dei gran odori.

Ost. Odori, e saorj. Cossa disela ? (*ridendo.*)

Ton. Mi ve digo che sto fumo per casa no me piase gnente.

Ost. Bisogna ch'el so camin fazza fumo.

Ton. Se l'ho fato scoar che no xe quattro zorni.

Gas. A monte sti pettegolezzi. (*a Tonina.*) Cossa me comanda, sior paron Menego ?

Ost. Prima de tutto ghe torno a dir, me preme de saver, se i mi paroni, se i mi avventori, xe contenti de mi. Gh'ha piaso, zela restà contenta stamattina ?

Gas. De cossa ?

Ost. De cossa ? De tuto, del disnar che gh'ho fato.

Ton. Disnar ?

Gas. Sior paron, vu me tolè in falo.

Ost. No xela ela sior Gasparo senser ?

Gas. Son mi seguro.

Ton. (*Sentimo mo.*) (*da se.*)

Ost. E po cossa serve, ho servio in sta casa, e s'ha magnà in sto tinelo.

Ton. Quando ? (*con ansietà.*)

Ost. Ancuo.

Ton. Ah ! questo xe l'odor che sentiva. (*a Gasparo con sdegno.*)

Gas. Mi ve digo, sior, che no so gnente, e che me maraveggio de vu.

Ost. E mi ghe digo, patron, che me maraveggio de ela, che ho parecchià qua in sta casa per sette persone . . .

Ton. Sette persone? (*all' oste.*)

Ost. Sior sì, sette persone, a un zecchin per testa.

Ton. Una bagattela! Ghe giera done? (*con furia all' oste.*)

Gas. Quieteve, perchè quello xe un pezzo de mato. (*a Tonina.*)

Ton. Ghe giera done? (*con più furia all' oste.*)

Ost. Mi no so chi ghe fusse, ma i m'ha dito i mi omeni che ghe giera quattro omeni, e tre done.

Ton. Tre done! (*contro Gasparo fieramente.*) L'ho dito, l'ho scoperto; sior Bernardin ah! el sior diavolo che ve porta.

Gas. Tase una volta in tanta malora. (*a Tonina.*) Sior oste, mi son un galantomo anca mi.

Ost. E mi son un galantomo anca mi.

Ton. Cossa serve che ve fe nasar? Paghelo. (*a Gasparo.*)

Gas. Tase. (*a Tonina.*)

Ton. Aveu magnà? Paghelo. (*a Gasparo.*)

Gas. Ma tasi, che te casca la testa. (*a Tonina.*)

Disè donca che avè parecchià qua sto disnar? (*all' oste.*)

Ost. Sior sì, lo digo, e lo sostegno.

Ton. No se salo?

Gas. (*guarda Tonina bruscamente, poi si volta all' oste.*) E avè parecchià per sette persone, a un zecchin a testa?

Ton. Sior Bernardin, sior Bernardin.

Ost. Cussì semo restai d'accordo.

Gas. Con chi? Chi v' va ordenà da disnar?

Ost. So sior fradelo.

Gas. Compare , vu v'ingannè , perchè mi no gh'ho fradeli.

Ton. Tute finte , tuti riziri . Sior sì , per scondese l'ha fato passar qualedun per so fradelo. (*all' oste.*)

Gas. Se pol sentir de pezo ! infamar so mario ! (*a Tonina .*)

Ost. Sior Gasparo , no so cossa dir , me despiase . . .
Se la m'avesse dito , che no la voleva che so inug-
giar s'avesse gnente . . .

Gas. Mi no voleva . . .

Ton. Sior sì , sior sì , nol voleva che mi lo sapesse .
Ma lo so , l'ho scoperto a so marzo despoto .

Gas. Orsù , son stufio de soffrir ste insolenze . (*a Tonina .*) E vu , sior , ve digo che no so gnente , che no v'ho da dar gnente , e che andè a bon viazo .
(*all' oste .*)

Ost. Me maraveggio de ela . Se no la me vol pagar ,
ghe penserò mi a farne pagar , ma intantó la me daga la mia roba , patron .

Gas. Che roba ?

Ost. Le mie posac , i mi piatti , la mia biancaria .

Ton. Sior sì , deghe quel che ghe vien . (*a Gasparo .*)

Gas. Ve digo che se' mato da ligar .

Ost. Come ? La me nega l'arzentaria ?

Gas. Mi no so quel che ve disè .

Ost. M'ha dito i mi zoveni che i ha fato logar tutto
in t'una credenza , che la credenza xe in tinelo , e
la sarà quella là .

Gas. Se' mato , ve digo .

Ton. Vardemo , vardemo . (*corre alla credenza , apre
e si vede la roba .*)

Gas. Coss'è sta roba ? (*resta attonito .*)

Ost. Putti ; vegnì avanti . Portemo via là mia roba .
(*entrano i garzoni con delle ceste , mettono via*

tutto, e l'oste va ad aiutare, ed a riscontrar le posate.)

Ton. Cossa dixela? (*a Gasparo.*)

Gas. Son fora de mi.

Ton. Sior Bernandin?

Gas. Chi ghe xe sta? El diavolo in casa mia?

Ton. Oh s'è el diavolo, gh'avè rason! Queste xe cosse che altri ch'el diavolo no le fa far.

Gas. Vu sarè stada.

Ton. Mi? via mo, da bravo.

Gas. Altri che vu no gh'aveva la chiave, altri che vu no poteva vegnir.

Ton. Vardè se se' fora de vu. Se la passion ve orba, se no savè quel che ve disè. No ve arecordè, patron, che m'avè fato lassar a casa la chiave del saggiaor? (*con sdegno.*)

Gas. (*Xe vero; son fora de mi. Vele qua tutte do. (le tira fuori.)* Ma adesso che vedo, questa no xe compagna de st'altra. Questa no xe dela nostra porta. Se'vu che me l'ha scambiada: (*a Tonina.*)

Ton. Mi, ah! mi can! mi traditor! a mi sta sorte de imputazion? a una dona dela mia sorte? Son tradia, son sassinada; e anca m'ho da lassar strapazzar? Ah poveretta mi! Son morta, la xe fenia, no ghe più remedio per mi, no gh'è più remedio per mi. (*disperata.*)

Gas. Mo via, cara fia, ho dito mal...

Ton. Sassin dela to povera muggier, traditor del mio povero cuor.

Gas. Mo via digo...

Ton. Lassemi star; lassemi star... che farò qualche bestialità.

Gas. Da una banda la gh'ha mo anca rason. Bestia

che sou mi; audarghe a dir, che l'averà ela scam-
bià le chiave.

Ost. Servitor unilissimo. (*con muso duro.*)

Gas. Patron reverito. (*con sdegno.*)

Ost. La me favorissa sette dei so zecchini.

Gas. Ma se ve digo cussì...

Ost. La senta, son galantomo, se no la li gh'ha,
n'importa, aspetterò. Basta che la prometta de dar-
mell; aspetterò.

Gas. Ve torno a dir, che mi no v'ho da dar guente.

Ost. Co l'è cussì, co la me nega el debito, la farò chia-
mar dove se convien: andemo. (*ai giovani.*)

Gas. Sentì, fermeve. Un omo dela mia sorte, farma
chiamar? Con che fondamento me fareu chiamar?

Ost. Ghe dixela poco fondamento aver trovà la mia ro-
ba in te la so credenza, in tel so tinelo? E ancora
negarme la mia arzentaria?

Gas. Zitto, anigo, no fe altro strepito. No so guen-
te... ma gh'avè rason.

Ost. No la' sa guente?

Gas. No so guente... ma ve pagherò.

Ost. Me basta cussì; quando me pagherala?

Gas. Doman sarè sodisfà; ma feme almanco un servi-
zio. Chi xe quella persona che xe passada per mio
fradelo?

Ost. Mi no lo cognosso; el m'ha fato veguir qua,
avemo contrattà in sta casa, ho mandà el disnar in
sta casa. Mi no so altro più de cussì.

Gas. Ma come giero sto mio fradelo? Grando, pi-
colo, grasso, magro, come giero vestio?

Ost. No so, non m'arecordo ben. Grando, no certo;
gnanca tanto piccolo. Me par magretto... so ch'el
gh'aveva un tabaro de scariatto, mi no so altro.

Gas. (*No crederave mai ch'el fusse Lissandro.*)

Ost. Me comandela altro?

Gas. La vostra bona grazia. Patron.

Ost. Son ai so comandi de di, e de notte, co la vol; e un'altra volta, se no la vol che so consotte lo sappia, la me avvisa per tempo, e la lassa far a mi. (*parte coi garzoni.*)

SCENA XI.

GASPARO, il CAFFETTIERE, poi RIOSA.

Gas. Eh vatte a far squartar anca til Più che ghe penso, e più gh'ho sospetto sora Lissandro. Ch'el m'abbia fato elo sta baronada? No l'è baronada, se volemo, ma la xe un'insolenza; tanto più che m'ha toccà quel siropo de mia muggier.

Caf. Patron sior Gasparo.

Gas. Cossa gh'è, sior?

Caf. Son vegnù a incontrar, se la pagherà ela quei sette caffè che ho portà qua ancuro.

Gas. Mi no so gnente. Chi ve l'ha ordenai?

Caf. So ch'ela no sa gnente, e son vegnù qua per questo. Me li ha ordenai sior Lissandro.

Gas. Gierelo qua Lissandro?

Caf. Sior sì, no halo disnà qua in compagnia?

Gas. (Oh bona! ho scoperto tuto.) Saveu chi ghe giera qua a disnar?

Caf. Sior sì, li conosso tuti a un per un. Ghe giera anca una massera vestia da lustrissima.

Gas. Conteme, conteme. Ma no vorria che vegnisse mia muggier. Andemo, ve pagherò, e me contarè per strada. (*in atto di partire, ed il caffettiere l'aspetta alla porta.*)

Rio. Sior patron. (*coi stucci e le scatole.*)

Gas. Cossa gh'è? (*torna un passo in dietro.*)

Rio. Presto, ch'el metta via sta roba. (*gli dà tutto.*)

Gas. Coss'è là? (*l'apre e vede.*) (*Questa xe marcanzia de Lissandro.*)

Rio. L'ho trovada in cassella del taolinetto de portego.

Gas. Chi ghe l'ha messa?

Rio. No so, la patrona no certo. Che el metta via, che se la patrona se n'accorze, la se buta in canal. (*parte.*)

Gas. Ho capio. Questa xe roba de Lissandro. El se l'averà desinentegada. Gh'ho gusto da galantomio; sto sior cortesan me la pagherà.

FINE DELL' ATTO SECONDO. ,

A T T O T E R Z O

SCENA PRIMA.

Notte illuminata. La prima camera, o sia sala in casa di Gasparo col solito tavolino, sul quale una candela accesa, ed una spenta.

Fin. TONINA, e RIOSA.

Ton. **C**ara vu, lasseme star. (*a Riosa con sdegno, camminando.*)

Rios. Mo de Diana! cossa gh'halo fato el patron?

Ton. Cossa ch'el m'ha fato ah! So mi cossa ch'el m'ha fatto, ina no l'anderà sempre cussì; no, uo, uo l'anderà sempre cussì.

Rios. (In verità sta volta ho paura che la gh'abbia rason. (*da se.*))

Ton. Nol gh'ha più nè amor, nè convenienza, nè discrezion.

Rios. Mo se el ghe vol tanto ben.

Ton. Che el se lo petta el so ben. Dopo quel ch'el m'ha fatto, dopo quel ch'el sa che ho scoperto, el me vede fora de mi, el sa che son dove che posso esser, e in vece de scusarse, e de cercar de quietarme, el chiappa su senza dir guente, e el va via. Ah xelo ben questo? Eh, el xe la so arma ch'el tacca!

Rios. El la vede cussì... nol s'averà osà.

Ton. Siora sì, scuselo. Ho paura che ghe tegnì terzo mi.

Rios. Cara siora patrona, come parla! No xe d'ancuo che la me cognosse. Son una putta da ben, onorata e no son capace de tegnir teizo a nissun.

Ton. No la se scalda el figà, patrona. Chi v'ha dito che andè in pressa in pressa a far tante bele faccendine in cusina, che gieri infina snada.

Rios. Voleva che lassasse la cusina intrigada?

Ton. E chi l'ha intrigada quella cusina?

Rios. Cossa vorla che sappia mi? Me par d'esser stada tuto el zorno con ela.

Ton. Cossa soggio mi dove che fussi quando che giera al taolin a laorar con mia siora mare?

Rios. Oh! che xelo un palazzo la so casa?

Ton. Sentì che tocco de temeraria, come che la respoude.

Rios. Oh vorla che ghe la diga...

Ton. La diga mo.

Rios. La me daga la mia bona licenza, che anderò via.

Ton. Oh certo, che per mi la sarà una gran disgrazia!

Rios. A ela no ghe maucherà serve, e a mi no me maucherà patrone. Manco salario, manco piatanza, e magnar quel fià in santa pase.

Ton. Sentì che battola che la gh'ha!

Rios. Fazzo quel che posso, servo con amor, e ancora i me magna i occhi... (*piangendo.*)

Ton. Via, via, a monte, patrona. Andè a far quel che avè da far, e doman se volè andar via, mi no ve tegno per forza.

Rios. Basta. Parlerò col patron... (*singhiozzando.*)

Ton. Siora! Parlerò col patron! E mi cossa songio? Avè anca tanta temerità de dirme che parlerò col patron? Vardè cossa che vol dir un mario, che tratta

mal so muggier? Nissun la stima, la servitù ghe perde el respeto.

Rios. Mi, siora...

Ton. Andè via de qua.

Rios. No me par mo gnanca...

Ton. Andè via de qua, ve digo.

Rios. No ghe stago, se credesse de andar porta per porta a domandar un tocco de pan. (*parte.*)

SCENA II.

TONINA, poi LISSANDRO in maschera.

Ton. Sior sì che la xe cussì. Mio mario ghe dà de bon in man. Ma! chi mai l'averave dito! baron! ch'el me fava tante carezze. Tolè suso. Porlo far de pezo? L'è in dolo, el va via senza dirme gnente. El se vergogna, povereto. (*ironica.*) El gh'ha rabbia che l'abbia scoperto. (*si sente battere.*) Chi diavolo xe che batte? (*va ad aprire.*) O patron, sior Lissandro. (*sostenuta col suo medesimo tuono sdegnato, senza appena guardarlo.*)

Lis. (*in maschera in bautta, ma senza il volto sul viso.*) Patrona, siora Tonina. Gh'elo sior Gasparo?

Ton. Sior no, no l'gh'è.

Lis. (Lo so anca mi che nol gh'è, e se no l'avesse visto fora de casa, per aucuo no ve sarave vegnù.) (*da se ridendo.*)

Ton. Nol ghe xe, sala, sior Gasparo. (*con sprezzatura.*)

Lis. Ho inteso. (Se podesse recuperar la mia ròba!)

Ton. Se la vol tornar... (*con dispetto ed impazienza.*)

Lis. Eh no gh'ho tanta premura! (Bisogna che in

casa ghe sia baruffe , e gh'ho paura d'esser la causa mi. Da una banda me dispiaſeria.) (*da se.*)

Ton. E credo che nol vegnirà per adesso , sala. (El me doverave capir.) (*da se.*)

Lis. Ghe levo l'incomodo , ma... la diga...

Ton. Mi no me n'impazzo , la veda , in ti interessi de mio mario .

Lis. La me parla in t'una certa maniera... (Che la sappia qualcosa de mi?) (*da se.*)

Ton. Con grazia... (*vuol andar via.*)

Lis. Vago via , ma la supplico d'una parola .

Ton. Cossa comandela? (*rustica.*)

Lis. A caso averavela visto certi stucchi , certe scatole con dele buccole , dele fiube , dei aneli?

Ton. Dove?

Lis. Qua in casa .

Ton. Chi l'ha portada sta roba?

Lis. Son vegnù per un interesse da sior Gaspare...

Ton. E avè lassà qua sta roba?

Lis. Me l'ho desmentegada .

Ton. Ho inteso . (*affannata.*)

Lis. Coss'è sta? (*timoroso.*)

Ton. Mio mario avrà regalà quele sporche che aucuo xe stae qua a disnar . No ve digo gnente. Buccole , aneli , fornimenti; el vol andar in malora , el se vol precipitar elo , e el me vol precipitar anca mi .

Lis. Le ha avudo zente a disnar aucuo? Le ha disnà in compagnia? (*ridendo.*)

Ton. Oh mi no , sior , mi no ghe son intrigada! Elo , elo s'ha fato st'onor .

Lis. Sior Gaspare xelo sta a casa a disnar?

Ton. Sior sì , in compagnia de sette persone , quattro omeni , e tre done , e mi el m'ha ficcà da mia mare .

Lis. (E no i sa gnente de mi? Mo la xe la più bela
cossa del mondo!) (*da se ridendo.*)

Ton. Ridè, ah?

Lis. Siora no, no rido. (*tenendosi.*)

Ton. Mo za, vu altri omeni gh'avè el cuor de orso,
de tigre, fodrà de pelle de can.

Lis. Me despiase de vederla desgustada; ma la mia
roba l'ho lassada qua per accidente; sior Gasparo
no me l'ha domandada, e son seguro che la se tro-
verà tal e qual.

Ton. Dove se troverala?

Lis. Adesso che ghe penso, come che gierimo là che
fevimo certi conti co sior Gasparo, me recordò, che
l'ho messa in quel cassellin.

Ton. Se la ghe xe, tolevela.

Lis. Con so bona grazia. (*apre*) Poveretto mi, no
ghe gnente!

Ton. Ghe xela?

Lis. Siora no. (*malinconico.*)

Ton. No ve l'oggiò dito? Tutto l'ha donà via, tuto,
e ghe ne fusse sta.

Lis. (Com'elo sto negozio? Che gh'abbia da perder
cussì più de cento zecchini de roba?)

Ton. Mi ho paura, che anca vu sie d'accordo con mio
mario.

Lis. Oh siora no! Ghe posso far tutt'i zureamenti del
mondo, che no semo d'accordo; ma, cara siora
Tonina, bisogna che la me ajuta.

Ton. Iu che proposito?

Lis. Sta roba che ho lassà qua...

Ton. Cossa gh'intrio mi? Domandeghela a elo.

Lis. (Son intrighà morto.) La senta... Sior Gasparo
no ghe n'ha colpa... sta roba che ho lassà qua...

Ton. Sento zente su per le scale. Oh poveretta mi 't sior Raimondo, e siora Cattina? (*affannata.*)

Lis. (Diavolo! i scoverzirà tuto. Mi no gh'ho cuor de restar. Se podesse andar via.) Tornerò; a bon reverirla. Me permettela che vaga via per de qua? (*si mette il volto.*)

Ton. Sì, sì, dove che volè... Come hoggio da far a riceverli? (*Lissandro parte per l'altra porta.*) Con che cuor hoggio da sensar quel senza giudizio de mio mario? (*va ad incontrarli.*)

SCENA III.

RAIMONDO, CATTINA, e TONINA, poi RIOSA.

Ton. **S**erva umilissima. Che grazie? Che favori xe questi?

Rai. Bondì, la mia gnora Tonina.

Cat. Sì, sì cara. Son in collera con ela, ma quel che sta ben.

Ton. No so cossa dir, la gh'ha rason.

Rai. Oh l'an ve la perdona più mia fiola! (*ridendo.*)

Ton. No so cossa dir; so che i gh'ha tanta bontà l'uno e l'altro, che i me compatirà. Mio mario... miò mario... giera impegnà da sior Bernardin. (*con pena.*)

Rai. El so; i me l'han ditt.

Cat. Ma perchè no vegnir ela almanco?

Ton. Mi, fia mia, in verità no saveva gnente.

Cat. Oh giusto! no la saveva gnente?

Ton. No da dona d'onor, che no saveva gnente.

Rai. Oh in n'l'avrà volsuda avisar, per ne disturbarla da i so interessi. Me disim un poc, la mi fiola, ol'andà ben el negozi?

Tom. *XXVIII.*

Ton. Qual negozio?

Rai. Quel ch'a fatt voster marì in ca del gnor Bernardin?

Ton. Cara ela, no la me fazzo parlar . . .

Cat. Oh via, che no i staga adesso a parlar de negozj!

Ton. Vorla sentarse qua, vorla che andemo de là?

Cat. Gnente, mi no me son gnancora sfogada, e me voggio sfogar. La dise che la me vol tanto ben, e una zornada che avevimo da star insieme, la chiappa su, e la n'impianta?

Ton. Ghe assicuro, siora Cattina, che mi no ghe n'ho colpa, e co mio mario m'ha dito sta cossa, el mio viso xe diventà una brasa de fogo. Anzi, ghe dirò la verità, mio mario voleva che vegnisse doman a domandarghe scusa, in verità no savea gnanca come far a vegnir.

Rai. Vè, se el gnor Gaspar n'a psù esser co nu sta matina, generosament al vuol, ch'a cenamen in compagnia stassera.

Ton. Dove! (*con meraviglia.*)

Rai. Oh bela! in casa vostra. Al n' ve l'ha dit sior Gaspar?

Ton. No in verità, nol m'ha dito gnente.

Cat. Gh'ala impegni? Anderala via anca stassera?

Ton. No cara siora Cattina, no la me mortifica da vantazo. Ghe digo, e ghe accerto che no poteva aver una consolazion più granda de questa. Dove l'hala visto mio mario?

Rai. Ah no lo miuga vist, el ma scrit un bigliett. Oh el m'ha fatt rider con ste bigliett! (*lo tira fuori e legge.*) Ci sarà tutta la compagnia fuori del ridicolo sior Zanetto, e della sguattera sua consorte. S'hai iera quel mat, mi an ghe vegniva.

Ton. Oh! per mi za la pol dir quel che la vol,

mi no' so gnente, mi no cognosso nissun, el fa lì
so cosse senza dirne gnente.

Cat. (Per mi me basta che ghe sia Bortoletto.) (*da se.*)

Rai. Me despias solament una cossa. (*a Tonina.*)

Ton. Cossa, sior Raimondo?

Rai. Me despias ch'el sior Gasper abbia da sufrir
una doppia speisa. Stamattine un disnar soltuos,
stassira la cena.

Ton. Tutta Venezia xe piena de sto gran disnar da
un zecchin a testa.

Rai. Un zecchin a testa! Diavol! L'è ben pur assù.

Ton. Cossa disela? Che poco giudizio! Farse magnar
el so cussì miseramente. I giera in sette a magnar-
ghe le coste.

Cat. Siora?

Rai. Dé chi parlen, gnora Tonina?

Ton. Parlo de quei che ha magnà qua stamattina.

Rai. E i mitti tutt' a mazz?

Ton. Mi digo, che chi va magnar in casa d'un omo
maridà, in scondon de so muggier, sia chi se sia,
i xe poco de bon.

Cat. Andemo a casa, sior pare. (*sostenuta, e sdegnata.*)

Ton. Coss'è stà? (*a Cattina meravigliandosi.*)

Rai. La mia cara gnora, se sem vegnù mi, e mi fio-
la in casa vostra a magnar... (*con forza.*)

Ton. Intendemose. No parlo miga dela cena, parlo
del disnar. (*con caldo.*)

Rai. È mi a ve respond del disnar. (*con caldo.*)

Cat. E se ela se fusse degnada de veguir co i l' la
mandada a chiamar, no averessimo disnà in casa
del mario, in scondon de la muggier.

Ton. Come! Come! Oh poveretta mi! Coss'è sta cos-
sa? Lori ha disnà qua sta mattina?

Rai. Avìù dà volta la mia fiola?

Ton. Spieghemose, la me perdona, mi son in t'una confusion. Lori ha disnà qua stamattina?

Cat. De cossa volevela domandarmé scusa?

Ton. Che ancuo mio mario no li ha podesti ricever, e nol gh'ha podesto dar da disnar. (*affannata.*)

Cat. Se anzi el n'ha invidà, e avemo disnà qua, e no avemo visto nè mario, nè muggier.

Ton. Gnanca mio mario no ghe giera? (*con ansietà a Raimondo.*)

Rai. Guora no, al n'i è sta, al n'i è mai veguù, e sem andadi vi senza poderl ringraziar.

Ton. Oh cossa che sento! Oh cossa che la me dise! Mio mario no sa gnente! Mio mario xe innocente! La diga, la diga, chi ghe giera? Come ela stada?... Ma... L'aspetta che qua se bira da freddo. Oe! Riosa. (*affannata, e contenta.*)

Rios. Siora.

Ton. Ghe xe fogo in tinelo?

Rios. Siora sì.

Ton. Audemo, andemo, la favorissa. (*li prende tutti due per mano.*) Che la me diga... Che la me conta... Oe! Riosa, el paron xe innocente. (*allegra.*) Sou fora de mi dala consolazion. (*corre tenendo li due per la mano, e fa traballar Raimondo, e tutti partono.*)

SCENA IV.

Riosa, poi GASPARO con seguito di varie persone.

Rios. Oh che gh'ho tanto da caro, gh'ho tanto da caro. In verità per elo ch'el xe el più bon paron che se possa trovar. No 'l parla mai, el se contenta

de tuto, sia salà, sia dessavio, quella bocca no parla mai. Mo come mai xela stada! Chi mai ha disnà ancuo in sta casa? Che ghe sia el foletto? Ho paura de sì mi. Oh povereta mi! Mi che dormo sola! Ah i averze la porta! (*si vede aprire la porta, e trema.*)

Gas. (entra solo, e parla sotto voce e lontano.)
Riosa.

Rios. Ah! el xe elo! (*prende coraggio.*)

Gas. Dove xe la patrona? (*sempre sotto voce e ridente.*)

Rios. La xe... (*forte.*)

Gas. Zitto, no ve se sentir.

Rios. La xe in tinelo, e ghe xe sior Raimondo, e siora Cattina. (*anch' ella sotto voce e ridente.*)

Gas. Bon, bon. Xela su le furie?

Rios. Oh la xe tutta contenta!

Gas. Sì? com' ela?

Rios. No la sa?

Gas. Cossa?

Rios. Ghe xe el foletto in sta casa.

Gas. Oh sì! so mi che foletto ch' el xe. Impizzè una luse, e andè a verzer el cameron.

Rios. Oh mi no, sior, che no ghie vago!

Gas. Per cossa?

Rios. Perchè gh' ho paura del foletto.

Gas. Eh via mata!

Rios. No in verità, che no ghie vago, che no me voi ispiritar.

Gas. Via, via, lassè star. Dele volte la paura pol far dei brutti scherzi. Impizzè quella luse, che anderò mi.

Rios. Cossa vorlo far a sta ora in quel cameron? (*accendendo il lume.*)

Gas. Non disè gnente alla patrona che mi ghe sia, ne disè guente del cameron, nè de sta zente che

vederè. (*va pian piano alla porta.*) Amici, vegnì avanti pian pian. (*sotto voce alla porta e si vedono entrare varie persone. Alcuni con delle placche, e delle chiocche, e delle candele di cera in una cesta, e si vedono altri con degli strumenti, violoni, violini, corni, e qualche maschera ancora.*) Vegnì con mi. (*prende il lume.*)

Rios. Coss'è sto negozio? (*a Gasparo.*)

Gas. Zitto, no disè gnente a nissun. Dove xe el mio tabarro, e la mia bauta? (*a Riosa.*)

Rios. In cameron. Sul tavolin sotto el specchio.

Gas. Zitto. (*a Riosa, e ridendo parte col lume in mano e tutti gli vanno dietro.*)

SCENA V.

RIOSA, poi LISSANDRO in maschera.

Rios. **I** sonadori! Bisogna ch'el voggia far un festin. Ghe scommetto mi ch'el vol far un improvvisata a so muggier. Siestù benedeto! Va la che ti xe una pua. Ti xe una pasta de marzapan. Lo gradirala gnanca sta rustegona? (*prende il lume in mano.*) Oh l'ha lassà la porta averta! presto presto, che la vaga a serrar. Nissun me leverà dala testa che in sta casa no se ghe senta. (*tiene in mano il candelieri, e va per chiudere la porta. Nell'atto ch'ella vuol chiudere, si presenta Lissandro in maschera col volto sul viso. Riosa si spaventa, le casca il candelieri di mano, la candela si smorza, e grida.*)
Agiuto.

Lis. Non abbiè paura, son mi. (*si avvanza.*)

Rios. Agiuto, agiuto. (*torna a gridare, si salva all'oscuro e corre via.*)

Lis. Se trovasse la porta. *(vorrebbe andar via.)*

SCENA VI.

TONINA con lume in mano, e detto.

Ton. Coss'è sta cossa, cossa xe sti zighi? Siora mascara, cossa voleu? *(fra il timore e lo sdegno.)*

Lis. Son mi, siora Tonina. *(si smaschera confuso.)*

Ton. Ah vu se', sior Lissandro? *(Ho ben gusto ch'el sia elo.) (da se ridendo.)* Cossa gh'aveu fato a Riosa?

Lis. Mi no gh'ho fato gnente. La porta giera averta, voleva chiamar, la m'ha visto in mascara, e la s'ha messo in sto boccon de paura.

Ton. Vardè che stramba! L'averà lassà ela la porta averta. *(da se e va a chiuder la porta.)* *(Se posso me voi divertir con sto cortesan.)*

Lis. Xe mo, che per dirghe la verità, giera vegnù giusto per parlar con Riosa.

Ton. Dasseno? Cossa voleu da ela?

Lis. Ghe dirò... Me sta sul cuor la mia roba; voleva domandarglie se a caso la l'avesse trovada, se la l'avesse messa in qualche logo...

Ton. Oh sior no! ve l'assicuro mi che no l'ha trovà gnente. Se la l'avesse trovada, figureve la me l'averave dito.

Lis. Bisogna donca che sior Gasparo l'abbia avuda elo.

Ton. Via, via, no v'inquietè, se el la gh'averà elo, ve la darà.

Lis. Nol xe gnancora vegnù sior Gasparo?

Ton. Gnancora.

Lis. *(Vorave andar, vorave restar.) (da se.)*

Ton. Aspettelo, ch'el pol star poco a vegnir.

Lis. Me despiase... No voria... (No so quala far.)
(*da se.*)

Ton. (El gh'ha paura d'esser scoperto, bisogna procurar de fidarlo.) Sior Lissandro, savè di quel disnar, che s'ha fato qua stamattina?

Lis. Che disnar? (*ridendo.*)

Ton. Oh via, cossa serve? So che ghe se'sta anca vu a sto disnar.

Lis. Anca mi ghe son sta? (*ridendo.*)

Ton. Sì, lo so de seguro.

Lis. Co la lo sa donca...

Ton. Sentì; no xe sta miga mio mario, savè, che l'ha fato far sto disnar.

Lis. No? (*con affettazione.*)

Ton. Oh giusto! gnanca per immaginazion.

Lis. Mo chi donca? (*con meraviglia affettata.*)

Ton. No ve poderessi mai imaginar.

Lis. Mi no saverave. (*con affettata curiosità.*)

Ton. Oe! Zitto che no i ne senta. Xe sta quella flemma malignazza de sior Raimondo. (*piano e ridendo.*)

Lis. Eh via!

Ton. Cossa diseu? Chi l'averave dito?

Lis. Lo sala de seguro?

Ton. Oh no gh'è nissun dubbio! El xe sta elo che n'ha fata sta burla... El n'ha fato parecchiar sto disnar, sperando che ghe fussimo anca nu, no l'averà savesto dove trovarne, e adesso el s'è vergognà de dirlo. Sentì, sentì, el voleva buttarla sora de vu... (*ridendo.*)

Lis. Sora de mi?

Ton. Figureve, mi che son dretta, l'ho subito dito.
Sior Lissandro, digo, che confidenza gh'halo in casa

mia de vegnirme a far sta insolenza? Fina el sior Raimondo, el xe mio santolo, el m'ha visto putela, el xe un omo vecchio, el xe quel ch'el xe, el se pol tor sta sorte de libertà. Ma sior Lissandro nol gh'ha nissuna rason de vegnir in casa nostra co no ghe semo. Le xe burle che a elo no ghe convien, el xe un omo civil, e no lo credo capace de far de ste male azion. Ah! cossa diseu? Hoggio dito ben?

Lis. Pulito, pulito. (*mortificato*) E sior Raimondo coss'halo dito?

Ton. Oe! no l'ha savesto cossa dir. El s'ha imutio. L'ha tasesto, e chi tase conferma.

Lis. Brava, brava, da galantomo! (*ridendo*) (Fin adesso la va ben. Nissun sa gnente de mi.) (*da se ridendo*.)

Ton. (Ghe l'ho piantada pulito a sto cortesan.) (*da se ridendo*.)

Lis. E sior Gasparo mo coss'halo dito elo a proposito de sto disnar?

Ton. Oh elo el l'ha dito subito che sarà stà sior Raimondo.

Lis. Se gh'ho da dir la verità, el me giera vegnù in testa anca a mi.

Ton. Oh sì! la xe natural.

Lis. E cossa mo xeli vegnui a far qua, sior Raimondo, e so-fia?

Ton. I xe vegnui, perchè li avemo invidai. Tanto xe vero, che mio mario ha scoperta de lori, che per renderghe la burla, el li ha pregai de vegnir qua stassera a zogar alla Meneghela, (1) e all'im-

(1) *Giuoco di carte così chiamato dai veneziani.*

provviso el ghe fa parecchiar una cena. Doveressì restar anca vu, sior Lissandro.

Lis. Ghe dirò: sior Gasparo per so grazia l'ha mandà al caffè dove ch'el sa che son solito a andar. E se gh'ho da dir la verità, el m'ha invidà a cenar da elo.

Ton. Oh bravo, bravo! Gh'ho gusto. Rideremo, se devertiremo.

Lis. Ma me despiase de no poder restar.

Ton. Oh no ve lasso andar via, vedè! (*ridendo.*)

Lis. Me despiase che gh'ho un impegnno.

Ton. Oh no ghe xe impegni, che tegua! E po, se ve preme i vostri aneli, e le vostre fiube, bisogna ben che l'aspettè.

Lis. Veramente i me premerave... (Ma se resto a cena xe impossibile che no se sco verza, e dopo quelle quattro fregole che l'ha m'ha dito...)

Ton. Via, animo, cayeve zoso. (*ridendo, e con forza.*)

Lis. No siora Tonina... la ringrazio, ma no posso restar. (*vuol andar via.*)

Ton. Oh no ghe andè, vedè, fora de sta porta! (*si mette colla schiena alla porta.*)

Lis. Cara ela, la me permetta. (*guarda per sortir per l'altra porta.*)

Ton. Sì, sì, vardè pur. Ho serà colla chiave. Per de là no se va più. (*si batte forte alla stessa porta, e Tonina si spaventa un poco.*) De dia! i n'ha fato paura. Chi è che batte' cussì pulito? (*apre.*)

SCENA VII.

CECILIA, BORTOLO, e detti.

Cec. **A**micì.

Ton. Chi comandeli?

Cec. No la me cognosse, siora Tonina?

Ton. Me par, e no me par.

Lis. (Se podesse sbrigarimela.) (*tenta di andarsene, ma gli altri restano verso la porta, e Tonina sta attenta, e chiude.*)

Bor. Semo boni amici de sior Gasparo, e semo pieni d'obligazion.

Cec. Certo; no gh'ha bastà favorirne sta mattina, el vol che godemo le so grazie anca stassera.

Ton. Oh cossa dixela? L'onor, semo nu che lo ricevemo.

Lis. (Sieu maledetti! Se moverali de là una volta?)

Ton. (Te cognosso, ma no ti va via.) (*da se, accennando Lissandro.*) La favorissa, no xela sior Bortolo ela?

Bor. Per servirla.

Ton. E sta siora me par de cognosserla...

Bor. La xe mia muggier.

Ton. Ah so consorte la xe! E mi dele altre volte, che ho avuda la fortuna de vederla, l'ho sempre credesto so sorela.

Cec. Dasseno! (*un poco confusa.*). (Sentiu in che impegni che me mettè? Oh stassera no vado via de qua, se la cossa no xe dichiarada!) (*piano a Bortolo.*) Sior Lissandro, patron. (*scoprendolo nel cuor del suddetto discorso, lo saluta grossamente.*)

Lis. Patrona reverita.

Ton. Andemo de là, se la se contenta. (*a Cecilia e a Bortolo.*)

Cec. Quel che la comanda. (*rasserenandosi per non darsi a conoscere.*)

Lis. Me permettela? (*a Tonina per andarsene.*)

Ton. Sior no. (*a Lissandro.*)

Bor. La perdoni, no gh'ha da esser, me par, anca sior Raimondo? (*a Tonina.*)

Ton. Sior sì, el xe de là in tinelo co la so putta.

Bor. Dasseno! xeli soli?

Ton. I xe soli, ma ghe dirò. Sior Raimondo m'ha domandà da scriver, e mi per no far chiaccole, per no disturbarlo, gh'ho dà un libro a siora Cattina, e gh'ho dito che co sior Raimondo ha fenio, le me chiama.

Bor. Andemo, andemo a teguirghe un poco de compagnia. (*offre la mano a Tonina.*)

Ton. Via, sior Lissandro, deghe man a sta signora.

Lis. Mi la sa quel che gh'ho dito.

Ton. La varda che azion che me vol far sior Lissandro. Mio mario l'ha invidà, mi lo prego, e nol vol restar. (*a Cecilia ridendo.*)

Cec. Oh el resterà, el resterà! (*lo prende per mano.*)

Lis. Ma se ghe digo... (*cercando di liberarsi.*)

Ton. L'è capace de scampar, sala! (*a Cecilia ridendo.*)

Cec. Vorave veder anca questa. (*contro Lissandro.*)

Bor. Via, sior Lissandro. (*forte.*)

Lis. Ma se no posso.

SCENA VIII.

CATTINA, poi RAIMONDO, e detti.

Cat. Oh cari! cossa fali qua co sta bela conversazion?

Bor. Oh sior Cattina patrona! (*con allegria lascia Tonina e le corre incontro.*)

Ton. Halo senio sior Raimondo? (*anch' ella si accosta a Cattina.*)

Cec. Patrona, sior Cattina. (*lascia Lissandro e corre da Cattina.*)

Cat. Debotto. (*a Tonina.*)

Lis. Se posso, me la batto. (*va verso la porta.*)

Ton. El ne scampa, el ne scampa. (*a Cecilia, parlando di Lissandro.*)

Cec. Fermelo, fermelo. (*corre e gli porta via il cappello.*)

Lis. Diavolo maledetto!

Rai. (*colla penna da scrivere in mano.*) (Coss'è stotananai?)

Ton. Sior Lissandro che vol andar via.

Cec. Ch'el vaga, se ghe basta l'anemo. (*mostrando il cappello.*)

Bor. L'è ch'el vien zoso un'acqua che la consola.

Ton. Meggio.

Cec. Oh che gusto!

SCENA IX.

*RIOSA, e detti.**Rios.* Siora patrona. (*affannata.*)*Ton.* Cossa gh'è?*Rios.* Presto la vegna in cameron, presto. (*affannata.*)*Ton.* Coss'è sta? (*intimorita.*)*Rios.* La vegna a veder cossa che ha fato el foletto. (*ridendo.*)*Ton.* Eh va via, matta.*Rios.* Che i vegna, che i vederà. (*ridendo e facendo festa.*)*Tut.* Andemo, andemo. (*Cecilia, e Tonina prendono in mezzo Lissandro, Bortolo dà mano a Cattina, Raimondo seguita, Riosa ride, e tutti partono.*)

SCENA X.

Camerone illuminato, e colle sedie accomodate
per una festa di ballo.*GASPARO in maschera in bauta, e varie maschere che passeggiano. Subito l'orchestra suona de' minuetti, poi TONINA, CECILIA, e LISSANDRO senza cappello. BORTOLO, CATTINA, e RAIMONDO. Entrano tutti maravigliandosi, e TONINA principalmente fa grandi maraviglie battendo le mani come sogliono fare le donne che si maravigliano*

di qualche cosa, e facendo delle esclamazioni di giubbilo. Ah! Ah! Coss'è sta cossa? GASPARO in un canto mascherato tenendosi ben coperto col tabarro ride, e se la gode. Tutta questa pantomima dura una parte di minuetto, poi gli stumenti si fermano, e principiano a parlare,

Ton. Cossa xe sto negozio? Chi xe ste mascare?
Coss'è sta zente? (*a tutti.*)

Cec. Poveretta! No la sa gnente. (*ironica.*)

Ton. No, da dona onorata, che no saveva gnente,
e che no so gnente.

Lis. Mi resto incantà, e stimo che no se vede sior
Gasparo.

Rai. (*passeggia sbuffando.*) Che l'am perdona, gno-
ra Tonina. (*passeggiando.*)

Ton. Coss'è, sior Raimondo? la gh'alo con mi?

Rai. L'è veira, che mi cugnà m'ha fatt jersira l'i-
stessa soverchieri, ma li l'am perdona, an la credeva
capaz.

Ton. M'intendelo che no so gnente? Credelo che sia
una dona onorata? (*a Raimondo.*)

Rai. Cattina.

Cat. Sior. (*mortificata.*)

Rai. Andem.

Cec. Eh no, sior Raimondo, za che ghe semo...

Ton. L'aspetta un momento. La lassa che sappiemo
almanco... (*a Raimondo.*)

Gas. (*da se in un canto, e ride.*)

Ton. Sior Lissandro. (*accostandosi con lui.*)

Lis. Siora.

Ton. Coss'elo sto negozio? (*con calore.*)

Lis. A mi la me 'l domanda ?

Ton. Ghe scommetteria la testa . (*a Lissandro .*)

Lis. Oh la la perderia . (*a Tonina .*)

Ton. Vorave ben saver chi ghè xe in casa mia . (*va dalle maschere ad una ad una domandando piano. Le maschere con civiltà la salutano, e fanno cenno, che non sanno niente, intanto Lissandro, e Cecilia parlano come segue, e Raimondo passeggia.*)

Lis. La diga, siora Cecilia, xela una bela figura che la me fa far, a star qua cussì come un mato ?

Cec. Vorressi el vostro cappelo ?

Lis. Se ghe par che cossì staga ben .

Cec. Deme el tabaro e la bauta, e mi ve darò el cappelo .

Ton. Oh se no me dè el tabaro e la bauta, uo gh' avè el cappelo !

Lis. Eh sangue de Diana ! Che la sia come esser se voggia . Ghe semo , steinoghe , animo . (*si cava tabarro, e bauta.*) La toga , la me daga el cappelo , e devertimose , e ballemo , che ballerò anca mi .

Cec. Bravo ! Cussì me piase . (*gli dà il cappello, prende la bauta e il tabarro, e lo dà alla scena*)

Ton. (*dopo aver fatto il giro delle maschere, arriva vicina a Gasparo.*) (*E cussì, siora mascara, se pol saver . . .*)

Gas. (*ride .*)

Ton. Oh siestù malignazzo ! Adesso ho capio . (*lo conosce.*) Senza dirme gnente ? (*piano a Gasparo.*)

Gas. Tasè ; no disè gnente a Lissandro . (*piano a Tonina .*)

Ton. Patroni , adesso ho savesto tuto . (*alla compagnia .*) Mio mario senza dirme gnente , l'ha imprestà el portego a questì che ne sta dessorà , e i xe qua tra de lori che i se deverte in fameggia .

Cec. Se pettela? (*a Tonina.*)

Ton. La tasa, che ghe conterò. (*piano a Cecilia, urtandola.*)

Lis. E nol gh'ha dito gnente, sior Gasparo? (*a Tonina.*)

Ton. Cossa diseu? Nol m'ha dito gnente. Ma col vien a casa el me sentirà. (*affettando d'esser in collera.*)

Lis. (Vorave squasi che nol vegnisse.) (*da se.*)

Rai. Anim Cattina, andem. (*risoluto.*)

Cat. Sia malignazo! (*mortificata.*)

Ton. La vol andar via? (*si accosta pian piano a Raimondo.*)

Rai. An vui ch' resta qua la mia fiola con de la zent ch'an se cognoss.

Ton. • La tasa, che la xe una burla de mio mario. (*piano a Raimondo.*)

Rai. Mo dov'el sior Gasper? (*piano, rasserenandosi.*)

Ton. • (Quela mascara là in foudi.) (*piano a Raimondo.*)

Rai. (N'occorr alter, a i ò capi.) (*piano a Tonina e va bel bello a poco a poco per non dur nell'occhio accostandosi a Gasparo.*)

Ton. Via, con licenza dei patroni della festa, che la faccia un minuetto siora Cattina.

Cat. (*guarda Raimondo pateticamente.*)

Ton. Se contentelo, sior Raimondo?

Rai. An gh'è miga sta gran premura. (*a Tonina.*)

Cec. Oh sior sì, sior sì. Mettemole in moto un pochetto. Con licenza de chi comanda. Sonadori, sonè. (*i sonatori suonano un minuetto. Cattina balla con Bortolo. Intanto Raimondo si accosta a Gasparo, siedono vicini, si parlano piano, e ridono. Tonina e Cecilia siedono da un'altra parte, parlano tra di loro, e ridono. Finito il minuetto, Cattina*

va a sedere vicina a Bortolo. Tutti applaudiscono al minuetto, e Gasparo batte le mani, e ride.)

SCENA XI.

Riosa, e detti.

Rios. Sior patron. *(forte verso Gasparo, ma da lontano.)*

Ton. Cossa voleu dal patron? Qua nol ghe xe el patron.
(a Riosa.)

Rios. Ah sì, nol ghe xe! No m'arecordava. *(ironica.)*

Ton. Cossa volevistu?

Rios. Ghe xe do maschere ala porta che vorave intrar.

Ton. Chi xele?

Rios. Mi no so, la veda, che mi no gh' ho avertito. I me ha dito che le xe do mascare omo e donna.

Ton. Chi domandeli?

Rios. Del patron.

Ton. Chi mai porli esser?

Rai. *(domanda piano a Gasparo, ed egli fa cenno che non sa niente.)*

Lis. Vorla che vaga a veder mi? *(a Tonina.)*

Ton. Sì ben, sapieme dir.

Cec. Oe! no ghe dè miga el tabarro e la bauta, vedè. *(alla scena.)*

Lis. No la se indubita, che adesso no vago via guanca se i me bastona. *(in atto di partire.)*

Rio. Oh el diga, faroggio anca mi una furlana? *(a Lissandro.)*

Lis. Sì ben, la farè con mi. *(a Riosa e parte.)*

Rios. Oh che caro mato ch'el xe! *(parte.)*

Ton. *(si alza e corre da Gasparo.)* Che voggia che ve xe vegnù de far sta chiassana?

Gas. Senteve qua, che ve conterò. (*piano.*)

Rai. (*vorrebbe levarsi.*)

Ton. No, no, che nol se incomoda. (*a Raimondo.*)

Gas. Qua, qua, ch'el senta anca el: *sono tutte tre a sedere vicini, parlano piano e ridono.*)

Cec. E cussì, cossa penseu de far? (*a Bortolo, che senta anco Cattina, ma sotto voce.*)

Bor. Cossa me consegnieu?

Cec. Mi ve digo cussì, che se tiremo de longo, ghe va dela vostra, e dela mia reputazion.

Cat. Voravela che andasse via? (*a Cecilia con passione.*)

Cec. No digo questo, ma qualcossa bisogna far. Perchè no ghe parlev a sior Raimondo? (*a Bortolo.*)

Bor. No so cosa far. Sia maledio co ho finto de esser maridà.

Cec. Voleu che ghe parla mi?

Bor. Magari!

Cat. Oh sì, cara ela!

Cec. Ma za bisognerà che m'espona mi.

Bor. Via, cossa voleu far? Per el vostro povero fratello.

Cec. Oh putti senza giudizio! (*si alza.*) Ma mi son stada una mata. (*da se, camminando.*) Sior Raimondo.

Rai. Gnora.

Cec. Con licenza de siora Tonina, e de quella mascara che no coguosco. (*ironica, e Gasparo la saluta ridendo.*) Vegnirala in tinelo a ascoltar una parola?

Rai. Mi sol?

Cec. Ela solo.

Rai. Senza mi fiola?

Cec. La xe qua... Ghe xe siora Tonina.

Rai. Ah gh'la raccomand! (*a Tonina e s'alza.*)

Ton. Ch'el ghe staga col so cuor quieto. (*s'alza, e s'incammina verso Cattina.*)

Cec. La vegna cōn mi. (*a Raimondo, passano dinanzi a Cattina, e Bortolo. Cattina abbassa gli occhi, e Bortolo si alza, e fa una riverenza a Raimondo rispettosamente, e timida.*)

Rai. Ch'al n's' incomoda. (*a Bortolo.*) Coss'al el so guor consort, ch'al me par malinconich? (*a Cecilia.*)

Cec. Ghe conterò. Gh'ho da parlar de elo? (*piano a Raimondo.*)

Rai. Oh! Ajo da sentir di guai. Am despiass. (*dasse, e parte con Cecilia.*)

Ton. Son qua con ela. (*siede vicino a Cattina.*)
Cossa gh'hala, che la me par sbattuetta? (*a Cattina.*)

Cat. Oh gnente! no in verità, gnente. (Oh come che me batte el cuor!) (*piano a Bortolo.*)

Bor. E mi! Me trema fina le gambe. (*piano a Cattina.*)

SCENA XII.

Lissandro, e detti, poi Riosa.

Lis. **S**ala chi xè? (*a Tonina ridendo.*)

Ton. Chi?

Lis. Sior Zanetto Bigolini.

Ton. Mi no lo cognosso. (*Gasparo freme, Bortolo e Cattina ancora.*)

Lis. El xe el più caro matto de sto mondo.

Ton. E la dona? (*a Lissandro.*)

Lis. (*guarda intorno.*) Sì ben, no gh'è nè siora

Cecilia, nè sior Raimondo, lo posso dir. El xe cola massera de siora Cecilia.

Ton. Chi elo sto pezzo de aseno? Xelo liogo questo de menar massere? (*si alza.*)

Lis. La se ferma. Chi fa la festa, no l'ha da saver? Co ela ha imprestà el portego, no xè più casa sua. Lucietta xe vestia co i abiti dela patrona, e la passa per so muggier. (*Gasparo fremc, e si alza.*)

Ton. Coss'è ste baronade? Me maraveggio de vu, sior.

Lis. Mo la se ferma; el xe un chiassetto de carneval.

Rios. Chi gh'ha nòme sior Bortolo?

Bor. Mi, fia. (*alzandosi con affanno.*)

Rios. Che la vegna in tinelo, che i la domanda. (*parte.*)

Bor. Vegno. (*Vago a sentir la mia sentenza.*) (*parte.*)

Cat. (*Poveretta mi!*) Me par che me vegua mal.

(*da se, e beve qualche spirito.*)

Ton. Cossa gh'hala? (*a Cattina.*)

Cat. Gnente, fazzo perchiè uo me vegna sonno.

Ton. E cussì, sior, cossa me diseu de chiassetti? Coss'è sto finzerse mario e muggier? (*a Lissandro.*)

Lis. (*guardandosi intorno.*) La xe una burla; giusto come quella de sior Bortolo, e de siora Cecilia.

Ton. Come! No i xe mario e muggier, sior Bortolo e siora Cecilia? (*con meraviglia.*)

Lis. No la sa che i xe fradelo, e sorela?

Ton. Mi! no v'arecordè cossa che i m'ha dito in portego co i se vegnui? (*con caldo fremendo.*)

Lis. No gh'ho miga badà, la veda.

Gas. (*ride e passeggia.*)

Cat. (*Oh poveretti nu in che intrigo che semo!*) (*da se.*)

Ton. Siora mascara, cossa diseu? (*a Gasparo fremendo.*)

Lis. Xelo cl patron dela festa? (*a Tonina.*)

Ton. Sior sì, sior sì, el xe el patron. (*a Lissandro*)

Lis. Sior, uo la se metta in sospetto de guente, perchè i xe tutti galantomeni, persone oneste, la xe una burla, e no gh'è guente de mal. (*a Gasparo ridendo.*)

Gas. (*fa cenno che dimandi permissione a Tonina.*)

Lis. Siora Tonina, se contentela che le vegna ste mascare? (*a Tonina.*)

Ton. Dove xe? (*a Lissandro.*)

Lis. In portego.

Ton. Chi le ha fate intrar?

Lis. Gh'ho avertò mi veramente.

Ton. Chi v'ha dà sti ordeni, sior?

SCENA XIII.

ZANETTO, e detti, poi RIOSA.

Zan. (*Senza volto, e colla bauta sotto la gola correndo innanzi dice.*) Vedendo che le s'ha desmentegà de un so umilissimo servitor, me son tolto la libertà de rassegnarghe el mio gran rispetto, e de supplicarle della so devotissima tolleranza.

Ton. { (*si guardano l'un l'altro, e non possono*

Gas. { (*far a meno di non ridere.*)

Lis. Lasselo andar via, se ve basta l'animo. (*a Gasparo.*)

Zan. Se le me permete...

Rios. Siora Cattina. (*chiamandola.*)

Cat. Me chiameli? (*a Riosa, alzandosi con ansietà.*)

Rios. I la chiama in tinelo. (*parte.*)

Cat. Vegno, vegno; co so bona grazia. (*a Tonina, correndo.*)

Zan. Dove vala? Dove vala? (*a Cattina, andandole dietro.*)

Cat. Cossa vorla saver? Che el me lassa star. (Oh co i me chiama xe bon segno!) (*parte.*)

Zan. Se la me permette, me cavo zo. (*si cava il tabarro e bautta, si guarda l'abito, e si pavoneggia.*)

SCENA XIV.

LUCIETTA in maschera, col volto sul cappello e colla bautta mal messa, RIOSA, e detti.

Rios. **L**a varda, ghe xe qua sta siora in mascara... (*introducendola.*)

Zan. (*corre a prender Lucietta.*) La me permetta, che abbia l'onor de presentarghe...

Lis. La so siora consorte. (*a Zanetto ridendo.*)

Zan. No... (*si guarda intorno se vede Cecilia o altri.*) La massera de siora Cecilia. (*sotto voce; Gasparo, e Tonina non possono lasciar di ridere.*)

Lis. Cossa gh'hoio dito? (*a Gasparo e Tonina.*)

Rios. (Siestu maledia! Varè che sporca? E mi ancora gh'ho fato tante cerimonie!)

Luc. No la ghe xe la patrona? (*a Zanetto.*)

Zan. Via, se el vostro debito, e ringrazieli. (*a Lucietta.*)

Luc. Patroni. (*fa una riverenza sgarbata.*) Grazie tanto. No avemio disnà qua stamattina? (*a Zanetto.*)

Zan. Certo, no v'arecordè?

Luc. Ceneramio anca?

Rios. (La vegna, lustrissima, la vegna in cusina, che ghe faremo una polentina.) (*si ritira un poco per rispetto dei padroni.*)

Zan. Me permettela? (*a Tonina.*)

Ton. Via, per un minuetto la se comoda.

Zan. Sonadori, sonemelo belo e lungo. Favorissela?
(*a Tonina.*)

Ton. No dasseno, mí no balo. Perchè no ballelo co
la so mascara?

Zan. La gh'ha rason. Son qua, anemo, un mennetto
gaggiardo. (*a Lucietta.*)

Luc. Oh mi no, sior...

Zan. Anemo, anemo, digo.

Luc. Se no ghe ne so.

Ton. Via da brava. (*a Lucietta.*)

Lis. Fève coraggio. (*a Lucietta.*)

Luc. Farò quel poco, che so. (*finito il minuetto,
tutti applaudiscono. Zanello si pavoneggia.*)

Lis. Animo, una furlana. (*prende Lucietta. I sona-
tori sonano. Lissando, e Lucietta ballano la fur-
lana.*)

SCENA ULTIMA.

TUTTI.

*CECILIA avanti, poi si vedono CATTINA, e
BORTOLO che si tengono per mano, e CATTINA
si asciuga gli occhi col fazzoletto, in ultimo
viene RAIMONDO.*

Cec. Bravi! bravi! Evviva chi balla... Cossa fastu
qua ti? (*a Lucietta.*)

Luc. El xe vegnù a torme, el m'ha dito che la lo
saveva. (*a Cecilia, mortificata.*)

Cec. Chi v'ha dà sta libertà, sior, che andè a casa
da mi, e che nienè con vu la mia serva? (*a Zanello.*)

Zan. Se l'ho fato, l'ho fato cole mie rason. Dov'elo sior Raimondo?

Rai. A son qua mi, per obbedirla.

Zan. E la crede che mi sia maridà?

Rai. Un galantom ne doverave mentir.

Zan. La gh'ha rason, ma no xe vero gnente.

Ton. Oh che zavaggi! Oh che potacchi! E ela, siora Cecilia perchè lassela che so mario tegna per manco sta confidenza la fia de sior Raimondo?

Cec. Vorla saver el perchè? Perchè sior Bortolo ancuo xe sta mio mario, e doman el sarà mario de siora Cattina.

Ton. Com'elo sto negozio? (*con allegria.*)

Zan. No xe vero gnente, no i sa cossa che i xe diga. E mi son qua per domandarghela a sior Raimondo.

Rai. E mi son qua per dirgh, che mi fiola l'è promessa, e che doman la sarà maridà.

Zan. Con chi, patron?

Rai. Con un galantom, che merita la mi stima, e che abbrazz come zeuer, e come mio fiol. (*lo abbraccia, Bortolo abbraccia Raimondo teneramente senza parlare, Cattina piange forte dalla consolazione.*)

Zan. Sangue de mi! cospetto de mi! No la posso tegnir.

Ton. Ma come xela stada? Conteme. (*a Raimondo.*)

Rai. La gnora Cecilia, ve le contrà li. Mi an ve poss dir gnente, v'assicur che son fora de mi da la consolazion.

Lis. Orsù, za che la cossa xe andata ben, qua bisogna cavar se la mascara, e dir le cosse come che le xe. Sta barca l'ho menada mi, e la xe arrivada a bon porto. Xe vero che sior Gasparo ha pagà el nolo, ma el xe un galautomo, el xe bon amico. Col

vegnirà ghe domandaremo scusa, e con sette zecchini dela so moneda el sugherà sta lissia.

Gas. (si leva la maschera.) Bravo compare Lissandro!

Lis. (un poco confuso.) Com'ela? Ve ne aveu per mal?

Gas. Niente, compare. Semo amici, e saremo amici.

Lis. E la mia roba? I mi scrignetti li gh'aveu vu?

Gas. I vostri scrignetti i xe in bone man. Andè da l'oste qua visin. Deghe sette zecchini del disnar de sta mattina, e el ve darà pontualmente la vostra roba, e mi ve dago de sora via la cena de sta sera, el festin, e la vostra chiave del saggiaor. *(li dà la chiave.)*

Tut. Bravo! bravo! *(a Gasparo, e danno la baja a Lissandro.)*

Lis. Gh'avè rason. Compati un chiassetto de carnaval. Pagherò volentiera i sette zecchini per la consolazion che sto tal accidente abbia prodotto la consolazion de sti do zoveni innamorai.

Zan. E mi?

Lis. E ela l'ha fato el so ballo... deghe el so tabaro e la so bauta. *(alla scena.)*

Zan. E mi resto senza muggier!

Lis. È cussì.

Zan. E anca... i me manderà via senza cena?

Ton. Sior no, sior no, poveretto! che el resta. *(a Gasparo.)*

Gas. Cossa dixelo sior Raimondo?

Rai. Per mi ch'el resta pur.

Zan. Grazie, ceumo, ballemo, devertimose, e no ghe voi più pensar.

Ton. Oe! putti, cossa feu? Vegni avanti. Aveu perso le parole? *(a Bortolo e Cattina.)*

Bor. Son confuso tra l'allegrezza, la contentezza, e el rimorso de qualche busia che ho dito, e la confusion che i m'abbia cussì ben perdonà.

Ton. Bravo! e vu fia? (*a Cattina.*)

Cat. Mi, siora . . . ghe digo . . . che me sento . . . In verità no so cossa dir.

Ton. Siori, no la pol dir gnente, ma la dise assae. No la gh'ha fià de parlar, perchè el so spìrito xe impiegà a consolar el so cuor. Lassemo che la se remeta in forza, e dopo del so incantesmo, succederà l'allegria. Intanto devertimose, ballemo, e po' andarem a cenar. Ma prima che se torna a ballar, permetteme che diga quattro parole a chi se convien.

Siori, i nostri chiassetti xe finii.

Se ve se' divertii

Tant o meglio per nu. Ma per saverlo

Come mai se pol far? Sì, benedetto

L'uso sia de Venezia. Se in teatro

Qualcosetta ghe xe che dà diletto,

Collé man, e coi piè se fa chiassetto.

FINE DELLA COMMEDIA.

SIOR TODERO
B R O N T O L O N
O SIA
IL VECCHIO FASTIDIOSO

P E R S O N A G G I

TODERO, *mercante vecchio.*

PELLEGRIN, *figliuolo di TODERO.*

MARCOLINA, *moglie di PELLEGRIN.*

ZANETTA, *figlia di PELLEGRIN e di MARCOLINA.*

DESIDERIO, *agente di TODERO.*

NICOLETTO, *figliuolo di DESIDERIO.*

CECILIA, *cameriera di MARCOLINA.*

FORTUNATA, *vedova.*

MENEGHETTO, *cugino di FORTUNATA.*

GREGORIO, *servitore.*

La scena si rappresenta in Venezia in casa di Todero.

SIOR TODERO
BRONTOLON

A T T O P R I M O

SCENA PRIMA.

Camera di Marcolina.

MARCOLINA, e CECILIA.

Marc. **E** cusì? Ghe xe caso che possa bever el caffè stamattina?

Cec. Co no la manda a torselo a la bottega, ho paura che no la lo beva.

Marc. Per cossa? no ghe n'è del caffè in casa?

Cec. Siora sì, ghe ne xe, ma el paron vecchio l'ha serrà el caffè, e l'ha serrà el zucchero sotto chiave.

Marc. Anca questa ghe xe da novo? tra le altre insolenze, che ho sofferto da mio missier, ho anca da tollerar, che el me serra el zucchero, che el me serra el caffè?

Cec. Cossa disela? più vecchio che el vieu, el vien pezo che mai.

Marc. Com'el stada? che grillo ghe xe saltà in testa? che vovada xe stada questa?

Cec. La sa, che el xe un omo, che bisega per tuto,

che brontola de tuto. L'è andà in tinelo, l'ha dà un'occhiada al zucchero, l'ha dà un'occhiada al caffè; l'ha scomenzà a dir: vardè; un pan de zucchero in otto zorni el xe deboto finio; de una lira de caffè deboto no ghe ne xe più. No gh'è regola, no gh'è discrezion. L'ha tolto su la robà, e el se l'ha portada in camera, e el se l'ha serrada in armer.

Marc. Son tanto stufà de sti stomeghezzi, che deboto no posso più. Che diavolo de vergogna! Xe tanti anni, che son in sta casa, e gnancora non son parona de gnente? e quel sempio de mio inario, grandò e grosso com' una putta da maridar, el gh'ha paura a parlar. Nol xe gnanca bon de mantegnir de caffè so muggier. Eh! per diana de dia, i gh'ha rason, che gh'ho sta fia da logar; da resto, grazie al cielo, gh'ho casa mia, e ghe vorave far veder, che no gh'ho bisogno de lori.

Cec. Per dir la verità, la xe squasi una cosa da no creder, che un omo de trentacinque, o trentasie anni, maridà, pare de fioi, con tanta intrada, con un negozio in casa, che buta, no sia paron de spender un ducato a so modo, e abbia da star soggetto al pare co fa un putelo.

Marc. Siora sì, e s'ha da veder sta mostruosità, che un capo de casa fazzo sgangolir el fio, la niora, la nezza, e se lassa po menar per el naso da un tanguaro de un fattor, che se fa la ponga per elo, e lo consegna a esser un can col so sangue.

Cec. Certo; el paron gh'ha chiappà ben voler a lu, e a so fio, e fursi al fio più che al pare.

Marc. Ma se pol dar un sempio, un alocco, una malagrazia compagna?

Cec. Disela de sior Nicoletto?

ATTO PRIMO. 113

Marc. Sì, de quella cara zoggia de sior Nicoletto, della degnissima prole de sior Desiderio, agente amorosissimo de quel orbo de mio missier.

Cec. Eh! se si ha po da dir la verità, sior Nicoletto nol xe po tanto una malagrazia.

Marc. Oh che cara Cecilia! Ve piaselo quel pampalugheto?

Cec. Cossa vorla, che el me piasa? A mi se sa, che nol m'ha da piaser... Da resto in verità dasseno...

Marc. Orsù a monte, che no voi sentir a parlar de colori. Mio missier li ha volesti tor in casa per farne despeto: e se mio mario no ghe remedierà, ghe remedierò mi. Che destrighemo sta puta, che se marida mia fia, e po troverò mi la maniera de remediarghe.

Cec. Cara siora parona, no vorave che la credesse...

Marc. I batte; andè a veder chi è.

Cec. Credo che la me cognossa...

Marc. Andè a veder chi è, ve digo.

Cec. Vago, vago. Siora sì, vago. (No ghe starave depenta in sta casa. Se no fusse per quel puto, no ghe starave gnanca se i me indorasse. (*parte.*))

SCENA II.

MARCOLINA, e poi CECILIA.

Marc. A una donna della mia sorte serrarghe tuto? No esser patrona de guente? mai un spasso? mini un divertimento? Brontolarme sina el magnar? m'hai trovà in fun gattolo? m'hai tolto senza camisa? Gh'ho dà sie mille ducati, e son civil più de lori; che i so vecchi xe vegnui co le sgalmare, e casa

114 SIOR TODERO BRONTOLON

mia xe più de cent'anni, che la gh'ha negozio impiantà.

Cec. Xe una siora, che la domanda. (*con sdegno.*)

Marc. Chi xela?

Cec. Mi no so; credo che la sia siora Fortunata. (*come sopra.*)

Marc. Coss'è, siora? Cossa xe sti musoni?

Cec. Sia malignazzo sta vita, e chi la ghe piase!

Marc. Coss'è stà? con chi la gh'aveu?

Cec. Son andata a veder chi è. I m'ha dito: tirè; ho tirà; xe vegnù el parou vecchio, e el m'ha dito un mondo de roba.

Marc. Oh! la finiremo sta musica: Sì, da quella che son, che la finiremo. Andè, andè, diseghe a quella siora, che la resta servida.

Cec. (Se el missier xe impastà de tossego, guanca la niora no xe impastada de zucchero.) (*parte.*)

SCENA III.

MARCOLINA, poi FORTUNATA.

Marc. Siora sì, nol vorave mai, che da mi vegnisse nissun. El me vuol tentar de mazo anca in questo.

Fort. Patrona siora Marcolina.

Marc. Patrona siora Fortunata.

Fort. Cossa fala? stala ben?

Marc. Servirla; e ela?

Fort. Cusi, e cusi.

Marc. La se comoda. Vorla cavar se el zendà? (*siedono.*)

Fort. Eh! n'importa; da sta stagion no l'incomoda.

Marc. Vorla un poco de fogo?

Fort. No, no, dasseno, ho caminà, no gh'ho fredo.

Marc. Gnauca mi, la veda; no tegno squasi mai fogo sotto.

Fort. Tuto xe un usarse. Co se xe usae, no se pol far de manco. Co no se se usa, no se ghe pensa.

Marc. Siora sì, siora sì, son stada usada cusì da putela, e voggio che usa cusì anca mia fia.

Fort. Cossa fala, siora Zannetta?

Marc. Ben, ben, poverazza. Dopo che l'ha avu quella malattia, in bon ora lo possa dir, la xe vegnua tanto fatta.

Fort. La diga, siora Marcolina, la vorla maridar la so puta?

Marc. Magari, che ghe capitasse una bona occasion!

Fort. Per dirghe la verità, son vegnua a trovarla giusto per questo.

Marc. Dasseno?

Fort. Gh'ho un partio per le man, che se el ghe tocca, dasseno voi che la me benelissa.

Marc. Oh! care le mie viessere! Chi xelo?

Fort. Mo a pian; avanti che ghe diga chi el xe, la me diga, se la xe in stato de maridarla.

Marc. No gh'oggi dito de sì?

Fort. Disponela ela de la so puta?

Marc. Ghe dirò: doveraye disponer so pare, ma so pare no farà nè più nè manco de quello che dirò mi.

Fort. E sior Todero?

Marc. La sarave bela, che quando xe contento el pare e la mare, el nono non s'avesse da contentar!

Fort. Mo no sala, che sti vecchi i vol esser patroni de tutto?

Marc. Siora sì, fin a un certo segno. Ma co el partio xe bon, co l'occasion xe a proposito, per cossa vorla che el diga de no voler?

116 SIOR TODERO BRONTOLON

Fort. La dota chi ghe l'ha da dar?

Marc. Ghe l'ha da dar mio missier; ma gnanca per questo nol pol miga dir de no ghe la voler dar; perchè po, ala fin dei fini, mio mario xe bonazzo, el stà a tutto, el lassa che so pare fizza tutto quello che el vol; ma co bisognasse, me basterave l'anemo de farlo parlar. De la roba in casa ghe n'è, el gh'ha la dote de so mare, ghe xe la mia, gh'ho osè in capitolo anca mi. La putta s'ha da maridar, e ca de diana! se mio missier farà el matto, ghe xe giustizia per tutti.

Fort. No, siora Marcolina; co gh'ha da esser dei strepiti, no femo niente.

Marc. Digo, cusi per dir; ma strepiti no ghe n'ha da esser, e no ghe ne sarà. Mio missier xe avaro, xe stravagante, xe tutto quel che la vol; ma l'ha sempre dito ch'el vorave, che mia fia se logasse; e da do parole che l'ha dito gier sera, mi credo che nol veda l'ora che la se marida. No miga perchè el ghe voggia ben, sala, perchè el xe un de quei vecchi, che no vol ben a altri che a se stessi, ma per liberarse da una bocca de più.

Fort. Via donca, co la xe cusi, la ghe parla.

Marc. Ghe parlerò. La me diga el putto chi el xe.

Fort. Se la sa, cossa ghe darali de dota?

Marc. Mo, cara siora Fortunata, la vol metter el carro avanti i bo. Sentimo prima chi xe el partio, e po ghe daremo quella dota, che se converrà.

Fort. Cossa gh'hala paura? che ghe propoua una persona ordenaria? Sala che sto putto che ghe propono, xe un fior, xe una copa d'oro? Sala che in sto paese no ghe xe altrettanto? Sala che el xe un mio zerman?

Marc. Oh caspita! so zerman?

Fort. Mo siora sì; cossa disela? ghe xe eccezion?

Marc. Certo che col xe so parente, nol pol esser altro che una persona civil; ma, cara siora Fortunata, per esser un bon partio ghe vol qualcossa de più.

Fort. Sala che el xe fio solo, che el gh'averà do boni mille ducati d'intrada, e che el gh'ha una carica in aspettativa? Sala che nol gh'ha un vizio al mondo, che el xe un putto che no fazzo per dir, ma el gh'ha un'aria propriamente da zentilomo? sala che el xe sior *Meneghetto Ramponzoli*, fio de sior *Massimo*, e de siora *Scolastica Caramali*?

Marc. Oh! se la me ne dirà tante, ghe dirò, siora sì; lo cognosso, son contenta, magari!

Fort. Mo magari certo, magari!

Marc. Xelo informà de sta mia putta? Salò che merito che la gh'abbia? salò che oracolo che la xe?

Fort. Oh! el sa tutto.

Marc. Salò mo anca, che la xe una putta ben fatta? che la xe un pometto de riosa?

Fort. Vorla che ghe parla da amiga? el l'ha vista.

Marc. Come? quando? mia fia no pratica co nissun; in casa mia no ghe vien nissun. (*riscaldandosi*.)

Fort. Via, via, siora Marcolina; no la vaga in collera, che no ghe xe mal. El l'ha vista al balcon.

Marc. Sotto la zelusia?

Fort. Sotto la zelusia: E el l'ha vista anca fora de casa una mattina a bon ora.

Marc. Se la va col zendà fina alla cintura.

Fort. Cossa serve? No sala? co i putti vol, no so se la me capissa.

Marc. Zanetta sa qualcossa donca.

Fort. Da quel che ho inteso; no i s'ha mai parlà; una coi occhi credo che i abbia fatto la parte soa.

115 SIOR TODERO BRONTOLON

Marc. Oh povereta mi!

Fort. Eh via, cara ela! fussele cusì tute le pute dal di d'ancuo; e fussegi cusì i puti, come che xe sto sior Menegheto!

Marc. Cara siora Fortunata, no so cossa dir: za che la xe vegnua a favorirme con tanto bon cuor, la fizza che sto negozio gh'abbia bon fin.

Fort. La diga, cara ela: cossa ghe darali de dota?

Marc. La diga ela: cossa pretenderavelo?

Fort. El puto xe una pua, xe una pasta de marzapàn, e de ste cosse nol ghe ne sa, è nol ghe ne vorrà gnanca saver. So pare, e so' mare i se rimette in mi, e quel che fazzo mi, xe ben fato. Gh'ho dito, co siora Marcolina sèmo amighe, so che siora, che la xe: la puta xe una bona puta, lassè far a mi. Mi mo, vedela, voi che andemo alla bona, mi no voi domandar, voi che la diga ela tuto quello che la pol far, e se me parerà convenientè, la me varda mi, e no la pensa altro.

Marc. Ghe dirò: mi ho portà in casa sie mille ducati. Manco de quello che gh'ho dà mi, a mia fia no i ghe poderà dar.

Fort. Bezzi contai?

Marc. S'intende. I ghe li scriverà in banco.

Fort. Siora Marcolina, nie dala parola?

Mar. Ghe dago parola.

Fort. Porla mantegnimela la parola che la me da?

Marc. Siora sì. Ghe dago parola, e son capace de manteguirghela.

Fort. Basta cusì. A bon riverirla. (s' alzano.)

Marc. Vala via cusì presto?

Fort. Vago a dar la risposta. Ma la varda ben, sala?

Marc. Cossa serve? Semio puteli?

Fort. Se veguirò col puto, me lasserà veder la puta?

Marc. Co sarà serh el contratto.

Fort. E no avanti?

Marc. Oh! la vede ben.

Fort. Gnente, gnente?

Marc. La xe una siora, che intende.

Fort. Eh! via, cara ela, che al di d'ancuo le se vede le pute. No se sta più su sti rigori, no; le se vede.

Marc. Basta, co se trata de ela.

Fort. A bon reverirla.

Marc. La diga, la metterali all'ordine pulito?

Fort. Modestamente.

Marc. No digo cossazze. Ma sala? la sa in che tempi che semo.

Fort. Vorla che el ghe spenda intoruo tuti i sie mille ducati?

Marc. Che i se faccia onor, che no i se faccia burlar.

Fort. Cara siora Marcolina, ghe xe più di che luganega.

Marc. Eh! cara siora Fortunata, al di d'ancuo chi se marida no ha da sperar de avanzar su la dota.

Fort. La diga cara ela, co la se marida ela, gh'ali fato ste gran spesazze?

Marc. Oh! per mi, fia, i ghe n'ha speso pocheti.

Fort. Vedela donca? xe segno, che tuti no pensa a un modo. Una cossa de mezzo, che staga ben, che vanga ben. Cossa occorre far tanti abiti st'anno, perche st'anno che vien, no i sia più ala moda? faremo, faremo pulito. Un bon anelo, le so zogiete, un per de abiti boni.

Marc. Merli, la veda, sora tuto merli.

Fort. Ghe sarà el bisogno. No la s'indubita, ghe sarà el bisogno. Con so bona grazia, Se vederemo.

Marc. Patrona.

Fort. Xela contenta?

Marc. Oh siestu benedetta!

Fort. Bondì, vita mia. (*si baciano.*)

Marc. Mo quanto che ghe son obbligada!

Fort. No hala dito, magari! la vederò, se sarà magari. Mi co me metto? dito fatto. Patrona. (*parte.*)

SCENA IV.

MARCOLINA, poi PELLEGRIN.

Marc. In verità dasseno una fortuna più granda no podeva desiderar. Sou segura che mia fia starà ben; so che putto che el xe, so che casa che i gh'ha. Oh per diana xe qua mio mario! ho giusto da caro, che ghe lo dirò prima a elo, e farò che elo ghe lo diga a so pare. Vegni qua mo, sior Pellegrin.

Pell. No criè, vedè, mi no ghe n'ho colpa.

Marc. De cossa?

Pell. Ho sentio in cusina, che avè crià per el zuccherò, e per el caffè... no criè con mi, che mi no so gnente.

Marc. Eh! adesso no xe tempo de parlar de stè cose. V'ho da dir qualcosa che importa più.

Pell. De ben, o de mal?

Marc. De ben, de ben.

Pell. Sia ringrazià el cielo, ho sempre paura che ghe sia del mal.

Marc. Ho maridà vostra fia.

Pell. La xe maridada?

Marc. M'intendo la xe promessa.

Pell. Chi l'ha promessa?

Marc. Mi.

Pell. Vu?

Marc. Sior sì, mi. Ve opponeressi fursi a quel che ha fatto vostra muggier?

Pell. Mi no parlo.

Marc. Lo so che in sta casa mi no son parona de gente. Ma no gh'ho altro al mondo, che sta creatura, e su la mia creatura crederave de poder arbitrar.

Pell. Xe, vero, la xe la vostra creatura, ma crederave che la fusse anca mia.

Marc. Sior sì. Gh'avè rason; ma co ye dirò a chi l'ho promessa, sarè contento anca vu.

Pell. Ben; sentiremo. Se me parerà.

Marc. Se ve parerà? Ve metteressi in testa de desfar quel che ho fatto?

Pell. Oh bella! Me disè che avè promesso mia fia; me disè che sarò contento: voleu che sia contento avanti de saver el novizzo?

Marc. Vostra muggier no xe capace de far una stramberia.

Pell. Mi no digo ste cosse.

Marc. Parè in tuna certa maniera...

Pell. Voleu che tasa? taso.

Marc. Sior Meneghetto Ramponzoli lo cognosseu?

Pell. Siora no.

Marc. E so pare, sior Massimo?

Pell. Guança.

Marc. E siora Scolastica?

Pell. Pezo.

Marc. Mo che omo scu? No cognossè nissuu, no cognossè i zermani de siora Fortunata Marsioni?

Pell. Mi no cognosso gnauca le auguelle, se no basta i Marsioni.

Marc. Se no i cognossè vu, li cognosso mi.

Pell. Benissimo.

Marc. E el partio xe bon, e la putta anderà a star da regina. Cossa diseu?

Pell. Cossa voleu che diga? Sarà cussì, come che disè.

Marc. Ve par che abbia promesso troppo a prometterghe sie mille ducati?

Pell. Per mi, co mió pare xe contento elo, son contento anca mi.

Marc. Bisogna che ghe parlè a vostro pare.

Pell. Cossa voleu che ghe diga?

Marc. Diseghè quel che v'ho dito mi.

Pell. Mo se mi sta zente no la cognosso.

Marc. Se no la cognossè vu, la cognosso mi.

Pell. Douca parleghe vu.

Marc. Mo andè là, che se' un gran omo de stucco.

Pell. Via principieu a criar?

Marc. Delle volte me faressi andar zo dei bazarì. Cossa voleu? che quella povera putta fazzo la muffa in casa? Voleu che la fazzo la vita che fazzo mi? Vostro pare diventa ogni zorno pezo che mai. Non se pol più viver, ne manca el nostro bisogno. Destrighè quella putta, sior Pellegrin, destrighè quella putta. *(con collera.)*

Pell. Ma mi cossa voleu che fazzo?

Marc. Seu un omo? o seu un pampano?

Pell. A vu cossa ve par che sia?

Marc. Sì, se' omo in quelle cosse che non m'importa; e se' un pampano, co se tratta de vu, e della vostra fameggia. Andè subito da vostro pare, diseghe che xe capità sta bona occasion, che assolutamente non se l'avemo da lassar scampar. Parleghe de la dota. Sentì cossa che el ve disè. Manco de sie mille no certo. Se uol cognosse el putto, xe giusto che el lo cognossa; son una donna ragionevole; xe giusto

che el sia informà. L'informerò mi, se bisogna; ma intanto parleghe vu. Sentì, se el xe ben disposto; rilevè, se el gh'avesse qualche difficoltà. Se el gh'ha delle difficoltà, parleghe fora dei denti, disè l'animo vostro, desmissiève, buttè via quella gnaguera... Ah! cossa diseu?... pùh! omeni senza sesto; piegore monzue. Gh'ho una rabbia intorno, che no la posso più sopportar.

Pell. Ma che sugo ghe xe mo adesso d'andar in collera?

Marc. Parlo parlo, e no me respondè.

Pell. Bisogna ben che pensa anca mi al modo, come che ho da parlar, come che me ho da introdur.

Marc. Ghe vol tanto? de cossa gh'aveu paura? al pare s'ha da portar rispetto, se gh'ha da parlar con rispetto; ma in te le cosse giuste se pol dir la so rason; perchè saveu, fio caro? chi se fa pigora, el lovo la magna.

Pell. Ben, ghe parlerò.

Marc. Parleghe subito.

Pell. Ghe parlerò... avanti che andemo a disnar.

Marc. Andè subito, ve digo.

Pell. No ghe xe sta pressa.

Marc. Destriglieve; no me fe'andar in collera, che debotto, debotto...

Pell. Via, quieteve, anderò subito. Ah povereto mi! Pregho il cielo, che me daga pazienza.) (*parte.*)

Marc. Mo che omeni, mo che omeni che se trova! El m'ha tocca a mi per mia maledetta disgrazia. Mi che son tutta spirito, tutta fogo, e lu el xe una pepa, che propriamente par, che el casca da tutte le bande. E mia fia? oh! anca ela no la pol dir de no esser fia de so pare: la xe un gneguè co fa elo. A mi no la me soneggia sicuro. Mi per diana de dia!

no me perderave, se fusse in mezzo d' un' armada .
(parte .)

SCENA V.

Camera di Todero .

TODERO, e GREGORIO .

Tod. **V**egni qua mo, sior .

Greg. La comandi .

Tod. Saveu cossa che v' ho da dir ? che son stà in
cusina , che ho visto un fogaron del diavolo , che le
legne no i me le dona , e che no voi che se butta
suso in quella maniera .

Greg. Ah ! la xe stada ela in cusina ?

Tod. Sior sì , son sta mi . Cossa vorressi dir ?

Greg. Mi no digo gnente ; ma co so vegnù a casa da
spender , ho trovà el fogo desfatto , la carne no bo-
giva , e ho crià colla serva .

Tod. No se pol far boger una pignatta senza un carro
de legne ?

Greg. Come vorla che la bogia con de stizzetti ?

Tod. Suppiè .

Greg. Mi gh' ho cento cosse da far , non posso star
miga là tutta la mattina a suppiar .

Tod. Co no ghe se' vu , che vaga a suppiar la massera .

Greg. Anca ela l' ha da far i letti , l' ha da scoar ,
l' ha da laorar .

Tod. Co no pol la massera , che vaga in cusina mia
nezza , che ghe vaga so mare .

Greg. Figurarse , se ele vol andar in cusina !

Tod. Co no ghe xe nissun , disemelo , che anderò a
suppiar mi .

Greg. (Che el suppia quanto che el vuol, mi un de sti di me la batto.)

Tod. Chi ghe xe adesso in cucina?

Greg. Per adesso ghe xe Cecilia.

Tod. Mi fio dove xelo?

Greg. Za un poco el gierà in camera co la patrona.

Tod. Coss'è sta patrona? in sta casa no ghe xe altri patroni, che mi. Cossa faveli in camera?

Greg. Giera la portiéra tirada su; cossa vorla che sappia mi?

Tod. Dove xe la puta?

Greg. In tiuelo.

Tod. Cossa fala?

Greg. La laora.

Tod. Cossa laorela?

Greg. M'ha parso, che la mettesse i dopponi a una camisa.

Tod. Sior Desiderio ghe xelo?

Greg. Sior sì, el xe in mezzà.

Tod. Cossa falo?

Greg. Mi ho visto che el scriveva.

Tod. E el puto?

Greg. El xe in mezzà co so pare.

Tod. Scrivelo?

Greg. Mi no so dasseno, no gh'ho abbadà.

Tod. Andeghe a dir a sior Desiderio, che el vegna qua.

Greg. La servo. (in atto di partire.)

Tod. E po andè in cucina.

Greg. Adesso no gh'ho gnente da far in cucina.

Tod. Mettè suso i risi.

Greg. A stà ora ho da metter suso i risi? Vorla disnar avanti nona?

Tod. Voggio disnar a l'ora solita. Ma i risi i se

mete suso a bonura, acciò che i cressa, acciò che i fazza fazon. Son sta a Fiorenza, e ho imparà là, come se cusina i risi. I li fa bogier tre ore; e mezza lira de risi basta per ottò, o nove persone.

Greg. Benissimo. La sarà servida. (Ma per mi me ne farò una piguatela a mio modo.) (*in atto di partire.*)

Tod. Vardè cossa che fa mia n'ora e mio fio, e sapiemelo dir.

Greg. Sior sì, sior sì, ghe lo saverò dir. (Tuto sì; ma la spia no la voggio far.) (*parte.*)

SCENA VI.

TODERO, poi DESIDERIO.

Tod. Nissun fa gnente in sta casa. Mio fio xe un alocco; le done no gh'ha giudizio. Se no fusse quel bon galantomo de sior Desiderio, povereto mi! Son vecchio; certe fadighe non le posso più far. Gramo mi, se nol fusse elo! el xe un omo attento, el xe un omo fedel, el xe nato in tel paese, dove che son nato anca mi; el xe anca, alla lontana, un pochettin mio parente: avanti che mora lo voggio beneficar. Ma no voggio miga per beneficalo el privarme mi. Son vecchio, xe vero, ma posso viver ancora dei anni assae; ghe n'è dei altri, che xe arrivai al cento e quindese, ai cento e vinti, e no se sa i negozi come che i possa andar. Troverò ben mi la maniera de beneficalo senza darghe un bezzo del mio. Velo qua. No voi per altro, che el creda che gh'abbia bisogno de elo; no voi che el se in-superbissa. Lo voggio beneficar; ma voi che el laova, e che el se sfadiga.

Des. Son qua, cossa me comandela?

Tod. Aveu senio de metter zo la scrittura?

Des. Ghe son drio, ma no ho podesto gnancora fenir.

Tod. Cossa diavolo feu? In cossa ve perdu? No se guente?

Des. La dise, che no fazzo gnente, me par de far qual cossa, e più de qualcossa. Mi a Rialto, mi in piazza, mi a palazzo, mi a scuoder, mi a pagar...

Tod. Via, via; andemo drio fin domattina?

Des. Mo, caro sior Todero...

Tod. Sior Todero, sior Todero! Una volta ve deguevi de dirme sior paren.

Des. La compatissa; me par, secondo el bon ordene mercantil, che le inconbenze che la m'ha onorà de darne...

Tod. Chi magna el mio pan m'ha da respettar.

Des. La m'ha onorà de ammetterme alla so tola...

Tod. Ma mi son el paron.

Des. L'ha avù anca la bontà de dirme che sèmo un pochetto parenti.

Tod. Se fussimo anca parenti più de quel che sèmo, son paron, e voggio esser trattà da paron.

Des. Benissimo. Da qua avanti ghe dirò sior paron.

Tod. Dove xe vostro fio?

Des. In mezzà, che copia le lettere.

Tod. Gh'halo voggia de far ben quel putto?

Des. Mi me par de sì.

Tod. E mi ho paura de no.

Des. Vizj nol ghe n'ha certo.

Tod. Se nol ghe n'ha, el ghe ne pol aver.

Des. Mi no so cossa dir, mi nol lasso praticar con nissun.

Tod. Quanti anni gh'halo?

Des. Disdott'anni.

Tod. Maridelo .

Des. Con che fondamento vorla che lo marida ?

Tod. Lo mariderò mi .

Des. Caro sior paron, certo che se ela volesse, la poderia darghe stato, la poderia far la sorte de quel povero putto .

Tod. Sior sì, lo mariderò mi .

Des. Ma senza impiego chi vorla mai che lo toga ?

Tod. Lasseme el pensier a mi .

Des. No credo mai che la ghe vorla dar una putta ordenaria. Semo pover omeni; ma gnauca per questo...

Tod. Tasè là .

Des. No parlo .

Tod. Saveu, chi ghe voggio dar ?

Des. Mi no saverave .

Tod. Mia nezza .

Des. Siora Zanetta ?

Tod. Sior sì. Mia nezza Zanetta .

Des. Oh ! se contenterali so sior pare, e so siora mare ?

Tod. Sou paron mi .

Des. La vedrà che nasserà dei sussurri .

Tod. Són paron mi, ve digo .

Des. Mi la me compatissa, no voi che per causa mia...

Tod. Seu stufio de star con mi ? Gh'aveu voggia che ve manda a bon viazo ?

Des. Mi no so cossa dir. Ela sa, ela vede, la faza ela; mi me remetto in ela .

Tod. Mia muggier m'ha dà sie mile ducati. Mia niora ha portà in casa sie mile ducati. Xe giusto che anca mia nezza gh'abbia sie mile ducati .

Des. Caro sior Todero...

Tod. Coss'è sto sior Todero ? sì ben che mia nezza sarà muggier de vostro fio, credeu de no averme da dir sior paron ?

Des. Sior sì, tutto quel che la vol.

Tod. (Per adesso lo voggio tegnir un poco basso.)

Des. E cossa vorla che fazza mio fio?

Tod. Che el tenda al mezzà, che el se arleva sotto de vu, perchè a una vostra morte el me possa servir, come fe vu.

Des. (El gh'ha intenzion che mora avanti de elo.)

Tod. Tegnirò la dota in-tel mio negozio; ve pagherò el tre per cento; el pro della dote servirà, per pagarme le spese della nuggier.

Des. E come vorla che i se vesta?

Tod. No xeli vestii? Vedeu sta velada? xe undes'anni, che me l'ho fata, e la xe ancora che la par nova.

Des. E se vegnirà dei putei?

Tod. No parlè altro, no me secchè. Ho pensà a tutto, ho previsto tutto. Credo che me cognossè, credo che lo sappiè che no son un can; che no son un spilorzo; diese ducati più, diese ducati manco... no varderò de spenderli, se bisogna.

Des. Diese ducati più, diese ducati manco?

Tod. Andè in mezzà, andè a fenir de metter zo la scrittura, e stè zitto e no parlè co nissun. Mia nezza sposerà vostro fio.

Des. Mi no so cossa dir. (Orsù, mi fazzo conto de lassar correr. Se el ghe dà la puta con sie mile ducati de dota, co la sarà fata, la discorreremo.)
(parte.)

SCENA VII.

TODERO, poi PELLEGRIN.

Tod. Sior sù, in sta maniera no dago fora i bezzi dela dota. Za la puta, se la sta in casa, bisogna che la mantegna, e obbligo pare e fio a star con mi, e a servirme, come voi mi. Se nasserà dei fioi, qual cossa sarà. Se i sarà maschi, i vegnirà grandi, i me servirà. I manderò fora in tei miei loghi, i me servirà da fattori. Co Desiderio no sarà più bon, i starà in mezzà con Nicoletto. Xe meggio sempre aver in casa de la zente de cuor.

Pell. Sior pare, patron.

Tod. Sioria.

Pell. Se la se contenta, ghe vorave parlar.

Tod. Coss'è, sior? piove?

Pell. Per cossa?

Tod. Chi v'ha insegnà la creanza de vegnir a parlar con vostro pare col cappello in testa?

Pell. La compatissa. (*si cava il cappello.*)

Tod. Cossa gh'aveu da dirme? Qualche strambazzo de vostra muggier?

Pell. Sior no, ghe vorave parlar de mia fia.

Tod. Cossa ghe casca a quella scempia?

Pell. Perchè mo ghe diselo scempia?

Tod. Perchè la xe una scempia, e perchè son paron de dir quel che voggio. Gh'hala gnente in contrario, patron?

Pell. Mi no digo gnente.

Tod. Cossa volevi dirme de vostra fia?

Pell. Ghe saria una bona occasion de logarla.

Tod. La xe logada.

Pell. La xe logada?

Tod. Sior sì, fe conto che la sia maridada.

Pell. Senza che mi sappia guente?

Tod. In sta casa comando mi.

Pell. E mia muggier lo sala?

Ton. La lo saverà, quando vorrò mi.

Pell. Caro sior pare, no voria che nascesse qualche desordene.

Tod. Che desordene voleu che nassa?

Pell. Mia muggier ha promesso la puta a un certo Menegheto Ramponzoli.

Tod. Vostra muggier l'ha promessa? E gh'avè stomego de soffrirlo? E gh'avè tanta poca prudenza da dirlo? Da quauto in qua le done hale da torse sta libertà de comandar, de disponer, de prometter le fie? A vu le ve la pol far, che se un pezzo de giazzo vestio da omo; ma mi no la tegnirò. Comando mi, e son paron mi, la voggio maridar mi. E vu, sior, cossa diseu?

Pell. Mi no digo gnente. Me despiase per mia muggier.

Tod. Diseghe che la vegna a parlar con mi.

Pell. La diga, sior pare, poderavio almanco saver, chi xe el nozizzo, che l'ha destinà per mia fia?

Tod. Lo saverè co me parerà a mi.

Pell. De`diana! finalmente po son so pare.

Tod. E ini son el pare del pare, e son paron dei fioi, e son paron dela nezza, e dela dota, e dela casa, e de tuto quel che voggio mi. (*parte.*)

Pell. Oh povereto mi! adesso sì stago fresco. Cossa dirà mia muggier? son tra l'ancuzene, è el martello. No so quala far. M'anderave a sconder, m'anderave a butar in canal. (*parte.*)

SCENA VIII.

Camera di Marcolina.

MARCOLINA, poi FORTUNATA.

Marc. **B**rava siora Fortunata! la xe tornada presto.
Me portela dele bone nove?

Fort. Per mi bonissime. E ela che nove me dala?

Marc. Oh! no gh'ho dit, cara ela? Ho parlà con mio mario, e el xe contentissimo.

Fort. E el vecchio?

Marc. Al vecchio ghe xe andà a parlarghe so fio, e za senz'altro la fazza conto che la cossa sia fata.

Fort. La puta sala gnente?

Marc. Siora sì, no vorla? ghe l'ho dito subito. Oh poverazza, la s'ha messo a pianzer dala contentezza!

Fort. Possio vederla mi siora Zanetta?

Marc. Oh! cossa che la dise, la chiamo subito.

Fort. La diga. Ho menà con mi una persona. Me dala licenzia, che la fazza vegnir avanti.

Marc. Che persona xela?

Fort. Eh via, siora Marcolina!

Marc. Ah furbacchiotta! ben t'ho capio.

Fort. Se no fussimo avanzai, come che semo, no me torave sta libertà.

Marc. Via, via, no xe sottoscritto el contratto, ma i xe promessi in parola; la lo fazza vegnir, che la xe patrona.

Fort. Lo chiamerò; intanto la fazza vegnir la puta.

Marc. La farò vegnir. Ma me par che voggia la convenienza, che el parla prima con mi.

Fort. Sì, sì, la gh'ha rason; dasseno la gh'ha rason, Adesso ghe digo ala dona, che la lo chiama. (*s'acosta alla scena.*)

Marc. No crederave mai, che mio missier fasse qualche scena. Veramente la xe vegnua siora Fortunada più presto che no credeva. Basta, son mi in te l'impegno, e nassa quel che sa nasser, la mia parola la gh'ha da valer.

Fort. La vederà se el xe un puto de sesto.

Marc. I soi coss'ali dito?

Fort. Oh! contentissimi. I xe fora de lori dalla contentezza.

Marc. Quando gh'ali intenzion de voler dar la man?

Fort. Oh! credo mo, che i gh'abbia gusto, che quel che s'ha da far, el se fazzo presto.

Marc. Per mi, più presto che i fa, i me fa più servizio.

Fort. Velo qua, velo qua. Cossa disela?

Marc. Pulito, dasseno, el me piase.

Fort. Che el resta servido, sior Menegheto.

SCENA IX.

MENEGHETTO, e dette.

Men. **P**atrone mie riverite.

Marc. Serva umilissima.

Fort. Vedela, sior Zerman? questa xe siora Marcolina, mare de siora Zanetta, che sarà la so sposa.

Men. Confesso non esser degno de sta fortuna. Son pieno di debito con siora Zermana, che s'ha compiasso de procurarme sto onor, e poderò chiamarme felice, se arriverò a meritarme el so benigno compiacimento.

134 SIOR TODERÒ BRONTOLON

Marc. Veramente la fortuna xe mia d'aver un zenero cussì cortese, e sarà fortunada mia fia d'aver un sposo cussì gentil e compito.

Men. La prego. (*vuol prender la mano a Marcolina per baciargliela.*)

Marc. Cosse fala?

Men. La supplico. (*come sopra.*)

Marc. Non la s' incomoda.

Men. La permetta un atto del mio rispetto, e la se degna de accettarme, no solamente per zenero, ma per fio.

Marc. (*Propriamente el me intenerisce.*)

Fort. Sentela, siora Marcolina? cossa gh'hoggio dito?

Marc. Certo, el xe pien de spirito, e de bona grazia.

Men. La prego de no confonderme con troppa bontà.

Marc. Me despiase che mia fia . . . se volemo, gh'ha del talento, ma no la xe gnancora . . . come sarave a dir desmissiada.

Men. Eh! la xe zovene; avvezza a star retirada, le idee xe ancora confuse; col tempo le se svilupperà.

Fort. Oh sì! la gh'averà un bon maestro; la se farà.

Marc. La senta. Bona la xe certo. Per bona ghe la dago, e ghe la mantegno.

Men. Co la xe bona, de più no saverave desiderar. Cossa ghe xe de meggio a sto mondo della bontà, della pase, della bona armonia?

Marc. (*Oh, siestu benedetto! Parlo quell'alocco de mio marit.*)

Fort. Mo via, siora Morcolina, la ne faccia sta grazia, la lassa che riverimo siora Zanetta.

Marc. Zanetta, vien de qua, fia mia.

SCENA X.

ZANETTA, e detti, poi PELLEGRIN.

Zan. Cossa comandela?

Fort. Patrona, siora Zanetta.

Zan. Patrona.

Fort. (Ah! cossa ve par!) (a Meneghetto.)

Men. (Più bella ancora dareute, che da lontan.) (a Fortunata.)

Marc. (Cossa distu? te piaseło.) (a Zanetta.)

Zan. (Eh, nol me despiase.) (a Marcolina.)

Marc. (E sì so, che ti l'ha visto dell'altre volte.) (a Zanetta.)

Zan. (Mi? quando?) (a Marcolina.)

Marc. (Sì, sì, careta, non parlemo altro.) (a Zanetta.)

Fort. (Via, diseghe qualcossa.) (a Meneghetto.)

Men. Permettela che abbia l'onor de umiliarghe la mia servitù? (a Zanetta.)

Zan. Patron riverito.

Men. E po, permettela che possa congratularme con mi medesimo de l'acquisto che son per far de una sposa piena de tanto merito e de tanta bontà? che possa assicurarla della mia stima, del mio amor, e del mio rispetto?

Zan. Cgnosso la mia ignoranza, e me vergogno a no saver responder come vorria. Mi no posso dir altro, se no che la ringrazio de la so bontà; che la prego de compatirme, e che farò de tuto per meritarme el so compatimento e el so amor. (a Meneghetto.)

Fort. (Via, via, no la s'ha portà tanto mal.) (*a Meneghetto.*)

Men. (Siora sì, se ghe vede una verità, un'innocenza; la gh'ha 'un non so che, che me penetra, che me pol.)

Marc. Oh! vegnì qua, sior Pellegrin.

Pell. Chi elo sto sior?

Marc. El novizzo de vostra fia.

Pell. (Oh povereto mi!)

Men. El pare dela mia sposa? (*a Fortunata.*)

Fort. Sior sì, giusto elo el xe.

Men. La permetta che abbia l'onor...

Pell. Grazie, grazie, patron. (Senti una parola.) (*a Marcolina.*)

Men. (Cussì el me riceve? Mi no capisso gnente.)

Marc. Cossa gh'è? (*agitata a Pellegrin.*)

Pell. (Mio pare no vol; el la vol maridar elo, el dise che el l'ha promessa, el cria, el strepita; se el sa, se el vien de qua, povereti nu!) (*a Marcolina.*)

Marc. (Zitto, che no i sappia gnente, per amor del cielo!)

Fort. Coss'è? Ghe xe qualcosa da novo? (*a Marcolina.*)

Marc. Eh! gnente, gnente. Anderà tuto ben.

Fort. Via donca, sior Pellegrin, za che el xe qua, che el daga parola anca elo a sior Meneghetto de darghe so fia, e de darghe sie mille ducati de dota, come semo restai d'accordo.

Pell. Mi no so gnente.

Marc. Come! no savè gnente? (*a Pellegrin.*)

Pell. No so gnente, e no ghe ne voi saver gnente.

Fort. Siora Marcolina, cossa xe sto negozio?

Marc. Mi ho dà la parola, e mi la manteguirò.

SCENA XI.

GREGORIO, e detti.

Greg. Sior patron, siora patrona, el patron vecchie xe in tute le furie. El voleva vegnir de qua. El correva, el xe cascà, el s'ha fato mal a una man. Son corso per agiutarlo, e el m'ha dà una spenta, che el m'ha tratto da qua a là. No so cosa el gh'abbia, mi ho paura, che el diventa mato.

Marc. (Presto, andè de là, vardè, tegnìlo che nol vegna de qua a far strepiti, che nascerà un precipizio.) (*a Pellegrin.*)

Pell. (Vedeu, siora? no ve l'hoggio dito?) (*a Marcolina.*)

Marc. (Causa vu, che no gh'avè spirito, che no gh'avè condotta, che gh'avè paura a parlar.)

Pell. (Sì, causa mi! magneme ancora, che gh'avè rason. Andemo, vegni via con mi.) (*a Gregorio, e partono.*)

Fort. Andemo, sior Meneghetto.

Marc. No so cosa dir, son cussì mortificada, che no gh'ho fià da parlar.

Fort. La compatissa; la sa cosa che gh'ho dito. Avanti de impegnarse se varda, come che se se impegna.

Marc. Siora sì, quel che ho promesso, son donna-capace de mantegnirghelo.

Fort. Chiaccole, senza fondamento! Andemo via de qua sior zeriman.

Marc. Se i vol andar, mi no i posso tegnir. Ma questo xe un affronto che la me fa.

Fort. L'affronto l'avemo riceveto nu, patrona.

Men. Me despiase in te l'anema un contrattempo de sta natura. Attribuissio tutto ala mia sfortuna. Bisogna che el cielo no l'abbia destinada per mi. Pazienza! ghe son umilissimo servitor:

Marc. Patron. (*sostenuta.*)

Men. Siora Zanetta, prego el cielo che ghe daga maggior fortuna.

Zan. Oh! caro sior, mi son una povera desfortunada. (*piangendo.*)

Fort. Andemo, andemo. (*a Meneghetto.*)

Men. Oh Dio! la pianze. (*a Fortunata.*)

Fort. Me despiase, ma no so cossa farghe.

Men. Cara siora, la supplico de perdon. Da cossa mai xe nate ste novità? ghe xe obietti contra la mia persona? xe tolta de mira la mia fameggia? credeli che el mio stato, e la mia condizion me fazza esser indegno de imparentarme con lori?

Marc. Nissuna de ste cosse, sior. Mio mario, e mi semo persuasi de elo, de la so casa, de la so condizion, e sora tutto de la so proprietà, e de la so bona maniera. Ma el satiro de mio missier, ambizioso de voler comandar...

Fort. Mi l'ho prevista, siora Marcolina, e la sa che ghe l'ho dito, e ghe l'ho replicà, e ela ha abuo da dir...

Marc. Siora sì, mi son la stramba, mi ho fatto el mal, e gh'ho torto mi.

Zan. E mi poverazza, torrò de inezzo. (*piangendo.*)

Men. Mo via, possibile che no ghe sia rimedio? Tute le cosse a sto mondo le gh'ha qualche difficoltà. Par che no se possa conseguir una bona fortuna senza l'accompagnamento de qualche spasemo, de qualche travaggio. Specialmente in tei matrimoni ghe xe sempre qualche disturbo, e po le cosse se

giustae; quel pochetto de amaro, che s' ha sofferto, fa parer più dolce la consolazion delle nozze.

Fort. (Mo va la, fio mio, che ti gh' ha un discorso che t' innamori.)

Marc. Che i me daga tempo, e i vederà se son capace de dir, de far e de mantegnir.

Men. Tempo; la dise benissimo, tolemo tempo. Mi no gh' ho sta pressa de maridarme. Mi ho determinà a farlo, più per condescender ai mii genitori, che per propria mia volontà. Adesso che ho abù la fortuna de cognosser sta puta, me par che el cuor me stimola a farlo; e se dovesse aspettar, e patir, e sfadigar per averla, me par che sia tutto ben impiegà per el mèrito de un tal acquisto.

Marc. Cossa diseu, Zanetta?

Zan. No so cossa dir. No posso far altro, che raccomandarme al cielo, perchè el me conceda sta grazia.

Fort. Zerman, se vede ben che sè innamorà.

Men. Ghe par che sia innamorà? co la lo dise ela, sarà cussì. Mi in verità no so dirlo, perchè non ho mai fatto l'amor. Subito che ho pensà a maridarme ho desiderà d'esser capace de voler ben: sta signora me dà in tel genio, e me par che se la fusse mia, ghe vorave ben. Vedo che la me compatisse, che la me varda con qualche bontà, che la se rammarica per causa mia, e no la vol che corrisponda al buon cuor, no la vol che spera dal tempo la nostra quiete, la nostra consolazion? Me raccomando alla prudenza della mare, me raccomando alla bontà della fia, dependèrò dai so ordini, dai so comandi, e ghe son umilissimo servitor. (*parte.*)

Fort. Cossa disela, siora Marcolina?

Marc. Digo cussì, che se credesse de restar in camisa,

voggio certo e seguro, che el sia mario de mia fia.

Fort. El cielo ghe conceda la grazia: De sti putti, fia mia, ghe ne xe pochetti. La senta: la gh'ha rason, che el xe mio zerman, da resto son vedoa... e per diana de dia! no me lo lasserave scampar.
(*parte.*)

Zan. Sentela, siora mare?

Marc. Andè, andè, fia, e racomandevè de cuor.

Zan. Oh! son tanto desfortunada, che ho paura che nol me tocca. (*parte.*)

Marc. Sì, se el cielo vorrà, el sarà too, e el ciel l'ha da voler, perchè el cielo vol le cosse giuste, e xe giusto che a una bona putta ghe abbia da toccar la grazia de un bon mario.

FINE DELL' ATTO PRIMO.

ATTO SECONDO

SCENA PRIMA.

Camera di Todero.

TODERO, poi GREGORIO.

Tod. Oh che spuzzetta! prometter la fia senza dir-melo a mi? senza voler dipender da mi? Chi son-gio mi? el cuoco? el sguatero? el facchin de casa? Ghe farò veder chi son. Adesso son in impegno de farghela veder, se m'andasse la casa. Oe, gh'è nia-sun de là. (*chiama.*)

Greg. Cossa comandela?

Tod. Audè a chiamar Nicoletto.

Greg. La servo.

Tod. Chi ghe xe in cusina?

Greg. El patron.

Tod. El patron? chi elo el patron?

Greg. Ho falà, voleva dir el fio del patron.

Tod. Cossa falo Pellegrin in cusina?

Greg. El xe sentà al fogo, e se scalda e el suppiar.

Tod. Sì, nol xe bon dà far altro che da suppiar. Ane-mo, via, andeme a chiamar Nicoletto.

Greg. La servo subito. (*parte.*)

Tod. Gran disgrazia aver un fio bon da gnente!

Eh, n'importa, n'importa. Xe meggio cussì. Xe meggio che nol sappia gnente, piuttosto che el sappia troppo. Cussì comando mi, son patron mi, lu e so muggier i ha da dipender da mi, e mia

142 SIOR TODERO BRONTOLON

nezza la voggio maridar mi. Cossa falo costù, che nol vien? Velo qua, velo qua. Voi, che el sposa avanti che quella spuzzetta arriva gnanca a saver cou chi ho destinà de sposarla.

SCENA II.

Nicoletto, e detto.

Nic. (*G*h' ho una paura co vegno a parlar co sto vecchio, che me trema le bule in corpo.)

Tod. Via, vegnì avanti. Cossa feu là incantà?

Nic. Son qua. Cossa comandela?

Tod. Aveu fenio de copiar le lettere?

Nic. Deboto.

Tod. Deboto, deboto! no la fenì mai.

Nic. Fazzo quel che posso. (*tremando.*)

Tod. (Se vede che el gh' ha tema de mi.)

Nic. (Cossa che anderave via volentiera!) (*scostandosi un poco.*)

Tod. Vegnì qua.

Nic. Son qua. (*si accosta.*)

Tod. Che mestier gh' averessi intenzion de far?

Nic. Cossa vorlo che diga? mi no saveria cossa dir.

Tod. Ve piase star in mezzà?

Nic. Sior sì.

Tod. Staressi volentiera con mi?

Nic. Sior sì.

Tod. Scrivereu? lavorereu? imparereu?

Nic. Sior sì.

Tod. Sior sì, sior sì; no savè dir altro che sior sì. (*con sdegno.*)

Nic. (*si ritira con timore.*)

Tod. Vegnì qua. (*dolcemente.*)

Nic. (*si accosta con timore.*)

Tod. Ve voleu maridar?

Nic. (*fa segno di vergognarsi.*)

Tod. Via, respondè. Ve voleu maridar?

Nic. Oh cossa che el dise! mi maridarne?

Tod. Sior sì; se volè maridarve, mi ve mariderò.

Nic. (*vergognandosi fa dei risetti.*)

Tod. Anemo, respondeme; sì, o no?

Nic. (*ride più forte storcendosi.*)

Tod. Voleu, o no voleu?

Nic. Se el disesse dasseno!

Tod. Sior sì, digo dasseno: e se volè, ve mariderò.

Nic. Per cossa me vorlo maridar?

Tod. Per cossa, per cossa? co digo de maridarve, no
avè da cercar per cossa.

Nic. Salo gnente sior pare?

Tod. El sa, e nol sa; e co vel digo mi, son paron
mi, e chi magna el mio pan, ha da far quel che
voggio mi.

Nic. Oh bela! el me vol maridar?

Tod. Sior sì.

Nic. Quando?

Tod. Presto.

Nic. El diga. Chi me vorlo dar?

Tod. Una puta.

Nic. Bela?

Tod. O bela, o bruta, la torrè come che la sarà.

Nic. (*Oh! se la xe bruta, mi no la voggio.*)

Tod. Cossa diseu? (*con sdegno.*)

Nic. Gnente. (*con timore.*)

Tod. Co saverè chi la xe, gli' averè da caro.

Nic. La cognossio?

Tod. Sior sì.

Nic. Chi xela?

Tod. No ve voggio dir gnente; e vardè ben, de quel che v'ho dito, no parlè co nissun, che se parlè, povereto vu.

Nic. Oh! mi no digo gnente a nissun.

SCENA III.

CECILIA, e detti.

Cec. Sior patron.

Tod. Cossa gh'è? coss'è stà? cossa voleu? cossa me vegnua a seccar?

Cec. Via, via, nol vaga in colera. Manco mal che in te la so camera ghe vegno manco che posso.

Tod. Faressi ineggio a filar.

Cec. Ho filà fin adesso.

Tod. Ve pesela la rocca, che no la podè portar da una camera all'altra?

Cec. Me par mo anca de far...

Tod. Manco chiaccole. Cossa seu vegnua a far in sta camera?

Cec. Son vegnua a dirghe da parte de so siora niora...

Tod. (Manco mal, che no l'ha dito dela patrona.)

Cec. Che se el se contenta, la vorave veguirghe a dir do parole.

Tod. Diseghe che adesso no posso, che gh'ho da far.

Cec. Do parole sole...

Tod. No posso, ve digo, andè via de qua.

Cec. Ben ben, nol vaga in colera: ghe dirò che nol pol. (*in atto di partire.*)

Nic. (Oè; v'ho da parlar.) (*piano a Cecilia.*)

Cec. (Se vederemo.) (*a Nicoletto, e parte.*)

Tod. Dove xe vostro pare?

Nic. El giera in mezzà, che el scriveva.

Tod. Aspetteme qua fin che torno.

Nic. Staralo un pezzo?

Tod. Starò fin che vorrò mi. Aspetteme e no ve parti. (Voi tornar a parlar con so pare, voi concluder, voi stabilir, voggio destrigarine. Mia niora me vol parlar? Sior sì, m'immagino cossa che la me vol dir. Che l'aspeta che marida so fia, e po che la me parla, quanto che la vol. (*parte.*))

SCENA IV.

NICOLETTO, poi CECILIA.

Nic. Oh bela! el me vol maridar. La xe ben curiosa! Mi ho paura ancora che el burla. Magari! che el disesse da seno. Sangue de diana, se me marido, ho da saltar tant'alto, dall'allegrezza!

Cec. Nicoletto. (*sulla porta.*)

Nic. Oe Cecilia, senti.

Cec. Gh'è pericolo che el vegna?

Nic. El xe andà in mezzà da mio pare.

Cec. Se el me trova qua, povereta mi.

Nic. Eh! col va in mezzà, el ghe sta un pezzo.

Cec. Cossa me volevi dir?

Nic. Voleu che ve ne conta una bela?

Cec. Via, mo contemela.

Nic. Ma vardè ben, vedè, no disè gnente a nissun.

Cec. Oh! mi no parlo.

Nic. Indivinè mo. Sior Todero el me vol maridar?

Cec. El ve vol maridar? (*con ammirazione.*)

Nic. Sì, anca per diana che el me vol maridar.

Cec. Eh via, che ve burla.

Nic. Nol burla gnente, nol burla. El me l'ha dito, el me l'ha confermà, el me l'ha tornà a dir. Anzi

Tom. XXVIII.

146 SIOR TODERO BRONTOLON

mi no voleva creder, e el m'ha fina crià, perchè no credeva.

Cec. Mo me contè ben una cossa granda!

Nic. Ah, cossa disea? pareroggio bon, co sarò maridà?

Cec. Salo gnente vostro sior, pare?

Nic. Sior Todero m'ha dito de sì, che el lo sa.

Cec. E chi gh'halo intenzion de darve?

Nic. No so; nol me l'ha volesto dir.

Cec. Ve maridereu volentiera? (*mortificata.*)

Nic. De diana! mi sì, no vedo l'ora.

Cec. No savè chi sia la novizza, e no vedè l'ora de maridarve?

Nic. El m'ha dito che la cognosso, che co saverò chi la xe, gh'averò da caro.

Cec. Vu no andè in casa de nissun; done in sta casa no ghe ne vien. Col dise che la cognossè, parerave che la novizza avesse da esser in casa.

Nic. Che la fusse siora Zanetta?

Cec. Uh che diavolo de bestialità! Figurarse, se a vu el ve daria una so pezza!

Nic. Oe Cecilia, ghe sarave pericolo che fussi vu?

Cec. E se fussi mi, ve despiaserave?

Nic. Magari! Oh magari, oh magari!

Cec. Sentì, no stè a far fondamento dele mie parole, ma se poderave anca dar. El patron xe cussì de quel temperamento, che sempre el brontola, che sempre el cria; ma mi so che nol me vede mal volentiera. Qualche volta el m'ha dito, che son una doneta de garbo. Xe quattro mesi, che nol me dà el salario, e ogni volta che ghe lo domando, el me dise. Lassa che te lo suna; lassa, lassa che te voi maridar.

Nic. Cussì el ve dise?

Cec. Sì, anca verenta i mi occhi, che el me l'ha dito.

Nic. Lassa, lassa, che te voi maridar?

Cec. Lassa, lassa, che te voi maridar.

Nic. Mo la sarave ben bella!

Cec. Gh'averessi gusto, Nicoletto?

Nic. Mi sì, per diana! E vu' gh'averessi gusto?

Cec. Oh, se savessi quanto beti che ve voggio!

Nic. Varè, vedè! per cossa no me l'aveu mai dito?

Cec. Percchè son una puta da ben, e le pute no le ha da parlar de ste cosse, co no le gh'ha speranza de maridarse.

Nic. Adesso mo gh'averè speranza de maridarve?

Cec. Mi sì, vedè; se ho da dirve la verità, gh'ho tanta fede che l'abbia da esser cussì.

Nic. Oh, che cara Cecilia!

Cec. Cossa diseu? oh chi l'avesse mai dito!

Nic. Oh, che cara muggier! (*le vuol toccare una mano.*)

Cec. Via, sior sporco, tegnì le man a casa.

Nic. Oh, se sè cattiva, mi no ve voggio.

Cec. Co sarà el so tempo, no sarò cattiva.

Nic. Vien zente.

Cec. Oh povereta mi!

Nic. Eh! xe Gregorio.

Cec. Zitto, zitto.

Nic. Mucchi, mucchi.

SCENA V.

GREGORIO, e detti.

Greg. **N**icoletto, andè da basso in mezzà, che el paron ve chiama.

Nic. Vago, vago.

Cec. Oe, sentì: caro vu, no ghe disè gnente al paron, che m'avè trovà qua. (*a Gregorio.*)

Greg. Eh, no abbiè paura, no parlo. Fazzo co i altri quel che me piaserave che fusse fatto con mi. (*parte.*)

Nic. Vago a sentir cossa che i me dise.

Cec. Sì, fio, andè. Pol esser che sapiè qualcossa de più. Vardè ben, no me menzonè: se i ve parla de mi, mostrè de vegnir da la villa, e co savè qualcossa avviseme.

Nic. Sì ben, ve conterò tutto. Sangue de diana! sangue de diana! sangue de diana! (*parte saltando.*)

Cec. I fa ben a maridarlo a bonora. I putti co no i se marida, i chiappa delle pratiche, e i se desvia. Siestu benedetto! Adesso el xe un colombin. Me toccheràlo a mi? Oh! mi gh'ho bona speranza, seguro. El cuor me dise de sì, e co'l cuor me dise una cossa, nol fala mai. (*parte.*)

SCENA VI.

Camera di Marcolina.

MARCOLINA, e PELLEGRIN.

Marc. **S**enti, el la pol slongar vostro pare; ma scapolarla, no certo. L'anemo mio ghe lo voggio dir. Gnanca ascoltarne nol vol? Cossa songio mi? Una yillana? una massera? Cussì el me tratta? Co sta insolenza? co sto disprezzo? E vu gh'avè tanto cuor de veder strapazzada vostra muggier?

Pell. Me dava de maraveggia, che no gh'avesse da intrar anca mi.

Marc. Cussì no gh'intressi! Cussì no ghe fussi! Cussì no v'avessio mai visto, nè cognossù!

Pell. M'avesselo negà mio pare, piuttosto che mardarme!

Marc. Mi mi son stada negada.

Pell. E mi certo, ho bù una gran fortuna a sposarve.

Marc. De mi de cossa ve podeu lamentar?

Pell. De gnente.

Marc. De gnente, certo de gnente; e se disessi all'incontrario; saressi un ingrato, un busiario, un omo dé cattivo cuor. Che disturbi v'hoggio dà in tanti anni che son vostra muggier? M'hoggio mai lamentà de la vita miserabile che ho dovesto far? hoggio mai preteso gnente de più del puro necessario per mantegnirse? Vostro pare coss'halo speso per mi? ché abiti m'halo fato? Quella povera putta gh'hala altro intorno che delle strazette, che gh'ho dà mi? Songio una de quelle che ghe piasa i bagordi, i divertimenti? vaghio mai fora de la porta? gh'hoggio visite in casa? gh'hoggio conversazion? songio gnanca patrona de beber un caffè, se me ne vien voggia? E pur ho sempre soportà e soporto, e no digo gnente. Perchè soporto? perchè son una dona discreta, perchè son una dona d'onor. Vedo anca mi, che quel benedetto vecchio xe d'un natural, che bisogna soffrir, chi no vol che nassa dei criminali. Ma che nol me tocca la mia creatura. Soffrirò tutto; ma no soffrirò mai, che el me la marida a so modo, senza gnanca che sappia chi el ghe vol dar. La xe le mie vissere. No gh'ho altro ben a sto mondo, no gh'ho altre consolazion che quelle care raise; e co penso che i me la vol tor, co penso che i me la pol negar, che i me la pol sassinar, me sento proprio che i me schioppa el cuor. (*piange.*)

Pell. Via, cara muggier, no pianzè, no ve désperè. Pol esser, che sior pare la voggia maridar ben. No savemo gnancora a chi el gh'abbia intenzion de volerla dar. Cara fia, quieteve. (*si asciuga gli occhi.*)

Marc. Eh! caro mario, vostro pare savè chi el xe. Co se trattasse de sparagnar, ho paura che nol varderia de precipitarla.

Pell. Gnancora no se pol dir cussì. Aspettemo, sentimo cossa che el dise. Sentimo chi el ghe-vol dar.

Marc. Sentì; meggio de sior Meneghetto, no certo. Se lo cerchemo cola candeletta, no ghe troveremo un mario compagno. Un puto civil che gh'ha del soo, che sta ben; un fio solo, zovene, de bona grazia, che sa, che intende, che gh'ha giudizio, dove diavolo lo voleu trovar?

Pell. Xelo solo al mondo? no ghe pol esser dei altri?

Marc. Ma pussibile che no se possa gnancora arrivar a saver chi sia colù, che vostro pare s'ha cazzà in testa de volerle dar?

Pell. Un zorno el se saverà.

Marc. Sior sì, tiremo avanti cussì, e intanto se perderà l'occasion. Sentì, sior Pellegrin, mi ve parlo schietta. Savè in che impegno che son. Ho dà parola, e el mio decoro voria che la mantegnisse; ma sono una dona tanto discreta, e ho da far con zente tanto pulita, che se la mia puta no restasse pregiudicata, per scansar i strepiti, i susurri e le disunioni, vorave anca inzegnarne de remedjarghe, e de cavarme con reputazion.

Pell. Sì, sicu benedetta! Sè sempre stada una dona de garbo, e in sta occasion son seguro, che oporterè da par vostro. Cara muggier, se me volè ben...

Marc. Se non ve volessi ben, no averave sofferto quel che ho sofferto.

Pell. Lo vedo, lo cognosso, anca mi. Un zorno respireremo, no v'indubitè. Mio pare xe vecchio assae.

Marc. Eh, vostro pare, fio caro, el gl'ha intenzion de seppellirne quanti che semo.

Pell. No so cossa dir; che el viva fina che el cielo vol.

Marc. Che el viva pur; mi no ghe auguro la morte; ma vorave che el pensasse che ghe semo anca nu a sto mondo; che el xe patron, ma per questo no l'ha da tiranueggiar. Vorave che el pensasse che se' so fio; che se el gl'ha bisogno de aiuto, non l'ha da servirse dei atrani, e lassarve vu in tun canton; e che se el gl'ha voggia de far del ben, el primo ben el l'ha da far al so sangue.

Pell. Vu parlè da quella dona che sè. Chi sa! pol esser che se scambia le cosse. Usemoghe sto rispetto, mostremoghe ubbidieuza in questo.

Marc. In cossa?

Pell. Lassemo che el la marida elo sta putta.

Marc. Se el la mariderà ben, volentiera, se no, ghe salterò ai occhi co fa un basiliscò. Butterò sottosora Venezia, o che creperà elo, o che creperò mi.

Pell. Mo via, Marcolina, no ve stè a iurabbiar.

SCENA VII.

CECILIA, e detti.

Cec. Sior Pellegrin, la vaga in mezzà da basso, che el patron la chiama.

Pell. Vago. (Chi sa che nol me diga qualcosa?) (a Marcolina.)

Marc. Sentì se el ve parla; e se no, parleghe vu.

Andè co le bone, procurè de cavarghe de bocca chi xe sto partio che el gh'ha per le man.

Pell. Sì ben, farò el possibile de saver. (Chi sa! Mi gh'ho speranza che tutto abbia d'andar ben.)
(parte.)

SCENA VIII.

MARCOLINA, e CECILIA:

Marc. **D**isè, saveu dove che staga de casa siora Fortunata?

Cec. Siora sì, la stà qua su la riva del vin.

Marc. Metteve su la vesta e el zendà; andè da siora Fortunata, reverila da parte mia, diseghe che me premeria subito de parlarghe. Diseghe, se la pol favorir da mi, se no, che anderò mi da ela.

Cec. Siora sì, subito. La diga, siora patona, ghe vorave confidar una cossa.

Marc. Su che particolar?

Cec. Su un particolar mio de mi.

Marc. (Vardava se la saveva qualcossa sul proposito de mia fia.) Via, destrigheve, che me preme che andè a farlo sto servizio.

Cec. Ma la prego de no dir gnente a nissun.

Marc. Che bisogno ghe xe? co no s'ha da parlar, mi no parlerò.

Cec. La senta: el paron vecchio el vol maridar Nicoletto.

Marc. El vol maridar Nicoletto? come l'aveu savesto?

Cec. Ghe dirò tutto, ma cara ela, no la diga gnente a nissun.

Marc. Mo via, cossa serve? diseme, come l'aveu savesto?

Cec. No vorave che qualcedun me sentisse. (*va a guardare.*)

Marc. (Poveretta mi! Che a quel vecchio ghe fusse vegnù in testa la bestialità de darghe mia fia!)

Cec. La senta. Nicoletto me l'ha confidà elo.

Marc. Elo ve l'ha confidà? cossa v' halo dito?

Cec. Eh, m' ha dito cussi, che sior Todero lo vol maridar.

Marc. E chi gh' halo intenzion de volerghe dar?

Cec. Se no l'audasse io collera mi ghe lo diria.

Marc. In collera? Ho d'andar in collera? Gh' intrio mi in sto negozio, che ho da andar in collera?

Cec. Se volemo, la ghe pol intrar, e no la ghe pol intrar..

Marc. (Me vien un freddo dalle ongie dei pì fin alle raise dei cavei.)

Cec. La senta. Pol esser ancora che fala; ma da quel che m' ha dito Nicoletto, e da quello che mi posso congetturar, credo certo de no m' ingannar.

Marc. E cussi, se pol saver chi fa sia?

Cec. Se gh' ho da dir la verità, gh' ho pensier d' esser mi.

Marc. Vu?

Cec. Siora sì, mi.

Marc. (Oime! me xe tornà el fià in corpo.)

Cec. Ghe lo confido, perchè so che la me vol ben, e la gh'averà da caro, che anca mi sia logada.

Marc. Ma diseme, cara vu, con che fondamento vorlo mio missier maridar sto putto?

Cec. Mi no so po, i ghe penserà lori; so che lo sa anca sior Desiderio..

Marc. E quella volpe vecchia de sior Desiderio, che in materia del so interesse xe fursi pezo di mio missier, che pretende de esser nostro parente, che disna

a tola con mi, se contenterà che so fio sposa una cameriera, che no gh'ha dota, che no gh'ha guente a sto mondo?

Cec. Cala ela, se no gh'ho dota, gh'ho dell' abilità, e anca mi gh'ho dei parenti, che xe civili al pari de sior Desiderio; e anca qualcossetta de più.

Marc. Ma lo saveu de certo, che i voggia maridar Nicoletto, e che vu siè quella che i ghe vol dar? Cosa v'halo dito? come v'halo parlà?

Cec. Ghe dirò, co xe andà da basso el paron, el m'ha chiamà Nicoletto, e el dise... No savè, el dise, sior Todero me vol maridar. Digo mi; dasseno? sì dasseno, el dise. Digo mi, digo mi, chi ve vorlo dar? el dise: no so; el disè. El m'ha dito che la cognosso, che col saverò, gh'averò da caro. Oh! digo, vu no cognossè nissun, bisogna che la novizza sia in casa. El dise... bisogna; el dise. Digo mi, digo, se fusse mi quella? Magari! el dise. Oel! el gh'ha un gusto inatto, e anca mi in verità son contenta.

Marc. E no gh'avè altro fondamento, che questo?

Cec. Oh! la senta, la senta: sala quante volte che el paron m'ha dito, che el me vol maridar?

Marc. V'halo mai parlà de Nicoletta?

Cec. Oh giusto! no sala che omo che el xe? el xe capace de chiamarme dal dito al fatto, e dirme, sposelo, che voi che ti lo sposi. Oel se el me lo dirà, e mi lo sposerò.

Marc. Ben, ben, ho inteso.

Cec. Ghe despiase che me marida?

Marc. Andè, andè dove che v'ho dito.

Cec. De diana! mi son vegnua a parlarghe col cuor averto...

Marc. Andè, ve digo, andè subito, che me preme.

Cec. (Mo che rustegona! oh la xe pezo de so missier! Ghe zogo mi, che la gh'ha 'invidia, perchè no se marida so fia.) (*parte.*)

SCENA IX.

MARCOLINA sola.

Oh no ghe vedo chiaro in sto negozio! Cecilia xe un pezzo che la gh'ha voggia de maridarse, e la se va taccando su i specchi. Da quel che la m'ha dito bisogna che i abbia parlà de maridar Nicoletto; ma no gh'è niissuna rason de creder, che i ghe voggia dar una serva. Ghe scommetterave la testa, che quel vecchio mato de mio missier, ha dà volta al cervelo a sto segno de immaginarsè de poderghè dar la mia putta; e quel temerario de Desiderio xe capaissimo de darghe sotto, e da stuzzegarlo a costo del precipizio de sta fameggia. Mai me xe passà per mente tal cossa: averia pensà a tutte le cose del mondo, fora che a questa; ma el discorso de Cecilia me fa sospettar, e el mio sospetto no xe senza rason. El dise che el l'ha impromessa, e no l'ardisse de dir con chi: Vedo la confidenza, che el gh'ha co sta zente; so che l'è superbo; ma che la superbia ghe passa quando che se tratta dell'avarizia. So che l'è capace de tutto, e no sarave una maraveggia, che el fusse anca capace de strapazzar el so sangue, e de sassinar una nezza. Ma no, no la gh'anderà fatta. Fin che sti occhi xe averti, sto gusto no lo gh'averà. Finalmente son mare, sulla mia creatura gh'ho rason de parlar anca mi, e se la legge no vol che sia patrona la mare de maridar

a so modo una fia; nissuna legge pol obbligar una mare a lassarla sacrificar.

SCENA X.

PELLEGRIN, e detta.

Pell. (Sen stordio; no so in che mondo che sia.)

Marc. E cussì, sior Pellegrin, gh'avemio gnente da novo?

Pell. Gnente. (Se ghe lo digo, la va in bestia contra de mi.)

Marc. Aveu parlà con vostro sior pare?

Pell. Siora sì, gh'ho parlà.

Marc. Cossa volevelo?

Pell. Gnente... cussì... el m'ha domandà... se sè in collera; cossa che ghe volevi dir...

Marc. Poverazzo! va sè el più bon omo del mondo. Se vede che le busie no le savè dir. V'halo parlà della puta?

Pell. Sì bea; el m'ha anea parlà della puta.

Marc. V'halo dito che el la vol maridar?

Pell. El m'ha dito che el la vol maridar.

Marc. Mo via, no ve fe tirar le parole fora de bocca. Cossa v'halo dito?

Pell. Cussì, che el la vol maridar.

Marc. V'halo dito chi el ghe vol dar?

Pell. No, nol me l'ha dito.

Marc. Eh sì, che el ve l'averà dito.

Pell. No, ve digo, nol me l'ha volesto dir.

Marc. Zurelo mo, che nol ve l'ha dito.

Pell. Cossa serve che zura? co ve digo che nol me l'ha dito.

Marc. Vedeu? se' un busiaro.

Pell. Perchè mo songio un busiaro?

Marc. Perchè mi so che el ve l'ha dito.

Pell. Come lo podeu saver? giera la porta serada.

S'ha parlà in fià; co no gh'avè el foletto, che ve lo diga, no podè saver.

Marc. Sior sì, gh'ho il mio foletto, e el foletto m'ha dito tuto.

Pell. Eh via, buttè a monte sti puttelezzi.

Marc. Anca sì, che ve so dir el con e il ron de tuto quel che avè dito, e che avè parlà?

Pell. Mo dirave ben, che gh'avè el foletto dasseno.

Marc. Se ve dir quel che so, sareu capace de negarme la verità?

Pell. No; se sentirò che andè a segno, ve prometo de dirve tuto.

Marc. Ve impegneu da galantomo, da omo d'onor?

Pell. Da galantomo, da omo d'onor.

Marc. El novizzo, che ha destinà a mia fia sior misier, xe el degnissimo sior Nicoletto.

Pell. Come diavolo l'aveu savesto? (*maravigliandosi.*)

Marc. (Ah pur troppo l'ho indovinada!)

Pell. Cossa diseu de sta bela novità?

Marc. Diseme prima vu, patrou, cossa aveu risposto a sta bela proposizion.

Pell. No so gnente. Se m'ha giazza el sangue, che no gh'aveva fià da parlar.

Marc. Ma pur qualcosa averà bisognà che disè; i v'averà obligà a responder qualcosa.

Pell. Figurarse; ghe giera là mio pare, sior Desiderio, el puto; se diseva gnente gnente, le giera cosse da precipitar.

Marc. Avè sempre tasesto donca?

Pell. Credeu che no parlerò?

Marc. Parlerè n'è vero? parlerè, co no ghe sarà più

tempo de poder parlar. Povera dona mi! Possibile che abbia da nasser sto caso? Possibile che su i mi occhi i me vegna a portar via la mia creatura? no, no i me la porterà via. No, cani, no, sassini, no, traditori; el mio sangue no me lo lasserò strapazzar; le mie carne, me la defenderò mi, me la defenderò mi la mia zoggia. Che i vegna, se ghe basta l'anemo, che i vegna a dirme de menarmela via; i troverà una vipera, un basilisco, un'anema desperada. (*agitandosi*.)

Pell. Mo via, muggier... (*accostandosi*.)

Marc. Lasseme star.

Pell. Muggier, digo.

Marc. Andè via de qua.

Pell. Mo no me fe desperar.

Marc. Son più desperada de vu.

Pell. Oh povereto mi!

Marc. Oh cielo aginteme per carità!

SCENA XI.

FORTUNATA, e detti.

Fort. **C**oss'è creature? cossa xe sta?

Marc. Goente, fia, gnente; la se senta. Deghe una carega. (*a Pellegrin*.)

Pell. Siora sì, subito. (*porta una sedia a Fortunata*.)

Fort. Son qua, siora Marcolina, cossa me comandela?

Marc. Cara ela, la perdona se l'ho incomodada.

Fort. Oh cossa disela? gnente affatto. Vorave esser in caso de poderla servir.

Marc. Via, sior Pellegrin, se avè da far, andè, che sta signora ve dà licenza.

Fort. Per mi, che el se comoda pur.

Pell. (Ho inteso, no la me vol.) *Patrona.* (a *Fortunata.*)

Fort. Patron riverito. (a *Pellegrin.*)

Pell. (Mia muggier no me vol. Mio pare me magna i occhi, anderò a serrarme in soffitta.) (parte.)

SCENA XII.

MARCOLINA, e FORTUNATA.

Marc. **M**i veramente l'aveva mandada a incomodar per una rason; ma adesso ghe n'ho diese, che m'obbliga a pregarla, a sconzurarla de assistermi, de no me abbandonar.

Fort. Cara signa Marcolina, son qua in quel che posso con tutto el cuor. Veramente giera andada un pochetto in collera; ma ho po pensà che ela no ghe n'ha colpa, e quel puto m'ha tanto savesto dir, che no so per lori cossa che no farave.

Marc. Aveva giusto a caro de saver da ela, co l'è andà via de qua, cossa che l'ha dito; se l'ha preteso de cavarse con civiltà, o se el gh'ha veramente per la mia puta quella premura che el mostrava d'aver.

Fort. Ghe attesto e ghe protesto, che un putto più schietto e più sincier nol gh'è, nol ghe xe sta, e nol ghe sarà. No hala sentio? el xe pronto a soffrir, a aspettar...

Marc. El punto sta, signa Fortunata, che più che stemo faremo pezo. Ghe xe delle cosse per aria con quel mio missier... Se ghe disesse tuto, la se metteria le man in ti cavei.

Fort. La diga; senza che buttemo via le parole tra

ela e mi, che mi za la sa che no posso concluder gnente, parlaravela volentiera un' altra volta col putto?

Marc. Magari, che el cielo volesse!

Fort. Se la vol, el xe poco lontan. Co xe vegnù la so serva, el giera a casa da mi. Curioso anca elo, gramo, perchè la sa... la zoventù... la ghe piaße... ne l'ha mai fatto l'amor... el m'ha compagnà fin da basso e el m'ha aspettà da quel dale acque. Gh'halà balconi che varda in cale?

Marc. Siora sì; quel balcon che xe là, el varda giusto sora quel dale acque.

Fort. Vorla che el chiama?

Marc. Sì, sì, la 'l chiama.

Fort. La parlerà con elo, la ghe dirà a elo: Per mi? de diana! no con una man, ma con cento. (*corre alla finestra.*)

Marc. In tel caso che son, me par chè me sia lecito de tentàr tutto. Con no se intacca l'onor de la casa, co no se intacca la reputazion de la puta, no me vergogno a umiliarme, no me vergogno a pregar. Chi sa che el cielo no m'assista; che in grazia de quella innocente el cielo no benedissa le mie intenzion!

Fort. El vien subito.

Marc. Grazie, siora Fortunata.

Fort. Oh, po mi son de bon cuor.

Marc. Co parlo, la me aggiuta anca ela.

Fort. No la s'indubita. La lassa far a mi.

SCENA XIII.

MENEGHETTO, e dette.

Men. **P**ermettele?

Fort. La favorissa.

Marc. Serva, sior Meneghetto.

Men. Ghe' fazzo umilissima riverenza. La perdoni, mi non averave ardio de vegnir, se nò m'avesse dà coraggio siòra zermana.

Marc. El pol esser seguro, che da mi in casa mia el sarà sempre visto ben volentiera.

Men. Effetto della so bontà.

Fort. Poverazza! la xe tanto bona, e la gh'ha sempre dei travaggi che la fa sospirar.

Marc. Ma! cossa vorla far? semo a sto mon do, bisogna starghe.

Men. Me despiase a sentir che la gh'abbia de le cose che la disturba; ma chi gh'ha el cuor benfatto, come che la gh'ha ela, sente manco i travaggi, e se difende con più coraggio.

Marc. Eh! fio mio, son più debole de quel che el crede, e po' quando dol, dol, e co se sente toccar sul vivo, in verità el coraggio no basta.

Fort. Povera signora! la ghe conta, la ghe conta, la ghe diga tutto a sior Meneghetto, el xe un galant'omo, sala?

Men. Vorria col sangue stesso poder esser de gioventù a una persona che merita tuto el ben.

Marc. Caro sior Meneghetto, za che la sorte la foto, che possa aver l'onor de parlarghe, el me permetta che ghe diga una cossa, che me afflize, che me tormenta, a la qual elo solo, volendo, el ghe po-

Tom. *XXFIII.*

deria remediar. Mio missier, omo indiscreto, irragionevole, de cattivo cuor, xe sempre più inviperio a voler disponer dela mia puta, e quel ch'è pezo, a volerla precipitar. S'ha penetrà la so intenzion, s'ha savesto a chi el gh'ha in animo de volerla dar; e me vergogno a dirlo, e me bogiè el sangue a pensarlo. La senta, se se pol dar un omo più can, più perfido, più incivil. Una puta de quella sorte, una puta, che no fazzo per dir, la xe un fior, uua pua, una pasta de marzapan, el gh'averave intenzion de darla a un fio de un nostro fattor.

Fort. Eh via!

Men. Possibile sta cossa?

Marc. Cussì no fussela per mi, e per quella povera innocente, che no merita un affronto de sta natura.

Fort. Mo el xe ben un vecchio senza giudizio, e senza reputazion.

Men. E cossa penseravela de far in sto caso? (*a Marcolina.*)

Marc. Caro sior Meneghetto, la prego de parlarme sinceramente: la mia puta ghe vala a genio?

Men. Anzi gh'ho tuta la stima...

Marc. No parlemo de stima, lassemo da una banda le cerimonie: ghe piasela? ghe par d'aver guente d'amor?

Fort. No halo dito che el g'he vol ben? (*a Meneghetto*)

Men. Quel che ho dito, l'ho dito de cuor, e fursi ho dito manco de quel che sento. Siora Zanetta merita tuto, e me chiamerave felice; se la podesse conseguir in consorte.

Fort. Sentela, no ghe l'oggiò dito? (*a Marcolina.*)

Marc. La prego de pèrdon, la compatissa una mare piena de zelo e de confusion. Se nol gh'avesse la dota subito, se el l'avesse da aspettar, mettemo

sto caso, fin dopo la morte di mio missier, gh'averavelo difficultà de facilitar?

Fort. De dia! l'alo da viver sempre sto vecchio? Mi credo che el gh'abbia deboto cent'anni.

Men. Veramente in materia d'interesse anca mi ho da dipender dai mi maggiori; ma son seguro che i me vol ben, e co se trattasse de contentarme, son certo che no i gh'averave nissuna difficultà d'aspettar: onde ardisso de dir, che se no ghe fusse altro che sta sola difficultà, posso comprometterme de accordarla, e che per mi, circa alla dota, saria contentissimo de aspettar.

Fort. Sentela? el xe de sto cuor. (*a Marcolina.*)

Marc. Donca, co la xe cussi, xe facile che el la gh'abbia ogni qualvolta che el vol; e più prestò che femmo, se cavemo fora da ogni pericolo, da ogni batticuor. Mio mario xe contento, mi son contenta, la puta più che più. Co 'l pare, e la mare ghe la dà, co elo là vol, se trova do testimoni, e se fa tuto quello che s'ha da far.

Fort. Brava siora Marcolina! cossa diselo, sior zerman? Ghe par che l'abbia pensada pulito?

Men. Ghe dirò, se la me permette, ghe dirò el mio debole sentimento. Circa alla dota ghe confermo quel che gh'ho dito; la xe una cossa che me riguarda mi solamente, e posso arbitrar senza far ingiuria a nissun. Ma sposarla, senza che el nono lo sappia, sposarla a despetto del patron dela casa, l'onestà nol consente, e la mia pontualità ghe resiste. Xe vero che el pare, e la mare gh'ha autorità su la puta; ma dipendendo anca lori dal capo dela famegia, no i pol disponer de un matrimonio senza l'assenso de chi ghe pol comandar. I pol ben opponerse con vigor, con rason e per giustizia, se

occorre, perchè un vecchio imprudente no sacrifica malamente el so sangue, no daga una nezza a una persona indegna, che no la merita, e che ghe pol far disonor; ma gnanca per questo, la me perdona, no i l' ha da maridar in scoudon, no i ha da corregger un mal con un altro mal, no s' ha da perder el respeto a un pare, e a un missier, che s' ha da compatir per natura, che s' ha da venerar per l'età, e s' ha da soffrir per legge, per convenienza, e per onestà.

Fort. Mo andè là, fio mio, che doveressi far l'avvocato.

Marc. No so cossa dir, el parla ben, el dise ben. El so discorso me serve de rimprovero, de mortificazione. Sarà quel che piaserà al cielo, se vede che la mia puta no xe destinada per lu.

Men. Mo perchè? perchè vorla metter sta cossa in disperazion? No se pol trovar dele strade oneste, dei mezzi forti e civili per mover l'animo de so sior missier? tentemo, provemò a farghe parlar.

Fort. Che el ghe parla elo, sior Meneghetto. Chi vorlo mai a sto mondo, che possa parlar meggio de quello che el ghe pol parlar elo? m'impegno che se el ghe dise lu do parole, el lo redusse un agnelo.

Men. Per mi no gh'ho difficoltà de parlarghe.

Marc. No i lo cognosse, no sa chi el sia; no faremo gnente.

Fort. Se pol provar.

Men. Provemo. Cossa mai sarà? me diralo de no? pazienza.

Marc. E se el ghe dise de no, no gh'è altro?

Men. Se el me dise de no, vorla che mi lo obbliga a dir de sì?

Marc. Allora no ghe sarà più speranza, che Zauetta sia so muggier.

Men. Me despiaserave ne l'anima, ma la vede ben...

(*si vede mover la portiera.*)

Fort. Oe! clui xe drio quella portiera?

Marc. (No saverave...)

Fort. (Che ghe fusse el vecchio?)

Marc. (No crederia.)

Fort. (Vorla che varda?)

Marc. (La varda pur.)

Fort. (Se el fusse elo, el ghe poderave parlar.)

(*s' accosta.*)

Marc. Ma! no ghe remedio.

Men. Chi sa! no la se despera.

Fort. Oh! ela la xe? (*scopre la portiera, e vede Zanetta col fazzoletto agli occhi appoggiata alla porta.*)

SCENA XIV.

ZANETTA, e' detti.

Zan. Oh, povereta mi! (*vergognandosi.*)

Fort. Via, via, no la se vergogna.

Marc. Cossa feu là vu, siora? (*a Zanetta.*)

Zan. La compatissa. (*vuol partire.*)

Fort. Eh via, che la se ferma un pochetto! (*la trattiene.*)

Marc. No, cara ela, la lassa che la vaga via. (*a Fortunata.*)

Fort. De diana! cosa gh'hala paura? la sa pur con chi l'ha da far. (*a Marcolina trattenendo Zanetta.*)

Men. La prego de no usar per mi sto rigor. So che no merito gnente; ma la mia onestà spero che no ghe possa pregiudicar. (*a Marcolina.*)

Marc. Semo troppo lontani, sior Meneghetto; ghe vedo poca speranza che possiemo riuscir.

Men. Chi sa? no semo tanto lontani.

Zan. Eh, ho sentio, che nol ghe pensa guente de mi.

Men. Come, siora Zauetta, (*accostandosi*) come mai porla dir sta cossa? Se la dise d'aver sentio, l'averà inteso quanta premura che gh'averia de aver la fortuna d'averla.

Zan. Siora mare voleva, e elo no vol.

Men. Voggio quel che posso voler. No voggio quel che no convien de voler.

Marc. Oh fia, basta, cussì. La ghe permetta che la vaga in te la so camera. (*a Fortunata.*)

Fort. Per mi, che la vaga pur.

Men. La se assicuri, siora Zanetta, che la stimo, e che ghe voggio ben.

Zan. Mi no ghe credo nè bezzo nè bagattin. (*parte.*)

Fort. Sentelo, sior zerman?

Men. Pazienza! Spero che un dì la me crederà. Sti rimproveri i xè tante ferie al mio cuor; ma la compatisso, no la xè in istato gnancora de destinguer l'amor dala convenienza. Lo protesto, ghe voggio ben; più che la vedo più la me piase, e le so lagreme le me move a compassion, e sempre più le me impegna. Con so bona grazia, voi parlar co sior Todero, voi tentar de vincerlo, se mai posso. El cielo me daga forza, me daga abilità de far breccia per la consolazion de sta casa; per la consolazion del mio cuor. Tutto se fazzo, tutto se tenta, ma che se salva el decoro, la giustizia, la convenienza, l'onor. (*parte.*)

Fort. No la s'indubita guente. Se el ghe parla, el xe cotto. Me par de vederlo. El ghe accorda tuto. La staga aliegra, la se consola. Voggio andar a

consolar quella povera puta . La me fa tanto peccà.
(parte.)

Marc. Certo, che sior Meneghetto el gh'ha una maniera de parlar che l'incanta . Se l'avesse da far con un altro, son segura che el lo persuaderia; ma co mio missier? pol esser, ma me par impossibile. El xe un vecchio, che gh'ha ste tre piccole qualità: avaro, superbo e ostinà. Da resto po, el xe el più bon omo del mondo. Chi el sente elo, tutti xe cattivi, tutti xe pessimi, e lu xe bon. I xe cussì stazente; co no i roba, co no i zoga, co no i fa l'amor, ghe par de esser oracoli de bontà. Da resto, all'avarizia i ghe dise ponto d'onor, e all'ustinazion parola, puntualità. Poveri alocchi! Ghe vol altro per esser zente da ben! Ghe vol bon cuor, sora tutto bon cuor. Amar el so prossimo, voler ben al so sangue, giustizia con tutti, carità per tutti. Povero vecchio! Se el tira avanti cussì, el se u'accorzerà. El cielo ghe daga del ben a elo, e me daga pazenzia a mi, e un poco de consolazion a quele care vissere de mia fia.

FINE DELL' ATTO SECONDO.

A T T O T E R Z O

SCENA PRIMA.

Camera di Todero.

TODERO, e DESIDERIO.

Tod. Chi elo sto sior, che me vol parlar?

Des. Mi no saveria. El xe un zovene proprio, civil.

Tod. Domandeghe cossa che el vol.

Des. Mo no sarave meggio che la lo fasse vegnir?

Tod. Sior no. Volè sempre far el dottor. Domandeghe cossa che el vol.

Des. Benissimo. (Ghe vol una gran pazenzia.) (*parte.*)

Tod. Stago a veder che el sia qualchedun mandà da mia niora, o per pregarme, o per farne qualche bulada.

Des. Co tutta civiltà, e con un mondo de cerimonie el m'ha domandà perdon, se a mi nol me dise cossa che el vol, perchè la xe una cossa che nol la pol dir a altri che a ela.

Tod. Xelo solo?

Des. El xe solo.

Tod. Gh'halo spada?

Des. El xe in tabaro. Mi no gh'ho osservà, se el gh'abbia anca la spada.

Tod. Orbo, alocco, no savè mai gnente.

Des. Anderò a veder, se el gh'ha la spada.

Tod. Aspettè, vegnì qua. Xelo foresto, o xelo Venezian?

Des. Al parlar, el me par venezian.

Tod. Che muso gh' halo?

Des. El gh' ha muso da galant'omo.

Tod. Diseghe che vegna.

Des. Manco mal. (*in atto di partire.*)

Tod. Eh! cossa me vienli a intrigar i bisì? Senti, vegnì qua.

Des. La comandi.

Tod. Dove xe vostro fio?

Des. El sarà in mezzà.

Tod. Arecordeve ben, che doman voi che se destrighe-
mo; voi che i se sposa, e voi esser fora de sto pea-
sier.

Des. Ben, quel che la comanda.

Tod. Fazzo conto, che ghe daremo la camera dove
che dormì vu.

Des. E mi, dove vorla che vaga?

Tod. -Ve farè un letto postizzo in mezzà.

Des. Basta, vedremo.

Tod. Coss'è sto vederemo?

Des. Quel sior aspetta.

Tod. Lassè che l'aspetta.

Des. El se stufferà.

Tod. Se el se stufferà, l'anderà via.

Des. (Mo che omo! mo che satiro! mo che natural!)

Tod. Che difficoltà gh'aveu de farve un letto in mezzà?

Des. Guente. Bisognerà che el letto la lo preveda.

Tod. In tel vostro letto quanti stramazzi gh'aveu?

Des. Do.

Tod. Ben, tireghene via uno, doppielo; e el servirà
per paggiazzo e per stramazzo per vu.

Des. E la vol che staga i novizzi con un stramazzo
sol?

Tod. Vardè che casì! Quanti credeu che ghe ne sia

170 SIOR TODERO BRONTOLON

in tel mio leto? Un, e xe quindes'anni che uol se pettena.

Des. Mo caro sior Todero...

Tod. Sior diavolo che ve porta.

Des. Caro sior patron...

Tod. Zitto. No alzè la ose.

Des. Almauco per sti primi di...

Tod. Tasè: Andè a spionar a pian pian da la portiera, se quel sior xè andà via.

Des. (In fatti bisognerave che el fosse andà.) (*va alla porta.*)

Tod. Ghe xelo?

Des. El ghe xè.

Tod. (Gho capio: Bisogna che el gh'abbia una gran premura. Col stà tanto, so che ora che xè; el sarà qua per bezzi, el gh'averà bisogno de bezzi. Sì, sì, se el xè un bon negozio, l'ascolterò; se el xè una cana sbusa lo mando via.) Diseghe ebe el vegna.

Des. (Poverazzo! l'ha avù una gran pazenzia. De là no ghe xè guanca careghe da sentarse.) (*parte.*)

SCENA II.

TODERO, poi MENEGHETTO.

Tod. Eh! al di d'ancuo no gh'è più da far ben. No se sa de chi fidarse. Bisogna andar cauti; contentarse de vadagnar poco; ma far i so negozietti sicuri.

Men. (Per verità, el primo ricevimento xè qualcosa de particolar. No se pol trattar pezo con un villan. Voi soffrir tutto. Dal canto mio no voi che ste signore abbia mutivo de lamentarse.)

Tod. Sì, el xè ben all'ordene; ma pol esser che

tutto quel che el gh'ha a sto mondo, el lo gh'abbia attorno, e chi sa guanca se el l'ha pagà.)

Men. Patron mio riverito.

Tod. Servitor suo.

Men. La perdona l'incomodo.

Tod. Gh'ho un mondo de affari, Gh'ho cento cosse da destrigar. La me diga in cosa che la posso servir.

Men. Me despiase de disturbarla; ma la supplico de tolerarme.

Tod. Xelo negozio longo?

Men. El pol esser corto, e el poderave esser longhetto.

Tod. Se fusse per bezzi, ghel digo avanti, no ghe n'ho.

Men. No, signor, per grazia del cielo no ho bisogno de incomodarla per questo.

Tod. Ben: la diga donca quel che la vol.

Men. (Stimo che nol me dise guanca se me voi sentar.) La perdoni, no gh'hala ela una uezza da maridar?

Tod. Sior no.

Men. No?

Tod. Sior no.

Men. La favorissa Sior Pellegrin, no gh'halo una fia?

Tod. Sior sì.

Men. No xela da maridar.

Tod. Sior no.

Men. Mo perchè no xela da maridar?

Tod. Perchè la xe maridada.

Men. Ghe domando mile perdoni. So sior pare e so siora mare no i lo sa che la sia maridada?

Tod. Ghe domando do mila scuse. Se no i lo sa lori, lo so mi.

Men. Per amor del cielo la compatissa l'ardir; e la puta lo sala?

Tod. Se non la lo sa, la lo saverà.

Men. Donca no la xe maridata.

Tod. Donca mi intendo che la sia maridata. (*con sdegno.*)

Men. La prego, la prego; no la se altera, per carità. Son un galantomo, son un omo d'onor; no permetterave mai, che per causa mia l'avesse da soffrir el minimo despiaser. Intendo adesso quel che la vol dir. El l'ha promessa, e i omeni d'opor, i omeni che fa conto de la so parola, co i ha promesso una cossa, i la considera come fata. Bravissimo! son persuaso, lodo el so bon costume, e me ne consolo con ela infinitamente.

Tod. (Siben, siben, el gh'ha buona chiaccola. A vederlo, no credeva taufo.)

Men. (Xe uuf ora, che stago in piè. Debotto no posso più.)

Tod. Orsù, gh'hala altro da comandarme?

Men. Se la me permettesse, gh'averia qualche altra cossa da dirghe.

Tod. La prego de destrigarse.

Men. Me despiase de vederlo a star incomodo.

Tod. Me despiase anca a mi.

Men. La se seuta.

Tod. No gh'ho tempo da perder.

Men. (Pazenzia! supporterò.) Me onoreravelo de dir a mi, chi sia la persona ala qual l'ha promesso, e segoudo ela l'ha maridà sta so nezza?

Tod. Cossa ghe importa a ela a saverlo? Cossa gh'intrèla in ti fati mii?

Men. Per amor del cielo no la se scalda, la me tolera con bontà. No son qua nè per turbar la so pasc,

nè per arrogarme quell'antorità che uo gli' ho. Son qua per ben, e la reterà persuasa dela mia onestà, e dela mia bona intenzion. Vorla favorirme de dir chi sia sto novizzo?

Tod. Sior no.

Men. La me permetterà donca, che mi ghe diga che el so.

Tod. La lo sa? (*con meraviglia.*)

Men. Per obbedirla.

Tod. La diga mo, chi el xe.

Men. Sì signor, subito. El fio del so fattor.

Tod. Da chi l'aveu savesto, sior? (*con sdegno.*)

Men. No xe necessario che ghe diga de più.

Tod. Voi che me disè, chi ve l'ha dito.

Men. Ghe lo dirò, ma prima la favorissa ela de dirme, per che causa ste nozze, che ghe xè per farse, e che secondo ela xè fatte, le le ha tegnue sconte per el passà, e la seguita a volerle sconder presentemente.

Tod. Ve torno a dir, che non ho da render conto nè a vu, nè a chi che sia de quel che fazzo, e de quel che voggio, e de quel che penso.

Men. Permettela che ghe diga, che no solo mi so quel che la fa, ma anca quel che la pensa?

Tod. Come? seu qualche strigon?

Men. No, signor, no son un strigon; ma son un zovene che per grazia de cielo gh'ha tanto lume che bastà per conoscere i omeni, e arguir dale operazion i pensier, e i sentimenti interni che le ha prodotte. La soffra, sior Todero, la soffra con bontà che ghe diga, che un omo dela so sorte, in concetto de omo ricco, de omo d'onor, gh'ha rason se el se vergogna de far saver al mondo nua debolezza de

sta natura, che non merita de esser approvada da chi che sia.

Tod. Coss'è, sior? Chi ve manda? Chi v'la fimbocchè Per chi me veguin a parlar?

Men. Nissun me manda. Vegno mi, da mia posta. Parlo per cla, e se ho da confessarghe la verità, parlo auca per mi.

Tod. Oh adesso intendo! Scu quello che ha domandà mia nezza a so mare, e che so mare ve l'aveva accordada senza de mi?

Men. La perdoni. Una mia zermana ha parlà. Qualche cossa xè stà discorso; ma l'assicuro in via d'onor, in via de pontualità, che senza el so assenso no se averave concluso mai. So il mio dover, so el rispetto che se convien a un pare de fameggia, a un capo de casa, a un omo rispettabile dela so qualità.

Tod. (No se pol negar che nol gh'abbia delle massime da omo civil.)

Men. No so se la cognossa la mia fameggia.

Tod. Chi scu?

Men. Meneghetto Ramponzoli per obbedirla.

Tod. I Ramponzoli li cognosso.

Men. Me lusingo che nissun possa intaccar in gnente nè il mio costume, nè la mia civiltà.

Tod. Mì no digo che cussì non sia.

Men. E no poderia lusingarme, che la me concedesse so nezza?

Tod. Mia nezza xè maridada.

Men. No la xè maridada. (*flemmaticamente.*)

Tod. Sior sì, che la xè maridada. (*con caricatura.*)

Men. Ghe domando perdou; no la xè maridada. (*come sopra.*)

Tod. Son in parola da maridarla, ho promesso de maridarla, e posso dir la xè maridada. (*con isdegno.*)

Men. Col fio del so fattor?

Tod. Con chi me par e me piase a mi.

Men. Za che da mi l'ha sofferto tanto, la supplico de soffrir anca questo. Se dise che la la vol maridar al fio del so fattor, guente per altro che per el sparaguo miserabile della dota.

Tod. Chi dise sta baronada? Chi dise sta falsità? No xe vero guente. Che dago sie mile ducati. E se no credè, vardè, e diseghielo a chi nol crede, e diseghe a ste lingue indegne, che me crede un avaro, che son galantomo, e che ghe dago a mia nezza sie mile ducati, sie mile ducati. (*colla carta alla mano.*)

Men. Come! la ghe dà so nezza al fio del so fattor con sie mile ducati de dota, e no la se degnerà de darmela a mi?

Tod. La xe maridada. (*con forza.*)

Men. No la se degnerà de darmela a mi, che la toria senza dota? (*caricando la voce.*)

Tod. Senza dota? (*con meraviglia.*)

Men. Sull'onor mio, senza dota. (*caricando come sopra.*)

Tod. E un omo della vostra sorte se marideria senza dota?

Men. Anzi, siccome per grazia del cielo no son in stato d'aver bisogno, mi no vago in cerca de dota.

Tod. Caro sior, se vorla sentar?

Men. Grazie ala so bontà: (*prende una sedia e siede.*) e ela no la se senta?

Tod. No son stracco. (*resta pensoso.*)

Men. (Pol esser che l'avarizia lo persuada.) Cussi che risposta me dala?

Tod. Caro sior... l'ho promessa... el contratto xè sottoscritto... lassè che torna a lezer sta carta. (*finge di legger piano.*)

Men. (Voggia el cielo, che la vaga ben!)

Tod. (Senza dota? El saria el mio caso. Ma in sostanza che dota ghe daghio a Desiderio, e a so fio? Gnanca un bezzo. Xe vero che maridando mia nezza co sto sior, in fazza del mondo parerave più bon... Ma chi farà i mi interessi? Se desgusto Desiderio e so fio, chi mi servirà? Bisognerà che paga un fattor, che paga un zovene... (da se; cogli occhi sulla carta fingendo sempre di leggere.)

Men. Ala letto? Ala visto? Possio sperar? (alzandosi.)

Tod. Ho letto, ho visto, ho pensa. Ghe torto a dir: mia nezza xè maridada.

Men. Come? (mortificato.)

Tod. Come! come! la xè cussi.

Men. Ma la favorissa.

Tod. La perdoni. Gh'ho troppo da far. No me posso più trattegnir.

Men. Ma la me diga almanco...

Tod. Gh'è nissun de là? Oe, Desiderio, dove seu?

SCENA III.

DESIDERIO, e detti.

Des. La comandi.

Tod. Compagnè sto sior. (a Desiderio.) La scusa. Ho da far. A bon reverirla. (parte.)

Men. (Che maniera impropria, incivil!)

Des. (Mancò mal che ho tuto sentio!)

Men. (No gh'è remedio. Anderò da siora Marcolina, anderò a licenziarme.) (va per sortire dalla porta, per dove è entrato.)

Des. Per de qua, la veda, per de qua se va fora più presto. (mostrandogli l'altra porta.)

Men. Avanti d'andar via, vorave riverir siora Marcolina.

Des. No la ghe xe, la veda.

Men. No la ghe xe?

Des. La xè andada fora de casa.

Men. La xe andada fora de casa? Bravo! Ho capio.

(Costu sa qualcossa. Eh! no me degno de vegnir a parole con lu. Anderò via e tornerò.) (*parte per dove Desiderio ha accennato.*)

Des. Patron riverito. El va via senza saludarme. Poverazzo! Se cognosse el so bruseghin. In fatti... Co ghe penso anca mi... Cossa dirà siora Marcolina? La sbrufferà un poco. E po? e po bisognerà che la sbassa le ale, e che la se contenta anca ela. (*parte.*)

SCENA IV.

Altra camera.

CECILIA, e NICOLETTO.

Cec. Vegnì mo qua, sior, cossa diavolo me diseu?

Nic. Zitto, che no i senta.

Cec. Eh! no ghe xe, nissun. Disè, disè, coss a v' insunieu?

Nic. Mi no m'insonio guente. Ve digo cussì che sior Todero me vol dar so nezza.

Cec. A chi!

Nic. A mi.

Cec. Con quel muso?

Nic. Co sto muso.

Cec. El via, andeghela a contar ai morti.

Nic. Sangue de Diana, che me faressi dir! Cossa

Tom. XXVIII.

songio? Un pampalugo? Non ho da saver quél che i dise? Doman m'ho da maridar, e no ho da saver chi gh'ha da esser mia muggier?

Cec. Doman v'avè da maridar?

Nic. Siora sì, doman.

Cec. Chi ve l'ha dito?

Nic. Sior pare me l'ha dito. E el m'ha dito che gnancora no diga gnente a nissun.

Cec. (Per Diana! scomenzo a aver paura, che el diga la verità. Se fusse mi, i m'averave dito qualcossar.)

Nic. E no dormirò più co sior pare, e mi gh'avèrò la camera tutta per mi, e lu l'anderà a dormir in mezzà, e mi gh'avèrò la novizza, e i me vestirà pulito, e anderò fora de casa quando che vorrò mi. (*gloriandosi di tutto questo.*)

Cec. (La xe una cossa che me farave strassecolar.) Come diavolo se pol dar che el paron ve voggia dar a vu una so nezza?

Nic. Varè, vedè! Cossa songio mi?

Cec. Vè par che vu v'abbie da metter con quella putta?

Nic. Co i me mette lori, bisogna che i me possa metter.

Cec. Schiavo, sior novizo, donca. (*con ironia.*)

Nic. Ah! Cossa discu? (*allegro.*)

Cec. E de mi, no ghe pensè più gnente? (*mortificata.*)

Nic. No ghe penso? Siora sì, che ghe penso.

Cec. Co sposè la parona, per mi no gh'è più speranza.

Nic. Perché no gh'è più speranza? Co la morirà ela, ve sposerò vu.

Cec. Eh! povero mamalucco. Ma mi mamalucca, che no doveva tender alle parole de una frasca.

Nic. Oè! no me strapazzè, savè, che ghe'l dirò a sior pare.

Cec. Cossa m'importa a mi? Diseghelo a chi volè vu.

Sior sì, sè una frasca, una cabala, una carogna.

Nic. Voleu zogar che debotto . . . (con isdegno.)

Cec. Coss'è sto debotto? (alzando la voce.)

Nic. Son paron anca mi. (si riscaldano tutti due.)

Cec. Mi no ve cognosso per guente.

Nic. E ve farò mandar via.

Cec. Vu me farè mandar via?

SCENA V.

MARCOLINA, FORTUNATA, e detti.

Marc. **O**e, oe! Cossa xè sto sussurro?

Fort. Siora Marcolina, xelo questo quel bel novizzo?

Marc. Siora sì. Cossa disela?

Fort. Mo caro! Mo che bella zoggia! Mo che fortunazza che ghe toccherà a quella putta! (ironica.)

Cec. (Me par anca impossibile che la parona ghe la voggia dar.)

Nic. Le diga, lo sale anca ele che son novizzo? Siora Zanetta lo sala?

Marc. Tocco de temerario! ti averessi tanto ardir de pretender de sposar la mia puta? No ti te vergoni, sporco, ignorantazzo, pezzente, de meterte con una mia fia? Cossa credistu, perchè ti gh'ha da la toa quel vecchio sordido de mio missier, che gh'averò paura de farte dar un fracco de bastonae? Se ti gh'averà ardir guanca de vardarla mia fia, guanca de minzonarla, no ti magnerà più pan, te farò scavezzer i brazzi, no ti sarà mai più omo in tempo de vita toa.

Nic. (Asco!)

Cec. (Oh che gusto, che gh'ho!)

Fort. Vedeu sior novizzo? Questa sarà la dota che gh'averè.

Nic. Mo per cossa mo? Cossa gh' hoggio fatto?

Marc. Cossa che ti m' ha fatto?

Fort. No siora Marcolina, la me compatissa; no la gh' ha rason de andar in colera co sto putó. Elo no ghe n' ha colpa. N' è vero, fio mio. Vu no ghe n' avè colpa. (*figendo dolcezza.*)

Nic. Mi no ghe n' ho colpa.

Fort. Cossa gh' importa a elo de sposar so fia? Disè la verità, a vu no v' importa guente. (*a Nicoletto.*)

Nic. Mi no, guente.

Fort. Figurarse, se in sta età gh' importa de maridarse! No ghe pensè, n' è vero, de maridarve? (*a Nicoletto.*)

Nic. (*non risponde, e guarda in terra.*)

Fort. Coss' è; no respondè? Gh' averessi voggia de maridarve?

Nic. Mi sì, che me marideria.

Fort. Oh caro! E pretenderessi siora Zanetta?

Nic. Mi no pretendo guente, mi no pretendo.

Marc. Via, via, siora Fortunata, ho capio: da una banda lo conpatisso. Poverazzo! el se voria maridar, ma no gh' importa miga d' aver mia fia. Ghe scommetto mi, che el gh' averia più a caro d' aver Cecilia. (*fige anch' ella dolcezza.*)

Fort. Cossa diseu? La sposeressi Cecilia? (*a Nicoletto.*)

Nic. Mi sì, che la sposeria.

Cec. Bisogne rave veder, se mi lo volesse.

Marc. La varda, cara ela, che casi! Stamattina cossa m' lala dito?

Cec. Mo no vedela che no gh' importa guente de mi? Che el me lassa mi per un' altra?

Marc. Per un' altra? Coss' è sto dir per un' altra? Ve metteressi dal par con una mia fia?

Fort. Creature, queste xe tutte chiaccole, che no serve

guente. Se vede che sti do se vol ben; ma el putto i l'ha fatto zo, e Cecilia se n'ha avù un pochetto per mal. Siora Marcolina, se la se contenta, mi voggio che la giustemo. Co l'è fatta, l'è fatta. Sto povero putto me fa peccà. Cecilia gh'ha del merito, e bisogna procurar de farghe sto ben. Maridemoli, e co i sarà maridai, la sarà fenìa. Cossa diseu, sior Nicoletto?

Nic. Certo, acciò che i me daga de le bastonae?

Marc. Mo no, caro fio, no ghe sarà sto pericolo. Diseva cussì, se pretendevi Zanetta, no miga per no darvela a vu, che se'un putto de garbo; ma perchè l'ho promessa a un altro, e perchè sou desgustada con mio missier. Da resto ve voggio ben, ve assisterò, ve defenderò, no ve lasserò mancar el vostro bisogno. Se sior Todero ve manderà via, ve farò trovar un impiego.

Fort. Sì, sior Meneghetto 'ghe lo troverà.

Marc. Via, Nicoletto, cossa respondeu?

Nic. Cossa vorla che diga? Mi farò tutto quel che la vol.

Marc. E vu, Cecilia, cossa diseu?

Cec. Cara ela, co la s'impogna che no me mancherà pan.

Marc. Credo che me cognossè, credo che de mi ve possiè fidar.

Fort. Sentì, fioi: quel che s'ha da far, bisogna farlo presto, perchè se i lo vien a saver...

Nic. Se mio pare lo sa, poveretto mi.

Fort. Oè! voleu che chiamemo do testimonj, e che se destrighemo qua su do piè?

Cec. Vorla che chiama Gregorio? (a Marcolina.)

Fort. Un solo no basta.

Cec. Anderò al balcon, e farò vegair de 'suso an de quei zoveni dal caffè.

Marc. Sì, via destigheve.

Cec. Vago subito. (Eh! come che nasse i casi, quando che manco i s'aspetta.) (*parte.*)

For. La ghe n'ha una voggia che la s'inspirita. (*a Marcolina.*)

Nic. Lo saverà mio pare?

Marc. Lassè far a mi.

For. Ve defenderemo nu. Cossa gh'aveu paura?

SCENA VI.

CECILIA, GREGORIO, un FACCHIN, e detti.

Cec. Oh! son qua: ghe giera giusto el facchin che ha portà le legne, e se serviremo de elo.

Marc. Vegnì qua mo, Gregorio; vegnì qua, quel zovene. Siè testimonj de sto matrimonio tra ste do creature. Via, deve la man.

Nic. Oe! Gregorio, no ghe disè gnente a sior pare.

Greg. No, saveu? mi no parlo.

Fort. Via, destigheve.

Nic. Me trema le gambe.

Cec. Animo, dè qua. (*prende la mano a Nicoletto.*) Questo xè mio mario.

Fort. Via, disè anca vu. (*a Nicoletto.*)

Nic. Coss'hoggio da dir? (*a Fortunata.*)

Fort. Questa xè mia muggier. (*a Nicoletto.*)

Nic. Questa xè mia muggier.

Fort. La xè fatta.

Cec. Ve ringrazio, savè sior Pasqual. (*al Facchino.*)

Pasq. Patrona, magneremo sti confetti.

Greg. Sì, sì, andemo, vegnì con mi, che marenderemo. (*parte con Pasquale.*)

Fort. Novizzi, me ne consolo.

Cec. Grazie.

Nic. Songio novizzo adesso?

Fort. Sior sì.

Marc. Vien zente. Andè là per adesso no ve lassè veder.

Cec. Andemo. (*a Nicoletto.*)

Nic. Dove?

Cec. De là, con mi.

Nic. A cosa far?

Cec. Via, mamalucco, andemo. (*lo prende per mano e parte.*)

SCENA VII.

MARCOLINA, e FORTUNATA, poi MENEGHETTO.

Fort. **M**o no la poteva andar meggio!

Marc. Tegniralo sto matrimonio?

Fort. Oe! I novizzi xe in camera; che i lo desfa, se i pol.

Marc. Per la condizion no ghe xè gnente da dir.

Fort. Siora Zanetta co l' al saverà, la salterà tant' alta.

Marc. Mio mario ha da restar.

Fort. E el vecchio?

Marc. E sior Desiderio?

Fort. Oh che rider!

Marc. Eh! sior Desiderio no riderà.

Fort. Oe! sior Meneghetto. (*accennando ch' egli viene.*)

Marc. Oh! bravo.

Men. Le perdoni. Ho trovà la porta averta. Me son tolto la libertà de entrar. (*mortificato.*)

Fort. Cossa gh'è, sior Meneghetto?

Marc. Sior Meneghetto, cossa xè stà?

Men. Ho parlà, ho fatto quel che ho podesto, e no gh'è remedio. (con afflizione.)

Marc. No? (ridendo.)

For. No, dasseno? (ridendo.)

Men. Le ride? (con ammirazione.)

Fort. Anca sì, che ghe xè remedio.

Men. Mo come?

Fort. Oe! a le curte...

Marc. Levemolo de pena. (a Fortunata.)

Fort. Nicoletto l'ha fatta... (tutte due parlano sì presto che Meneghetto, ch'è in mezzo di loro, rimane quasi stordito.)

Marc. El s'ha maridà...

Fort. L'ha sposà Cecilia...

Marc. E so pare no sa gnente...

Fort. No gh'avemo più paura de lu...

Marc. La mia putta xè in libertà...

Fort. E la sarà vostra de vu...

Mar. Co el se contenta de aspettar la dota...

Fort. Siora sì, l'ha promesso e l'aspetterà.

Marc. Ma destrighemose... (a Meneghetto.)

Men. Oimèi! per carità. Le me lassa chiappar un pochetto de fià. Tutte ste cosse xè nate in cussì poco tempo?

Marc. Sior sì, la xè cussì. Gh'halo paura che lo voggiemo burlar?

Men. (Son fora de mi. No so in che mondo che sia.)

Marc. El par iacantà. (a Fortunata.)

Men. L'amor, fia mia, l'amor, la consolazion.

Marc. Anca mi me sento sbalzar el cuor.

Fort. E mi? In sta cossa no gh'intro più che tanto, ma gh'ho una sodisfazion, come se fusse per mi.

Marc. Oe ! vardè Desiderio . (*a Fortunata accennando ch' ei viene .*)

Fort. Retireve , retireve , zerman . (*a Meneghetto .*)

Men. Me par un insonio . Ho paura de desmissiarne .
(*si ritira .*)

SCENA VIII.

MARCOLINA , FORTUNATA , e DESIDERIO .

Des. (*Son intriga . Voraghe dirghelo a siora Marcolina , e non so come far .*)

Marc. (*Ancora col vedo se me muove el sangue .*)
(*a Fortunata .*)

Des. (*Figurarse . La sarà inviperia . Ma se mio fio ha da sposar so fia , bisogna ben che ghe parla .*) Patrona , siora Marcolina .

Marc. Patron . (*con indifferenza .*)

Fort. Sior Desiderio , patron . (*come sopra .*)

Des. Patrona . No so se la sappia l' onor , che sior Todero m' ha volesto far . (*a Marcolina .*)

Marc. Oh ! Sior sì , el so . (*dolcemente .*)

Fort. Me consolo , sior Desiderio .

Des. Grazie . Mi certo no averave mai avudo sto ardir . . .

Marc. Oli cossa che el dise ! Me maraveggio . (*con ironia .*)

Fort. Le cosse , co le xè destinae . . . (*urtandosi con Marcolina .*)

Des. (*Vardè , vardè , mi no credeva mai che la se quietasse cussì facilmente .*)

Marc. (*Oe ! el vecchio .*) (*a Fortunata .*)

Fort. (*Adesso vien el bon .*) (*a Marcolina .*)

Marc. (Xe tre di che nol vedo.) (a *Fortunata*.)

Fort. (Tasemo, no ghe disemo guente.) (a *Marcolina*.)

SCENA IX.

TODERO, e detti.

Tod. Cossa feu qua? Perchè no tendeu al mezzà?
(a *Desiderio*.)

Des. Caro sior, son vegnu a far le mie parte co siora *Marcolina*.

Fort. Sior *Todero* patron.

Tod. Patrona. (a *Fortunata* risticamente.)

Marc. Patron, sior inissier. (dolcemente.)

Tod. (Patrona.) (con ammirazione.) Andè a far quel che avè da far. (a *Desiderio*.)

Des. La lassa almanco che fizza el mio dover co siora *Marcolina*, la lassa che la ringrazia...

Tod. De cossa?

Des. De la bontà, che la gh'ha, de accordar anca ela, che la so puta sia muggier de mio fio.

Tod. E vu, siora, cossa diseu? (a *Marcolina*.)

Marc. Mi no digo gnente.

Tod. Ah! (a *Marcolina*.)

Marc. Mi no digo guente.

Des. No sentelo? La ghe la dà, volentiera. (a *Todero*.)

Tod. (Manco mal! No credeva che la sel passasse co sta pachea.)

Fort. (Mi stimo assae che la tegna duro. Me vien da dar un sbroccon da rider, che deboto no posso più.)

Des. Se la se contenta, xè meglio che chiama mio fio, e che se concluda: I mi ha dito che el giera qua. Sala gnente ela dove che el sia? (a *Marcolina*.)

Marc. Mi no so gnente.

Fort. Eh! so mi, dove che el xe; el xe de la co la so novizza. (*ridendo.*)

Des. Co la so novizza? (*ridendo.*)

Fort. Sior sì, co la so novizza.

Des. Vedela, sior Todero? (*con allegria.*)

Tod. Sior corno. (*con ironia.*)

Des. Vedela sior paron; el xe co la so novizza. (*ridendo.*)

Tod. Che i vegna qua.

Des. Subito li vago a chiamar. (*parte.*)

SCENA X.

MARCOLINA, TODERO, e FORTUNATA.

Fort. (*O*e! ghe semo.) (*a Marcolina.*)

Marc. (No vedo l'ora de sentirli a sbruffar.)

Tod. Dove xe Pellegrin? (*a Marcolina.*)

Marc. Mi no so dasseno.

Tod. Che alocco! Che pampalugo! Nol se vede mai.

Marc. Poverazzo! El gh'ha un pare che lo fa tremar.

Tod. Aueino, scomenzemio? (*con collera.*)

Fort. Zitto, zitto, che vien el novizzo.

SCENA XI.

*DESIDERIO tirando per un'orecchia NICOLETTO,
e detti.*

Nic. *A*hi! ahi! ahi! (*dolendosi dell'orecchia.*)

Fort. Oh belo! (*ridendo.*)

Nic. Ahi ahi! (*come sopra.*)

Tod. Cossa feu ? Seu matto ? Seu ispirità ? (*a Desiderio con isdegno.*)

Des. Tocco de furbazzo ! Tocco de disgrazia ! (*a Nicoletto.*)

Tod. Cossa v' halo fato ? (*a Desiderio.*)

Des. Cossa ch' el m' fatto ? El m' ha tradio , el m' ha sassinà , el s' ha maridà .

Tod. Sior bestia , sior strambazzo , no seu sta vu che l' ha maridà ?

Des. Sior diavolo , sior satanasso , l' ha sposà la massera . (*a Todero forte.*)

Tod. L' ha sposà la massera ? (*a Fortunata con meraviglia.*)

Fort. Oh mi no me n' impazzo !

SCENA XII.

CECILIA , e detti , poi GREGORIO .

Cec. Sior sì , cossa voravelo dir ? El m' ha sposà mi . No l' ha sposà una massera , l' ha sposà una cameriera civil ; una puta da ben e onorata .

Tod. Pare e fio , fora subito de casa mia . (*a Desiderio.*)

Cec. Ah ! sior patron , se raccomandemo a la so carità .

Tod. No gh'è carità che tegua . Baroni , canaggia !
Fora subito de casa mia . (*strillando.*)

Des. Coss' è sto scazzarne ? Coss' è sto strapazzarme ?
Son qua , voi star qua , e no voggio andar via .
(*con forza.*)

Fort. Olà , olà patroni . (*alzando la voce.*)

Marc. Oel Gregorio , andè presto a chiamar mio marito . (*con affanno e forte.*)

Gre. (*si fa vedere e corre via.*)

SCENA XIII.

MENEGETTO, e detti.

Men. **L**e scusi, le perdoni, coss'è sto strepito?
Per amor del cielo, no le fizza sussurar la contrada.

Tod. Coss'è, sior? Cossa feu qua? Cossa gh'intreu?
(*a Meneghetto.*)

Men. Son passà a caso. S'ha sentio strepito, s'ha sentio crier. La zente ha fatto bozzolo davanti la so porta. El capo de contrada voleva veguir. Tutti voleva intrar. Ho credesto ben d'impedir, e son venguà mi a offerirghe umilmente, e de bon cuor el mio agiuto e la mia mediazion.

Tod. Andè via de qua. Pare e fio, fora subito de casa mia. (*a Desiderio.*)

Des. Ghe torno a dir, sangue de mi, che no voggio andar.

Men. Zitto, sior Desiderio. No fe strepito, no ve fe nasar. Ve conseggio andar via co le bone; se no mi, vedeu? mi, per la stima, e per el respetò che gli'ho per sior Todero, mi troverò la maniera de farve andar.

Des. Dove hoi d'andar? Cossa hoi da far co sto aseno maridà?

Men. A Nicol etto ghe penserò mi, ghe provvederò mi.

Fort. E Cecilia, se sior Todero no la vol in casa, veguirà a star cou mi.

Cec. Oh sieti benedetti! Andemo, andemo, el mio caro mario. (*lo prende per mano.*)

Nic. Andemo, andemo. Oh che gusto! Oh che bela cossa! Son maridà. (*parte con Cecilia.*)

SCENA XIV.

TODERO, MARCOLINA, FORTUNATA,
MENEGHETTO, e DESIDERIO.

Des. **E** mi? Cossa ha da esser de mi?

Tod. E vu tornerè a Bergamo a arar i campi.

Des. Oh sior patron, la sa con quanta attenzion, con quanta fedeltà l'ho servia, la servirò ancora, per gnente, senza salario, per gnente.

Tod. Me servirè per gnente? (*con più dolcezza.*)

Des. Sior sì, ghe lo prometto.

Fort. Sior sì, sior sì, el ve servirà per gnente. Ma de aria no se vive. El ve servirà per gnente, e el se pagherà da so posta. (*a Todero forte.*)

Des. Cossa gh'intrela ela? Me vorla veder precipità?

Tod. Tasè là. (*a Desiderio:*) Son pover omo; mi no posso pagar un fattor. (*a Fortunata.*)

Marc. Caro sior missier, no gh'avè vostro fio?

Tod. Non xe bon da gnente. (*a Marcolina.*)

Fort. Sior Meneghetto lo assisterà. (*a Todero.*)

Tod. Cossa gh'intrelo elo in ti fatti miei? (*a Fortunata.*)

Fort. El gh'intreria, se 'l volesse. (*a Todero dolcemente.*)

Marc. Intendelo, sior missier? (*a Todero dolcemente.*)

Tod. Coss'è, coss'è stà? Cossa voleu che intenda! che zente seu? No savè gnanca parlar!

Fort. Parlè vu, sior zerman. (*a Meneghetto.*)

Men. Sior Todero, la vede che quella scrittura s'è fatta xè revocada dal fatto.

Tod. Ben; e cussì?

Men. Se la se degna de accordarme so siora nezza.

Tod. Via; gh'è altro?

Men. Son pronto a darghe la man.

Tod. E no disè altro più de cussì?

Men. La comandi.

Tod. No m'aveu dito che la torè senza dote?

Men. Sior sì, senza dota.

Tod. Mo vedeu? No savè parlar. Sior sì, son galan-
tomo; quel che ho promesso, mantegno: ve la darò.

Marc. Bravo, sior missier! son contenta anca mi.

Tod. No ghe xe bisogno che siè contenta, o che no
siè contenta; co son contento mi, basta.

Marc. (Mo el xè ben un omazzo!)

Tod. E vu, sior, cossa feu qua? (*a Desiderio.*)

Des. Stago a veder sta bella scena: vedo tutto, capis-
so tutto, che i se comoda, che i se sodisfa; ma mi
non anderò via de qua. Ho servio, semo parenti,
faremo lite.

Men. Avanti de far lite, che sior Desiderio renda con-
to della so ammistrazion.

Des. El diavolo che ve porta! Vago via per no me
precipitar. (*parte.*)

SCENA XV.

*TODERO, MARCOLINA, FORTUNATA,
MENEGHETTO, e ZANETTA.*

Tod. **C**redu che el m'abbia robà?

Fort. Anemo, anemo: ve sè liberà, no ghe pensè più.
La vegna, la vegna, siora Zanetta. (*alla porta.*)

Zan. Cossa comandela?

Fort. (Ala savesto?) (*a Zanetta.*)

Zan. (Ho sentio tutto.) (*a Fortunata con allegria.*)

Men. Finalmente, siora Zanetta, spero che el cielo

seconderà le mie brame, e me concederà l'onor de conseguirla per mia consorte.

Zan. Siora sì... la fortuna... per consolarme... El compatissa che no so cossa dir.

Marc. Via, deve la man.

Tod. Tasè là, siora; tocca a mi a dirghelo. (*a Marcolina.*)

Zan. (Oh povereta mi!)

Tod. Sposeve. (*a Zanetta e Meneghetto.*)

Men. Questa xè mia muggier.

Zan. Questo xe mio mario. (*forte con ispirito e presto.*)

Fort. Brava, brava! La l'ha dito pulito.

SCENA ULTIMA.

PELLEGRIN, e detti.

Pell. **C**oss'è? Cossa xè sta? Ghe xe strepiti, ghe xè sussurri? Me maraveggio; son qua mi, son parou anca mi. (*in aria di voler far il bravo.*)

Tod. Martuffo!

Marc. Saveu che strepiti, saveu che sussurri, che ghe xè? Che vostra fia xè novizza.

Pell. Con chi?


Marc. Co sior Meneghetto.

Pell. No ve l'hoggio dito che sarave andà tutto ben?

Marc. Sior sì, xè andà tutto ben; ma no per *vu*, no per la vostra direzion. Muè sistema, sior Pellegrin. Za che sior missier ha mandà via de casa sior Desiderio, preghelo che el ve fazzo operar, che el ve prova, che el se prevala de *vu*. In quel che no savè, sior Meneghetto ve assisterà. Mi pregherò sior missier de compatirme, de averne un poco de

carità, de non esser co mi cussì aspro, de non esser in casa cussì sutilo. Ringraziamo el cielo de tutto, e ringraziamo de cuor chi n'ha sofferto con tanta bontà, pregandoli che avendo osservà che brutto carattere che xè l'indiscreto, che xè el brontolon, no i voggia esser contra de mi nè indiscreti, nè brontoloni.

FINE DELLA COMMEDIA.



LE
M O R B I N O S E

P E R S O N A G G I

Sior LUCA, *vecchio benestante.*

Siora SILVESTRA, *vecchia sorella de Sior LUCA.*

Siora MARINETTA, *fia de Sior LUCA.*

TONINA, *cameriera de Siora MARINETTA.*

Siora FELICE.

Sior ZANETTO, *mario de Siora FELICE.*

Siora LUCIETTA.

Siora BETTINA, *fia de Siora LUCIETTA.*

Sior BORTOLO, *moroso de Siora BETTINA.*

Il SIGNOR FERDINANDO, *forestiere.*

NICOLÒ, *caffettiere.*

SERVITORI.

La scena si rappresenta in Venezia.

LE
MORBINOSE

A T T O P R I M O

SCENA PRIMA.

Camera in casa de sior Luca.

*Siora MARINETTA che si conza la testa, e
TONINA che la serve.*

Mar. Via, conzeme pulito, che voggio parer bon.

Ton. Cara siora parona, se la xe bela, in ton,

Proprio che la fa voggia.

Mar. Eh via non me burlè!

Ton. Eh sti musì no fala!

Mar. Che morbin che gh'avè!

Dè qua un poco de polvere.

Ton. Subito, son qua lesta.

(le dà la polvere.)

Mar. Deme quel fior de pena, che me lo metta in testa.

Ton. La servo. Xelo questo?

Mar. Questo. Me stalo ben?

Ton. Pulito! Ghe ne vorla un da metter in sen?

Mar. Sì ben, deme un garoffolo.

Ton. Vardè che bon, sestin!

Mar. Pario bon co sti fiori?

Ton. La me par un zardin .

Mar. Xelo levà sior padre?

Ton. Nol xe levà gnancora .

Mar. Sior amia?

Ton. Oh la xè suso, che sarà più de un' ora!

La xe anca ela al specchio . Ho spionà da un busetto

Dela porta , e l'ho vista che la se dà el beletto .

Mar. Vardè che vecchia maga, andarse a sbellettar!

Ton. Povera putteleta ! la se vol maridar .

Mar. Sì ben de sessant' anni .

Ton. Sessanta ?

Mar. Anca de più .

Ton. Dasseno ? Eppur la xe più in gringola de na .

Mar. I batte .

Ton. Vago a veder .

Mar. Se xe el fattor , tirè .

Ton. Gh' hiala ordenà qualcosa?

Mar. Vederè , vederè .

Voggio far magnar l'aggio a più de qualcheduna .

Ton. Per diana ! de sto gusto no ghe ne xe nissuna .

Che le se metta intorno tutto quel che le vol .

In materia de questo nissuna no ghe pol .

Anca se le se veste d'oro da cao a pie' ,

In fazza ala parona le diventa scarpie .

Per comparir , a ela ghe basta una strazzeta ,

E la stà ben con tutto . Oh siela benedeta ! (*parte .*)

SCENA II.

Siora MARINETTA , poi TONINA che torna .

Mar. **T**onina me vol ben , ghe voi beu anca mi .
Per questo , poverazza ! la me loda cusì .

Da resto , no son orba ; vedo cognosso e so .

Senza presumer guente, quel che gh' ho, e che no gh' ho.

Ton. Sala chi xe?

Mar. Chi xe ?

Ton. Siora Felice .

Mar. Eh via !

A st' ora ?

Ton. Cossa disela ? A st' ora la vien via .

Mar. Che la vegna . Senti . Sbattè la cioccolata .

Ton. Bisogna che la fazza ; no ghe ne xe de fata .

Ghe ne giera do chicchere , e la se l' ha bevua

Tutta quanta za un poco quella vecchia monzua .

(*parte .*)

SCENA III.

Siora MARINETTA, poi siora FELICE.

Mar. **G**ramazza ! la procura de manteguirse in ton.

Fel. Marinetta , ghe seu ? (*di dentro .*)

Mar. Sì , vita mia , ghe son .

Fel. Cossa diseu co presto che ve veguo a trovar ?

Mar. Mo se brava dasseno . Me fe strassecolar .

So che al festin se' stada assae dopo de mi .

Fel. Se ghe son stada ? e come ! ho balà fin a di .

Mar. Sarà stracca . Senteve .

Fel. Sentemose un pochetto .

Mar. Diseme ; aveu dormio ?

Fel. No ho guanca toccà leto .

Cusì co me vedè , a casa son andada ,

Mio mario ronchizava , e mi me l' ho sbignada .

Mar. Gh' averè sono .

Fel. Gneute . Mi no son scamossiosa .

Tornerave a balar fresca co fa una riosa .

Mar. Anca mi saria stada fina al fin dela festa ,
Ma savè che a sior amia ghe doleva la testa ,
Son vegnua via per ela .

Fel. Dormela ? cossa fala ?

Mar. La xe in te la so camera, che la se mette in gala.

Fel. Oh che cara Silvestra ! la xe una maraveggia .

Perchè no stala a casa ? nissun no la consegna ?

Toccaria a so fradelo a farghe far giudizio .

Mar. Gramo elo , se el parla ! Nasseria un precipizio .

Fel. L'aveu vista giersera sta vecchia stomegosa ,

Che co sior Ferdinando la fava la graziosa ?

Mar. Se l'ho vista ? ve zuro che me vegniva mal .

Fel. La zente se n'ha incorto ; i ha fato un carneval .

E quel caro foresto la toleva per man .

Mar. Certo , sior Ferdinando xe un bravo cortesan .

El fa el belo con tutte . Con tutte el xe el medemo ;

Ma se el me salta in testa , voggio che lo burlemo .

Fel. Sì per diana de dia ! Burlemolo un pocheto .

Femo co sto foresto un tantin de chiasseto .

Za xe de carneval , se se pol divertir ,

Basta far cose oneste , che no daga da dir .

Mar. Scrivemoghe una lettera piena de tenerezze ,

Lodando el so grau merito , la grazia e le bellezze .

Senza che el sappia gnente la dona chi la xe ,

La lettera bollada mandemola al caffè .

Lassemo che el ghe pensa , che el traga a indivinar ,

E dopo immascheremose , e andemolo a burlar .

Fel. Sì ben . Bisognerave far qualcosa de più .

Far creder spasemada per elo una de nu .

Tegnirlo un buon pezzetto su le bacchette , e po

Far che el se scoverzisse burlà da tutte do .

Mar. Lasseme far a mi . No ve indubitè gnente .

Vago a scriver la lettera .

Fel. Me par che vegna zente .

Mar. Fermeve qua, Felice. Subito vago e vegno.
 Gl'ho un'altra cossa in testa. Se riderà, m'impegno.
 (*parte.*)

SCENA IV.

Siora FELICE, poi TOGNINA.

Fel. **C**erto che Marinetta la xe una cara mata.
 Voi che se la godemo.

Ton. Vorla la gioccolata?

Fel. Sì ben, cusì de drento me scalterò un pochetto.

Ton. La prego a perdonar, cossa fa sior Zanetto?

Fel. Mio mario?

Ton. Siora sì. Stalo ben?

Fel. El sta ben,

Lo cognosseu?

Ton. No vorla! Xe un pezzo che nol vien.

Mo via che la ghe diga, che el ne vegna a cattar,

El xe el più caro matto, che se possa trovar.

Fel. Mio mario xe un bel matto? Brava! se'ben curiosa.

Ton. Digo cusì per dir. Xela fursi zelosa?

Fel. Se poderave dar che avesse zelusìa

De qualche altro soggetto, ma de vu no, fia mia.

Ton. Certo che de mi no, perchè se sa chi son,

Da resto...

Fel. El vederissimo cascar a tombolou.

Ton. Ghe n'è cascà dei altri.

Fel. Dasseno?

Ton. Sì dasseno.

Fel. Vardè. Dala paura mi stassera no ceno.

Ton. La burla a pian, patrona, se fusse una de quele.

Da sior Zanetto Trigoli ghe n'ho sentio de bele.

Fel. Cara vu, feme rider.

Ton. Soagio la so buffona?

Fel. Propriamente ve godo.

Ton. Ghe 'l dirò ala parona.

SCENA V.

Siora MARINETTA, e dette.

Mar. Cossa xe stà, Tonina?

Ton. Gnente.

Fel. Ve dirò mi.

Ton. Via, no la faccia scene.

Fel. La m' ha dito cussì,

Che Nane mio mario...

Ton. Che bisogno ghe xe?

Mar. Via, parlè con rispetto, e no ve imusonè.

Deghe a Beppo sta lettera, e che el la porta presto

Da quello dale acque all' insegna del Cesto.

Ton. Siora sì. (*ingrugnata.*)

Mar. Ca de diana, che no voi sti musoni!

Ton. (Se sta siora me stuzzega!) (*da se.*)

Mar. Coss'è sti brontoloni?

Fel. Eh lassè che la diga!

Mar. Mandè via quella lettera.

Ton. (Voi che la me la paga sta signora etcetera.) (*parte.*)

SCENA VI.

Siora MARINETTA, e siora FELICE.

Mar. Cossa diavolo gh'hala?

Fel. Sentì che strambaria,

La crede che de ela mi gh'abbia zelusia.

Mio mario xe un mattazzo, ghe piase de burlar,

E sta sporca la crede de farlo innamorar.

Senti per causa vostra ho sopportà, e ridesto.

L'ho trattada da matta, no gh'ho badà, da resto...

Mar. Cara vu, compatila. Orsù ho fato pulito.

Ma che bocon de lettera, che a Ferdinando ho scritto!

Ma perchè el mio carattere no dasse qualche indizio,

Ho fato che sior ania me fazzo sto servizio.

Ela, che me vol ben, senza difficoltà.

La m'ha scritto la lettera, come mi gh'ho detà.

Se sentissi che roba! che amori! che parole!

M'impegno, co la leze el va in acqua de viole.

E per meglio burlarlo, senti quel che ho pensà;

Gh'ho scritto che l'incognita in maschera anderà,

E acciò che la cognossa senza nissun sospetto,

La gh'averà un galan color de riosa al petto.

Femo cussì, Felice, per farlo taroccar,

Con un galan compagno andemo a spazizar.

Veli qua tuti do. Pontemoseli al sen.

Voi che femo la scena, come che va.

Fel. Sì ben. (si
appuntano il nastro al petto.)

SCENA VII.

Siora LUCIETTA, siora BETTINA, e dette.

Luc. Che xe nissun?

Fel. Sentì. (a *Marinetta*.)

Mar. Oh per diana de dia!

Xe qua siora Lucietta co Bettina so fia.

Fel. Mo za, la fia e la mare tuto el zorno a rondon.

Mar. Vegui avanti, Lucietta.

Fel. E' sì uo le par bon.

Luc. Patrona. (a *Marinetta*.)

Mar. Oh oh patrone! Che buon vento?

Bett.

Patrona.

(a *Marinetta*.)Mar. Patrona, fia. (a *Bettina*.)Fel. Patrono. (a *Lucietta*, e *Bettina*.)

Luc. Oh! qua la xe? patrona.

(a *Felicità*.)

Mar. Se' in maschera a buon'ora.

Luc. Cossa diseu? mia fia

La dise che de boto el carneval va via.

St'anno el xe tanto curto...

Bett. L'è de boto fenio.

Se no se ne tolemo...

Luc. E mi ghe vago drio.

Mar. Senteve.

Bett. Eh no son stracca!

Fel. Avè tanto balà.

Bett. Balerave anca adesso.

Luc. Via, sentemose un fià. (*siede*.)

Bett. Stassera ghe tornemio?

Mar. Nu altre ghe tornemo.

Bett. La diga, siora mare, nu gh'auderemio?

Luc. Andemo.

Mi savè che no balo, ma me devertò assae.

Quante scene giersera, che ho viste e che ho notae!

Fel. Mo za, chi no fa niente nota tutte le cazze.

Luc. Cossa diseu de Beppa! ah mo che gran cossazze!

Che abiti! che zoggie! come diavolo fala?

Bett. E con tutti i so abiti, mo co mal che la bala.

Luc. Cara ti, cossa serve? se' no la bala ben,

La fa aeggio le carte con chi va e con chi vien.

Mar. Mi la me stomagava con quei so complimenti.

Fel. E pur co la parlava, tutti ghe stava attenti.

Luc. Mo no fala da rider? Vardè come la fa:

Sior conte, devotissima. La se comoda qua.

Son un poco stracchetta! ballerò adessadesso.

La me tegna sta ventola. Grazie, con so permesso.

Mar. Oh brava! Lucietta, l'imitè a perfezion.

Fel. E Lugrezia Malsesto che stava in quel canton?

Luc. Mo quella... la gh'aveva... basta, za me capì.

Saverè, Marinetta.

Mar. La me vuol dir a mi?

So tutto.

Bett. De Lugrezia che novità ghe xe?

Se maridela fursi?

Luc. Via, via, vu no gh'intrè.

Ghe giera... (*piano a Marinetta.*)

Mar. Quell'amigo. (*piano a Lucietta.*)

Fel. Conteme. (*piano a Lucietta.*)

Luc. Quel marzer. (*piano a Felice.*)

Fel. La vorlo tor? (*piano a Lucietta.*)

Luc. Seu matta? se el gh'ha un'altra muggier.
(*piano a Felice.*)

Fel. Cossa che me contè!

Bett. Siora mare, vien tardi.

Luc. Cossa vol dir, patrone, quei galanetti sguardi?

Mar. I xe all'ultima moda. Ghe ne voleu?

Luc. Mi sì.

Mar. Ve ne posso dar uno.

Bett. Siora Marina, e mi?

Mar. Uno anca vu sì ben.

Fel. Oe! digo, Marinetta...
(*le fa un cenno.*)

Mar. Eh! sì, sì, v'ho capio; lasso che le se i metta.

Luc. Cara siora Felice, 'cossa gh'aveu paura?

Bett. No me par che sta moda la sia una cargadura.
Un poco de galan...

Fel. Cossa m'importa a mi?

Luc. Se le lo porta ele el se convien più a ti.

Mar. Sì ben; tutte d'accordo. Me vago a immascherar,
Parecchio el galanetto, e vel vegno a portar.

Fel. Oe! senti, Marinetta...

Mar. (So quel che volè dir,
Lasseme far a mi, che me voi devertir.) (*parte.*)

SCENA VIII.

*Siora FELICE, siora LUCIETTA, e siora
BETTINA.*

Fel. (Sì, sì, de Marinetta capisso l'intenzion.
Ma no vorria che in tante se fasse confusion.
Elle no le sa gnente.)

Bett. La diga, xela andata
Gnancora ala commedia?

Fel. Sì ben, che ghe son stada.

Luc. Che commedia aveu visto?

Fel. No so, no ho capio.
So che no la m'ha piasso, e per questo ho dormio.

Bett. Non giera da rider?

Fel. Gneite, fia mia, ma gnente.
Mi no so come diavolo ghe fusse tanta zente;

No se sentiva altro a zemer e a crier

Diavoli cola barba, che fava inspiritar,

M'ha fato un imbriago rider un pochettin.

Ma mi za no gh'ho gusto co no gh'è Truffaldin.

Bett. E ini son stada a quella de quei do bruti nasi;
No ha m'ha piasso un bezzo.

Luc. Se in palco no ti tasi.
Come t'hala da piaser, se ti fa sempre chiasso?

Bett. Mi, siora, ala commedia vago per aver spasso.
Cossa m'importa a mi, che i altri diga evviva,

Mi co no rido assae, digo che l'è cattiva.

Luc. Ti ha pur ridesto a quella dele contradizion.

Bett. Mo, se ho ridesto a quella ho abù le mie rason.

Sentindo a contradir le cosse cüssi chiare,

Me pareva sentir sior pare e siora mare.

Luc. Vardè là, che frascona! cüssi ti parli? e ti

No ti sa contradir?

Bett. Rideva anca de mi.

Fel. Certo ho sentito a dir; tûti i nostri difetti

I li mete in teatro. Vardè che maledetti!

Luc. Sì ben; co la commedia del ricco insidiato

Che diavolo no hai dito, che diavolo no hai fato?

Basta me xe sta dito de una mare e una fia

Che no i me tocca mi, che per diana de dia...

Manco mal che l'ha abù poco applauso. So danno.

Bett. Però i ha fato ben i comici sto anno;

I ha fato ressaltar le vedoe spiritose.

Fel. Stago a veder che i fizza le done morbinose,

Se i le fa, voi che andemo, e se i ne tocca nu,

Voggio che i ne la paga, e che ghe femo bu.

SCENA IX.

Siora MARINETTA in maschera, e dette.

Mar. Son qua; tolè, Lucietta; anca vu, fia, tolè.

Ponteve sto galan, e po andemo al caffè.

Luc. Bisogna che gh'abbì bottega de galani.

Mar. Gh'ho sta cordela in casa, che xe più de do ani:

L'ho taggiada ala presta, presto li ho fati su.

Bett. Dove vorla che andemo?

Mar. Gnente; vegni con nu.

Bett. Non avemio d'andar da sior santolo orese?

Luc. Ghe passemo davanti.

- Fel.* Voleu far dele spese?
Luc. Mia fia vol una cossa.
Bett. Voi scambiàr sto aneieto.
Fel. Lassè veder. Cò belo!
Bett. El me xe un poco stretto.
Fel. Marina.
Mar. Cossa gh'è?
Fel. (Senti sto caso belo:
 In deo de Ferdinando ho visto quell'anelo.)
Mar. (Che el ghe l'abbia donà?)
Fel. (Giersera su la festa.)
Mar. (Gnente, lo goderemo.)
Luc. Che cerimonia è questa?
 Cossa parlevu in secreto?
Fel. Gh'avemo un interesse.
Luc. (No voria dell'anelo, che le se n'incorzesse.
 A far che le lo veda l'ha fato mal mia fia.)
Mar. Via se volè che andemo, mettemose ala via.
Bett. Passemo dall'orese, e po dove se va?
Mar. Nu saremo al caffè; ve aspetteremo là.
Fel. Le pol andar avanti.
Bett. Andemo, femo presto.
Luc. A qual caffè sarale?
Mar. All'insegna del Cesto.
Luc. Ben ben, se catteremo.
Bett. (Gh'averia più piaser,
 Se in vece de ste mascare ghe fusse el forestier.)
 (da se e parte.)
Luc. Senti, ve lo confido, a mia fia l'aneieto
 Ghe l'ha dà el so novizzo, ghe l'ha dà Bortoleto.
 Ma no voi, che el se sappia; fin che no vien quel dì,
 No voggio che se diga... sioria, za me capi. (parte.)

SCENA X.

Siora MARINETTA, e siora FELICE.

Fel. Cossa diseu ? che mare !

Mar. Che sia la verità ?

Fel. Oh ! ghe l'ha dà el foresto quanto che mi sou qua.

Mar. Se lo sa Bortoletto ?

Fel. Dixeme, cara vu,

Perchè co sti galani le feu vegnir con nu ?

Mar. Per rider : vegnì via, che ve dirò per strada

Quel che avemo da far.

SCENA XI.

SILVESTRA, e dette.

Silv. Mia nezza inmascherada !

Mar. Oh sior amia, patrona !

Fel. Patrona ; cossa fala ?

Silv. Stago ben per servirla. La diga ; dove vala ? (*a Marinetta.*)

Mar. Vago un pochetto a spasso. Tornerò a mezzo dì.

Vorla guente ; sior amia ?

Silv. Voi vegnir anca mi.

Fel. In maschera anca ela ? la se anderà a straccar.

Silv. Credeu che mi no sia bona da caminar ?

Me fe giusto da rider. Andemo, siora sì,

Se andè in mascara vu, voi vegnir anca mi.

Fel. (Cossa avemo da far co sta vecchia taccada ?)

Mar. Andemo in tun servizio. (*a Silvestra.*)

Silv. Vardè che baronada !

Semo de carneval, deboto el xe feuio ;

Tom. XXVIII.

Tutti ha d'andar in maschera, e mi ho da star indrio.

Fel. Anderemo stassera; anderemo a balar.

Silv. No no, se va mia nezza, a casa no voi star.

Fel. Cossa gh'hala paura? con mi la pol vegnir.

Son dona maridada. No ghe xe da che dir.

Silv. Mi no digo de andar per farghe compagna;

Se mia nezza xe putta, son anca mi una fia.

E se gh'ho qualche anetto de più de Marinetta,

In canton cole vecchie no voi che se me metta.

Fel. (Mi no la voi seguro.) (piano a Marinetta.)

Mar. Sior amia, in verità

Vago in tun servizietto, e subito son qua.

Silv. No me volè, frascona? Vegnirè un'altra volta

A far che mi ve scriva le lettere.

Mar. L'ascolta...

Mo no la vaga in collera. Sior amia, la sia bona.

Silv. Coi galanetti sguardi?

Mar. Vorla? la xe patrona.

Silv. Sì, sì, gnanca per questo... via pontemeli al sen.

Mar. Subito, volentiera.

Silv. Vardè mo; staghio ben?

Mar. Pulito.

Fel. (Marinetta, e vu?)

Mar. (Andemo de là,

Gh'ho dell'altra cordela, e subito el se fa.)

Silv. Tornereu presto?

Mar. No vorla? che bisogno ghe xe?

Silv. Via, tornè che anderemo a beber el caffè.

Mar. Dove?

Silv. Al solito logo.

Mar. Stamattina mi no.

El beberemo a casa.

Silv. Basta, ghe penserò.

Mar. Oh patrona, sior amia!

Silv. Va via, va via, bandiera.

Fel. Addio siora Silvestra, se vedremo stassera.

Silv. Oh ala festa no manco! Gieri col forestier,

Ho fato un ballo solo. Stassera almanco un per.

Fel. (La vol che i la minchiona; vardè se la più mata,

Se pol dar de sta vecchia! e pur se ghe ne catta.)

(*parte.*)

Mar. (Bisogna che dissimula, e che ghe vaga drio,
Perchè la fazzo far co voggio a modo mio.

Mia amia, poverazza! de botto no pol pi,

Ma del morbin in testa la ghe n'ha più de mi.)

(*parte.*)

SCENA XII.

SILVESTRA sola.

Si ben, sì ben, carette, andè dove volè.

Credeu che mi v'aspetta? se'mate, sel credè.

Vago subito subito anca mi a immascherarme.

Figureve, se a casa voi star a indormenzarme!

Xe vero che son vecchia, ma in gringola me sento;

El cuor co vago a spasso me bagola de drento.

Son dretta co fa un fuso; no gh'ho certi malani,

No gh'ho gnente d'invidia de una de vint'ani.

FINE DELL' ATTO PRIMO.

A T T O S E C O N D O

SCENA PRIMA.

Bottega di caffè.

*Ferdinando colla lettera aperta in mano ,
e Nicolò.*

Ferd. **E**hi Nicolò.

Nic. Lustrissimo.

Ferd. Dimmi, questo viglietto

Da chi ti fu lasciato?

Nic. Nol so da poveretto.

Mi no giera a bottega quando che i l'ha portà.

L'ho domandà ai mi zoveni, ma gnanca lori el sa.

Ferd. È una cosa curiosa. Tu che sei veneziano,

Dimmi del tuo linguaggio cosa vuol dir galauo.

Nic. Galano! no capisso.

Ferd. Qui non dice così? (*gli fa vedere la parola nella lettera.*)

Nic. Sta parola galano no l'ho sentia ai mi di.

Galan color de rosa, adesso capirò.

Galan, e no galano.

Ferd. Non è tutt'un?

Nic. Sior no.

Vol dir una cordela bianca, celeste o sguarda,

Ligada per esempio, in modo de coccarda.

Ferd. Ora, ora ho capito. (Chi mi mandò il viglietto

Avrà per segno un nastro color di rosa iu petto.)

Nic. Me comandela guente?

Ferd. Sia il caffè preparato.

Nic. Lo vorla qua?

Ferd. Preparami un camerin serrato.

Se verranno delle maschere, vogliam la libertà.

Nic. La perdona, lustrissimo, no posso in verità.

Le botteghe onorate no serra i camerini.

Ferd. Non posso a modo mio spendere i miei quattrini?

Nic. Lustrissimo patron, mi ghe domando scusa,

In sto nostro paese ste cosse no se usa.

In pubblico se vien a beber el caffè,

E el se beve in pubblico da sospetar no gh'è.

Femene d'ogni rango da nu la vederà

In tempo dele maschere vegnir con libertà.

Ma co la libertà xè resa universal,

In fazza del gran mondo se schiva el mazor mal.

Ferd. Di rendermi sospetto non era il pensier mio:

Quel che gli altri costumano, vo' costumare anch'io.

Preparate il caffè.

Nic. Per quanti?

Ferd. Io non lo so.

Nic. Co saverò per quanti subito ghe'l farò.

L'acqua calda xe pronta, el caffè xe brusà.

Subito che i me l'ordena, lo maseno in tun fià.

El xe più bon assae, quando el xe fato a posta.

Al caffè de Venezia, la el sa, no gh'è risposta.

In materia de questo l'ha da vegnir da nu:

Per caffè de Levante, Venezia e po no più. (*si ritira in bottega.*)

Ferd. Questa incognita amante chi diamine sarà?

Mi ha posto questa lettera in gran curiosità.

Pratica di Venezia non ho formato ancora,

Stretta non ho amicizia con veruna signora.

Senz'altro chi mi scrive esser dee una di quelle,

Che ho veduto al festino. Ve n'eran delle belle.

Che fosse la ragazza, cui l'anello ho donato?
 Non crederei, sarebbe l'ardir troppo avanzato.
 Parvemi onesta. È vero che l'anellino ha preso;
 Ma vidi il di lei volto di bel rossore acceso.
 Quella certa signora, che Mariuetta ha nome,
 Che aveva più d'ogn' altra begli occhi e belle chiome,
 Mi fe qualche finezza, ma la conosco in cera,
 È furba come il diavolo, non pensa in tal maniera.
 Chi scrisse in questo foglio mostra di spasimare;
 Ma scrivermi potrebbe ancor per corbellare.
 Ecco una mascheretta. Quella del nastro aspetto.
 Oh cospetto di Bacco! ha la coccarda in petto.

SCENA II.

*MARINETTA, e detto, e FELICE un poco
 indietro.*

Mar. Fermeve qua un pochetto; lassè che vaga mi.
 Coverzive el galan, e co ve par, vegnì. (*a Felice
 in disparte.*)

Ferd. (Si darà da conoscere.) Servo suo riverente,
 (*Mariuetta gli fa una riverenza.*)

Il desio di vederla rendevami impaziente.

Mar. Mi?

Ferd. Sarei certamente pur troppo fortunato,
 Se l'onor di servirla mi concedesse il fato.

Mar. Disela a mi, patron?

Ferd. A lei, signora mia.

Mar. Me cognossela?

Ferd. Ancora non so dir chi ella sia.

Mar. Con chi no se cognosse no se se tol sto impegno.

Ferd. Se non conosco il volto, vi riconosco al segno.

Mar. A che segno?

ATTO SECONDO.

215

Ferd. A quel nastro :

Mar. Oh bela in verità!

No gh'è altri galani in tutta sta città?

Ferd. (Parvemi nella voce, che sia la Marinetta.

Cercherò di chiarirmi.) Graziosa mascheretta,

Comandate il caffè?

Mar. Grazie, la me perdona,

Che se vien mio mario dasseno el me bastona.

Ferd. Siete voi maritata?

Mar. Sior sì, per mia sfortuna.

Gh'ho quattro fantolini, e una putella in cuna.

Ferd. (Dunque non sarà questa quella ch'io mi credeva.)

Che foste maritata, signora, io non sapeva.

Quel nastro mi ha ingannato.

Mar. Sto nastro? cara ella,

La me diga el perchè?

Ferd. Vi dirò l'istoriella:

Un'incognita amaute scrissemi in un viglietto,

Ch'io l'averei veduta con questo segno al petto.

Mar. No se poderia dar, senza intaccar l'onor,

Che qualche maridada gh'avesse dell'amor?

Ferd. Dar si potrebbe ancora. Sareste voi la bella,

Che in questo foglio istesso meco d'amor favella?

Mar. Mi no so guanca scriver.

Ferd. Siete donna ordinaria?

Mar. Sior foresto carissimo, sta volta la zavarìa;

Civil più che nol crede son nata in casa mia,

E soto de ste mascare no se sa chi ghe sia.

Ferd. Dite non saper scrivere.

Mar. Digo de sì e de no

Co me par e piase.

Ferd. Scriveste voi?

Mar. Sior no.

Ferd. Eppure io giurerei, che vostro è questo scritto.

Mar. Zaro sull' onor mio, che mi no ghe l' ho scritto.

Ferd. Dite, mi conoscete?

Mar. Lq conosso benissimo.

Ferd. E chi son io, signora?

Mar. Un signor gentilissimo.

Ferd. Mi vedeste altre volte?

Mar. L' ho visto, e gh' ho parlà.

Ferd. Dove? quando?

Mar. Dasseno me l' ho desmentegà.

Ferd. Eh, signora, lo vedo, volete divertirvi!

Fatemi questa grazia, vi prego di scoprirvi.

Mar. Sola no me convien. Amiga, vegù qua. *(a Felice.)*

Fel. *(si avvanza, e scopre il nastro.)*

Ferd. *(Ecco un nastro compagno; che diavolo sarà!)*

Fel. Serva, sior Ferdinando.

Ferd. Mi conoscete? Oh bella!

Con questi nastri al petto, qual di voi sarà quella?

Fel. Mi son quela seguro.

Mar. Quela son anca mi.

Ferd. Ma chi di voi ha scritto questo foglio che è qui?

Fel. Mi no.

Mar. Gnanca mi certo.

Ferd. Si pòtrebbe saper

Da voi, chi l'abbia scritto?

Fel. Se el so, nol voi saver.

Ferd. Ah sì voi siete quella, che arde per me nel seno!

(a siora Felice.)

Fel. El s'inganna de grosso, sior forestier, dasseno.

Ferd. Dunque voi siete quella, che amor per me si sente?

(a Marinetta.)

Mar. Sior forestier, dasseno, no lo gh' ho gnanca in mente.

Ferd. Quand'è così, potete andarvene di qua.

Fel. Oh che bela creanza!

Mar. Che bela civiltà!

Fel. Xelo elo el patron?

Mar. Comandolo qua drento?

Ale done civil se fa sto complimento?

Ferd. Ma se voi vi credete di corbellar con me...

Fel. Gnanca no se esibisse un strazzo de caffè?

Ferd. Subito, volentieri. Caffè. (*forte.*)

Nic. Vegno a servirla.

Ferd. (Se si cava la maschera, potrò almeu scopririla.)

Voi lo berete ancora? (*a Marinetta.*)

Mar. Farò quel che farà

La mia compagna.

Ferd. Brava! Ci ho gusto in verità.

Nic. Serve del caffè. Se vorle comodar?

Ferd. Favorite sedere.

Fel. No me voggio sentar.

Mar. Gnanca mi.

Ferd. Molto zucchero? (*a Felice.*)

Fel. Piuttosto in quantità.

Ferd. Così?

Fel. Ancora un pocheto.

Ferd. E voi? (*a Marinetta.*)

Mar. Poco me fa.

(*Niccolò versa il caffè.*)

Ferd. Signore, colla maschera bere non si può.

Mar. Via, che el lo beva elo.

Ferd. Anch'io lo beverò.

Questo è per voi, signora. (*a Marinetta.*)

Mar. Oh xe qua mio mario!

Ferd. Io non vedo nessuno. (*guardando intorno.*)

Fel. Oh che xe qua mio fio!

Patron. (*a Ferdinando.*)

Mar. La reverisso. (*a Ferdinando.*)

Fel. La se conserva sau.

Mar. La lo mantegna caldo, che el beverò doman.

Fed. La prego a compatir, se vago via e l'impianto.

(*parte.*)

Mar. Quela dal galanetto la reverisse tanto. (*parte.*)

SCENA III.

*Ferdinando, e Nicolò, poi Lucietta, e
Bettina.*

Nic. **L**o comanda ela?

Ferd. Va al diavolo anche tu.

Nic. (Co sta sorte de matti no me u' intrigo più.)
(*si ritira in bottega.*)

Ferd. Sì, voglio per conoscerle, seguirle a lor dispetto.

Ecco dell'altre maschere con il galano al petto.

Chi sa che una di queste... Che diavol d'imbarazzo!

Vogliono le veneziane farmi diventar pazzo.

Luc. Le amiche no se vede. Aspettemo un pocheto.)
(*piano a Bettina.*)

Bett. (La varda, siora mare, quello dell'aneleto.)

Luc. (Sì, per diana de dia! Sta' zitta, femelo zavarar.)

Bett. (No vorave che Bortolo...)

Luc. (Mandelo a far squartar:

Xe do ani deboto, che el vien in casa mia;

Nol t'ha mai donà gnente. Bortolo xe un'arpia.)

Bett. (In verità dassenò, che no la dise mal.)

Luc. (Devertimose un poco; senio de carneval.)

Ferd. (Sto a veder della scena qual sia la conclusione,

Quei nastri maladetti mi han posto in confusione.)

Luc. Patreu.

Ferd. Servo divoto.

Bett. Serva.

Ferd. Padrona mia.

Luc. La fa dele so grazie una gran carestia.

Ferd. Non capisco, signora.

Luc. Me capisso ben mi.

Ma dele amighe vecchie no se se degna pi.

Ferd. In Venezia, signora, non ho amicizia alcuna;

Se acquistar ne potessi, sarebbe una fortuna.

Luc. S'avemo cognossù in paese lontan.

Ferd. Dove?

Luc. Se no m'inganno, o a Torcello o a Muran.

Ferd. Non so questi paesi, dove si sian neunmeno.

Fatemi la finezza dirmi chi siete almeno.

Luc. Mi gh'ho nome Pandora.

Ferd. Pandora? e voi? (a

Bettina.)

Bett.

Marfisa.

Ferd. Due nomi veramente da muovere le risa.

Brave, signore mie! veggo che volentieri

S'usa da voi talvolta burlar coi forestieri.

Piacemi estremamente nel vostro sesso il brio:

Ma però vi avvertisco che so burlare anch'io.

Luc. L'ha falla, mio patron; no se usa in sta città

Burlar i forestieri. Xelo mai stà burlà?

Ferd. E come! e in che maniera! Volete voi sentire,

Se mi han ben corbellato? Or ve lo fo capire.

Vi leggerò un viglietto, che affè vale un tesoro.

(Scoprirò se per sorte l'ha scritta una di loro.)

Ferdinando adorabile. A me!

Luc. No xe ben dito?

Ferd. Vi par ch'io sia adorabile?

Luc. Se sa, chi ghe l'ha scritto?

Ferd. Io non lo so finora. *Ferdinando adorabile.*

Luc. Fin qua no ghe xe mal.

Bett. Nol xe guanca sprezzabile!

Ferd. Grazie dell'opinione, che formano di me.

(Se lodano il viglietto, qualche sospetto c'è.)

*Un' incognita amante vi ha consacrato il core ,
Costretta notte e giorno a sospirar d' amore .
Per me ! Sentite come l' incognita beffeggia .*

Luc. Nol la merita fursi ?

Bett. Xela una maraveggia ?

Ferd. (Quella che ha scritto il foglio par che in esse vi sia.)

Luc. La feuissa de lezer .

Bett. (Chi diavolo è custia !)

Ferd. Appena vi ha veduto, coi rai del vostro viso

Si è sentita colpire da un fulmine improvviso .

Questo ha del romanzesco .

Luc. Perchè ? no se ne dà

De sti amori improvvisi ?

Bett. Co i lo scrive , sarà .

Ferd. (Se una di queste due vergato ha questo foglio,

Chi sia di lor l'autrice assicurarmi io voglio .)

Sentite , or viene il buono . La vostra innamorata ,

Per un riguardo onesto si tiene ancor celata ;

Oggi voi la vedrete con mascherato aspetto ,

E avrà un galan per segno color di rosa in petto .

Luc. (Diavolo !)

Bett. (Cossa sentio ?)

Ferd. Ditemi , quel galano

L'hanno tutte le donne del popol veneziano ?

Luc. Perchè ?

Ferd. Perchè poc' anzi due maschere civili

Avevano dinanzi due nastri a quei simili .

Luc. Dasseno ?

Ferd. Certamente .

Luc. (Cossa distu , Bettina ?

Anca sì , che sta lettera xe scritta da Marina !) (piano a Bettina .)

Bett. (La xe anca capace .)

Luc. (No scoverzimo gnente .)

Ferd. (Vien da loro il viglietto. Si vede apertamente.)

Luc. Gl'ala nissun sospeto, chi possa averghe scrito?

Ferd. Direi, se non teinesssi d'essere troppo ardito.

Luc. Via, la diga.

Ferd. Mi pare che sia la veneziana,
Che mi ha scritto il viglietto, poco da me lontana.

Luc. A vu, mascara. (*a Bettina.*)

Bett. A mi?

Ferd. Se è ver quello che dite,
Se il viglietto è sincero, perchè non vi scoprite?

Bett. Mi non ho scritto certo.

Luc. Mi no so di biglieto.

Sala chi averà scritto? quella dell' aneieto.

Ferd. Come sapete voi, ch'io ho donato un auelo?

Luc. Sior sì, savemo tuto.

Bett. L'ho anca visto; el xe belo.

Ferd. Dite, sareste mai una di voi Bettina?

Bett. Mi Bettina, sior no.

Luc. Sala chi son? Marina.

Ferd. La signora Marina? Quella giovine bella,

Che sul festin jersera brillò come una stella?

Bett. (Malignazo!)

Ferd. Signora, vi giuro in verità,

Mi ha incontrato la vostra amabile beltà.

Di quante che ho veduto, siete la più brillante,

L'unica che può rendere questo mio core amante.

Luc. De rider e burlar lo so, che el se diletta,

Quela dell' aneieto xe bela e zovenetta.

Ferd. Bettina avrà il suo merito, ma francamente il dico,

In paragon di voi io non la stimo un fico.

Bett. Mascara, andemo via. (*a Lucietta.*)

Luc. Vegno; aspetè un pocheto.

Donca no la ghe piase quella dell' aneieto?

Ferd. È bella, se vogliamo; ma non saprei amarla;

E poi quella sua madre non posso tollerarla.

Luc. Andemo, che xe tardi. (*a Bettina.*)

Ferd. . Vonno andar via? perchè?

Non mi fanno l'onore di bever un caffè?

Luc. Grazie, grazie. (Asenazzo!) Andemo a travestirse.

No voi che elue cognossa, s'el gh'ha idea de chiarirse.

(*a Bettina.*)

Bett. La diga, sior foresto, ghe piase Marinetta?

Ferd. La signora Marina mi piace e mi diletta.

La venero, la stimo, e lusigarmi io voglio,

Ch'ella sinceramente mi parli in questo foglio.

Luc. Quel foggio no xe mio, gh'el digo, e ghe'l inategno,

Ste lettere no scrive chi ha un pochetto d'inzegno.

Marina lo ringrazia dela so gran bontà,

E in premio la lo mauda tre mia de là da strà.

(*parte.*)

Ferd. Questo cosa vuol dire? (*a Bettina.*)

Bett. . Vol dir liberamente,

Che delle so finezze no ghe penso gnente.

Che se Marina el manda tre mia de là da strà,

Lo manderà Bettina sedese mia più là. (*parte.*)

SCENA IV.

Ferdinando solo.

Maledetta Bettina, Marina e quante sono!

Tutte a beffar mi vengono sul medesimo tuono.

So pure che per fama le donne veneziane

Passano per gentili, vaghe, discrete e umane.

Intesi da ciascuno lodarle in ogni parte;

So che di farsi amare onestamente han l'arte,

E so che i forestieri, che furo in questo loco,

Della lor gentilezza si lodano non poco.

A me per mia sventura finor mi è capitato
Gente, da cui mi vedo deriso e beffeggiato.
Anche Marina istessa m'insulta e mi corbella?
Ma chi sa poi, se è vero, e se Marina è quella!
Parmi ancora impossibile, che donna sì gentile
Possa a un uom corrispondere con animo sì vile.

SCENA V.

SILVESTRA, e detto, poi NICOLÒ.

Silv. (Le cerco e no le trovo. Dove sarale andae?
Chi sa, ste frasconazze dove le xe imbusae!)

Ferd. (Chi scrisse questo foglio, tento scoprirehin vano.
Ecco qui un'altra maschera col solito galano.)

Silv. (Oh! in verità dasseno el forestier xe qua,
Che sul festin giersera ha tanto chiaccollà.)

Ferd. Meglio è ch'io me ne vada, pria d'impazzire ancora.
(in atto di partire.)

Silv. La diga. (lo chiama.)

Ferd. Mi comandi.

Silv. Vala via?

Ferd. Sì signora.

Silv. La senta una parola.

Ferd. Posso servirla in niente?

Silv. Tutto quel che la vol.

Ferd. (Questa è più compiacente.)

Vuol il caffè?

Silv. Son sola, da resto el beveria.

Ferd. Non basta un uom d'onore sia seco in compagnia?

Silv. No ghe voi far un torto, cognosso el so buon cuor.

Ferd. Vuol che l'ordini adunque?

Silv. La me farà un favor.

Ferd. Caffettiere.

Nic. Comandi.

Ferd. Un caffè.

Nic. Patron mio,

Co l'averò portà, me lo darala in drio?

Ferd. Spicciati, impertinente; porta il caffè.

Nic. (Da putto

Ghe fazzo boggier quello con el zucchero e tutto.)

(da se, e parte.)

Ferd. (Almen, se non mi burla, in volto la vedrò.)

Silv. Ho caminà, son stracca.

Ferd. Sieda.

Silv. Me senterò.

Che el se senta anca elo, che da giersera in qua

Nol pol esser che basta gnancora destraccà.

Ferd. E ver, fui sul festino. Ci foste voi?

Silv. Sior sì.

Ferd. Ho ballato di molto.

Silv. L'ha balà anca con mi.

Ferd. Ho ballato con tutte.

Silv. L'ha fato ben, xe giusto;

Ma me par che con mi l'abbia balà de gusto.

Ferd. Posso saper chi siete?

Silv. Ch'el l'indovina mo.

Ferd. Mi confondon le maschere e indovinar non so.

E quello che confondere mi fa più d'ogni cosa,

È quel nastro incarnato, o sia color di rosa.

Silv. Sto galan ghe fa spezie?

Ferd. Certo, perchè un viglietto

Dissemi che l'avrebbe chi mi vuol bene in petto.

Silv. La diga, sto viglietto principelo cusì:

Ferdinando adorabile.

Ferd. Senz'altro, eccoli qui.

Voi potrete svelarmi quel che saper desio:

Chi vergò questo foglio?

Silv. El carattere è mio.

Ferd. Dunque voi siete quella, che ad onorarmi inclina?

Silv. (Voggio farne del merito, za no ghe xe Marina.)

Certo quella mi son, come dise el biglietto,

Costretta notte e zorno a sospirar d'affetto.

Ferd. Ti ringrazio, fortuna, alfin scoperto ho il vero.

Ma il vostro cor, signora, posso sperar sincero?

Silv. Caspita! sincerissimo; le zovene par mie

In sta sorte de cosse no le dise busie.

Ferd. Oh ciel! siete fanciulla, vedova o maritata?

Silv. Oh son puta, son puta!

Ferd. Perchè andar scompagnata?

Silv. Gh'ho la mia compagnia qua de drio in tun canton.

Son vegnua per parlarghe senza aver suggizion.

Ferd. (Al gesto, alla maniera parmi che sia bellina.)

La vostra condizione?

Silv. Son quasi cittadina.

Ferd. Sarà per me una sorte, ch'io non merito certo.

Servire una signora, qual siete voi di merto.

Scopritevi di grazia. Questo caffè non viene? (*forte.*)

(Il desio di vederla mi fa vivere in pene.) (*da se.*)

Nic. El caffè xe qua pronto.

Ferd. Si smascheri, signora.

Silv. Vien zente?

Ferd. Siamo soli. Affè non vedo l'ora.

Silv. Me cognossela? (*smascherandosi.*)

Ferd. (Oimè!)

Silv. Coss'è stà?

Ferd. Niente, niente.

Silv. Ghe vien mal?

Ferd. Non signora; par che mi dolga un dente.

Silv. Via, via, ghe passerà. Xelo bon sto caffè? (*mettendovi molto zucchero.*)

Nic. La 'l senta.

Tom. XXVIII.

Ferd. (Gran fortuna, che oggi è toccata a me!)

Silv. Deme dell'altro zucchero; vegni qua, caro fio.

(a Nicolò.)

Nic. Ancora? se col zucchero mezz'ora l'ha bogio.

Silv. A mi me piase el dolce. E a ela? (a *Ferdinando*.)

Fer. Certamente.

Sil. Co'l caffè no xe dolce, nol me piase per gnente.

Oh caro sto dolcetto! (succhiando lo zucchero in fondo della tazza.)

Nic. (L'è vecchia co è la luna.)

Me consolo con ela. (a *Ferdinando*.)

Ferd. Di che?

Nic. De sta fortuna. (parte.)

Ferd. Anche costui mi burla.

Silv. Vorla che andemo via?

Ferd. Vada pur.

Silv. No son degna dela so compagnia?

Ferd. Ma non è accompagnata?

Silv. Via, ch'el vegna con mi.

Co le pute civil no se trata cussì.

Ferd. Dove destina andare?

Silv. A casa.

Ferd. Che diranno,

Se una puta sua pari col forestier vedranno?

Silv. Cossa vorla che i diga? voi far quel che me par.

Nissun no me comanda e son da maridar.

La me daga la man.

Ferd. (Godiam questa vecchietta.)

Eccomi qui a servirla.

Silv. Cara quella grazietta!

FINE DELL' ATTO SECONDO.

A T T O T E R Z O

SCENA PRIMA.

Camera in casa de sior Luca.

ZANETTO, e TONINA.

Ton. **V**ia, caro sior Zanetto, se falo sfregolar?
Appena el xe veguù, subito el vol scampar?

Zan. Voi cercar mia muggier. No so dove la sia.

Ton. Cossa gh'halo paura? che i ghe la meua via?

Alfin siora Felice no xe una fantolina;

E po no xela audada cola mia paroncina?

Poco a tornar a casa tardar le poderà,

Che nol zavarìa altro, e che el l'aspetta qua.

Zan. L'aspetterò. Per diana! sta cara mia muggier

La vol coi so mattezzi, che ghe ne daga un per.

(*accenna pugni o schiaffi.*)

Ton. Certo che so muggier la xe... la me perdona...

Xè che la mette suso anca la mia parona.

Zan. Oe! parlè con creanza.

Ton. Eh non digo per dir!

La xe zovene ancora, la se vol devertir.

Ghe piase andar in mascara, balar qualche pocheto,

Zogar tutta la notte.

Zan. E mi, gramazzo! in leto.

Ton. Povero sior Zanetto, el me fa compassion!

Vorla che ghe la diga?

Zan. Disè mo.

Ton. El xe un minchiou.

Zan. Come parlev, patrona?

Ton. Eh non intendo miga...

Basta, la me capisse, senza che ghe lo diga.

Zan. Mì no capisso gnente.

Ton. Me spiegherò più meggio..

Sta vita ritirada de far no lo conseggio.

Se devertisse i altri? che el lo fazzo anca lu.

Vardè là che marmotta! povera zoventù!

Zan. Cossa xe sto marmotta? vardè come parlè.

Ton. Eh caro sior Zanetto, vu no me cognossè!

Lo so che in sta maniera parlar no me convien;

Ma se pol dir qualcosa, quando che se vol ben.

Zan. Me volè ben?

Ton. Me par che no ghe sia bisogno

Guanca de domandarlo. Sior sì, no me vergogno,

Ghe voggio ben, l'ho dito, e ghe lo torno a dir.

De voler ben a uno, chi me pol impedir?

Zan. Son maridà. Se' putta...

Ton. Vardè che gran cazzada!

No vago col mio ben fora de carizada.

Lo amo, come s'el fusse mio pare o mio fradelo;

E se gh'avesse un stato, ghe lo darave a elo.

Zan. (Per dir la verità, me piase sto musetto.) (da se.)

Ton. (No ghe ne dago un bezzo. Lo fazzo per despetto.)

Zan. Vegniria qualche volta, ma ho suggizion.

Ton. De chi?

In sta casa, fio caro, fazzo quel che voi mi.

Sior Luca xe el patron, ma el xe vecchio, el xe sordo,

Che el ghe sia qualche volta guanca non m'arecordo.

So sorela xe sempia, pezo de una putela,

La zovene no parla, la xe aliegra anca ela.

Podè, senza riguardi, vegnir liberamente,

Se vegnirè a trovarme, staremo allegramente.

Zan. Certo che qualche volta gh'ho bisogno anca mi
De devertirme un poco. Sfatigo tutto el dì.

Ton. E la muggier a torzio.

Zan. E la muggier a spasso.

Ton. El mario se sfadiga, e la muggier fa chiasso,
Ai teatri, ai festini. La butta via, la zoga,
La xe una morbinosa, ma de tacco ti boga.

Zan. E se mezzo ducato anca mi butto via,
El diavolo ghe 'l dise, e subito la cria.

Ton. No soffriria ste cosse gnanca un omo de stucco;
In verità dasseno, che se' un gran manalucco.

Zan. E tocca via con questa.

Ton. Ve parlo per amor.

Proprio quando ve vedo, me se consola el cuor.

Zan. Ma se me volè ben, e se ve dè sto vanto,
Lassar no poderessi de strapazzarme tanto?

Ton. No posso far de manco; cossa voleu che fazzo?

Zan. Pazienza! strapazzeme.

Ton. Le parole no mazza.

Zan. Mia muggier no se vede.

Ton. Cossa voleu da ela?

Zan. L'ha portà via le chiave. No gh'ho bezzì in scarsela.
Son usà co me levo andar a marendar.

Felice sta mattina la m'ha fato zunar.

Ton. Povero pampalugo, in verità la godo!

Zan. Brava! tirè de longo.

Ton. Voressi un panimbrodo?

Zan. Perché no?

Ton. Sì, fio mio, aspetè che vel fazzo.

L'ha portà via le chiave. Povero minchionazzo! (*parte*)

Zan. Tocca via de sto passo. Qualche volta me vien
L'amor in ti garetoli, la me vol tropo ben.

Ma za ghe son avezzo a tor le strapazzae,

E Felice in sto conto la me vol ben assae.

Ton. Fina che boggie el brodo, son veguua a parecchiar.

Ho ordenà, col xe fato, che i lo vegna a portar.

(*prepara un tavolino colla salvietta e la posata.*)

Zan. Se vien zente?

Ton. N' importa.

Zan. Sior Luca gh' elo?

Ton. El gh'è.

Zan. No vorria che el disesse...

Ton. Che bisogno ghe xe?

Zan. Magnar in casa soa senza parlar con lu...

Ton. Non ho visto a sto mondo un sempio co fa vu.

Zan. Grazie.

Ton. Sentevè zo, che xe qua el panimbrodo.

(*viene un servitore col panimbrodo.*)

Zan. Se vien siora Marina?

Ton. Ve manderia sul sodo.

Zan. Via, via, no andè in colera; sarà quel che sarà.

(*siede.*)

Ton. Maguè, scaldeve el stomego.

Zan. Prezioso in verità!

Ton. (Pagherave un da trenta, che so muggier vegnisse,

E a so marzo despeto che la se inzelusisse.)

Zan. Vien zente.

Ton. Ste pur saldo. Non abbiè suggiziou.

Zan. Cossa voleu che i diga?

Ton. Mo se' un gran bernardon.

Zan. Tonina, co sto amor...

Ton. Magnè, magnè, Zanetto.

Saveu chi xe?

Zan. Me par...

Ton. El xe sior Bortoletto.

Zan. Bortolo? me despiase. Stemo de casa in fazza.

SCENA II.

*BORTOLO, e detti.**Bort.* Se pol vegnir?*Ton.* La vegna.*Bort.* Nane, bon pro ve fazza.*Zan.* Cossa diseu compare? se volè, se' patron.

I ha volesto per forza...

Bort. No abbiè suggizion.

Magnè pur. I m'ha dito che qua ghe xe Bettina.

Xe vero? (*a Tonina.*)*Ton.* La ghe giera, ma de prima mattina.*Bort.* E adesso saveu guente in dove che la sia?*Ton.* Mi no lo so dasseno. La giera in compagnia

Co so mare, le ho viste tute do immascheræ.

Vatela a catta ti dove che le xe andæ.

Bort. Gh'è la siora Marina?*Ton.* No la gh'è gnanca ela.*Bort.* Oh sta puta... per diana! che ghe la fazo bela.*Ton.* Eh, caro sior, la puta no ghe n'ha colpa un bezzo!

Xe causa quella mare.

Bort. Eh lo so, che xe un pezzo!*Ton.* Se mi gh'avesse un puto, co fa sior Bortoletto;No me chiameria degna. Oh sielo benedetto! (*piano a Bortolo.*)*Bort.* Dasseno?*Ton.* In verità. Xe che mi son... cusì,Da resto... Ma la senta, son civil anca mi. (*come sopra.*)*Bort.* Sentì, se la me salta, son capace de far

Quel che nissun al mondo se pol immaginar.

Ton. Bettina xe una frasca.

Bort. La gh'ha troppo morbin.

Ton. Bortolo, magneressi anca vu un bocconzin?

Bort. Magnar?

Ton. Se a sior Zanetto volè far compagnia,
Vago a torve qualcosa.

Bort. Quel che volè, fia mia.

Ton. Non voi miga... lo fazzo perchè vedè el bon cor.

(Sior sì, per devertirme voi metterlo in saor.)

(*da se e parte.*)

Bort. (Xe che la xe una serva, da resto... Betta, Betta,
Ti me faressi far... causa siora Lucietta.)

Zan. Amigo, me despiase che ho debotto fenio,
Ma certo uu panimbrodo più bon non ho sentio.

Bort. Tonina vol che magna.

Zan. Cossa?

Bort. No saveria.

La vol che marendemo tutti do in compagnia.

Zan. Lassemo, che la fazza. Co no ghe xe i paroni,
Le serve se la gode a spale dei minchioni.

Bort. No vorria che vegnisse sior Luca o Marinetta.

Zan. Ghe l'ho dito anca mi, ma al sentir sta spuzzetta
No la gh'ha suggizion.

Bort. Co la parla cusì,

La sa quel che la dise.

Zan. Cusì digo anca mi.

Ton. (*con due piatti, ed un'altra posata.*)

Son qua; voi che magnemo do fette de presutto,
E un tantin de stuffa.

Bort. Brava!

Zan. Mi stago a tutto.

Ton. Via senteve, sior Bortolo.

Bort. E vu?

Ton. Mi no ghe penso.

Zan. Vegnì via. (*a Tonina*)

- Ton.* Despenseme.
Zan. Oh per mi ve despenso !
Bort. Me voleu ben , Tonina ?
Zan. Tonina xe impegnada .
Ton. Con chi , patron ?
Zan. Con mi .
Ton. Oh mandria gazzarada !
Zan. Sentiu ? se nol savessi , imparè Bortoletto ;
Quando che la strapazza el xe un segno d' affetto .
Bort. Cara vu , strapazzeme .
Ton. Tasè là , sior perucca .
Che debotto ve digo sior stroppolo de zucca .
Zan. Sentiu ? la ne vol ben . Semo do fortunai .
Ton. Oh scartozzi da pevere , fagotti mal ligai !

SCENA III.

Sior Luca, e detti.

- Luc.* **T**onina .
Zan. Oe ! sior Luca .
Bort. Voleu che andemo ?
Ton. Eh gnente .
Zan. Almanco respondeghe .
Ton. L'è sordo ; nol ghe sente .
Luc. Tonina ?
Zan. Andemo via .
Ton. Stè là , no ve movè .
Za se volè andar via , per forza l'incontrè .
Zan. No vorria . . .
Ton. Pampalugo !
Bort. La civiltà . . .
Ton. Minchion !
Bort. E se el paron ne cria ?

Ton. Che el cria, che el xe paron.

Luca. Gh'è nissun in sta casa? vèh vèh! schiavo patroni.

Chi ei sti siori? (*a Tonina.*)

Ton. Do amici. (*forte.*)

Luca. Cossa?

Ton. Do amici boni. (*più forte.*)

Luca. No i cognosso. Chi xeli? (*si mette gli occhiali.*)

Ton. Sior Bortolo Zavagna, (*forte.*)

E sior Zanetto Trigoli.

Luca. Sior Bortolo che magna?

Vedo anca mi che el magna.

Bort. La prego a perdonar.

Luca. Come?

Bort. Ghe domando perdon.

Luca. Cossa xe sto zigar?

Tonina.

Ton. Cossa vorla?

Luca. Chi li ha fati vegnir?

Ton. La vecchia.

Luca. Chi?

Ton. La vecchia. (*più forte*)

Luca. Perché?

Ton. No ghel so dir.

Luca. Cossa?

Ton. (Pustu crepar; me averzo, e nol me sente.)
(*da se.*)

Luca. Marina dove xela?

Ton. No so.

Luca. Che?

Ton. No so gnente.
(*forte.*)

Zan. La perdona, sior Luca, la troppa confidenza.

Veramente, el confesso, l'è stada un'insolenza

Cercava mia muggier, so che la giera qua.

I m'ha dà da marena, e mi no ho reffadà.

Luca. La m'ha calà in sta recchia sta note una flussion.

De qua ghe sento poco. La prego de perdon.

Zan. Amigo, parlè vu donca dall'altra banda.

Bort. Certo, s'avemo tolto una libertà granda;

Ma se sa che sior Luca xe un omo tuto cuor,

Che tuti i buoni amici el trata con amor.

De carneval xe lecito torse ste libertà.

Amigo, a quel che vedo, l'è sordo anca de qua.

(parla con Luca, e Luca seguita a guardar Zanetto non sentendo Bortolo.)

Luca. Xela ela che parla? *(a Zanetto.)*

Zan. Per mi non ho zittio.

Xe quello là che parla. *(accenna colla mano.)*

Luca. Oh el gh'aveva da drio!

(voltandosi vede Bortolo.)

Ton. Che commedie! No xe le cosse da crepazzar?

No ghe badè, marzocchi. Senteve, audè a magnar.

Bort. Permettela, signor?

Luca. Vala via? la se comoda.

Bort. El stuffà se sfredisse.

Luca. Basta, no la s'incomoda.

Zan. Che persutto prezioso!

Luca. Basta cussì; che el tasa.

Zan. Vago a magnar el resto.

Luca. La reverissa a casa.

(Bortolo e Zanetto tornano a tavola.)

Luca. Tonina.

Ton. Sior.

Luca. Adesso, che i xe audai via de qua,

Voria che me disessi... Oh bela in verità! *(si volta, e li vede a tavola.)*

Mo za che la mia roba s'ha da magnar cussì,

Quando che i altri magna, vot magnar auca mi.
 Un piato e un tovaggiol. Con licenza, patroni,
 Gh'è uu odor che consola! No i xe miga minchionii.
 Ghe ne voggio auca mi de sto stuffa.

Bort. Gh'ho gusto.

Luca. Come?

Bort. Digo de sì.

Luca. Cossa dixeù?

Bort. Xe giusto.

Ton. (Per diana! che le vien. Per causa del patron
 Mi co siora Felice no gh'ho la mia intenzion.
 La crederà che elo gh'abbia dà da magnar.
 Sto vecchio malignazzo me xe vegnù a intrigar.)
 (da se, e parte.)

SCENA IV.

MARINETTA, siora FELICE, e detti.

Mar. **B**on pro fazza, patroni. Se disna, o se merenda?

Fel. Sior mario, come vala, cosa xe sta facenda?

Zan. Se no fussimo qua, qualcosa ve dirave.

No ve basta de andar, me portè via le chiave?

Fel. Vardè che gran faccenda! Oh povero putelo!

La mamma è andada via senza darghe el cestelo..

Zan. La me burla, patrona? (s'alza.)

Mar. Vu burlè sior Zanetto?

Se tase, e a so mario se ghe porta rispetto.

El xe un omo, e coi omeni no se tratta cusì,

E no se va a ziron tutta la notte e el dì.

Mi ghe conterò tutto. Sentì, sior; vegnì qua.

(mostra di gridare a Felice, e fa che s'accosti
 Zanetto, cui dice piano.)

Netteve, che se' sporco, i lavri da stuffa.

Zan. (va a pulirsi la bocca.)

Fel. Mo ti xe una gran matta! (*a Marinetta ridendo.*)

Mar. Gh'haistu paura? (*a Felice.*)

Fel. Gnente. . .

(*a Marinetta.*)

Zan. Sta vita no la voggio, certo assolutamente.

Mar. El gh'ha rason, sta vita no la se pol durar.

Vu tutto el zorno a spasso, e elo in casa a scassar.

Siora no, no va ben; se ghe dise cùsì;

Mario, se me devertò, devertite anca ti.

Vustu vegnir a spasso, vustu che se godemo?

Mettite su el tabarro, tiò la bautta e andemo.

Quando ti vien con mi, ti me consoli tanto;

Ma po, se no ti vol, vissere mie, t'impianto.

Zan. Brava, siora Marina, brava da galant'omo!

Fel. Eh mio mario xe bon!

Mar. Vostro mario xe un omo.

Fel. Vederè che stassera el veguirà al festin.

Mar. Chi xelo? un taggia legne? Xelo un spazza camin?

Fel. El me vol ben Zanetto.

Mar. Caspita! el meritè.

Fel. N'è vero? (*a Zanetto.*)

Mar. Respondeghe. (*a Zanetto.*)

Zan. Gran diavolo che se'!

(*in atto di partire.*)

Fel. Andeu via co sto sesto?

Mar. El se va a immascherar.

Fel. Oe! mi no vegno a casa.

Mar. La stà con mi a disnar.

Fel. Che staga? (*a Zanetto.*)

Mar. Siora sì; stè pur.

Fel. Grazie infenite.

Mar. Ve ringrazio anca mi.

Zan. Patrone reverite. (*in*

atto di partire.)

Fel. Tolè, tolè le chiave.

Zan. Siora sì, siora sì.

Fel. Xestu in colera, Nane?

Zan. Son . . . no so gnanca mi.

(*parte.*)

Mar. Xelo andà?

Fel. El xe andà.

Mar. A bon viazo, mostela.

Fel. M' avè fato da rider.

Mar. Se fa cusì, sorela.

Cossa serve coi omeni criar e far musoni?

Quando che no se cria i diventa più boni.

Bort. (Sta puta no se vede.) (Digo, siora Mariua.

Me saveriela dir . . .

Mar. Cossa cercheu? Bettina?

Bort. Giusto ela.

Mar. Dixè; no savè guente?

Bort. Cossa?

Mar. No savè de Bettina? Oh la l'ha fata grossa!

Bort. La diga mo.

Mar. Conteghe. (*a Felice.*)

Fel. Cossa gh' hoi da contar?

Mar. (Inventemo qualcosa; femelo desperar.) (*piano a Felice.*)

Bort. Me fè star in travaggio.

Mar. Se savessi!

Bort. Mo via!

Mar. La se sposa.

Bort. Con chi?

Mar. Con mistro Zamaria.

Bort. Chi elo costù.

Mar. El xe un omo. Felice lo cognosse.

Fel. El xe quello, che vende dell' acqua per la tosse.

Bort. Dove stalo?

Fel. A Venezia.

Bort. Ma dove?

Mar. In cao castelo.

Altro che vu, sior Bortolo; se vedessi co belo!

Bort. Dove xela Bettina?

Mar. La xe dal so novizzo.

Fel. No, la xe dal compare?

Bort. Chi elo?

Mar. El sior Pastizzo.

Bort. Patrone.

Mar. Dove andeu?

Fel. Senti.

Bort. Voggio andar via.

Voggio che el me la paga.

Mar. Chi? mistro Zamaria?

Bort. Giusto elo. *(in atto di partire.)*

Mar. Fermeve. *(lo vuol trattenere.)*

Bort. Voggio andar via. *(come sopra.)*

Mar. Ascoltene.

(lo fermano.)

Bort. Lasseme andar. *(si scuote.)*

Mar. Tegnimolo.

Bort. Gnanca co le caene.

(si libera dalle donne, e nel fuggire urta nel tavolino, lo getta in terra, e fa cader anche il signor Luca.)

Luca. Cossa xe stà? *(in terra.)*

Mar. Sior padrel *(lo ajuta ad alzarsi.)*

Luca. Oi! *(alzandosi.)*

Mar. S'halo fato mal?

Luca. Come?

Mar. S'halo maccà?

Luca. Cossa?

Fel. (Mo che coccà!) (*da se.*)

Luca. Ho magnà un pochetin, m'aveva indormenzà.

Diseme, cara fia, come songio cascà?

Mar. El xe stà un accidente.

Luca. Cossa?

Mar. El gato xe sta. (*forte.*)

Luca. El gato? Oh malignazzo! halo magnà el stufà?

Chi elà questa? (*accenna Felice.*)

Fel. Son mi.

Luca. Siora?

Fel. El sa pur chi son.

Luca. Malignazzo quel gato! m'ho indolenza un galon.

Voggio andarme a sentar; la star in piè me stracco.

Fia mia, mandeme subito a tor un tacco macco.

Cossa? (*a Felice.*)

Fel. No digo gnente. (*sogghignando.*)

Luca. Come? (*a Marinetta.*)

Mar. Digo de sì. (*sogghignando*)

Luca. Ridè? Co se xe vecchi i ne trata cusì.

Me diol, e ancora i ride. Se visesse to mare!

Senti sa frasconazza, no scoffouar, to pare.

Siora? (*a Felice.*)

Fel. Per mi no parlo.

Luca. Vardè là, che bel sesto!

Anca vu sarè vecchie, se no creperè presto.

I omeni anca vecchi i è boni a qualcosa,

La dona l'ha fenio co la xe vecchia e flossa. (*parte.*)

Fel. Oh che caro vecchietto! no ghe respondè gnente?

(*a Marinetta.*)

Mar. Cossa gh'hoi da responder? Savè che nol ghe seate.

Fel. E quel povero Bortolo?

Mar. Povero fantolin!

Fel. Perchè farlo zurar?

Mar. No saveu! per morbin.

Fel. El xe fora de elo, gramazzo! el xe ben grezo.

Mar. El crede a ste faloppe: se pol sentir de pezo?

Oh sior amia, sior amia!

Fel. In mascara auca ela?

Mar. Oe! co sior Ferdinando!

Fel. Marina, come xela?

Mar. Scondemo sti galaui.

Fel. Sì, che nol ne cognossa.

Mar. Mia amia col foresto?

Fel. No saveria per cossa.

SCENA V.

SILVESTRA, FERDINANDO, e detta.

Silv. **P**utte, cossa diseu, m'hoi trovà un bel braccier?

Fel. Brava, siora Silvestra!

Mar. Brava! col forestier.

Ferd. Che vedo! in questa casa la signora Marina?

Silv. Sior sì, la xe mia nezza.

Ferd. Nezza?

Silv. Mia nepotina.

Ferd. Questa mi giunge nuova. Non mi credeva mai
Di essere dove sono.

Mar. Mo, ghe despiase?

Ferd. Assai.

Mar. Grazie del complimento.

Fel. Vardè là che bel sesto?

Ferd. Con ragon, mia signora, meravigliato io resto.

Mar. Perché?

Ferd. Voi lo dovrete saper più di nessuna.

Mar. Mi credo che el zavarìa.

Fel. Ai quanti fa la luna?

Silv. Sto sior, Marinetta, el sta a disnar con nu.

Tom. XXVIII.

Mar. Dasseuo? me consolo.

Ferd. No, non vi resto più.

Silv. Perché? S' halo peutio?

Mar. Fursi per causa mia?

(Sta vecchia... fe de tutto de menarmela via.)

(piano a Felice.)

Silv. No crederave mai, che el me fasse sto torto.

Fel. Sentì, siora Silvestra. (El xe inamorà morto.)

Silv. (De chi?)

Fel. (De vu.)

Silv. (Dasseno?)

Fel. (Con fondamento el so.)

Silv. (Saveu chi el sia?)

Fel. (So tutto.)

Silv. (Chi elo?)

Fel. (Ve conterò.)

Andeve a despoggiar; veguirò in compagnia,

E ve conterò tutto.)

Silv. (E se intanto el va via?)

Fel. (Eh che no l'anderà!)

Silv. La senta, sior foresto,

Me vago a despoggiar, e torno presto presto.

Me aspettela?

Ferd. Non so.

Fel. Eh che l'aspetterà!

Mar. Se el vol andar, che el vaga.

Ferd. Dove? di là da strà?

Mar. Vardè che bel parlar!

Fel. Dico quel che mi han detto.

Vada, vada a spogliarsi. (a Silvestra.)

Silv. M' aspettelo?

Ferd. Vi aspetto.

Sil. Bravo! cusì me piase. (Vedo che el me vol ben.)

Vegui con mi, Felice. (El cuor me sbalza in sen.)

El disnerà con nu. Oe! no ghe disè guente
A sior Luca, za elo xe vecchio, e nol ghe sente.
Senza che nissun sappia femo sto disnaretto.
(Proprio me sento in griugola. Oh sjestu benedetto!)
(*parte.*)

Fel. (Hoi d' andar anca mi?)

Mar. (Si andè, ma destrigheve.)
(*a Felice.*)

Fel. (Sola volè restar?) (*piano a Marinetta.*)

Mar. (Per questo?) (*a Felice.*)

Fel. (Comodeve.) (*a Marinetta, e parte.*)

Mar. Che el diga, caro sior, cossa gh' halo con mi?

Ferd. Vi par che i galantuomini si burlino così?

Mar. Chi lo burla?

Ferd. Che forse voi vi siete scordata

Di quel che mi diceste al caffè mascherata?

Mar. Come m' halo scoperto?

Ferd. Mi domandate il come?

Non vi dovea conoscere, se mi diceste il nome?

Mar. Mi gh' ho dito el mio nome?

Ferd. Oh bella in verità!

Voi stessa, e mi sapeste mandar di là da strà.

Mar. Sior Ferdinando caro, questa xe uua bulada.

In mascara al caffè, xe vero, ghe son stada,

Ho parlà anca con elo, ho sentio d' un biglietto.

Gh' aveva per desgrazia un certo galanetto;

In grazia dela mascara, m' ho tolto confidenza,

Ma no gh' ho dito el nome, nè giamca sta insolenza.

Anzi, perchè in tel viso nol me vedesse, el sa,

Che el caffè in te la cliccara scampando gh' ho lassà,

E che finzendo de esser femmena maridada,

Del mario col pretesto sou dal caffè scampada.

Ferd. Oh ciel! voi siete quella... dunque l' altra non siete...

Or conosco il vestito. Sì, che ragione avete.

Prima venner due maschere, per verità compite,

Poi altre due ne vennero, più risolte e ardite.

Avean lo stesso nastro, come le prime al petto,

E che avea il vostro nome una di quelle ha detto,

Mar. Sior? le ha fiuto el mio nome? Zitto, le trovo adesso.

Un galan co fa questo? (*mostra il nastro.*)

Ferd. Par quel galano istesso.

Mar. Certo un galan compagno gh'ho dà mi stamattina.

Le xe ele senz'altro. Lucietta con Bettina.

Ferd. Lucietta colla figlià?

Mar. Ghel digo in verità.

Ferd. Han ragion di mandarmi dunque di là da strà.

Mar. Perché?

Ferd. Non conoscendole, ho detto che Lucietta

Mi pareva iusoffribile, e l'altra una fraschetta.

Mar. Bravo, bravo dasseno! Gh'ho gusto; tolè su.

Ferd. Cospetto! Colle maschere non vo' parlar mai più.

Mar. Cossa gh'importa a elo d'averle desgustae?

Se el gh'ha dito ste cosse, le se le ha meritaè.

Ferd. Voi però niente meno di me prendeste gioco.

Mar. No ghe xe mal, l'ho fato per devertirme un poco.

E circa a quel biglietto, no la creda che el sia

Nè tuto verità, nè tuto una busia.

Ferd. Parlate voi di questo? (*mostra il biglietto.*)

Mar. Sior sì, parlo de quello.

Ferd. Tanto brutta è chi scrisse, quanto il biglietto è bello.

Mar. Cussì, co sto disprezzo la parla in fazza mia?

Dove ha dito Lucietta debotto el manderia.

Ferd. Vi par che sia vezzosa la signora Silvestra?

Mar. Ah el parla de mia amia! La xe un'altra manestra.

Ferd. Non fu lei che lo scrisse?

Mar. Certo è la verità.

Ma se la vecchia ha scritto, qualcun ghe l'ha detà.

Ferd. Per altro i sentimenti saranno suoi.

Mar.

Nol credo.

(*vezzosamente.*)

Ferd. Son vostri? (*vezzosamente.*)

Mar.

No so gnente.

Ferd.

Sì, sono vostri, il vedo.

Ah se creder potessi sincero un simil foglio

Quanto sarei contento! Ma disperar non voglio.

Una gioviue onesta, che unisce alla beltà

I doni dello spirito, no che ingannar non sa.

Appena vi ho veduta, voi mi piaceste tanto,

Che pareste d'amore un prodigioso incanto.

So che ve ne accorgete. Nè credovi capace,

In mercè della stima, di essere mendace.

Signora, a d'ispiegarvi l'onestà vostra impegno;

Se burlaste, pazienza! per questo io non mi sdegno.

Dono all'età ridente lo scherzo menzognero;

Ma per pietà, vi prego, non mi celate il vero.

Mar. Che el vaga a dir ste cosse a quella dell'anelo.

Ferd. Non mi mortificate. La verità vi svelo.

Parvemi conveniente sì piccolo tributo

A figlia, cui sembrava l'anello esser piaciuto.

Ma da'miei labbri intesero, se ho dell'amor per essa,

La madre mascherata e la fanciulla istessa.

Ambe da voi sfidate a dir la verità,

Dicano, se di voi lodata ho la beltà,

E se il merito vostro in faccia lor vantato,

Mi fe dal loro sdegno schernito e strapazzato.

Voi siete quella sola, che in città sì famosa

Apparve agli occhi miei più amabile e vezzosa;

E se del vostro affetto posso sperare il dono,

Sull'ottor mio vel giuro, lieto e felice io sono.

Mar. Sento a mover i piati, xe ora de disnar,

La vaga in quella camera, la se vaga a scaldar.

Ferd. Così mi rispondete?

Mar. Vorlo andar? (*con impazienza.*)

Ferd. Non gridate.

Anderò, mia signora, senza che mi mandiate.

(Mi piace, è figlia sola, ha delle facoltà.

Parmi di non spiacerle, voglio sperar. Chi sa?) (*parte*)

Mar. Ah sto sior Ferdinando el xe sutìlo e fin!

No voria incocalirme, e perder el morbin.

Vardè, quando che i dise: per quanto che sia esperta,

Per quanto che abbia fato, la burla è scoperta.

De ste sorte de burle no ghe ne fazzo pi.

Se tropo andemo avanti togo de mezo mi.

Per dir la verità el me piase sto sior,

El gh'ha certe parole, che bisega in tel cuor.

Bettina mo credeva d'averlo chiapà in rede;

So dano! hala sentio? Ste cosse le se vede.

L'ha dito che ghe piase, che ela xe una fraschetta,

Gh'ho gusto per Bettina, ma anca più per Lucietta.

Voi farghe veder mi chi son e chi no son.

Ma po come sarala, se casco a tombolon?

Semo da maridar. Donca se poderia,

Se el disesse dasseno... Ma se no so chi el sia!

Oh m'ho intriga pur mal! Povera zoventù!

Quando che si scomenza, no se ghe pensa su.

Co i omeni burlando se fa de sti vadagni,

E el morbin coll'amor va zo per i calcagni.

FINE DELL' ATTO TERZO.

ATTO QUARTO

SCENA PRIMA.

Camera con tavola per desinare, credenza ec.

*Servitori che apparecchiano, TORINA, poi
FELICE.*

Ton. **A**nemo, seve onor, e parecchiè pulito;
La tola bene all'ordene fa vegnir apetito.
Pieghè quei tovaggioli con qualche bizzaria;
Feghe un beccheto de anara, un fongo, una galia.
Sentì sentì: in tel logo dove sta el forestier,
Pieghieghe el tovaggiol in forma de cimier.
Soto el cimier metteghe do vovi de galina;
Cossa vol dir i vovi lassè che l'indovina. (*fa cen-
no colla mano al capo.*)
Dove starà la vecchia feghe sto bel scherzetto,
Pieghieghe el tovaggiol in forma de cailletto.
Con quel de la parona, che xe con un amoroza,
Formeghe un bel garofolo, o un boccolo de riosa.
E a sta siora Felice, che gh'ha tanto morbin,
Feghe una bela cuna con dentro un fantoliu;
E a mi se la rason la vien a domandar,
Ghe dirò che vol dir, che la vaga a scassar.

Fel. Chi ha d'andar a scassar?

Ton. Mi no digo de ela.

Fel. M'immagino patrona, la sarave ben bela,
Che con mi ve tolessi sta confidenza.

Ton. Mi?

La pensa, se de ela parlarave cussì?

Fel. Dove xe Marinetta?

Ton. Mi no so in verità.

Fel. La tola xela all'ordine?

Ton. Deboto è parecchià.

La dica, sior Zanetto vegniralo a disnar?

Fel. Sempre sto mio mario vel sento a menzonar.

Ton. Co no la xe zelosa, no gh'importerà gnente.

Fel. L'ho dito, e el torno a dir, no ve gh'ho gnanca in men-

(te

Ton. E pur chi el sente elo, el sta con batticuor.

Co gh'ho dà da marenda el gh'aveva timor.

Fel. Vu donca stamattina gh'avè dà da marenda?

Ton. Mi ghe n'ho dà, no credo che de mi la se offenda.

Fel. No, fia mia, de ste cosse mi no me togo pena.

Deghe pur da marenda, da disnar e da cena.

Mi no ghe vago drio; no gh'ho sta sinfonia;

Me basta de trovarlo, co torno a casa mia.

E po, mi me fido che nol xe tanto grezo,

Che se el vorà scambiar, nol vorà farlo in pezo.

Ton. Mi son pezo de ela? l'intendo sto sermon.

Fel. Chi ha bona rechia intende.

Ton. Brava! la gh'ha rason.

Patrona.

Fel. Ve saludo.

Ton. (Sì, per farghe despetto,

Voggio mandar a veder, se i trova sior Zanetto.

Finzerò che l'invida la parona a disnar.

Voggio farghela veder; voi farla desperar.) (*parte.*)

SCENA II.

FELICE, poi MARINETTA.

Fel. **L**a crede mo custia de farne magnar l'aggio.
So chi el xe mio mario, de lu no gh'ho travaggio.
Ma se gnente vedesse, che la 'l metesse suso,
Oh no la sa chi sia, ghe sgraffierave el muso!

Mar. Cossa feu qua, Felice?

Fel. Dove xelo l'amigo?

Mar. El xe de là. Fia cara, sou in tun brutto intrigo.

Fel. Cossa vol dir?

Mar. Per mi so che avè dell'amor.

Voggio contarve tuto, voi palesarve el cuor.

Fel. Anca sì che indovino?

Mar. Via mo.

Fel. Se' innamorada?

Mar. Poco manco sorela.

Fel. Vardè che gran cazzada!

E per questo? No seu da maridar?

Mar. Xe vero.

Ma no se sa chi el sia.

Fel. Se saverà, mi spero.

Mar. Se savessi, Felice, come che stago!

Fel. Oh via!

Fareu che per amor se perda l'allegria?

No se pol voler ben, e star allegramente?

No me stè a far la mata. Tendemme a mi.

Mar. Vien zente.

Fel. Mi, mi scoverzirò...

Mar. Mascare? chi mai xele?

Fel. A sta ora do mascare vestie da ortolanele?

Mar. Stimo che le vien via senza gnanca parlar.
Fel. Demoghe poche chiaccole; xe ora de disnar.

SCENA III.

LUCIETTA, e BETTINA, che travestite da ortolanelle fanno riverenze e vari cenni senza parlare, e dette.

Mar. **M**ascherette.

Fel. Pulito! Vardè che figurazza!

Mar. Andeu a spasso? brave!

Fel. Gh'è dela zente in piazza?

Mar. Gh'aveu omeni? no?

Fel. Seu maridae? Seu pute?

Mar. Disè, cossa vol dir che no parlè? Seu mute!

Fel. Tolevene, patrone, infina che podè.

Mar. Mo via, desmaschereve. No? no volè? perchè?

Mi no so cossa dir, ve podè comandar.

Me despiase che adesso xe ora de disnar.

Fel. Oe! mascare, ale curte; desmaschereve, o via.

No volè andar? Me piase.

Mar. Mi no so chi le sia.

Me par che quella mascara se doveria cavar.

Fel. Ve l'hoi da dir in musica. Nu volemo disnar.

Mar. La xe un poco longheta. Ridè? brave! E cussì?

Voleu che andemo a tola?

Luc. Vegno a tola anca mi.

(*smascherandosi.*)

Fel. Oh oh Lucietta! brava! Xela Bettina quella?

Bett. Siora sì. (*smascherandosi.*)

Fel. Mo co brava! Che bela ortolancla!

Mar. Aveu disnà?

Luc. Disnà? Veguo a disnar con vu.

Mar. Dasseno ?

Luc. Sì dasseno .

Fel. Saremo in do de più .

Mar. (Le vien mo giusto ancuo, per intrigarne i bisi .)

Luc. Gh' ho una fame che ispirito, fe meter suso i risi.

Mar. Gh' avè fame? Ste fresca! No ghe xe squasi guente.

Luc. No stè a far cerimonie, magnemo allegramente.

Bett. Xe sta qua Bortoletto ?

Mar. Siben, el ghe xe stà .

Fel. Gh' avemo dà da intender cento bestialità .

B. It. De cossa ?

Mar. Vien siora amia .

F. L. Zitto, zitto, tasemo .

Lassè pur che la vegna, voi che se la godemo .

Mar. (Gh' ho rabia che le sapia che ghe xe qua el foresto,

Bisognerà che pensa trovar qualche pretesto .)

SCENA IV.

SILVESTRA, e dette .

Silv. **S**on qua; che i meta in tola .

Mar. Oe ! avvisè de là .

(*ad un servitore .*)

Silv. Dove xe el forestier ?

Fel. Oe ! le forestier xe andà .

Silv. Cossa diseu ?

Fel. Dasseno . El gh' aveva da far .

L' ha visto che vien tardi, e l' ha volesto andar .

Silv. No i la finisse mai ste carogue in cucina ;

Voi cazzar via la cuoga, voi cazzar via Tonina .

Tuti voi cazzar via . Sempre la xe cusù .

Se xe andà via el foresto, voggio andar via anca mi.

Mar. Eh via ! no la ghe bada...

Fel. (Lassè che la se instizza.)

(*piano a Marinetta.*)

Silv. Oh mi! con poche legne el mio camin se impizza.

Luc. Coss'è, siora Silvestra?

Silv. Chi seu vu?

Luc. Son Lucietta.

No me cognosse più?

Silv. E quella?

Luc. Mia fia Betta.

Fel. Vedeu, siora Silvestra? Se no gh'è el forestier,

In pe de uno a tola ghe n'averemo un per.

Silv. Sto cambio nou me comoda. Che i lo vada a cercar.

Voggio che l'aspettemo, e no s'ha da disnar.

Bett. Andemo, siora mare. Varè là che bel sesto!

Luc. Chi aspettela, Felice?

Fel. L'aspetta quel foresto,

Sior Ferdinando.

Luc. Oh caspita! gierelo vegnù qua?

Mar. La l'ha menà qua ela. (*accenna Silvestra.*)

Luc. Eh via!

Silv. Cossa xe stà?

Xela una maraveggia? Certo, patrona sì.

Se nol savè, vel digo, el spascina per mi.

Lo so che per invidia i l'a fato andar via;

Ma voggio che el ghe torna, sì, per diana de dia!

Anemo con chi parlio? Andemelo a cercar. (*ad un servitore.*)

Voggio star al balcon, se credo de crepar. (*parte.*)

Fel. Mo no xela da rider?

Mar. (Varda che nol te veda.)

(*a Felice.*)

Fel. (El deve far qualcosa. Lassemo che l'al creda.)

(*a Marinetta.*)

Bett. Se vien sto forestier, andemo via.

Luc.

Perchè?

Se el vien lassa che el vegna. Che bisogno ghe xe?

Quel sior l'è giusto bou per una vecchia matta.

Uno pezo de elo no credo che se catta.

Mar. Come parlev, Lucietta?

SCENA V.

Ferdinando, e dette.

Ferd. (*Vedendo le due ortolanelle resta in disparte.*)

Luc. Digo la verità,

Nol gh'ha sior Ferdinando guente de civiltà.

Bett. La gh'ha rasou mia mare.

Fel. Mo perchè poverazzo!

Bett. Perchè nol sa el trattar.

Luc. El xe proprio un boazzo.

Mar. V'halo fato qualcosa?

Fel. (Oh che gusto! el le sente.)

(*avendo veduto Ferdinando.*)

Disè, disè, conteme.

Luc. No, nol m'ha fato guente.

Fel. Ma pur?

Mar. Siora Lucietta, quando lo strapazzè,

Co disè tanto mal, qualche rason ghe xe.

Fel. I dise pur che el sia un signor da Milan.

Luc. Oh oh un signor! Chi sa che nou sia un zaratau.

Mar. Eppur a vostra fia el gh'ha dà un aneletto.

Luc. Dasseno! Chi l'ha dito? Vardè che bel soggetto!

Mar. Perchè torlo?

Bett. Nol val gnanca diese ducati.

Luc. I crede mo sti siori... Va là, poveri mati!

Se mia fia ghe tendesse, la perderia el concetto.

Ferd. Grazie delle finezze.

- Luc.* (Oh siestu maledetto !)
- Bett.* (Halo sentio?) (a *Lucietta.*)
- Mar.* (Gh'ho a caro.)
- Luc.* Perchè no halo tasesto?
 Bisognava star là, che l'averia godesto.
 Lo savevimo tutte, che el giera in quel canton,
 L'ho visto, me n'ho incorto col xe vegnù in scondon.
 E ho dito quel che ho dito per far vogar Mariua.
 Ho volesto far scena. No xe vero, Bettina?
- Bett.* Siora sì.
- Fel.* (Oh che galiotta !)
- Mar.* Voltè quella brisiola.
- Ferd.* Sì, anch'io vi ho conosciuto colla vostra figliuola
 Questa mattina in maschera, in foggia differente,
 E ho detto quel che ho detto sincerissimamente.
- Luc.* Dasseno?
- Ferd.* In verità.
- Luc.* Da cavalier la godo.
- Ferd.* Piacciono i belli spiriti ancora a me, sul sodo.
- Fel.* A monte, a monte tutto; anemo, cossa femio?
 Me sento a sgaugolir, maguemio, o no maguemio?
- Mar.* Andè a avvisar sior amia.
- Fel.* Me bala le bucle.
- Mar.* No se ghe vede più. Impizzè le candele. (*ad un servitore.*)

SCENA VI.

SILVESTRA, e dette; indi si accendono i lumi.

- Silv.* **S**on qua. Cossa voleu?
- Fel.* Vedeu, siora Silvestra?
- Eccolo, el xe tornà. Oh xe qua la menestra!

(mettono tre piatti in tavola, poi altri tre, poi le f.utta.)

Silv. Bravo, bravo! impiantarme... (a *Ferdinando*.)

Ferd. Signora, io non saprei.

Mar. Via, sentemose a tola.

Silv. Luce degli occhi miei. (verso *Ferdinando*.)

Luc. Mo che bei sentimenti!

Bett. Che grazia che la gh'ha!

Fel. Sior Ferdinando, a ela, che la se senta qua.

Silv. E mi?

Fel. Arente de elo.

Silv. All'idol mio vicina.

Fel. Brava! e da st'altra banda se senterà Marina.

Qua Lucietta, qua Betta. Che piasa, o che despiasa,

Fazzo mi per sta volta i onori dela casa.

Ferd. Servo prima di tutte la signora Silvestra. (presentandole.)

Silv. Ch'el me ne daga assae, me piase la manestra.

Ferd. La signora Felice. La signora Bettina.

A lei. (getta il tondo a *Lucietta*.)

Luc. Che mala grazia!

Ferd. Garbata signorina,

L'ultima è la padrona.

Mar. La me fa tropo onor.

Ferd. (L'ultima ala sua mensa, ma la primiera in cor.)
(piano a *Marinetta*.)

Silv. Cossa diselo?

Ferd. Niente.

Silv. Via, che el magna anca elo.

Fel. Digo, sior Ferdinando; de che paese xelo?

Ferd. L'ho detto un'altra volta, la mia patria è Milano.

Luc. Xelo conte, o marchese?

Ferd. Io sono un ciarlatano.

Silv. Cossa?

Mar. Via, che nol staga a dir de sti strambotti.

Silv. Certo, el xe 'un zaratan, che zoga ai bussolotti.

El xe uu bravo sparissi, e confessar convien,

Che el m'ha fato sparir el cuor fora dal sen.

Ferd. E il mio dov'è sparito? il mio dove sarà?

Mar. Credo poco lontan.

Ferd. È vero.

Silv. El soo xe qua.

Fel. Puti, demé da beber.

Luc. Troppo presto fia mia.

Fel. Eh che voggio, che el vin me meta in alegria!

Voleu che stemo qua co fa tante marinotte?

Anemo, fazzo un brindese: Viva le zovenotte. *(beve.)*

Silv. Grazie.

Bett. Più tosto a mi sto brindese el me tocca.

Silv. Eh! tasè là, putela, che gh'avè el late in bocca.

Nè vu, nè vostra mare no podè dir cussì.

Felice è zovenotta, e Marinetta e mi.

Mar. Oh che cara sior amia!

Silv. Dixelo vu, Mariua.

Co vu gieri putela, no giero fantolina?

No zoghevimo insieme ale bagatelette?

Ferd. Quanti ani può avere?

Silv. Zito; i xe ventisette.

Bett. Con quelli dela nena?

Luc. E quelli de so mare.

Bett. E quelli de so santola.

Fel. E quei de so compare.

Silv. Oe! voleu che ve diga de quei che v'ha nanio?

Ferd. Non vedete che burlano?

Silv. Lo so, lo so, fio mio.

SCENA VII.

BORTOLO, e detti.

Bort. Bon pro fazza, patroni.

Bett. Oh Bortolo xe qua!

Luc. Che bon vento ve mena?

Mar. Dixè. L'aveu trovà? (*a*

Bortolo.)

Bort. Chi?

Mar. L'amigo.

Bort. Nissun nol cognosse a castelo.

Fel. Oè! senti una parola.

Bort. La diga me. (*si accosta a*

Felice.)

Fel. (El xe quello.)

(*accenna Ferdinando.*)

Bort. (Per diana!) (*da se.*)

Luc. Bortoletto, semo qua in compagnia.

Bort. Brave, brave, patrone! digo, sior Zamaria.

(*a Ferdinando.*)

Ferd. A me?

Bort. A ela.

Fel. Senti. (Nol xe miga el novizzo.)

(*piano a Bortolo.*)

Bort. (Mo chi xelo?) (*piano a Felice.*)

Fel. (El compare.) (*piano a Bortolo.*)

Bort. (Chi? sior conte Pastizzo?)

(*piano a Felice.*)

Fel. (Giusto elo.) (*piano a Bortolo.*)

Mar. (Oh che mata!) Volcu sentarve a tola?

(*a Bortolo.*)

Bett. Vegnù arente de mi.

Tom. XXVIII.

Bort. Sior conte, una parola. («
Ferdinando.)

Ferd. Dite a me?

Bort. Digo a ela.

Luc. Conte de quella spessa.

Silv. Sior sì, sior sì, el xe conte, e mi sarò contessa.

Ferd. Io non ho questo titolo, garbato signorino.

Bort. Nol xe el conte Pastizzo?

Ferd. No il mio bel Simoncino.

Bort. Coss'è sto strapazzar?

Mar. Caro quel bel festin!

No vedeu che se burla, che el feino per morbin!

V'avemo dà da intender, che Betta xe novizza,

Per vederve un pochetto a ranzignar la schizza.

No avè mai sentio a dir: sior mistro Zamaria,

Baratteme etecetera? Vu ve l'avè sorbia.

Volevimo chiarirve e vu ne no sè scampà,

E el povero sior pare l'avè quasi copà.

Bett. Vardè che bele burle!

Bort. Xele cosse da far?

Fel. Via, via, beveghe suso, lassevela passar.

Bett. Senteve qua. (*gli fa loco.*)

Mar. Siè bon, porteghe una carega.

Bort. Gh'ho un velen, se savessi...

Luc. Via, no fe che i ve prega.

Silv. Quando le feu ste nozze?

Luc. Drento de carnaval.

Silv. E nu, sior Ferdinando?

Ferd. (Oh le farei pur mal!)

Mar. Mia amia, a quel che sento, voria la conclusion,

Ma la gh'ha qualche dubio, e la l'gh'ha con rason.

Silv. Mi siora...

Mar. Eh sì, so tutto! Lo so che la l'toria.

Ma la dise sior amia, che no la sa chi el sia.

Donca, se a lu ghe preme la conclusion del fato.

Sior amia vol saver quale che xe el so stato.

Ferd. Sior amia vuol sapere! (*a Marinetta.*)

Silv. Eh che non sou curiosa.

Ferd. Sì, sì, la signor amia dee sapere ogni cosa.

Io sono un galantuomo; Fernando è il nome mio;

Astolfi è il mio casato, e cittadin son io.

L'entrate ch'io possiede bastano al mio bisogno;

Ricchezze non ostento, del ver non mi vergogno.

Ecco qui quattro lettere di raccomandazione,

Che provano il mio nome, e la mia condizione.

Ho qui dei patriotti, che mi conoscon tutti,

Ci son dei Veneziani, che di me son istrutti.

Moglie non ho, la cerco di condizion mia pari,

Non dico di volerla pigliar senza denari.

Bramo una dote onesta, ma più della ricchezza

Desidero una figlia d'onore e di schiettezza;

Ed io posso promettere amor, fede e rispetto.

Ecco, alla signora amia quanto dir posso, ho detto.

Silv. (Caspita! se el me tocca, l'occasion xe bonissima.)

Mar. Sior amia ghe risponde, che la xe contentissima.

Togo ste quattro lettere per poderme informar;

Sior amia appresso el mondo se vol giustificar,

Se qualchedun volesse parlar fora de tou,

Sior amia vuol defenderse.

Fel. Sior amia gh'ha rason.

Silv. In verità dasseno, nezza son obbligada

Al vostro bon amor. Proprio son consolada.

Ferd. La signor amia intese tutti gli affari miei;

Anch'io vorrei sentire qualche cosa da lei.

Silv. Per mi so una putta savia, onesta, e da ben.

Mar. La lassa che mi diga. A ela no convien:

Sior amia che ve parla, gh'ha parenti onorati.

La gh'averà de dote cinquemile ducati.

Tutti bezzi investii, n'è vero? (*a Silvestra.*)

Silv. Mi nol so.

Mar. Quando che mi lo digo, ghe lo mentegnrò.

La xe ben educada, e sora quell' articolo,

In materia d' onor... (*con caldo.*)

Silv. Oh no ghe xe pericolo!

Mar. La sarà per el sposo tutta amor, tutta fede.

La condizion xe onesta. Circa all' età se vede.

Silv. Vintisette fenii.

Ferd. Sì, mia signora, ho inteso.

Contento, contentissimo il vostro dir mi ha reso.

Spero la signor amia condur meco in Milan.

Silv. Fenimo de disnar, e demose la man.

Fel. Brava, Marina, brava! se' una puta valente.

Mar. (Digo, m' hoi portà ben in mezo a tanta zente?)

(*a Felice.*)

Fel. (Pulito!) (*a Marinetta.*)

Luc. Aveu fenio gnancora sti sempiezzi?

Silv. Povera sempia vu!

Luc. (Questa la val tre bezzi.) (*da se.*)

SCENA VIII.

TONINA, e detti.

Ton. **O**e! oe! siora padrona. (*correndo.*)

Silv. Cossa xe sto fracasso?

Mar. Cossa xe stà, Tonina?

Ton. El paron vien da basso.

Mar. No gierelo andà in letto?

Silv. El vien zo mio fradelo?

Ton. Siora sì, el vol veguir a magnar in tinelo.

Mar. Salo che ghe xe zente?

Ton. Gnancora nol lo sa.

Silv. No voi che el sappia gnente, andemo via de qua.

Mar. Dove vorla che andemo? No podemo scampar.

Che ghe sia zente in casa s'halo da lamentar?

Quel che ghe pol despiaser al povero vecchietto

Xe che senza de lu s'ha fato un disnaretto.

No la credesse mai che l'avessimo fatto, (*a Ferdinando.*)

Per sprezar mio sior pare, e farghe sto mal tratto.

Ma el xe vecchio, el xe sordo, deboto nol pol più.

Silv. No se salo? Sti vecchi no i gh'ha da star con nu.

Ton. El vien zo da la scala. (*a Marinetta.*)

Mar. Presto, senza parole,

Destrighè sto tinelo, e portè via ste tolc. (*ai servitori.*)

E acciò che nol se innagina, che s'ha dà da disnar,

Batemola in tun balo, metemose a balar.

Ghe xe do servitori, che sona el chitarin,

Troveremo qualcun, che sonerà el violin.

Dei strumenti da nu no ghe ne manca mai,

Squasi ogni dì se bala, i è de là parecchiai.

Sior pare anderà via col vede che se bala,

Vago e vegno in tun salto, fina che el fa la scala.

(*parte.*)

SCENA IX.

I detti, poi ZANETTO.

Silv. Anca mi voi balar col mio bel novizetto.

Zan. Patroni reveriti.

Fel. Bravo, bravo, Zanetto!

Se' vegnù un poco tardi.

Zan. La diga, cara siora,

Quando se vien a casa? No ghe par che sia ora?

(*a siora Felice.*)

Fel. Seu vegnù per crial ?

Zan. Certo ; sou vegnù a posta.

Fel. Ben , se volè crial , criè da vostra posta .

Zan. Vardè che baronada !

SCENA X.

Siora MARINETTA col violino , e detti .

Mar. Oh xe qua sior Zanetto!

Salo sonar ? (*a Felice .*)

Fel. Sì ben .

Mar. Sonenela un pochetto . (*a Zanetto .*)

Zan. Gh' ho altro in testa , patrona .

Mar. Via , sior Zanetto caro .

Fel. Cossa xe ste scamoffie ?

Mar. Metè zo quel tabaro .

Fel. Anemo . (*gli vuol levare il tabarro .*)

Zan. Lassè star .

Mar. Anemo , no parlè . (*gli cava il tabarro per forza .*)

Fel. Fè a modo dele done .

Mar. Tolè el vùlin , sonè .

Zan. Per forza ho da sonar ?

Mar. Animo , Bortoletto ,
Ballè cola novizza . Soneghe un menuetto . (*a Zanetto .*)

(*Zanetto suona , Bortolo e Bettina ballano . Tutti siedono all' intorno .*)

SCENA XI.

Sior LUCA, e detti.

Luc. (Viene avanti, non sentendo suonare, e resta maravigliato vedendo che ballano. Si mette gli occhiali. Vuol parlare, e tutti gli fanno cenno che stia zitto.)

Fel. Presto, presto, anca mi. (a Bortolo, e si mette in figura.)

Ferd. È rimasto incantato.

Silv. Dopo, balemo nu. (a Ferdinando.)

Ferd. Ballar non ho imparato.

(ballano siora Felice e Bortolo, e intanto Luca va per parlare a quei che stanno a sedere, e tutti lo licenziano accennandogli di star zitto. Termina il minuetto.)

Ton. Se le me dà licenza, anca mi voi balar.

Mar. Siben, za mi no balo.

Ton. Che el lassa de sonar.

(a Zanetto.)

E che el bala con mi, (Si per farghe despetto.)

Mar. Via, za ghe xe chi sona.

Fel. Bala, bala, Zanetto.

(con allegria fanno il minuetto Zanetto e Tonina, e Luca vorrebbe parlare, e non lo lasciano dire.)

Silv. A mi. Me favorissela? (a Ferdinando.)

Ferd. Ma s'io non so ballar.

Silv. Sior Zanetto, comanda?

Zan. No posso; ho da sonar.

(riprende il violino.)

Silv. A vu, sior Bortoletto.

Bort. Son stracco in verith.

Silv. Me reffudè, patroni? che bela civiltà!

Credeu che mi no sappia? che sia una mamaluca?

Balo meggio de tutti. Vegni qua vu, sior Luca.

Luca. Cossa?

Silv. Balè con mi.

Luca. Come?

Silv. Vegni a balar.

Luca. No capisso.

Silv. Vardeme. (*gli fa cenno che balli con lei.*)

Luca. Ve farè minchionar.

Mi sì, che in ti mi anni, da zovene ho balà.

Silv. Anemo, vegni via. (*invitandolo anche coi moti.*)

Luca. Per diana! che son qua.
(*si mettono in figura, e tutti mostrano piacere di vederli.*)

Silv. (*principia la riverenza, e Luca non si move.*)

Via fè la riverenza.

Luca. Se no i sona gnancora.

Silv. Se' ben sordo, fradelo'. I sona che xe un' ora.

Luca. Come?

Silv. Mo via ballemo. (*torna a mettersi in figura.*)

Luca. Che i sona un pochettin.

Mo i sona molto a pian; gh'hali inseà el cantin?
(*fanno il minuetto.*)

Cossa diseu, patroni? Songio sta sempre in ton?

Chi sa cossa xe balo, sa balar senza son:

Mar. Andemo de là in camera a beber el caffè.

Fel. Sto vecchio nol voressimo.

Mar. Poverazzo! Perché?

Fel. (*Voglio che concludemo quel certo servizieto, e po lo chiameremo.*) (*a Marinetta.*)

Silv. Cossa parlu in segreto?

Fel. Sentì, fendo cussì. (*parla nell' orecchio a tutti, e tutti mostrano di applaudire.*)

Mar. Sì, sì, el pensier xe belo.

Ferd. Non vorrei che dicessero...

Fel. Eh ch'el principia elo!

Ferd. (*si accosta al signor Luca, lo reverisce, mostra di parlare e non parla, e Luca credendo che parli, e di non sentire, dice come segue interpolatamente.*)

Luca. Ghe son bon servitor. Come? Non lo capisso.

Sior sì, quel che la vol. Patron, la reverisso.

(*Ferdinando parte salutandolo.*)

Silv. Oh mi ghe vago drio! no mel lasso scampar,
Proprio no vedo l'ora, me sento a giubilar. (*parte.*)

Mar. Veguo de là anca mi. (*a Felice.*)

Fel. Andè.

Mar. Podè vegnir.

Fel. Vegno, co sto vecchietto me voggio devertir.

Mar. Per mi, sorela cara, el spasso xe fenio.

Passa tute le voggie la voggia de mario.

Quando che de seguro saverò el mio destin,

Co sarò maràlada, me tornerà el morbin. (*parte.*)

Fel. Certo che se sta ben co se gh'ha un bon mario,

Ma po, co la va mal, el morbin xe fenio.

Oe! vago mi, e po vu. (*si accosta a sior Luca, e fa la scena come fece Ferdinando.*)

Luca. Siora? No sento gnente.

Un pocheto più a forte. Sta recchia no ghe sente.

(*va dall'altra parte.*)

Cossa disela? A forte. Ah sì sì l'ho capida!

Basta che la comanda, la resterà servida. (*siora*

Felice ridendo parte.)

(*Zanetto e Bortolo, uno per parte, fanno la medesima scena, prendendolo in mezzo.*)

Sior sì. S'avemo inteso. Tanto fa che no i parla.)

Co me bisognerà, manderò a incomodarla .
(Zanetto e Bortolo partono, e si accostano Lucietta e Bettina .)

Ancora ghe ne xe ? Siora ? Coss' hala dito ?
 Eh sì sì l' ho capia ! La descorre pulito .
 Patrona reverita . Grazie ala so bontà .
 Co ste bele parole proprio la m' ha incantà . *(Lucietta e Bettina partono ridendo .)*

Lo so che xe un pezzetto, che mi son campanato ;
 Ma qualcossa sentiva . Donca son sordo affatto .

Ton. (Anca mi voggio torme qualche divertimento .)
(da se .)

Luc. Parleme un poco a forte; voi provar se te sento.

Ton. (parla a moti , e mostra di caricare .)

Luc. Più a forte. In te la rechia. Vien qua da st'altra banda.
Zigheme . (No ghe sento. La xe una cossa granda.)

Cossa distu ? Più a forte . Par che ti parli in fià .

Ton. (mostra di arrabbiarsi , e parte ridendo .)

Luc. No ghe sento più gnente . Tonina s' ha instizzà .

Son sordo affatto affatto . Cossa mo se pol far ?

No voi guanca per questo andarme a sotterar .

Cussì no sentirò dir mal dai servitori ;

No poderò la ose sentir dei creditori ;

E se qualcun mia fia me vien a domandar ,

Posso , co no ghe sento , la dota sparagnar .

FINE DELL' ATTO QUARTO .

A T T O Q U I N T O

SCENA PRIMA.

Altra camera , ossia sala illuminata .

*MARINETTA , FELICE , LUCIETTA , BETTINA ,
FERDINANDO , BORTOLO , SILVESTRA , tutti a
sedere bevendo il caffè. NICOLÒ colla cogoma,
TONINA colla sottocoppa .*

Fel. **B**on sto caffè , dasseno .

Ferd. Perfetto , in verità .

Nic. Procuro de insegnarme col me vien ordenà .

Luc. El xe bon qualche volta quello dele casae ,

Ma quel dele botteghe el riesse meggio assae .

Nic. Vorla dell' altro zucclero ? (*a Silvestra .*)

Silv. A dirlo me vergogno .

Caro fio , un altro poco .

Nic. Eh mi so el so bisogno !

Silv. Nicolò xe un bon puto . Xestu da maridar ?

Nic. No vorla ?

Silv. Via destrighete ; cossa vostu aspettar ?

Vedistu ? presto presto mi me destrigo .

Nic. Brava !

Silv. Propriamente a star sola sento che me brusava .

Luc. Disè , siora Silvestra , ve piase Nicolò ?

Nic. Se el fùsse da par mio ! Eh el mio novizzo el gh'ho !

Bett. (Proprio no fala stomego ?) (*a Lucietta .*)

Luc. (*a Bettina.*) (Via, no te ne impazzar.)

(*a Bettina.*)

Bett. (Credemio che el la toga ?) (*a Lucietta.*)

Luc. (Mi no so, se pol dar.)

(*a Bettina.*)

Silv. Vedeu quante candele? mo no par bon cusì?

Tutto sto bel parecchio el xe fato per mi.

Certo siora Lucietta. Stassera se sposemo.

Prima se dà la man, e po dopo ballemo.

Luc. Ala granda, ala granda.

Bett. Mi me par impossibile.

Bort. (Se se fasse ste nozze, la saria ben godibile.)

Fel. Cossa feu, Marinetta? no ve sento a zittir.

Mar. Bevo el caffè.

Fel. Ho capio. Sta cossa ha da feuir,

Se xe sior Ferdinando disposto a maridarse,

Senza tanti brui longhi, xe meglio destrigarse.

Ferd. Per me sono prontissimo.

Mar. Sior amia xe disposta.

Silv. El s'ha da far sta sera; qua no ghe xe risposta.

Fel. Femolo co volè, ma me par de dover,

Che prima anca sior Luca lo gh'abbia da saver.

Silv. Diseghe a mio fradelo, che el vegna qua da na.

(*a Tonina.*)

Fel. Useghe sto rispetto, audè a dirghelo vu.

Silv. Felice dise ben, el pol esser mio pare. (*s' alza.*)

Co fazzo un fantolin, voi che siè mia comare. (*parte.*)

Luc. Diseme, creature, xèla la verità?

Fel. Bisognerave ben che el fusse desperà.

Ferd. Se fossi un ciarlatano, signora mia garbata,

Per un casotto in piazza forse l'avrei pigliata.

Luc. Mo via, caro patron, so che l'ho dita grossa;

Ma anca elo de mi l'ha abuo da dir qualcosa.

Bett. E de mi?

ATTO QUINTO. 269

Ferd. Chiedo scusa, se troppo m'avanzi.

Luc. Sèmo tutti del pari, sèmo beli e scusai.

Cossa xe sta commedia? Conteme, cara vu.

Fel. La commedia è finia; no la se slonga più.

N'ha piasso un pochetin burlar quella vecchietta.

Sior Ferdinando Astolfi sposerà Marietta.

Bett. Dasseno? me consolo.

Luc. Me ne rallegro, fia.

Bort. Brava, siora Marina! Con mistro Zamaria?

Mar. No so guente guancora.

Ferd. Come? sì poco affetto

Voi per me dimostrate?

Mar. Sentì, ve parlo schietto.

Ve voi ben, lo confesso, spero che sarè mio,

Ma voggio assicurarme prima de tor mario.

M'avè dà dele lettere; m'avè dito chi se',

De vu no gho sospetti; sarà quel che disè.

Ma perchè no me possa nissun rimproverar,

Ho pregà sior Zanetto, che el se vaga a informar.

Quando poderò dir, siori, la xe cussi:

Ghe lo dirò a sior padre, lo farò dir de sì.

Ve podeu lamentar, v'ho fursi desgustà?

Ferd. Dolermi? anzi vi lodo.

Fel. Oh Zanetto xe qua!

SCENA II.

ZANETTO, e detti.

Zan. Forti, siora Marina, e stè sull'onor mio,

Questo ghel diga in fazza, xe un ottimo partio.

Senza difficoltà podè sposarlo in pase,

El xe un bon cittadin, che gh'ha poderi e case;

El xe un bon Milanese, un omo cognossù;

Galantomo, onorato, no se pol far de più.

Ferd. Signor, la bontà vostra per verità mi onora.

Fel. Aveu sentio, Marina? seu contenta guancora?

Mar. Adesso me vergogno de no averghe credesto.

Ferd. Ah no, in simili casi il siucersarsi è onesto!

S'io fossi un impostore scoprirmi avrei temuto;

Un galantuom desidera di essere conosciuto.

Ton. Oh, sior, la mia padrona la sa quel che se fa!

Se la va via, la diga, mè lasserà qua?

Mar. Ti vegnirà con mi, tasi che tel prometto.

Ton. Me despiaserà un poco de lassar sior Zanetto.

Ma cussì so muggier no la sarà zelosa.

Fel. Sentela, sior mario? xela la so morosa?

Zan. Cossa ghe salta in testa? ghe lo digo sul muso,
No ghe ne dago un bezzo.

Fel. Cossa diseu? tiò suso.

(a Tonina.)

Ton. Sì ben, sì ben, sti siori lo so quel che i sa far,

l ghe tende ale done co ghe xe da magnar.

Fel. Frasca, mio mario gh'ha da magnar a casa.

Ton. Cossa vienlo a marena?

Fel. Diseghe che la tasa.

(a Marinetta.)

Che debotto debotto...

Mar. Cossa ghe xe de niovo?

Fel. E vu stè a casa vostra; no andè a magnar, sior lovo.

(a Zanetto.)

Mar. Tonina, abbiè giudizio.

Ton. Ma se...

Mar. Va via de qua.

Ton. Ghe domando perdon. (a Felice.)

Fel. Via via v'ho pordonà.

Perdoneghe anca vu, no femò che custia

Ne rompa sul più belo la pase e l'allegria.

Mar. Vieu sior amia e sior pare.

Fel. Adesso vien el bon;
Lassè che parla mi, no stè a far confusion.

SCENA ULTIMA.

SILVESTRA, sior LUCA, e detti.

Silv. Mio fradelo xe qua, ma non l'intende guente.
Se se averze la gola, e tanto fa, nol sente.

Luca. Eh l'ho sentia sta mata! ma no ghe voi badar.
Se pol sentir de pezo! la se vol maridar! (*da se.*)

Fel. Sior Luca; semo qua per far un negozietto.

Luca. Cossa?

Fel. (El me fa crepar sto sordo maledetto!)

Nozze volemo far, quando che siè contento. (*forte.*)

Luca. (Vardè, quando che i dise; co no voria ghe sento.)

No capisso.

Silv. La dise che mi me voi sposar. (*s'ajuta coi cenni.*)

Luca. Cossa disela? (*a Felice.*)

Fel. Nozze, nozze, avemo da far. (*forte.*)

Luca. (Cria, se ti vol criar.)

Fel. (Oe! digo, Marinetta.

Xelo sordo a sto segno?)

Mar. (Credo che finza.)

Fel. (Aspetta.)

Ste nozze s'ha da far, la conclusion xe questa,

Poi ghe darà a sior Luca un maggio sulla testa. (*forte.*)

Luca. Un maggio sulla testa?

Fel. Veden se l'ha sentio?

Silv. Finzè de no sentirme, perchè voi tor mario?

Luca. Cossa?

Silv. Gamba.

Fel. Sentì. El novizzo xe là. (*accenna Ferdinando.*)

Silv. E qua xe la novizza.

Fel. E la novizza è qua. (*accenna Marinetta.*)

Silv. Dove xela?

Fel. Sior Luca, la burla xe senja;
Per quel sior ve domando Marina vostra fia.

Silv. Seu matta?

Fel. Mio mario Zanetto, el cogoossè;
El ve informerà elo, el ve dirà chi el xè.

Silv. Cossa xe sti spropositi?

Zan. (*si accosta a sior Luca, lo tira in disparte, e gli parla nell' orecchio, e lo stesso fa poi Felice.*)

Ferd. (Che ho da dire a costei?)

Silv. No seu vu el mio novizzo?

Ferd. Sposo, ma non di lei.

Silv. Donca de chi?

Ferd. Di questa.

Silv. Marina ha sempre dito
Che sposerè sior amia.

Ferd. È vero, io l'ho sentito.

Son forestier, mi manca la cognizion perfetta;

Ho creduto che amia voglia dir Marinetta.

Silv. Mo se' ben ignorante, amia vol dir la zia.

Ferd. E questa? (*a Marinetta.*)

Silv. Xe mia nezza.

Ferd. La nezza è sposa mia.

Mar. Mi no so cossa dir sior amia benedetta,

Per ela ghe xe tempo, za la xe zovenetta.

La xe stada una cossa mia per accidente.

La diga; ghe despiase?

Silv. No me n' importa guente.

(con sdegno.)

Fel. Orsù xela giustada? Sior-Luca xe contento.

El ve darà la dota.

Mar. Gh' halo sentio?

Luca. Ghe sento.

Senza che el pare sappia, donca se fa e se dise? *(a Marinetta.)*

Silv. La me l' ha tolto a mi quele care raise.

Luca. Adesso el se me dise ve par che para bon?

Mar. Mo via, caro sior padre, ghe domando perdon.

Luca. Cossa?

Mar. De quel che ho fato domando perdonanza.
(forte.)

Luca. Dov' elo sto novizzo? Certo una bela usa nza!

Fel. Via, parleghe, ma forte, se volè che el vé senta.
(a Ferdinando.)

Silv. (Ancora gh' ho speranza che lu no se contenta.)
(da se.)

Ferd. Signor, vi riverisco con umile rispetto.

Arsi per vostra figlia del più sincero affetto;

E se la bontà vostra sposa a me la concede,

La mia consolazione ogni allegrezza eccede.

Luca. Dasseno?

Ferd. Consolatemi col vostro gradimento.

Luca. Cossa voleu che diga? So chi se', me contento.

Silv. Oh poveretta mi!

Ferd. Un semplice ricordo

Si può far per la dote?

Luca. Come?

Fel. El xe tornà sordo.

Ferd. Per la dote, signore...

Luca. Cossa?

Mar. Ghel dirò mi.

La maia dote, sior padre. (*forte.*)

Lura. Mo no zigar cussì.

La ghe xe la to dota: Sior sì, la xe investia.

Destrigheve, sponseve, e la sarà fenìa.

Ferd. Porgetemi la mano. (*a Marinetta.*)

Mar. El cuor za ve l'ho dà. (*dando la mano.*)

Fel. Bravi! Cussì me piase.

Silv. Tocco de disgrazià! (*piangendo.*)

Fel. Anemo, che se bala.

Bett. Siora mare.

Luc. Coss'è?

Bett. Marina xe novizza.

Luc. Che bisogno ghe xe?

Drento de carneval ti la farà anca ti.

Bett. La farave stassera.

Luc. Cossa diseu? (*a Bortolo.*)

Bort. Mi sì.

Luc. Ve contenteu, Marina?

Mar. De diana! se' paroni.

Bort. Se' podemo sposar za che gh'avemo i soni.

Fel. Ala presta, ala presta. Deve la man, cussì. (*unisce la mano di Bettina e di Bortolo.*)

Seu contenta?

Bett. Sior sì.

Fel. Ve contenteu?

Bort. Sior sì.

Fel. Anca questa xe fata.

Silv. E mi, povera grama!

Fel. Nicolò dove xestu?

Nic. Mi son qua, chi me chiama?

Fel. Che sior Luca no senta, no voria che el criasse.

Nicolò lo tioressi? (*a Silvestra.*)

Silv. Mi sì, se i me lo dasse.

Nic. Grazie del bon amor; grazie patrona bela.

Ela no xe per mi; e mi no son per ela.

Mi son un botteghier, questa xe per la prima,

E po son troppo zovene, ela xe troppo grima. (*parte.*)

Silv. Sporco, sporco, carogna! No ha da passar doman,

Che gh'averò un novizzo, e ghe darò la man.

So che m'avè burlà, frascone, stomegose;

Lo so, siore spuzzette, che fe le morbinose.

Fel. No ghe badè, balemo. (*a Marinetta,*)

Mar. Avanti de balar,

Con chi me favorisse, el mio dover voi far.

Siori, le morbinose ve avemo recità;

Ma no le sarà stae, come che avè pensà.

Qualchedun co sto titolo andando più lontan,

Fursi che el se aspettava più chiasso e più baccau.

Ma bisogna distinguer. Ghe xe le morbiuose,

Ghe xe le done allegre, e ghe xe le chiassose.

El chiasso xe da cale. In alto è l'allegria.

El rango del morbin el xe de mezo via.


E stando sul tenor de sto tal argomento,

Se andemo lusingando de aver compatimento,

Pregando chi ne ascolta battere un pochetto.

Se no per nostro merito, almanco per morbia.

FINE DELLA COMMEDIA.



I
M O R B I N O S I

P E R S O N A G G I

BRIGIDA , *cantatrice .*

OTTAVIO , *romano .*

LELIO , *toscano .*

GIACOMETTO .

TONINA , *moglie di GIACOMETTO .*

FELIPPO .

ANDREETTA .

BETTA .

CATTE .

ANZOLETTA .

TONI .

Un SONATORE , *che parla .*

SONATORI , *che non parlano .*

Quattro BARCAROLI *da gondola .*

Quattro BARCAROLI *da peota .*

SERVITORI .

La sceua si rappresenta in Venezia .

MORBINOSI

A T T O P R I M O

SCENA PRIMA.

Fondamenta della Zuecca colla veduta del canale.

Sior FELIPPO, e Sior ANDRETTA.

Andr. Cossa diseu, compare? Aveu mai più sentio,
Che s'abbia nn'altra fraggia come la nostra unio?
Ste sorte de spassetti pochi li sa trovar,
Cento e vinti compagni saremo a sto disnar.

Fel. Cento e vinti compagni unì così alla presta;
No ghe voleva altro, che quella bona testa.
Come quel nostro amigo no ghe ne xe nissun;
E quello che più stimo a un ducato per un.
No se pol spender mauco.

Andr. Ve digo ben ve digo,
Che el nostro sior Lunardo s'ha tolto un bel intrigo.

Fel. El xe un omo de garbo, el farà de pulito;
No v'indubità gnente; so quello che el m'ha dito.
E po co no gh'è done, se sta come se pol.

Ma co ghe xe carpete le vol quel che le vol.

Andr. Disè ben, sior Felippo, gh'è manco suggizion:

Ma le done in sti casi, credeme, le par bon.

Mi me contenterave de star anca a dezun,

Se gh'avessimo tutti una dona per un.

Fel. Che diavolo diseu? cento e vinti sottane?

No se sentiria gnanca a suonar le campane.

A unir tutte ste done el saria sta un stramboto,

I diria alla Zuecca, che ghe xe el taràmoto.

Andr. Via, se no cento e vinti, almanco una trentina.

Fel. Pezo, caro Andreetta; ti è mato sta mattina.

Tutti arente de lori vorave i più bei gragni;

Se farave regata; se se daria dei pugni.

Andr. No digo che le fusse done da strapazzar.

Le muggier, le cugnae se poderia menar.

Staressimo più aliegri.

Fel. No, xe meggio cusì:

In compagnia le done le me piase anca a mi;

Ma saressimo tropi.

Andr. Eh t'ho inteso, baron!

Le te piase le done, co ti le gh'ha in scondon.

Fel. No tanto co fa ti, ma poco manco.

Andr. Orsù,

Ancuo no gh'è remedio, no ghe pensemo più.

Semio deboto uniti? che ghe ne manca assae?

Fel. Ho visto sin adesso dopo de mi arrivae

Disdotto o vinti gondoie.

Andr. Dove xeli sti siori?

Andemose un pocheto a devertir con lori.

Fel. Ho visto che diversi i s'ha messo a zogar.

Ghe n'ho visto dei altri per orto a spazizar.

Qualchedun s'ha liogà in ste case vicine

A devertir un poco ste bele zuecchine.

Andr. Voggio andar anca mi.

Fel.

Mo va là, che ti è belo.

Ti xè sempre in borezzo, e no ti xe un putelo.

Quando fastu giudizio? me par che saria ora.

Ti xe deboto nono, e ti fa el inato ancora?

Andr. Del nono e dela nona mi no me togo affanni.

Me par giusto de esser ancora di vint' ani.

E se restasse zovene me sposeria doman,

Ma ti de casa mia ti staresti lontan.

Fel. Ti ha rason... una gondola.

Andr. Vienla da nu?

Fel. Me par.

Andr. Chi gh'è drento?

Fel. Non so.

Andr. Vardemo a desmontar.

SCENA II.

Arriva una gondola, dalla quale sbarca

sior GIACOMETTO.

Andr. **O**e! xe qua Giacometto. (*a Felippo.*)

Fel. Bravo compare, bravo!

(*a Giacometto.*)

Giac. Ve saludo Felippo. Schiavo Andreetta, schiavo,
Semio de boto tutti?

Fel. Tutti gnancora no,

Ghe ne manca dei altri.

Fel. Andeve a cavar zo.

Giac. Sior Lunardo ghe xelo?

Fel. Se lo volè trovar,

Lo troverè in cusina.

Giac. In cusina? a che far?

Fel. No saveu? poverazzo! el xe tanto impegnà,

Che el vol esser per tuto a veder quel che i fa.

Andr. Se vedessi che tola, che el ne fa parecchiar!

Giac. Ma tuti cento e vinti ghe poderemio star?

Andr. Tuti iasieme. Gh'è un portego, che el par fabricà a
(posta.

E vederè un pareschio, che no ghe xe risposta.

Fina i soni gh'avemo.

Giac. Bela conversazion!

Andr. E quel che si considera, tuto per un lion.

Giac. Arriva un'altra gondola.

Fel. Saveu chi ghe sia drento?

Andr. No so, no lo cognosso.

SCENA III.

Arriva un'altra gondola, con dentro LELIO.

Giac. El xe guarnio d'ariento.

Andr. El xe quel forestier, che va al caffè del pomo.

Giac. Chi l'averà invidià?

Andr. No so da galautomio.

Giac. Lo saverà Lunardo. Elo gh'ha l'incombenza.

Lel. Padroni riveriti,

Andr. Ghe fazzo reverenza.

Giac. Ne vienla a favorir?

Andr. Xela dei nostri?

Lel. È qui

La compagnia famosa del disnar?

Andr. Sior sì.

Lel. Anchi' io fra i cento e venti, ebbi il grazioso invito.

Giac. Tuta nostra fortuna.

Lel. Son io il favorito.

Ehi, ci son donne?

Fel. Oibò.

Giac. Done no ghe ne xe.

Andr. Mo no xelo un matezzo? (a *Lelio*.)

Lel. Pare così anche a me.

Fel. La me credà, signor, staremo meggio assae;

Con troppa morbidezza la vol' esser trattae.

Sta cossa ghe fa mal, st'altra no la ghe piase;

Cussì, da nostra posta se goderemo in pase.

Andr. La ne fizza l'onor de dirne chi la xe. (*a Lelio.*)

Lel. Io sono un galantuomo; son cognito al caffè.

Sto vicino alla piazza. Lelio dal Sol mi chiamo,

Viaggio per divertirmi, e l'allegria sol bramo.

Giac. Bravo! cussì me piase.

Fel. Viva pur l'allegria.

Andr. Un zorno malinconico no son sta in vita mia.

SCENA IV.

*Arriva un'altra gondola, con dentro il
signor OTTAVIO.*

Giac. Vardè là un'altra gondola.

Andr. Sior Ottavio el me par.

Fel. Sì ben, l'è giusto elo.

Andr. Andemolo a incontrar.

(*si accostano alla riva.*)

Lel. Quel diavolo d'Ottavio certo ha una gran fortuna;

Ha cento donne intorno; io non ne trovo alcuna.

Ho piacere davvero, che oggi ne siamo senza.

(*Se mi facesse stare, non avrei sofferenza.*) (*da se.*)

Ott. Ah! ci siete ancor voi? (*a Lelio con allegria.*)

Lel. Sì, signor. Vi saluto.

Ott. Cos'avete con me che fate il sostenuto?

Andr. Siori, nu semo qua per star allegramente.

Gh'hai qualcosa tra lori?

Ott. Oibò; non abbiám niente.

Lelio è mio buon amico, coltiva un amoretto,

E suo rival mi crede.

Lel. Lo vuol far per dispetto.

Ott. Non è vero, signori. Credetemi sul sodo,

Che talvolta gli amici far taroccare io godo.

Ma son poi di buon cuore; son sì cortese e umano,

Che per un buon amico farei anche il mezzano.

Lel. Sì, del vostro buon cuore son certo e persuaso,

Ma farebbe per lui, quando si fosse al caso.

Finor quattro signore, ch'eran da me trattate,

Me le ha politamente tutte e quattro levate.

Ott. Davver mi vien da ridere. Sentite, se mi preme,

Che siam fra Lelio ed io due buoni amici insieme.

So che a una certa vedova egli facea la posta;

Sono andato stamane a ritrovarla apposta.

E non ci sono andato con altro sentimento,

Che per parte di Lelio a farle un complimento.

Lel. Sentite? ei mi beffeggia.

Andr. Cari patroni, a monte.

Fel. Co se tratta de done le tacole xe pronte.

Manco mal, che sta volta done po ghe n'avemo.

Andr. Oe! vien una peota.

Giac. Chi ghe sarà?

Fel. Vardemo.

Ott. Saranno i sonatori.

Giac. Sì, per diana de dia!

Sta mattina magnemo al son de sinfonia.

SCENA V.

*Arriva una penta, dalla quale sbarcano
varj SONATORI coi loro strumenti, cioè
violini, corni da caccia ec.*

Andr. Ben venuti, patroni.

Son. Patroni riveriti.

Giac. Animo, che deboto credo che siamo uniti.

Son. Semo qua per servirle.

Fel. Andeve a despogiar.

Andr. Andè desuso in portego, e principiè a sonar.

Giac. E meneghe de schena.

Andr. E a' corni deghe fià.

Fel. Non v'indubità guente, del vin ghe ne sarà.

Son. Li avemo stamatiua lustrai con dèlla gripola.

Subito andemo a farghe una sonada in tripola.

(parla de' corni da caccia, e partono i sonatori.)

Andr. Mi credo che deboto saremo più de cento.

Cossa stemio a star qua? voleu che andemo drento?

Giac. Andemo pur, mi vegno dove che me nienè.

Lel. Andiamo. *(incaminandosi.)*

Ott. Io son con voi. *(a Lelio seguitandolo.)*

Lel. Perchè venir con me?

Non potete andar solo? tant'altri non vi sono?

Statemi da lontano, ve lo domando in dono.

Ott. Cosa dite, signori? da ridere mi viene;

Ei non mi può vedèr, ed io gli voglio bene.

Lel. Non vi voglio dappresso; l'ho detto e lo ridico.

Del ben che mi volete, non me n'importa un fico.

Voi andate al casino; io vado in altro loco,

Fino all'ora del pranzo vo' divertirmi un poco.

(parte.)

Ott. È bellissima in vero, pare che siam nemici;
 E pur ve l'assicuro, che siam due buoui amici.
 Talor si caccia in testa di non volermi appresso,
 Talor, quand' io nol curo, viene a cercarmi ei stesso.
 Ha gelosia di me, poi viene a confidarmi
 Le avventure amorose, ed io soglio spassarmi,
 E gli so dar da intendere cento bestialità.
 Ei talor si riscalda. È bella in verità.
 Chi sa, che cosa rumina quella sua mente insana!
 Voglio tenerli dietro bel bello alla lontana. (*parte.*)

Giac. No vorria, che sti siori...

Andr. Zitto, zitto; stè attenti.

Prencipia i sonatori a accordar i stramenti.

Fel. Godemoll un pocheto, e po dopo anderemo.

Giac. Cossa diseu? che gusti!

Andr. Cusi se la godemo. (*si sente una sinfonia con corni da caccia, la quale si sonerà in orchestra.*)

Giac. Bravi, bravi dasseno!

Fel. Sì ben; ghe xe del bon.

Andr. Lunardo xe un gran omo.

Giac. Se pol dir omenon.

Fel. A unir sta compagnia poco non gh' ha volesto.

Giac. E tuti galantomeni, tuta zente de sesto.

Fel. Tuti amici de cuor, de quei che no xe finti.

Andr. Evviva sior Lunardo.

Giac. Evviva i cento e viuti.

SCENA VI.

ANZOLETTA, BETTA, e CATTINA zuecchine.

Anz. Pute, cossa diseu de sta bela matada?

Bett. Cossa mai xe sta cossa? gran zente xe arrivada.

ATTO PRIMO.

287

Catt. Ghe xe qualche novizza?

Anz. Oibò.

Catt. Ho sentio i soni.

Anz. I vol magnar coi piffari.

Catt. Mo vardè che matoni!

Bett. Figureve che roba, che i gh'averà a disnar?

Pute, pute, diseme. Che gli andemò a spionar?

Catt. Del disnar no ghe penso. Mi gh'ho gusto co 'l sona.

Bett. E quei boni bocconi? oh povera minichiona!

Figureve che torte! A mi no me ne tocca.

Me sento propriamente che me vien l'acqua in bocca.

Catt. Se andessimo de su no i ne daria qualcosa?

Anz. Sì ben! andè dessuso. L'avè ben dita grossa.

Sti siori veneziani subito i vol licar.

Bett. Cossa gh'aveu paura, che i ve voggia maguar?

Anz. E pò, se nò i vol done.

Bett. O poveri putei!

Se gh'andessimo nu, se licherave i dei.

Anz. Mi no ghe vado certo.

Catt. Oh guanca mi, sorela!

Anz. I sarà più de cento.

Bett. Aseo!

Catt. Una bagatela!

Bett. Se ghe ne conoscesse almanco qualchedun.

No vorave seguro che stessimo a dezun.

Anz. Ghe ne cognosso tanti. Ghe xe sior Giacometto.

Catt. Quel che vien qui la festa?

Anz. Sì ben quel picoletto.

Catt. Una volta el voleva sempre parlar con mi;

Ma Toni xe andà in colera, e no ghe parlo pi.

Bett. Cossa gh'astu paura?

Catt. Se el sapesse che parlo,

Povereta mai mi! no, no voi disturbarlo.

Bett. Te portelo mai guente?

Catt. Co el ghè n'ha, poverazzo!

El me compra dei fiori, squasi ogni festa un mazzo.

Bett. Vardè che gran cazzada?

Catt. Cossa m'halo da dar?

Bett. Mi co fava l'amor voleva da magnar.

Tuto me comodava, nose, pòini, zaletti,

Mo co no i dava gnente, musoni maledetti.

Anz. Mi mo son sempre stada de un'altra qualità.

Co ghe n'ho bu, ai morosi mi ghe n'ho sempre dà.

Mio sior pare all'ingrosso el fava provision,

E mi sempre qualcossa portava via in scondou.

M'arrecordo una volta mia mare, poveretta!

La m'ha trovà un presuto sconto soto la pretta.

L'ha volesto saver... no so; mi m'ho confuso,

E la m'ha lassà andar una man in tel muso.

Bett. Oh a mi mo per ste cosse, ve zuro in verità..

Che da mia siora mare no me xe mai sta dà!

In casa mia, sorela, no ghe xe sta vadagni,

Ma non ho mai volesto de quei che scalda i scagni.

Catt. Oe! vardè un'altra gondola.

Bett. No i ha fenio guancora.

Anz. No ghe xe miga un omo, gh'è drento una signora.

SCENA VII.

*Arriva un'altra gondola, di dove sbarca
siora TONINA.*

Ton. Siorie, pute.

Bett. Patrona.

Ton. Saveu dove che sia

La casa, dove ancuo se magna in compagnia?

Anz. Siora sì. La xe quella f' ma no se pol andar.

Ton. Perché?

ATTO PRIMO.

259

Anz. Perchè con lori no i vol done a disnar.

Ton. Ma creden, che là dentro no ghe ne sia nissuna?

Anz. Oh siora no dasseno! no ghe n'è guanca una.

Ton. Vardè, no me burlè.

Bett. Gh'halà qualche sospetto?

Ton. Me vorave fermar. Gh'averessi un-lioghetto?

Bett. Hala disnà guancora?

Ton. Mi no.

Bett. Vorla disnar?

Che la vegna da mi; ghe l'anderò a comprar.

Ghe farò una fortagia, conzerò la salata;

Gh'ho dela latugheta, tenera com'è nata.

Che la resta servida, la menerò in tel orto.

Se vorla devertir? no la me fazza torto.

Ton. (Certo, sta gran premura, che ha mostrà Giacometo

De vegnir coi amici, m'ha messo in tun sospetto.

No credo, se non vedo, che done no ghe sia.

Alfin son so mugier, posso aver zelusia.) (*da se.*)

Andemo, son con vu. (*a Betta, e parte.*)

Bett. Che la resta servida.

La servirò pulito, se de mi la se fida.

Pute, cossa diseu? anca questa xe buona.

Se la vorrà magnar, oe! no sarò minchiona. (*parte.*)

Anz. Eh la sa far pulito. (*a Catta.*)

Catt. Chi xe mai sta signora?

Anz. Vatela a cata ti. Mi no lo so guancora.

Catt. Che la sia una lustrissima?

Anz. Mi no so in verità,

Ma anche delle lustrissime ghe n'è da bon mercè.

Catt. Ti disi ben, sorela. No le gh'ha pau, gramazze!

E el lustrissimamento el va per le scoazze.

Anz. E che spazza!

Catt. E che fumo!

Anz. Che aria maledetta!

A rivederse, Cate. (*parte.*)

Catt. Bondi sioria, Anzoletta.

FINE DELL' ATTO PRIMO.

ATTO SECONDO

SCENA PRIMA.

Camera.

BRIGIDA, poi TONI.

Brig. **C**ossa mai xe sta cossa? mo cossa mai vol dir,
Che sto sior conte Anselmo no lo vedo a vegnir?
Per devertirme un poco el me fa vegnir qua.
El va via, e no lo vedo! che el m'avesse impiantà!
No crederave mai. La sarave un'azion,
No miga da un sior conte, ma da un poco de bon.
Vien el puto dasseno, el me saverà dir,
Se el l'ha catà gnancora, se el se vede a vegnir.

Toni. Patrona reverita.*Brig.* E cusì?*Toni.* Ho caminà

Per tutta la Zuecca; sto sior no l'ho trovà.

Ho domandà al traghetto; a qualchedun ghe par,

Che un foresto a Venezia s'abbia fato buttar.

Gh'ho dito se el gh'aveva i cavei longhi e scuri,

I ha dito che ghe par, ma che no i xe sicuri.

Brig. Ma coss' hoggio da far?*Toni.* No so da servitor;

Se la vol una barca, mi ghe la vago a tòr.

Brig. E po?*Toni.* Mi no so altro.*Brig.* E poi cossa faroggio?*Toni.* (Bisogna a quel che sento, che ghe sia dell' imbroggio

Brig. No me credeva mai, che el me fasse sto trato .
Proprio el m'ha sassinà .

Toni. Mo cossa gh'halo fato ?

Brig. Gnente , gnente .

Toni. La diga . A mi la se confida ,
Son un pato onorato . Son Toni dala Vida .
No la creda che voggia... Sior sì , se la m'intende ,
Mi bado ai fatti mii , no tendo a ste faccende .
E po gh'ho la mia Cate , che presto ho da sposar :
Via , cara siora Brigida , la se pol confidar .

Brig. Vardè là che bel fusto ! Disè , caro patron ,
Credeu fursi che sia qualche poco de bon ?
Un fio de un ortolan me parla in sta maniera ?
Me par che le persone se cognosse ala ciera .

Toni. Xela una zentildona ?

Brig. A vu mi no ve digo
Chi son , nè chi no son .

Toni. No me n'importa un figo .
Quel che la xe , patrona , mi lasso che la sia ;
Ma che la se destriga , e che la vaga via .

Brig. Come ! me descazzè ! seu fursi vu el patron ?

Toni. Mio sior pare xe un omo , che no vol suggizion .
Deboto el vien a casa , e quando el vegnirà ,
La sentirà sior pare , cossa che el ghe dirà .
La sarave ben bela ! I vien a domandar
Chè i se lassa un pocheto per orto a spazzizar .
Quel sior ne vien a dir , ve prego sta signora
Custodir un pocheto , torno da qua mezz'ora .
Xe tre ore che el manca , e nol se vedè più ,
Nu volèmo disnar , vorla disnar con nu ?
Nu no femo locanda , nu no femo osteria ,
E no volemo zente , che no se sa chi sia .

Brig. Mo via no audè in colera , che ve dirò chi son :

Toni. Se la parlerà schietto , la parerà più bon .

Brig. Sior sì, ve dirò tuto, senza che se contenda.
Son una virtuosa.

Toni. Vardè che gran faccenda!

Brig. Cossa vorressi dir?

Toni. La diga, cara siora,
Hala cantà a Venezia?

Brig. A Venezia gnancora.
Giera in qualche trattato; quel che m'ha menà qua,
De cantar in teatro m'aveva sconsiglià.
L'ha dito che una dona dela mia condizion,
Ai parenti, ala casa fa torto, e no par bon.
L'ha dito de sposarine. Ma vedo che sto fio,
Dopo tante mignognole de farlo el s'ha pentio.
Causa mia siora mare. La m'ha fato insegnar
Sto mistier malignazzo, ma mi nol voggio far.
Perchè mē, poverazza! vadagno, e me sladigo,
E ela tuti i mi bezzi la i spende coll' amigo.
Tolè, ve digo tuto, vardè se son sincera.
Caro vu, fe de tuto, che staga qua sta sera.
In casa da mia mare no ghe voria più andar.
O voggio maridarne, o me voi retirar.
Aspeto sto sior conte, spero che el vegnirà;
E se più nol vegnisse, el ciel proverà.

Toni. (Mi no so cossa dir, la me fa compassion.
Adesso mo ghe digo, che mi no son paron.)
Comanda mio sior pare; ma co lo vederò,
Ghe conterò l'istoria, e lo persuaderò.

Brig. Sieu tanto beuedeto! Da sto parlar se sente,
Che se' un puto de garbo, e no perderè gnente.

Toni. Mi no voi vadagnar, ma se la resta qua,
Se la vorrà disnar, qualcosa ghe vorrà.

Brig. Mi no gh'ho gnanca un bezzo.

Toni. La sta fresca, patrona.
No la gh'ha gnanca un bezzo! cara ela, perdonaj

Sior conte no gh'ha dà qualche bagateleta ?

Brig. Oh mi no togo gnente, sì ben so povereta !

El m'aveva esibio de darne un tanto al dì;

Mi gh'ho dito; sior no. Sposeme, e po sior sì.

Toni. Brava da galantomo ! Parlemose tra na,

L'ha visto el tempo brutto, e nol ghe torna più.

Brig. Se el gh'aveva con mi qualche intenzion cattiva,

Che el vaga pur al diavolo, e col xe là, che el scriva.

Cossa m'importa a mi del so ben, dei so bezzi !

Son zovene onorata; no voi sti stomeghezzi.

Se i me dona qualcossa, non uso a refudar,

Ma se i slonga le man, li mando a far squartar.

Toni. Dasseno ?

Brig. Sì dasseno.

Toni. Quando la xe cussi,

No i ghe donerà gnente.

Brig. Cossa m'importa a mi ?

Per mi poco me basta.

Toni. E per so siora mare ?

Brig. Che la ghe pensa ela. Za la gh'ha so compare.

Toni. Me par de sentir zente.

Brig. Chi xe ?

Toni. No so chi sia.

(*guarda alla scena.*)

El xe ün de quei siori, che disna in compagnia.

Brig. Cossa vorlo ?

Toni. Non so.

Brig. No ghe dixè, chi son.

Toni. Mi no ghe digo gnente. Cossa vorla, patrou ?

(*a Lelio.*)

SCENA II.

LELIO, e detti.

Lel. Si può venir?

Toni. Sta usanza mi no l'ho vista più!

El domanda, se pol, quando che el xe veguu?

Lel. Servidore umilissimo. (*a Brigida.*)

Brig. Serva.

Lel. Mi par foresta.

Brig. Sior no, son veneziana.

Lel. (Che bella donna è questa!)

Toni. Se pol saver, paron...

Lel. Audava un po' a diporto,

Sono entrato qua dentro a passeggiar nell'orto.

Veduto ho la signora, e mi ho preso l'ardire,

-S' ella me lo permette, venirla a riverire.

(*inchinandosi a Brigida.*)

Brig. Mi fa grazia distinta.

Toni. Signor, in casa mia

No se vien dale done, che no se sa chi sia.

Lel. Mi faresti un piacere? (*a Toni.*)

Toni. Cossa vorla da mi? (*con alterezza.*)

Lel. Dove avete imparato a favellar così?

Andatemi a compiar un'oncia di melato.

Il resto ve lo dono; ecco mezzo ducato.

Toni. (El zergo l'ho capio.) Seino un poco loutani.

Starò un pezzo a tornar.

Lel. Stateci fin domani.

Toni. Mo no la va disnar? deboto sarà ora.

Lel. Lasecrei mille pranzi per star colla signora.

Toni. Sentela? (*a Brigida.*)

Brig. Lo sentio. No saveria el perchè.

Lel. Perchè voi mi piacete.

Toni. Vorla che vaga?

(a *Brigida*.)

Brig. Andè.

Toni. Vago a tor el tabacco. La resta qua con elo.

(Mi no lo voggio perder sto mezzo ducato.) (*parte*.)

SCENA III.

BRIGIDA, e LELIO.

Brig. (Gh'ho bisogno de tutti in tel stato che sou,
Ma però che sia salva la mia reputazion.)

Lel. Signora mia, perdoni, è sola, o accompagnata?

Brig. Xelo orbo? no vedelo?

Lel. Veramente è garbata.

Posso saper, signora, la vostra condizionale?

Brig. Cossa gh'importa a elo?

Lel. Ci ho anch'io la mia ragione.

Brig. Elo, la me perdona, nol gh'ha far con tai.

Lel. Non ho che far con voi? potria darsi di sì.

Io sono un galantuomo. Molto voi mi piacete,

E se posso servirvi, dispor di me potete.

Brig. Grazie, grazie, patron, grazie de sto regalo.

Ela no me cognosse, e l'ha m'ha tolto in talo.

Lel. Ma di che vi offendete? So il mio dover, ridico;

Desidero soltanto d'esservi buon amico.

Se siete una signora, anch'io son nato bene,

Vi saprò in ogni grado trattar qual si conviene.

Siete voi maritata?

Brig. No lo so in verità.

Lel. Ma perchè mi volete celar la verità?

Brig. Gh'hoggio fursi sto obbligo de dirghe i fatti mi?

Lel. Ma via, cara signora, non parlate così.

Posso saper il nome?

Brig. Marfisa.

Lel. Eh non lo credo!

Brig. Mo no xelo un bel nome?

Lel. Scherzate, io me ne avvedo.

Fidar non vi volete della persona mia.

Brig. Perché m'hoi da fidar, se ini no so chi el sia?

Lel. Lelio dal Sol mi chiamo.

Brig. Gh'halo muggier?

Lel. Io no.

Brig. Se vorlo maridar?

Lel. Presto risolverò.

Brig. (El me par un bon zovene; dele volte, chi sa?

De sti bei accidenti al mondo se ne dà.) (da se.)

Lel. E voi siete fanciulla?

Brig. Son puta, patron sì.

Lel. Volete maritarvi?

Brig. Ghe penserò anca mi.

Lel. Se almen saper potessi chi siete, e chi non siete.

Brig. (Sto sior per quel che vedo el vien presto ale strete;

Ma cussì no me fido.) (da se.)

Lel. Non rispondete ancora?

Brig. Risponder a ste cosse xe un pocheto a bon'ora.

Che intenzion gh'averavelo?

Lel. Intenzion bella e buona,

Mi piace il vostro spirito, mi piace la persona.

Quan'l'io saprò chi siete, forse mi spiegherò,

Brig. Vorla saver chi son? doman ghe lo dirò.

(Spero ancora che el conte no me lassa cussì.)

Lel. (Appena l'ho veduta subito mi ferì.)

Posso goder intanto il piacer di servirvi?

Posso dopo pranzato venire a riverirvi?

Brig. Perché no? el xe patron.

Lel. Vedo da tal bontà,
Che avete un cuor gentile al par della beltà,
Ed io vi userò sempre quell' umile rispetto...

SCENA IV.

OTTAVIO, e detti.

Ott. Servo di lor signori.

Lel. (Che tu sia maledetto !)

Brig. Cossa vorla, patron?

Ott. Non son per darvi intrico;

Sono, signora mia, di Lelio un buon amico.

Soggezion non abbiate; so tutti i fatti suoi.

Lelio, buon pro vi faccia; mi rallegro con voi.

Lel. Caro il mio caro Ottavio, se mi volete bene,

Fate il piacer d'andarvene.

Ott. So quel che mi conviene.

(in atto di partire.)

Brig. Perchè el mandelo via? Mi no gh'ho suggizion.

Le visite onorate no le se fa in scondon.

La perdona, sior Lelio; co sto so bel parlar,

De ela, e anca de mi la farà sospettar.

Ott. Dice ben la signora. (Mi pare, e non mi pare
D'averla in qualche loco veduta recitare.) (da se.)

Posso saper chi sia? (a Lelio.)

Lel. Non lo so nè men io.

Ott. Come! non lo sapete?

Lel. Nol so sull'onor mio.

L'ho ritrovata a caso. Da lei son ben veduto,

E non vorrei che foste al solito venuto

A far le vostre scene.

Ott. Anzi giovar procuro

A ogni vostro piacere. (È lei, ne son sicuro.)

Brig. (Sto sior me para mi, che el gh'abbia più del omo.)

Ott. Non sapete chi sia. Bella da galantuomo!

Parini, se non m'inganno, d'averla conosciuta,

Non mi ricordo dove, ma so che l'ho veduta.

Brig. La senta una parola. (*ad Ottavio.*)

Ott. Son qui, che comandate?

(*a Brigida.*)

Brig. (Dasseno, el me cognosse?) (*piano ad Ottavio.*)

Ott. (Sì, ma non dubitate.)

(*piano a Brigida.*)

Lel. (Ecco qui, mi perseguita sempre in una maniera.)

Ott. Mi consolo con voi, se questa cosa è vera. (*a*

Lelio.)

Lel. Di che cosa?

Ott. (Mi ha detto questa cortese dama...)

(*piano a Lelio.*)

Lel. (È una dama?) (*piano ad Ottavio.*)

Ott. (Sicuro.) (*piano a Lelio.*)

Lel. (Buono! come si chiama?)

Ott. Con licenza, signora. (*a Brigida.*)

(*La contessa Narcisa.*)

(*piano a Lelio.*)

Lel. (Ed a me aveva detto, che avea nome Marfisa.)

(*piano ad Ottavio.*)

Brig. No me vergogno guente de dir quella che son;

Ma trovarme qua sola, lo so che no par bon.

Lel. No, signora contessa, no stia a rammaricarsi.

Brig. Disela a mi, patron?

Ott. Non occorre celarsi.

Io son dei buoni amici un amico fidato.

L'esser suo, mia signora, a Lelio ho confidato.

Anchor egli è nato bene, e certo non saprei

Trovarne un altro simile, che convenisse a lei.

Brig. Me burlela, signor?

Ott. Dico la verità.

Lel. Un amico sincero in me ritroverà,
Un servitor fidato, umile, e rispettoso.

Ott. E se saprete fare forse un tenero sposo. (*a Brigida.*)

Brig. (Come xela st'istoria?) (*da se.*)

Lel. Lo so che non son degno,
Ma ad incontrar son pronto ogni più grande impegno.
Ottavio sa chi sono.

Ott. Certo, signora sì.

Lel. (Possibil ch'io non trovi da maritarmi un dì?)

Brig. Se el disesse dasseno!

Lel. Per me non so mentire.

Ott. Lelio è un giovin di garbo, quel che è ver si ha da dire.
È ricco, è senza padre, è amabile e giocondo.

Brig. (El sarave un negozio el più bel de sto mondo.)

SCENA V.

GIACOMETTO, e detti.

Giac. **C**ossa feu qua, patroni? andemo, che ne attende.

Ott. Cosa dite di Lelio? (*accennando Brigida.*)

Giac. Roba soa? (*ad Ottavio accennando Lelio.*)

Lel. Ci s'intende.

Giac. Bravo, compare Lelio! Anca mi scambieria
Cento e vinti compagni per sta tal compagnia.

Lel. Lo sapete chi è?

Giac. Mi no.

Lel. È una contessa.

Giac. Dasseno?

Lel. Domandatelo. (*a Giacometto, accennando Ottavio.*)

Ott. Posso attestar per essa .

Giac. Cossa favela qua sola senza nissuu? (*a Brigida.*)

Brig. Hoggio mo i mi interessi da dirli a un per un?

Lel. Basta che io li sappia .

Ott. Ed ancor io li so .

Giac. E a mi gnente, gramazzo!

Lel. Ed a voi signor no .

Giac. Me despiate che a tola done no i ghe ne vol?

Che la vegna ; faremo tutto quel che se pol .

Brig. No, no, sior parouzin, ghe son tanto obligada:

Sola con tanti omeni ? la xe una baronada .

Me maraveggio gnanca , che el me la vegna a dir.

Ott. Sentite ? vostro danno . (*a Giacometto .*)

Giac. La prego a compatir ,

Ho dito quel che ho dito senza pensarghe su .

Dopo d' aver disnà , vegniremo qua nu .

Ott. Ma signor Giacometto , così non si favella ,

Lelio è il sol possessore del cuor di questa bella .

Egli non vuol nessuno , lo so di certa scienza ,

E di venirvi , al più , avrò io la licenza .

Lel. Nè anche a voi nol concedo . (*ad Ottavio .*)

Giac. Sentiu? *ad Ottavio.*)

Perchè tal cosa?

(*a Lelio .*)

Possibil che per me siate così ritrosa ?

Non volete ch'io venga! siete crudel così? (*a Brigida.*)

Brig. Che vegna pur .

Ott. Sentiu ? voi vegnir anca mi .

(*a Lelio .*)

SCENA VI.

*ANDREETTA, e detti.**Andr.* **P**resto, che se dà in tola.*Brig.* (Deboto i vien qua tuti.)*Andr.* Cossa xe sto nagozio? Oe! principieu dai fruti?

(ai tre compagni.)

Giac. Lelio gh'ha de sti tocchi? (a *Andreetta*.)*Ott.* Non vuol che gli si guardi.*Giac.* E a nu no ne tocca.*Andr.* Cossa semio? bastardi?*Brig.* Cossa voleu da mi?*Andr.* Semo tuti golosi.*Brig.* Voleu che ve la diga, che se'i gran morbinosi.*Andr.* Sior Lelio.*Lel.* Che volete?*Andr.* Se la volè menar,

Serada in tuna camera la poderia restar.

Mi, che son quel che trinza, ghe manderò el bisogno.

Lel. Se volete venire. (a *Brigida*.)*Brig.* Oh sior no! me vergogno.*Ott.* Ma via, cara contessa.*Andr.* Contessa? bisinele!

Co gh'è de ste signore, no ghe vol bagatele.

Come xela qua sola?

Brig. Za me l'ho immaginada,

Che el me dava anca elo la solita seccada.

Ghe son, perchè ghe son; cossa gh'importa a lu?

Andr. No la se scalda el sangue, che mi no parlo più.

SCENA VII.

FELIPPO, e detti.

Fel. **V**ia, no ve fè aspetar. I ha messo suso i risi.

Cossa vien qua ste femene per intrigarne i bisi?

Brig. Quel sior la civiltà nol l'ha imparada tropo.

Ott. Colle donne, signora, Filippo è misantropo.

Brig. Nol par mai venezian.

Fel. Son venezian, patrona;

Nè son gnanca de quei taggiadi ala carlona.

Co le done xe bele, antipatia no gh'ho.

Le me piase anca a mi, ma per ancuo, sior no.

Lel. Non si potria condurla in qualche appartamento?

Ott. Questo potrebbe farsi.

Giac. Mi per mi me contento.

Fel. La diga, cara ela. Chi xela? (*a Brigida.*)

Brig. Velo qua.

El vol saver, chi son. El gh'ha curiosità.

Fel. No ghe posso parlar? Mo la saria ben bela...

Giac. V'hoi da dir chi la xe? la xe una mia sorela.

Fel. Se l'è vostra sorela, mi ve digo cussì...

SCENA VIII.

TONINA, e detti.

Ton. **B**ravo, signor consorte!

Giac. (Oh povereto mi!)

Ton. Se me fa anca de queste? cussì con mi trattè!

Dirme i xe tuti omeni, done no ghe ne xe?

E vu altri, patroni, che me l'avè desvià,

No avè per le muggier guente de carità.

Fel. Da nu no ghe se done, vel digo e vel mantegno,
 Chi ha ordenà sto disnar, l'ha fato con inzegno.
 Ma se i le va a cercar, cossa gh'intremo nu?
 Mauderave le femmine a casa de colu.
 Per mi vago a disnar. Vegna chi vol vognir...
 E chi no vol, bon viazo; mi no voglio immatir.
 (*parte.*)

Andr. Andemo, cari siori, no se femo aspetar.
 Tuti a nome per nome Lunardo ha da chiamar.
 S'ha da passar rassegna, su de una scala sola.
 E po tutti per ordine s'ha da sentar a tola.
 Anca a mi qualche volta ma piase sti bei visi;
 Ma adesso voi andar a far l'amor coi risi.

Ton. Andè, che podè andar fin che ve chian o indrio.

Giac. Anca mi voggio andar.

Ton. La diga, sior mario.

Chi xela sta signora?

Brig. Oh per diana de dia!

Deboto me vien caldo; chi credela che sia?

Ton. So sorela no certo.

Brig. Son zovene onorata,

E qua con so mario no vegno a far la mata.

No lo gh'ho gnanca in mente. De lu no so che far.

El so caro mario la se lo pol petar. (*parte.*)

Lel. Lasciatevi servire. (*in atto di seguitarla.*)

Ott. No no, fate una cosa, (*lo tratta.*)

Pacificate in prima lo sposo con la sposa.

Voi dileguar potete tutti i sospetti suoi;

Se la signora è sola, la servirò per voi. (*parte.*)

Lel. (D'Ottavio non mi fido; voglio andar io con lei:

Non vo' che me la levi.) Schiavo, signori miei.

(*parte.*)

Ton. Chi ela quella pettegola? (*a Giacometto.*)

ATTO SECONDO.

305

Giac. Zitto; la xe contessa.

Ton. Cossa m'importa a mi se la fusse duchessa?

Parlo con vu sior sporco, che ve se andà a inventar
Che l'è vostra sorela.

Giac. Ho fato per hurlar.

Ton. Ai omeni ste burle in testa no le vien,

Quando che a so muggier dasseno i ghe vol ben;
Ma mio mario per mi nol gh'ha nè amor, nè stima,
El me fa de sti torti, e no la xe la prima.

Giac. (E no la sarà l'ultima.)

Ton. Coss'è? no respondè?

Giac. Cossa v'hoi da responder? mi lasso che disè.

Se avesse da parlar, ve poderave dir,
Che qua assolutamente no dovevi vegnir:
Che una dona civil, consorte de un par mio,
No va a far de ste scene in fazza a so mario.
Tornè a montar in gondola, batteve la, ma presto.
Parleremo sta sera, e ve dirò po el resto.
Se vegno a devertirme, se stago allegramente,
A casa mia, patrona, ve lasso mancar gnente?
Ho speso el mio ducato. No lo voi buttar via,
No voi per causa vostra star in malinconia.
Quanto me pare e piase voi rider e burlar.
Anemo, a casa vostra, e no me ste a seccar. (*parte.*)

Ton. Finzerò de andar via, ma tornerò ala riva.

No, no ghe voggio andar, se i me scortega viva.
So sorela? baron! voi vederla a fenir.
Gh'ho una smania in tel cuor, che me sento a morir.
Oh povere muggier, credeghe a sti baroni!
Oh ghe ne xe pur pochi de marii che sian boni!
Co i xe arente i ne dixe vissere, vita mia,
E co i ne xe lontani, bona sera sioria.

FINE DELL' ATTO SECONDO.

Tom. XXVIII.

20

A T T O T E R Z O

SCENA PRIMA.

Sala con tavola dei 120.

La tavola formerà un T, cioè in fondo alla scena vicino al prospetto del camerone, sarà lunga da un capo all' altro entrando di qua, e di là nelle quinte per fingere, che sia di 120. persone. A mezzo della tavola ne sarà attaccata un' altra, che forma la gamba del T, e questa verrà innanzi verso i lumini, cioè fin dove si potrà mettere fra un tendone e l' altro, e se la camera avanti fosse stata indietro, si potrà calare un tendone fra l' atto, per preparare la tavola. In faccia saranno i personaggi muti parte colla faccia, e parte colla schiena al popolo. In quella, che viene avanti, si metteranno i personaggi di qua, e di là. Alla prima scena ai lumini, di qua, e di là, vi saranno due porte di camera con portiere. Si avverte, che la tavola sia un poco in declivio, acciò sia goduta, e di mettere otto candele, benchè sia di giorno, potendosi tollerare quest' improprietà per non perdere affatto

la scena per l'oscurità. Sopra la tavola vi vorranno vari piatti, e si può fingere che siano ai frutti. Vi saranno delle bottiglie, dei rosolj, e poi a suo tempo il caffè.

Andr. Amici da levante, alla vostra salute. *(beve.)*

Giac. Amici da ponente, viva le bele pute. *(beve.)*
(tutti gridano: evviva.)

Ott. Lelio, evviva! *(col bicchiere in mano.)*

Lel. Chi viva?

Ott. Evviva la contessa.

Lel. Viva, viva di core! Oh se ci fosse anch'essa!

Fel. Senza le done in bocca no i sa star un momento.

Viva chi ha procurà sto bel divertimento.

Giac. E viva sior Lunardo, che n'ha trattai da re.

Andr. Viva quel bon amigo.

Fel. Sonadori, sonè.

(l'orchestra suona una parte di sinfonia allegra con i corni da caccia, e colle trombe.)

Andr. Mi ho magnà ben, compare. *(a Giacometto.)*

Giac. Semo stai ben trattai.

Lel. Gran sfarzi nella tavola per me non ci trovai.

Fel. Per mi son contentissimo, e la rason'xe questa:

Cossa volcu de meggio per un ducato a testa?

I primi cinque piatti i è sontuosonazzi.

Certo che in ti segondi no ghe xe sta gran sguazzi.

Ma misurando ben la spesa coll'entrada,

Me par che abbiamo fato una bona zornada.

Giac. Gran risi!

Andr. E quella sopa?

Ott. La carne era squisita.

Fel. Che castrà! Che frittura! Mi ghe andava de vita.

Giac. Quele quattro molecche no gierele perfette?

Andr. I s'ha desmentegà de taggiarghe le angiette .

Fel. Boni quei colombini .

Andr. Boni per la stagion .

Giac. E quel salà co l'haggio mo no gierelo bon ?

Fel. La torta veramente giera assae delicata .

Giac. No cavavela el cuor quela bela salata ?

Fel. E sto deser ? Dasseno no se pol far de più .

Lel. Lo chiamate deser ?

Fel. Tasè là , caro vu .

Se sa che in cento , e vinti qualcun s'ha da doler ;

Ma sta cossa , per dirla la me dà despiaser .

Dei disnar in diversi anca mi ghe u'ho fato ;

Ma non son mai stà meggio a spender un ducato .

Ott. Convienè compatirlo . A Lelio non dispiace

La tavola che ha avuta ; anzi se ne compiace .

Ma il desinar gli sembra , che meriti assai manco ,

Perchè non gli si è data una signora al fianco .

Fel. Sior si per otto lire co sta bela grazieta

L'averave volesto anca la so doneta .

Andr. Amici , gh'aveu guente , che ve avanza de bon ?

Maudè qua , mandè qua , che gh'ho el tira busson ,

Porto sempre con mi le mie arne in scarsela .

Dè qua quela bottiglia *rosolin de canela* .

Giac. Xela del Calzeniga ?

Andr. Adesso el sentiremo . . .

Fel. Anca mi un gottesiu .

Andr. Sì , se lo spartiremo .

Ott. Lasciate che lo senta .

Lel. Ed io sono bastardo ?

Andr. E viva i cento e viuti .

Giac. E viva sior Lunardo .

(tutti bevono il rosolino .)

SCENA II.

TONINA, e BETTA nascoste dietro la portiera da una parte, BRIGIDA, ANZOLETTA, e CATTE dall' altra, volendo vedere alzano un poco la portiera ora di qua, ed ora di là.

Giac. Oe! ghe xe dele done. (*ad Andreetta.*)

Andr. Zitto, che le ghe staga.

(*a Giacometto.*)

Lcl. Vi son donne là dentro. (*ad Ottavio.*)

Ott. Davver? O questa è vaga!

Fel. Cossa gh'è, coss'è sta? Se vede a buligar.

Per diana! le xe done, che ne vien a spionar.

Giac. Oe! la xe la contessa. (*a Andreetta.*)

Andr. Ghe xe un' altra con ela;

Che la sia to muggier?

Giac. La sarave ben bela;

La xe montada in barca; l'ho vista mi a montar.

No crederia, che aucuo la volesse tornar. (*si vedono muovere le portiere.*)

Fel. La xe lunga sta istoria. Dove xe sior Lunardo?

Ste done per adesso le ha abù qualche riguardo;

No le pol star in stropa, le vol veguir de filo, (*s'alza.*)

Adesso uo se varda più tanto per sutilo.

El disnar xe senio, podemo levar su,

Vorle vegnir a rider? Rideremo anca nu. (*tutti si alzano e partono le parti mute.*)

Giac. Bravo Felippo, bravo!

Andr. Bravo da galantomo!

Fel. Cossa credeu, patroni? Anca mi son un omo.

Benchè sono in ti ani, me piase l'allegria,
 E ne voi devertir al par de chi se sia.
 S'aveva dito; a tola done no ghe sarà;
 S'ha mantegnù l'impegno, e no ghe ne xe stà.
 Adesso sta pramatica l'avù el so compimento,
 S'avemo dà inventar qualche devertimento.
 Parlerò con Lunardo, aspetè qua un tantin;
 Voi che se devertimo, voi che femo un festin;
 Voi co ste zuecchine, che femo i generosi,
 Voi che i diga a Venezia, che semo i morbinosi. (*parte.*)

Giac. Mi ghe stago.

Andr. Anca mi.

Ott. Anch'io non mi ritiro.

Lel. (A servir la contessa unicamente aspiro.) (*da se.*)

Giac. Mo via, care patrone, no le faccia babao,

Che le vegna con nu. Le scampa da reca?

Lel. Queste belle signore patiscono i rossori.

Anderò io da loro; servo di lor signori. (*entra dov'è Brigida.*)

Ott. Non lo lascio di vista il caro amico mio;

S'ei si vuol divertire, vo' divertirmi anch'io. (*parte dietro Lelio.*)

Andr. Lori va per de là; nu andemo per de qua;

Anca per nu altri do qualcosa ghe sarà. (*parte.*)

Giac. Za che no gh'è Tonina, me togo boninan,

Voi balar, voi saltar magari fin doman. (*parte.*)

SCENA III.

Camera.

BRIGIDA, e LELIO.

Lel. **M**a via, cara signora, siate meco bonina.

Brig. Cossa vorlo da mi?

- Lel.* Datemi una manina .
Brig. Cole done civil tratar nol sarà uso .
Lel. Mi negate una mano ? (*vuol prenderla .*)
Brig. Ghe la darò sul muso .
Lel. Per aver una grazia da una gentil signora
 Mi contento di prendere una guanciata ancora. (*come sopra .*)
Brig. Ma la xe un'insolenza .
Lel. Ma se per voi nel seno
 Ardere già mi sento .
Brig. Ghe la puço dasseno .
Lel. Se avete cor , battetemi . (*come sopra .*)
Brig. Nol sarà miga el primo .
Lel. Voi di me non curate , ed io tanto vi st imo .
Brig. Se per mi , caro sior , el gh'ha dela bontà ,
 Che el scomenza a tratar come che va tratà .
Lel. Una finezza sola . (*accostandosi .*)
Brig. Che el staga con respeto .
Lel. Ma se amor mi tormenta .
Brig. Deboto ghe la peto .
Lel. Quella mano gentile male non mi può far .
Brig. Se sta man xe zentil , ghe la farò provar .
Lel. Qua nessuno ci vede , qua nessuno ci sente ,
 Mio tesoro , mio bene , pietà . . . (*si accosta .*)
Brig. Sior insolente. (*gli dà uno schiaffo .*)

SCENA IV.

Ottavio , e deui .

- Ott.* Cos'è stato ? (*a Lelio .*)
Lel. Non so .
Ott. Cosa fu ? (*a Brigida .*)

Brig. No saverei.

Domandeghelo a lu.

Ott. (*si volta da Lelio.*)

Lel. Domandatelo a lei.

Ott. Non so, se ciò sia vero, o se mi sia iugannato.

Un schiaffo a qualcheduno mi par sia stato dato.

Dite se ciò sia vero, o se ingannato io fui.

Lel. Domandatelo a lei.

Brig. Domandeghelo a lui.

Ott. Se alcun non lo vuol dire, lascerò che si taccia.

Chi l'ha avuto, sel goda, e che buon pro gli faccia.

Pensiamo a un'altra cosa. *Lelio*, codesta dama

(*a*) Lo so di certa scienza, che vi rispetta ed ama.

Lel. Lo so anch'io di sicuro.

Ott. E del suo amore in segno

So che brama di darvi di tenerezza un pegno.

Lel. Mi ha di già favorito.

Ott. Davver? Me ne consolo.

(*a Lelio.*)

Ma non è a sufficienza, se glie ne deste un solo.

Quando si ama davvero, si replica il favore.

Brig. Replicherò, se el vol.

Lel. Grazie di tanto onore.

Ott. Come! Voi ricusate la grazia generosa

Di una, che sol desidera di essere vostra sposa?

Lel. Mia sposa?

Ott. Sì signore. Contessa, non conviene,

Che tenghiate l'amico più lungamente in pene.

Perchè credete voi, ch'ella sia qui venuta? (*a Lelio.*)

La donna, lo sapete, è per costume astuta.

L'amor mi ha confidato, che per voi prova in petto;

Io le ho fatto la scorta a entrare in questo tetto.

Nulla vi ho detto in prima, per osservar se a voi

Piaceva il suo bel volto, piacevan gli occhi suoi.

Or, che mi par che siate per lei contento e lieto,
Vi parlo schiettamente, vi svelo il gran segreto.
La contessa Narcisa arde per voi d'amore;
E voi siete un ingrato, se le negate il cuore.

Lel. (Burla, o dice davvero?) (*da se.*)

Brig. Audemo co le bone. (*ad*

Ottavio.)

Ott. (Non lasciate fuggire questa buona occasione.)

(*piano a Brigida.*)

Lel. Voi dite cento cose, io non ne credo alcuna;

Se diceste davvero, l'avrei per mia fortuna.

È ver, per confidarvelo, che un schiaffo ella mi ha dato,

Ma se poi mi vuol bene...

Ott. Per amor ve l'ha dato,

(*a Lelio.*)

Non è vero? (*a Brigida.*)

Brig. È verissimo.

Ott. Sentite? In verità

Questo è un segno d'affetto. (*a Lelio.*)

Lel. Grazie alla sua bontà.

Ott. Concludiamo l'affare. Ella per voi si mostra

Inclinata all'estremo; se la volete, è vostra.

Lel. Come?

Ott. Come, si dice? Di voi m'è maraviglio.

Far sentir questo *come* a lei non vi consiglio.

Come mi domandate? Vostra potete farla

Sol coll'unico mezzo di amarla e di sposarla.

Vi è noto il di lei grado, vi è noto il di lei nome;

Non ardate mai più di pronunciar quel *come*.

Lel. Non so che dire, amico, lascio da voi guidarmi,

La contessa mi piace. Desio di maritarmi.

Ott. Lo sentite, signora? Disposto è a dir di sì. (*a*

Brigida.)

Brig. Ma se l'ha dito come; come dirò anca mi.

Ott. Come voi pur mi dite? Come si fan tai cose,
Domandar lo potete a quelle che son spose.
Per me posso servirvi a stendere il contratto,
Il come lo saprete quando che sarà fatto.

Brig. Ma voi saver avanti...

Ott. Che volete sapere?

Non vi dirò, che Lelio sia nato cavaliere.

Ma è persona civile, ricco di facoltà,

Buono, come una pasta.

Lel. Tutta vostra bontà.

Ott. Signora mia, del tempo non dobbiamo abusarci.

Brig. Zitto, che sento gente.

Ott. Chi viene a disturbarci?

SCENA V.

Toni, e detti.

Toni. Posso vegnir avanti?

Brig. Vegni, vegni, Tonin.

Toni. Un barcarior per ela m'ha dà un polizzin.

Brig. Chi lo manda?

Toni. No so.

Brig. (El xe quel traditor.)

(da se.)

Con so bona licenza. (Ah che me batte el cuor!)

Ott. (Lelio, me ne consolo.)

Lel. (Chi mai scrive quel foglio?)

(ad Ottavio.)

Ott. (Di che cosa temete?)

Lel. (Temo di qualche imbroglio.)

Toni. Che la diga, patron. (a Lelio.)

Lel. Che cosa vuoi da me?

Toni. Vorla che vaga a torghè un'onza de gingè?

(*a Lelio.*)

Lel. No, il gingè non mi piace, prendo solo il melato,

E tu puoi contentarti di quel mezzo ducato.

Brig. (Ah, che sto desgrazià me lassa, e me abbandona!

A crederghe a costù son stada troppo bona.

Se Lelio non minchiona, ghe posso remediar;

Ma son troppo scotada, no me voggio fidar.) (*da se.*)

Ott. Che vuol dir, che vi vedo confusa ed agitata?

Forse è cagion la lettera?

Lel. (Temo sia innamorata.)

Brig. La senta, sior Ottavio.

Ott. Eccomi a voi repente.

Brig. Ghe confido sta polizza, ma che nol diga gnente.

Ott. *Brigida mia carissima, a forza son costretto*

Lasciarvi in abbandono ad onta dell'affetto.

Mio padre mi richiama . . (legge in disparte.)

Lel. Posso sentire anch'io?

Ott. Permettete che il senta anche l'amico mio.

(*a Brigida.*)

Brig. Me despiase . . .

Ott. Che importa?

Lel. Son in curiosità.

Ott. Non vi perdetè d'animo; qualche cosa sarà.

Quel che scrive è un amante.

Lel. L'ho detto.

Ott. E che per questo?

Le cose di tal sorte io le accomodo presto.

Contessa adoratissima.

Brig. Dise cusì?

Ott. Tacete.

So leggere, signora.

Lel. Caro amico, leggete.

Ott. Pur troppo da gran tempo io vidi a più d'un segno,

Che della grazia vostra con diventato indegno.

So che Lelio d'al Sole teneramente amate.

Brig. Dixe cusì? (*ad Ottavio.*)

Ott. Tacete. (*a Brigida.*)

Lel. Amico, seguitate.

Ott. Di ciò solo vi prego, ditemi sì, o no.

Cosa risponderete?

Brig. Mi dasseno nol so.

Ott. Galantuomo. (*a Toni.*)

Toni. Signor.

Ott. Avete un calamaro?

Toni. Se la vol sto strazzetto, calamar da scolaro.

(*tira fuori di tasca un calamaro.*)

Ott. Adesso avete un poco di carta?

Brig. No ghe n'è.

Gh'ho sto libro da conti.

Ott. Lascia vedere a me.

(*straccia un foglio.*)

Toni. El mio libro... (*lamentandosi.*)

Ott. Sta zitto. Scrivete; io detterò.

(*a Brigida.*)

Brig. Cossa vorlo che scriva?

Ott. Quello ch'io vi dirò.

Brig. (Mo la xe ben curiosa. Dove vala a finir?

(*si mette per iscrivere.*)

Lel. (Sentiam che cose scrive.)

Ott. (Mi voglio divertir.)

Scrivete. (*a Brigida.*)

Brig. Scriverò.

Ott. Signor conte carissimo. (*det-
tando.*)

Che tutto a voi sia noto, ho un piacere grandissimo.

Adoro il signor Lelio, lo dissi e lo ridico,

E di voi, computitemi, non me n' importa un fico.

Brig. Ho da scriver sta roba?

Ott. Senza difficoltà.

Lel. (Se licenzia il rivale, ci ho gusto in verità.)

Ott. Scrivete. Innanzi sera forse sarò tornata

Col caro signor Lelio unita, e maritata.

Brig. Sta roba... (ad Ottavio.)

Ott. Non occorre che a bada lo tenete.

Terminate di scrivere, e poi sottoscrivete.

Qui non ci sarà nulla per sigillare il foglio;

Non importa; per questo più differir non voglio.

Come si può, pieghiamolo. Fate la soprascritta.

Al conte della Bosima che stà sulla via dritta.

Prendi tu questo foglio, e reca la risposta. (a Toni)

Toni. A chi?

Ott. Non perder tempo. (gli dà una moneta.)

Toni. Vado via per la posta.

(No saverò a chi darlo. Basta, per no faltar,

Lo buterò in canal, e lo lasserò andar.) (da se, e parte.)

Brig. (Mi son mezza confusa.)

Ott. Lelio, cosa vi pare?

Del ben della contessa potrete dubitare?

Ecco per amor vostro, per esservi costante,

Punto non ha tardato a licenziar l'amante.

Ora siete in impegno, se avete un cuore umano,

Se galantuom voi siete, di porgerle la mano.

Lel. Sì, mia cara colonna. (vuol abbracciarla.)

Brig. Cossa vorlo ziogar,

Che un effetto d'amor ghe torno a replicar?

(minacciandolo d'un altro schiaffo.)

Lel. Mi vuol bene così? (ad Ottavio.)

Ott. Anzi di cuor vi adora;

Un affetto più grande non ho veduto ancora.

S'io trovassi una donna che mi battesse, affè

Sarei per il contento, sarei fuori di me.

Lel. Quand'è così, signora, son qui quanto volete;

Il mio povero viso battete e ribattete.

Ott. Ma convien provocarla.

Lel. Ho a dir delle sciocchezze?

Ott. Provocar la dovete coi scherzi, e le finozze.

Lel. Fin qui non mi ritiro. Io voglio ad ogni patto...

(*vuole abbracciarla.*)

Brig. Andeve a far squartâr, che se' un pezzo de matto.

Ott. Brava!

Brig. E vu, sior Ottavio...

Ott. Or or d'amore in segno

Anche contro di me prende un pezzo di legno. (*a Lelio.*)

Lel. Vuol bene ancora a voi?

Ott. Chi sa!

Lel. Non ho sospetto;

Dategli in mia presenza qualche segno d'affetto.

(*a Brigida.*)

Brig. Ve dirò a tuti do quel che me vien in bocca;

A vu altri paronzini burlarme no ve tocca.

Cortesani d'albeo, scartozzi mal ligai,

Se credè minchionarme, resterè minchionai.

Mo che gran matrimonio! mo che bela fortuna!

Sior cavalier dal Sol, andè a sposâ la luna. (*parte.*)

Ott. Sempre più mi consolo.

Lel. Di che?

Ott. Voi siete certo,

Che di voi la contessa ha conosciuto il merto.

Quanti vi son, che cercano d'essere strappazzati?

Voi in genere di questo siete dei fortunati.

Andiam le vostre nozze a preparar di volo,

La contessa vi adora; con voi me ne consolo. (*parte.*)

Lel. Ti ringrazio, fortuna, se l'esser strappazzato

È dell'amor la prova, son più di tutti amato.

Cara contessa mia; se da te amato io sono,

Sì, strappazzami pure, battimi, e ti perdono.

FINE DELL' ATTO TERZO.

A T T O Q U A R T O

SCENA PRIMA.

Orto all'uso della Zuecca.

BETTA, e CATTE.

Catt. **Z**la che no gh'è nissun, spazzizemo un pochetto.

Bett. Varda, no ghe parlar, se vien sior Giacometto.
So muggier xe tornada.

Cat. Dasseno?

Bett. In verità.

De lu no la se fida.

Catt. Che gran bestialità!

Lo savè, siora Betta, come che mi son fata.

Lo savè che coi omeni mi no faccio la mata.

Toni xe assae sùtillo, no lo voi desgustar.

Ma giusto co sta siora me la voria cavar.

SCENA II.

ANZOLETTA, e dette.

Anz. **O**e! no savè? Sta sera i vol far un festin.

Catt. Baleremo anca nu?

Anz. Pol darse un pochetin.

Bett. I darà anca da cena?

Anz. Sì, ma nu no gh'intremo.

Bett. Quando che i dà da cena, qualcosa magnaremo.

Catt. Mi me basta balar.

- Anz.* E mi gh' ho el mio diletto
 A veder a fenir un certo negozietto .
 Quella certa signora , che no se sa chi sia ,
 I dise che la sposa un de sta compagnia .
 Mi me par impossibile ; ghe vederemo el fin .
Catt. Donca per le so nozze i farà sto festin ?
Anz. Pol esser .
Bett. Sì seguro , e co ghe xe novizzi ,
 No ghe mancherà certo nè torte nè pastizzi .

SCENA III.

GIACOMETTO, e dette.

- Giac.* **P**ute , bondì sioria .
Catt. Patron .
Giac. Bondì , fia mia .
 (*a Cate.*)
Bett. (*Oe!* no ghe disè guente, che so muggier ghe sia .
 La m' ha dito che tasa . (*piano a Cate.*)
Giac. Coss' è ? Ghe parlè in recchia ?
Bett. No ghe posso parlar ?
Giac. Eh vu se' volpe vecchia !
Bett. Vecchia a mi ?
Giac. Non intendo de parlar de l' età ;
 Digo ché se' una donna , che el fato soo lo sa ,
Bett. Certo no son mincliona .
Anz. Credeu che solamente
 Le vostre veneziane sia brave e sia valente ?
 Nu altre zuecchine lustrissime no semo ,
 Ma i nostri caratteri anca nu li gh' avemo .
 Chi vol pute de sesto s' ha da vegnir da nu .
 E per aria e per gusto zuecchine , e po' no più .
 Se se metemo in testa un galaneto , o un fior ,

Sento che tuti i dise: le fa cascar el cuor.
 In materia de balo, per far de le furlane
 No le pol imparar gnauco le veneziane.
 Mi no parlo de mi, che mi no son de quelle;
 Ma su sta fundamenta le luse co fa stelle.
 Bei musi, bele vite, pepini che innamora.
 Se vedessi! Ma tute no le vol vegnir fora.
 La festa da Venezia vien via sti licardini,
 E va da un cao all'altro facendo i pàregini,
 Col codegugno niovo; col fazzoletto al collo,
 Colla vita scavezza a usanza de bigollo.
 Varda, passa, saluda, i se voria butar,
 Ma i sol trovar dei ossi duri da rosegar.
 Stimemo nu zuecchin più assae de un venezian;
 Volemo un mariner, volemo un ortolan.
 Se no gh'avemo el gusto de star ala città,
 Ne piase più de tuto la nostra libertà.

Giac. Care fie, mi ve lodo. Ma i omeni, me par,
 Tuti no li mesura l'istesso brazzolar.

Mi son un galantomo, cognosso el mio dover.

Anz. Eh vu fateSSI meggio tender ala muggier!

Giac. Ghe tendo ale so ore.

Bett. Cossa voleu? gramazzo!

Anca lu el vieu a torse un poco de solazzo.

Xe vero che sta sera i fa un festin?

Giac. Se dise.

Bett. Feue vegnir a veder, car e le mie raise.

Giac. Perchè no? Vederemo.

Catt. Se vegno, voi ballar.

Bett. E se i dasse da cena, voggio anca mi cenar.

Giac. Se no i volesse done, come è stà stamattina?

Bett. Che i voggia anca sta sera sta bela seccadina?

Senza done no i bala; co le gh'è, le ghe sta.

Se' tuti galantomeni, savè la civiltà.

Tom. XXVIII.

Anz. Che bisogno ghe xe, che s'abbia da cenar?

Bett. Tasè là, cara vu, no ve ne ste a impazzar.

Giac. Basta, farò de tuto, perchè vegni anca vu,

E se i altri no magna, faremo tra de nu.

SCENA IV.

TONINA, e detti.

Ton. **B**ravo, sior Giacometto! Me piase in verità.

Giac. No se' andata a Venezia?

Ton. Dasseno che son qua.

Giac. Cara siora Tonina, andemo cole bone.

Ton. Tuto el dì v'ho da veder a star co ste frascone?

Anz. Come parleta, siora?

Catt. Frascone la n'ha dito?

Bett. A nu altre frascone? Cossa credela?

Giac. Zito.

Bett. Chi credela, che semo?

Anz. Semo zente onorata.

Catt. E no semo de quele.

Bett. E cusì no se trata.

Ton. Co sta bela insolenza se parla a una par mio?

Farne portar rispetto, tocca a vu, sior mario.

Giac. Voleu aver creanza? (*alle zuecchine.*)

Anz. Ela n'ha strapazzà.

Giac. Se parla con maniera. (*a Tonina.*)

Ton. Mandele via de qua.

Giac. Andè via.

Catt. Semo in orto, e ghe volemo star.

Ton. Fè che le vaga via. (*a Giacometto.*)

Giac. Se no le vol andar. (*a Ton. con coll.*)

Ton. Donca vegni con mi.

Bett. Vardè che bel mario!

Giac. Cossa aveu dito?

Bett. Gnente.

Giac. Andè, coreghe drio.
Anz. Povero pampalugo !
Ton. Andemio , o non andemio ?
Giac. (*Se ghe vago , i me burla .*)
Ton. Sior mario , cossa femio ?
Giac. (*E se no vago , è pezo .*)
Ton. Sì ve lezo in tel cuor,
 Ve cognosso ala ciera , che gl' avè del brusor .
 Per causa de ste sporche...
Bett. Oh per diana de dia !
Catt. Coss' è sto strapazzar ?
Anz. Coss' è sta villania ?
Catt. Qua no ghe xe sporchezzi .
Anz. Ela s' hala insporcà ?
Bett. La se vaga a nettar . . .
Giac. Zitto per carità .

SCENA V.

OTTAVIO, e LELIO travestiti da marinari, e detti .

Ott. Cossa xe sto sussuro ? (*affettando il veneziano , e parlando male .*)
Lel. Cossa xe sto fracasso ?
Giac. (*Sior Ottavio , e sior Lelio , sì tolemose spasso .*)
Ott. Questa xe mia muggier . (*accennando Betta .*)
Lel. Questa ghe xe mia sposa . (*accennan. Anz .*)
Ott. Questa xe mia sorella . (*accennando Catte .*)
Lel. De Giacomo morosa .
Ton. (*Me vien suso el mio caldo .*)
Bett. (*Bisogna secundar .*) (*piano a Cat. e Anz .*)
Giac. (*I parla el venezian , ma no i lo sa parlar .*)
Ton. Se una è vostra muggier , l' altra vostra sorela ,
 Dixè , con mio mario cossa gh' intrela quella ?
 (*accennando Catte .*)

Subito andemo via. (*a Giacometto.*)

Ott. Come! El xe maridao?

Lel. E el ghe xe vegnù qua per far l'innamorao?

Ton. Sentiu? (*a Giacometto.*)

Ott. Cossa diseu? (*a Giacometto.*)

Giac. Mi no so cossa dir.

(*Me vien da ghignazzar, no me posso tegnir.*)

Ton. Ridè, sior Giacometto? Ancora me burlè?

Giac. Mi no rido de vu.

Ton. El bel omo, che se'!

Ott. Presto andemo al festin. (*a Betta.*)

Bett. Son qua, caro paron.

Lel. Andemoghe anca nu. (*ad Anzoltta.*)

Anz. Se me volè, ghe son.

Lel. E sta puta con chi ghe xauderala?

Bett. (Oh belo!)

Catte ghe xanderà col so caro fradelo.

Lel. (Parlo ben veneziano?) (*piano a Giacometto.*)

Giac. (In venezian perfetto.) (*piano a Lel.*)

Ott. Che ghe dàga la man la Catte a Giacometto.

Giac. Sentiu? (*a Tonina.*)

Lel. Cossa diseu?

Ton. Chi xe sti papagai?

Ott. Semo do Giudechini, che ghe xe qua arrivaì.

Ton. No, sto vostro parlar nol xe da veneziani;

Me parè do foresti, parè do oltramontani.

Scorverzive chi se', ve prego per favor.

Ott. Mi ghe xe mariner.

Lel. Mi ghe xe pescador.

Ton. Col vostro *mi ghe xe* no me l'avè impiantada.

Mi ghe xe, mi ghe xe... la xe una barouada.

Co le doue civil no se trata cussì,

E ve lo digo in fazza.

Ott. Gh'avè rason, uvì.

Ton. Uvì, sior venezian?

Giac. Mo no vedeu, minchiona,

Che i xe do cari amici, che ve dà la baldona?

Ton. Ben, se i vol minchionar, se i gh'ha sta bela pecca,

Che i vegna a minchionar queie dela Zuecca.

Bett. Come sarave a dir?

Catt. Chi credela che semo?

Bett. Burlar le zuecchine?

Catt. Per diana! no ghe stemo.

Anz. No semo spiritose, come le veneziane,

Ma gnanca no se femo piantar dele panchiane.

Ott. Eh scacciate, signora, codesta gelosia!

Lel. Vi vogliamo guarire di tal maliucouia.

Ton. No la xe la maniera.

Giac. Cossa avemio da far?

Ott. Presto andiamo al festiuo. (a *Tonina*.)

Giac. Presto andemo a balar. (a *Ton*.)

Ton. No voi venir dasseno.

Ott. Oh qui non c'è risposta!

Lel. Ci dovete venire; siamo venuti a posta.

Giac. Mo via, cara muggier.

Ton. Chi ghe sarà a sta festa?

Ott. Gnente di ordini varj; ma tutta gente onesta.

Bett. Ghe saremo anca nu. (con aria grave.)

Catt. Con nu la veguirà.

Ton. Oh co ghe se'vu altre, gh'è il fior de nobiltà!

Anz. Se no semo lustrissime, semo done da ben.

Catt. No me n'importa un bezzo, se con nu no la vien.

Lel. Via veuite, signora.

Ott. Non fate la ritrosa.

Lel. Che volete di più? Vi sarà ancor la sposa.

Ton. Dasseno?

Lel. Senza dubbio.

Ton. Quando la xe cussì,

Co ghe xe la so sposa, posso esserghe anca mi.

Ott. Brava! così mi piace.

- Giac.* Brava muggier! andemo.
 Voi che se devertimo, e voggio che balemo.
Ott. Faccia ogni uno di voi quello che faccio io;
 Date mano a qualcuna. (*dando mano a Betta.*)
Ton. Mi voggio mio mario. (*vuol dar mano a Giac.*)
Ott. Che mario, che mario! Ecco così si fa. (*lascia Bet.*)
 Un bracciere di qua, un altro pet di là. (*Ottavio e Lelio*
prendono in mezzo Tonina e la servono di braccio)
Lel. Non sapete la moda? Io ve l'insegnerò.
Ton. Con un poco de tempo anca mi ne userò. (*parte con*
Lelio e Ottavio.)

SCENA VI.

BETTA, CATTE, ANZOLETTA, e GIACOMETTO.

- Bett.* Le vol far le smorfiose, e po co le ghe xe,
 Le ghe sa star pulito.
Giac. Mi son solo, e vu tre.
 A chi ghe daghio man?
Anz. Cedo el logo ala pòta. (*a Giac.*)
Catt. So camminar mi sola, senza che la me agiuta. (*a Giac.*)
Giac. Voleu vu, siora Betta? (*a Betta.*)
Bett. Che el daga man a ela. (*accennando Catt.*)
Catt. Che el serva la più zovene.
Anz. Che el serva la più bela.
Giac. Via no ve fe pregar. (*a Catte.*)
Catt. Za no andemo lontan. (*ritirando la mano.*)
Anz. Cossa xe ste scamossie? (*a Catte.*)
Bett. Eh lasseve dar man! (*a Catte.*)
Catt. No disè gnente a Toni.
Bett. No, nol lo saverà..
Giac. Andemo, putta bela. (*dando la mano a Catte.*)
Anz. Oh per diaua el xe qua!

SCENA VII.

Toni, e detti.

Toni. Come xela sta istoria?

Bett. Gnente, gnente, Tonin.

Semo anca nu con ela, la menemo al festin.

Toni. Cossa gh'intra sto sior?

Giac. Gli' intro, perchè ghe son.

Anz. Vardè ben che una puta sola no la par bon.

Catt. Toni, mi no voleva.

Toni. No voggio taroccar.

No digo che ala festa no ve voggia menar;

E se una puta sola non ha d'andar cusi,

Senza che altri s'incomoda, la voi compagnar mi.

la prende per mano, e la conduce via.)

Bett. No li lassemo soli.

Anz. Presto, andemoghe drio.

Giac. Donca co ste signore farò l'obbligo mio. *(esibisce*

la mano a tutte e due.)

Bett. Grazie. *(si fa dar braccio.)*

Anz. Accetto el favor. *(si fa dar braccio.)*

Giac. Posso dir, sta lì, e premi,

E arriverà alla festa un coppano a do remi. *(partono.)*

SCENA VIII.

Sala da ballo.

Tutti ballano. Lelio sta vicino a Brigida,

Ottavio fa lo stesso, e tormenta Lelio.

FINE DELL' ATTO QUARTO.

ATTO QUINTO

SCENA PRIMA.

Camera con lumi.

BRIGIDA, e OTTAVIO.

Brig. **F**in che sior Lelio balla ghe vorave parlar.
Ott. Sono con voi, signora.

Brig. Lo prego a perdonar.
 Che el me diga de grazia. Come xelo sto intrigo?
 Falo per mi dasseno, o per burlar l'amigo?
 Credelo che sior Lelio me possa un dì sposar?
 Da tutti sti riziri cossa possio sperar?

Ott. Ora che siamo soli vi parlerò sul sodo.
 L'amigo ha poco spirito, per questo io me lo godo.
 Lelio ha varj fratelli, il primo è maritato;
 Anch'ei vorrebbe moglie, ma non si trova in stato.
 Rovinaria se stesso, la casa, e i suoi parenti;
 Tutti delle sue nozze sarebbero scontenti.
 E la povera donna, che fosse sua consorte,
 Andrebbe ad incontrare una pessima sorte.

Brig. Donca de far ste nozze perchè trattar za un poco?

Ott. Con un, siccome 'è Lelio, posso prendermi gioco.

Brig. El se pol devertir con chi ghe par e piase,
 Che con mi el se diverta, xe' ingiusto, e me despiase.
 Che confidenza gh'alo, caro patron, con mi,
 De scherzar, de vegnirme a minchionar cusì?
 Lo so, che el me cognosse, el saverà chi son;
 E per questo me credelo qualche poca de bon?

Perchè ho cantà in teatro, ho perso el mio concetto?
Nissun no m'ha per questo da perder el rispetto.
El teatro, la scena xe cossa indifferente.
Fa ben chi gh'ha giudizio, fa mal chi xe imprudente.
E non occorre dir quello xe un logo brutto,
Che ghe xe per le mate pericolo per tuto.
Cossa fà de mal quele, che in mezzo a tanti
Riceve su le scene i amici e i dilettanti?
Fa mal quele, che in casa le visite riceve;
E el teatro e la casa confonder no se deve.
Vedo che tante e tante le gh'ha mille favori,
Da dame e cavalieri, da principi e signori;
Vedo che in una corte, a un pubblico servizio,
Se stima anca in teatro le done de giudizio.
Ghe xe del mal per tuto, in ogni profession:
In qualunque esercizio ghe xe el cativo e el bon;
Ma no pol el cativo chi è bon pregiudicar,
E no se pol dai pochi dei molti giudicar.
Ho cantà, m'avè visto, ma me posso vantar,
Che de mi no ha podesto la zente mo'norar.
E pur con tuto questo, savendo el pregiudizio
De sto nostro mistier, ho fato un sacrificio.
Quel pocheto, che aveva me ho contentà magnarme,
Per viver ritirada col fin de maridarne.
Me xè capità uno de meza qualità,
El m'ha dà la parola, e adesso el m'ha impiantà.
Sola qua me retrovo; mia madre no me piase,
Perchè sto mio pensier, lo so che el ghe despiase.
Ho persa un occasion, ghe ne sospiro un'altra,
Vu me burlè credendo che sia femena scaltra.
El desiderio mio creder me fa a l'inganno:
Vu burlè una meschina, e mi ricevo el dano.
Che carità xe questa? che modo de pensar,
Cole povere done vegnir a solazzar?

Se se' un omo d'onor pensè ala mia disgrazia;
 Abbieme compassion, ve lo domando in grazia.
 Soccorremme, gramazza! Quello che mi sospiro,
 Per vivere onorata, xe un consorte o un retiro.
 Lassè lassè stè burle, che al ciel no le ghe piase,
 Consoleme, ve prego, metè el mio cuor in pase.
 Sieme mio buon amigo, sieme mio protetor;
 Questa è la degna impresa de un cavalier d'onor.

Ott. Voi col parlar sincero, voi mi colpiste a segno,
 Che assistervi prometto col più onorato impegno.
 Vi condurrò a Venezia colla mia barca istessa,
 Verrete in casa mia, verrà la madre anch'essa.
 Dove sono alloggiato vi son delle signore,
 Sarete custodita con zelo e con onore.
 Moglie ancor non ho preso, forse la prenderò;
 Non prometto sposarvi, ma non vi dico un no.
 Noi ci conosceremo col praticarci a prova,
 Vedrò, se mi conviene, farò quel che mi giova;
 Ma in qualunque maniera, altrove o nel mio tetto,
 Voi sarete assistita, lo giuro, e lo prometto.

Brig. Pianto per l'allegrezza. (*piangendo*)

Ott. Le lacrime son vane.

Spesso solete piangere voi altre veneziane.

Brig. Nol creda za che sien ste lagrime sforzae;

In verità da seno dal cuor le xe mandae.

Una povera puta...

Ott. Basta così, ho capito.

Vedo che dalla sala il signor Lelio è uscito.

Ritirarvi potete in sala, o in altro loco,

Al mio albergo in Venezia noi anderem fra poco.

E per condurvi in casa con alquanto d'onore,

Verrete con alcuna di codeste signore.

Brig. Mi no voggio balar. In portego no vago.

Anderò in st'altra camera, e fin ch'el vol ghe stago.

Pregherò el ciel de cuor, che de mi nol se penta.
Brigida, povereta! ti sarà pur contenta. (*parte.*)

SCENA II.

OTTAVIO, poi LELIO.

Ott. Il ciel mi ha qui condotto per fare un'opra buona;
Quando di ciò si tratta, affè non si canzona.
Ma vo' col caro Lelio seguir la burla ancora;
Quando di qua si parte, la finiremo allora.

Lel. La contessa dov'è?

Ott. Finora è stata meco.

Lel. Perchè con voi, signore?

Ott. Perchè Cupido è cieco.

Lel. Non capisco.

Ott. Sappiate ch'è il di lei cuor sdegnato,
Perchè con altre donne voi avete ballato.

Lel. Davver? s'ella è gelosa, segno che mi vuol bene.

Ott. Ella è meco venuta ad isfogar sue pene.

In pubblico voleva darvi d'amore un segno;

- Ma io l'ho sconsigliata.

Lel. Siete un uomo d'ingegno.

Ott. Tutti non sanno mica qual siasi il vero affetto.

Lel. Certo avrebbero detto, che lo fa per dispetto.

Ott. Piuttosto, se volete qualche novo attestato

Dell'amor suo, la chiamo.

Lel. No, no, bene obbligato.

Ott. Siete forse pentito?

Lel. L'adoro più che mai;

Ma in materia di questo mi ha favorito assai.

Ott. Quando poi sarà vostra, io credo in verità

Che di queste finenze ne avrete in quantità.

Lel. Quando poi sarà mia... non so che dir, vedremo.

Credo che le finezze noi ce le cambieremo.

Ott. Dite, avete risolto sposar quella signora?

Lel. Se ho risolto mi dite? ma se nou vedo l'ora.

Ott. La conoscete bene?

Lel. So quel che avete detto.

Ott. Se non fosse contessa?

Lel. Come! vi è del sospetto?

Ott. Ella è una cantatrice.

Lel. Affè l'ho conosciuta,

Che sapeva la musica nel batter la battuta.

Ott. Sposereste una donna, che ha esercitato il canto?

Lel. Questo, cosa m'importa? La sposo tant'e tanto.

Ott. Ma il decoro?

Lel. Il decoro... intesi dir così,

Che suol la meraviglia svanir dopo tre dì.

Ott. Bravo! così mi piace. A rivederci, amico.

Lel. Dove andate?

Ott. Ove vado, sinceramente io dico.

Vado dalla contessa, *idest* dalla cantante.

Lel. Che avete a far con lei?

Ott. Oh delle cose tante!

Lel. Nou vorrei che pensaste levarmi ancora questa.

Ott. Questo tristo pensiero non vi cacciate in testa.

Vado a parlar per voi. Vado a disingannarla,

Che voi, perchè è cantante, vogliate abbandonarla.

Anzi, che voi talora avete un bel falsetto,

E che con lei potrete cantar qualche duetto.

Circa al ballo dirò, che se avete ballato,

Vi hanno quelle signore pregato e ripregato.

E al dì lei cuor temendo recar qualche molestia,

Siete stato costretto ballar come una bestia.

Dirò che, il caro Lelio la virtuosa apprezza,

E che venga qui subito a farvi una finezza. (*parte.*)

SCENA III.

LELIO solo.

Maledette finezze! possibile che poi
Non mi faccia di quelle, che piacciono anche a noi!
Sento ancora, meschino, sul viso a mio dispetto,
Le marche generose del suo tenero affetto.
Ma se non è contessa, tanto meglio per me.
Di queste tenerezze più non ne voglio affè.
Quando la virtuosa ad isposar sia giunto,
Se canterà il soprano, io farò il contrappunto. (*parte.*)

SCENA IV.

TONINA, ed ANDRETTA.

Ton. **N**o no, lasseme star.

Andr. La senta una parola.

Ton. Se mio mario no vien, voggio andar via mi sola.

Andr. Mo cossa mai xe stà?

Ton. L'ho visto co mi occhi,

A quella zuecchina el gh'ha urtà in ti zenocchi.

E nol l'ha fato in fallo. Sto mato senza inzegno

Per balar co sta frasca el gh'averà dà un segno.

Andr. Cara siora Tonina, non abbiè zelusia,

Za savè che la festa xe deboto senia.

Anderemo a Venezia. Quel che xe sta, xe sta,

Ma partimo d'accordo in pase, e carità.

SCENA V.

FELIPPO, e detti.

Fel. **G**ran Lunardo, compare! El vol che se fenissa
 Come s'ha prencipià, e che tuti stupissa.
 Quando che andemo via l'ha ordenà una tartana;
 L'ha lavorà in do ore per una settimana.
 Ghe xe dele peote, gondole in quantità,
 Soni, canti e baloni, e luse in quantità.
 Con allegria in Laguna staremo infina di.

Ton. Ma voggio mio mario sentà arente de mi.

Fel. Cossa gh'aveu paura? che i ve ne magna un tocco.

Ton. Eh che no savè guente, povero sior alocco!

Mi so quel che ho passà, cognosso Giacometto,
 E no voggio che el vegna a far de zenocchietto.

SCENA VI.

BETTA, CATTE, ANZOLETTA, TONI, e detti.

Bett. **G**h'ho gusto in verità.

Catt. Anderemo anca noi.

Anz. De sta sorte de spassi no ghe n'ho abuo mai più.

Toni. Arecordate, Betta, che te voi star darente,

No te voi abandonar in mezzo a tanta zente.

S'avemo da sposar, poco ne mancherà;

E avanti de sposarte no voria novità.

Ton. Fè ben, cussì me piase.

Andr. Via, sareu più zelosa?

Ton. El ghe xe tempo ancora avanti che el la sposa.

No ghe xe dele gondole? se s'ha da star fin di,

Voggio star da mia posta, e mio mario con mi.

And. Gl'averè tempo a casa.

Fel. Se' una gran seccatura.

Ua muggier' zelosa? piuttosto in sepoltura.

SCENA VII.

OTTAVIO, BRIGIDA, GIACOMETTO, e detti.

Ott. **T**ato è già preparato.

Giac. Deboto andemo via.

Ton. (Velo qua, cole done sempre el xe in compagnia.)

Vegnì qua, Giacometto.

Giac. Coss'è? Cossa xe stà?

Ton. Fina che andemo via, no ve parti de qua.

Giac. Ligheme ale carpete.

Ton. El so chi se', fradelo!

Giac. Cossa songio, patrona?

Ton. Se' pezo de un putelo.

SCENA ULTIMA.

LELIO, e detti.

Lel. **S**iete qui? da per tutto vi cerco, e non vi trovo.
(a Brigida.)

rig. Da mi cossa vorressi?

Lel. Vi è qualcosa di nuovo?

Ott. Certo, amico carissimo, vi è qualche novità.

Ella ha per maritarsi le sue difficoltà.

Più di cento ragioni mi ha detto in confidenza,

Per cui di maritarsi ha qualche renitenza.

Lel. Quali son questi obbietti?

Ott. Eccoli in due parole.

Principiamo da questo; dice che non vi vuole.

Lel. Bastami questo solo. Più non v' incomodate;
 S' ella ciò mi conferma, vi riverisco, andate.
Brig. Sior sì, ghe lo confermo; no per poco rispetto,
 Ma perchè in tel mio stato un' altra sorte aspetto.
 In te le mie disgrazie el ciel me agiuterà,
 Perchè in te l' assistenza del cielo ho confidà.
 Ma no parlemo più de ste malinconie;
 Andemo, che le barche xe a l' ordine senie,
 Andemo, che i no aspeta, e tuti xe curiosi
 De veder in sta sera el fin dei morbinosi.
 Certo, che nol sarà quello che molti aspeta,
 Come se poderà, se farà qualcoseta.
 Ha dito sior Luuardo che averzì quel porton;
 E a tuti sti signori ghe fèmo ua repeton.
 (*Si apre il tendone, e si vede una tartana illuminata, con peote illuminate, e varie gondole, dove tutti vanno a montare, chi in un lungo, chi nell' altro. Si sentono suoni, sinfonie, e canti, e con questo termina la commedia.*)

FINE DEL TOMO VIGESIMO OTTAVO.

INDICE

<i>Chi la fa l' aspetta</i>	Pag.	3
<i>Sior Todero brontolon</i>	«	119
<i>Le Morbinose</i>	«	195
<i>I Morbinosi</i>	«	277

596563
 SBN



